






M



15

Storck
Logica
Instit.

14
2
B
1
Liber Fidelis
1807
P. 2
IV C 25

42

1

SIGISMUNDI STORCHENAU;

I N

ACADEMIA WINDOBONENSIS

LOGIC. ET METAPH.


PROFESSORIS PUB. ORD.

INSTITUTIONES

L O G I C Æ.

EDITIO QUINTA

AB AUCTORE EMENDATA.



V E N E T I I S,

APUD JOSEPHUM ROSSI FIL. BARTHOL.

M D C C X C I V.

SUPERIORUM PERMISSU, AC PRIVILEGIO.

12. 1. E. 24

Joseph Mass

Joseph Massellian
Superior of the
10

CONSPECTUS

TOTIUS OPERIS.

<i>Prolegomenon in Philosophiam.</i>	Pag. 1
<i>Prolegomenon in Logicam.</i>	47

P A R S I.

De Facultate Cognoscitiva Mentis Humanae.

CAPUT I.	De Ideis, earumque Objectis.	31
CAPUT II.	De Formali Idearum Differen- tia.	33
CAPUT III.	De Materiali Idearum Differen- tia.	36
CAPUT IV.	De Idearum Signis.	67
CAPUT V.	De Vocabulorum Usu, Abusu, ejusque Remediis.	73
CAPUT VI.	De Definitione.	83
CAPUT VII.	De Divisione.	94
CAPUT VIII.	De Judicio.	97
CAPUT XI.	De Enunciatione, & ejusdem Variis Speciebus.	100
CAPUT X.	De Diversis Enunciationum Pro- prietatibus.	104
CAPUT XI.	De Enunciationibus in Metodo Scientifica Usitatis.	111
CAPUT XII.	De Ratiocinatione.	114
CAPUT XIII.	De Argumentatione, & nomi- natum de Syllogismo Sim- plici.	121
CAPUT XIV.	De Syllogismo Composito.	132
CAPUT XV.	De Reliquis Argumentandi Spe- ciebus.	133



P A R S II.

De Veritate Cognoscenda.

CAPUT I.	<i>De Veritate, ac Falsitate in Genere, earumque diversis Speciebus.</i>	142
CAPUT II.	<i>De Veritate Idearum, Judiciorum, ac Ratioe minorum.</i>	146
CAPUT III.	<i>De Indiciis Veritatis, Certitudine, & Evidentia.</i>	157
CAPUT IV.	<i>De Sensu Intimo, & Sensu Naturæ Communi.</i>	167
CAPUT V.	<i>De Testimonio Sensuum Externorum.</i>	182
CAPUT VI.	<i>De Auctoritate.</i>	195

P A R S III.

De Cognitione veritatis.

CAPUT I.	<i>De Scientia, ejusque Diversis Speciebus.</i>	231
CAPUT II.	<i>De Probatione, & Demonstratione.</i>	207
CAPUT III.	<i>De Probabilitate, & Opinione.</i>	219
CAPUT IV.	<i>De Fide.</i>	239
CAPUT V.	<i>De Interpretatione, & Lectione Librorum.</i>	255
CAPUT VI.	<i>De Ignorantia, ejusque Causis.</i>	266
CAPUT VII.	<i>De Errore, ejusque Fontibus.</i>	273
CAPUT VIII.	<i>De Concertatione Litteraria.</i>	292



PROLEGOMENON

I N

PHILOSOPHIA



§. I.



Philosophiam sapientiæ studium ; Quid Philosophia ?
sapientiam vero ex mente veterum rerum divinarum, & humanarum, causarumque, quibus hæ res continentur, scientiam esse ex De off. 1. 2. c. 2.

Tullio novimus. Veteres igitur ad philosophiam retulerunt omnia ea, quæ sive de Deo, sive de spiritibus, sive de mundo corporeo & rationis ducta, & sensuum experientia cognosci possunt : quæ opinio a veritate profecto aliena non est ; etsi, qui hodie obtinuit mos, eidem haud suffragetur. Nostro nimirum hoc tempore naturales scientias ob amplissima, quibus jam auctæ sunt, incrementa ita partimur, ut sub philosophiæ ambitu duntaxat logica, metaphysica, mathesis, physica, atque ethica contineantur, reliquis in diversas iterum classes distributis. Origo nominis si quæritur, ea modesto Pythagoræ responso debetur, „ omnes enim, qui in rerum contemplatione

Cic 99. Tusc 1. 5. c. 3.

„ studia ponebant, sapientes σοφοί & habe-
 „ bantur, & nominabantur, idque eorum no-
 „ men usque ad Pythagoræ manavit ætatem;
 „ quem, ut scribit auditor Platonis Ponticus
 „ Heraclitus, vir doctus imprimis, Phliuntem
 „ ferunt venisse, eumque cum Leonte Prin-
 „ cipe Phliasiorum docte & copiose disse-
 „ ruisse quædam: cuius ingenium, & elo-
 „ quentiam cum admiratus esset Leon, quæ-
 „ sivisse ex eo, qua maxime arte consideret;
 „ at illum: artem quidem se scire nullam,
 „ sed esse φιλοσοφίαν. “ Scientia porro ipsa
 varias omnino ab orbe condito vicissitudines
 experta est, ut enim certum est eam in pri-
 mo generis humani parente fuisse cumulatam
 admodum atque perfectam, cum ipse eum
 Auctor supremus insigni exornaverit sapien-
 tia, ut Ecclesiasticus testatum fecit: ita du-
 bitari vix potest, eam labente tempore, &
 suscrescentibus inter homines vitiis ita con-
 cidisse, ut paucissimi numerarentur, quia ad
 eam aut condiscendam, aut excolendam ope-
 ram conferrent aliquam.

C. 17.
 1. 6.

Quæphi-
 losophia
 Chal-
 dæorum?

II. Non ita tamen pulcherrimum hocce sa-
 pientię studium ex orbe exsulavit, ut non
 quavis ætate diversis in nationibus fuerint
 nonnulli, qui eruditionis magis conspicuæ
 famam adepti fuissent. Ut de antiquis He-
 bræorum Patriarchis taceam, prima omnium
 gentium, in qua philosophicæ disciplinæ sen-
 sump efflorescere cæperunt, quantum quidem
 ex veterum monumentis colligi potest, fuit
 Chaldaea Babyloniz pars, cuius incolæ Chas-
 dii, seu Chusdini a Chuso Chami filio com-
 pellati fuerunt; etsi enim Egyptii hanc sibi
 gloriam olim vindicare conabantur, conten-
 dentes, Chaldæos ex colonia Egyptiaca pro-
 genitos esse, inter eruditos tamen, ut vult
 Stanlejus, iam fere certum est, Persarum
 Magos, qui omnem suam eruditionem a Chal-
 dæis

daïs mutuati sunt, ipsis Egyptiis longe antiquiores esse, neque alia fuit ipsius Tullii mens Chaldaeos antiquissimum doctorum genus compellantis. Viri præ reliquis inter Chaldaeos celebres fuerunt Zoroaster, qui ex mente S. Epiphanii Nimrodi ætate floruit. Belus rex auctor, ut fertur, astronomiæ circa annum mundi 2682. cujus inanibus a superstizioso populo in Deorum numerum relatis Semiramis ejus filia templum media in Babylone extruxit, quod non minus ab arte, & splendore inclaruit, quam ex eo, quod suprema ejusdem pars Chaldaïs, Magisque apertissimum ad contemplandos siderum cursus præberet locum: Berosus denique, qui ab historia, quam, Ptolomæo Philadelpho imperium tenente, in lucem emisit, illustre sibi nomen comparavit, quique prius Chaldaïcas disciplinas in Græciam intulit, statua propterea auro obducta ab Atheniensibus honoratus, ut Plinius refert. Præcipuus Chaldaeorum in excolenda astronomia erat labor, quæ tamen brevi in astrologiam, aliasque turpissimas superstitiones degeneravit, unde factum est, ut omnem fere eruditionem suam ad vanas divinationes, somniorum interpretationes, artesque magicas referrent. Hujus porro eruditionis partes in diversas familias erant distributæ (nec dum enim publice docendi mos obtinuerat), atque ipsum familiæ caput in id curam intendit, ut scientia sua ad nepotes, ac posteros propagaretur, atque augeretur etiam. Quæ ejusmodi erant familiæ, propriam sibi in provincia sedem deligebant, immunitateque a publicis oneribus ac vectigalibus gaudebant.

De divin. l. 1.

l. 7. 6. 37.

III. Philosophia Chaldaeorum per finitimam brevi Arabiam, Persiamque propagata est; in hac rursum Zoroaster quidam (nomen hoc viris magna eruditione conspicuis videtur id

Quæ Per satum?

Quæ
Arabum?

temporis fuisse commune.) memorandus est, qui religionem meliorem in formam redigendo, ac populares suos erudiendo effecit, ut major litteris honos haberetur, quarum deinde cultores usitato inter Persas nomine Magi appellati sunt: tum Hystaspes, & Ostranes, qui Persicas scientias in Græciam primus invexit. In Arabia, ea præcipue, quæ Sabæa dicitur, parte quis prior litteris operam dederit, inter eruditos adhuc disceptatur; complures tamen fuisse scientiæ naturalis, & astronomiæ peritos vel ex Jobi, amicorumque disputationibus patet.

Quæ In-
dorum?

IV. Sed neque aliis tum quidem notis gentibus viri a doctrina illustres defuerunt: celebratur in India Budas cum Gymnosophistis; in Sinis Fohi gentis conditor; tum Confusius; in Malabarica Bramines; in Mauritania Alta; in Britannia, Gallia, Germania Druidæ; in Thracia Orpheus, & Zamolxis; in Scythia Anacharsis, qui ipsis Græciæ sapientibus adnumeratus est. In Phœnicia Pherecydes Pythagoræ magister; Mochus, vel Moschus, aut etiam Ochus doctrinæ de atomis, ut Strabo opinatur, auctor; Sanchoniaton Berytius, qui ante Trojana tempora floruisse fertur; Cadmus denique dux Coloniæ in Græciam deduxit, ex qua subinde celeberrimus ille inter Græcos philosophus Thales Milesius ortus est. Horum sapientium studio, tum & characterum, ac nauticæ inven-

(a) L. 2. tione Phœnicæ gentis gloria plurimum cre-
(b) - vit, illam Lucianus (a) eidem attribuit: hanc
Comp. & Rapius (b): „astronomiam primum a Phœ-
Plat. Arist. nicibus navigationi fuisse accommodatam,
Quæ E. „stellamque polarem viæ ducem delectam,
gyptio- „quod omnes deinceps gentes adoptarunt.“
rum? Prætereunda non est hoc loco Ægyptus, ma-
Macrob. form.
Scrip. 1. ter artium nuncupata, in qua derivatæ ex
1. c. 15. Phœnicia liberales artes ac mathematicæ di-
sci.

sciplinæ maxima obtinuerunt incrementa; ac geometria quidem cumprimis, cuius excolendæ necessitatem propemodum Ægyptiis imposuerunt annuæ Nili exundationes, & quæ inde consecutæ sunt, limitum, agrorumque confusiones. Præcipuum philosophiæ Ægyptiacæ lumen fuit Athotis, sive Hermes, vel Mercurius, qui populares suos geometriam, astrologiam, ac theologiam docuisse fertur: ejus doctrinam in Sacerdotibus, Prophetis, & Magis aliquandiu conservatam, demum vero collapsam restituit Si-phoad, alter Mercurius dictus, qui Trismegistii quoque cognomentum tulit. Moyses ipse Hebræi populi dux, curante Pharaonis filia, eruditus est omni sapientia Ægyptiorum, quæ ab ipso in subjectum sibi populum facili negotio promanavit, quamque aliquo post tempore Salomon rex divino munere inter mortales sapientissimus mirum in modum provexit.

vii.
Lenglet.
Meth.
pour e-
tud. p
hist. t. 2.
p. 39. &
55. Att.
c. 7. v. 22

V. Nascentem fere tantum adhuc spectavimus philosophiam; adolescentem jam, ac latius in dies se se in Græcia explicantem consideremus. Occurrunt primum hic illi, qui ob insignis eruditionis famam, communi quasi suffragio, specioso Sapientium titulo condecorati sunt, quod anno tertio Olymp. 497æ, qui est annus ante Servatorem 580. contigisse Laertius cum Plutarcho testatur. Septem, quibus id honoris obigit, exstiterunt: Thales Milesius, Solon Atheniensis, Chilon Lacædemonius, Pittacus Mitylenæus, Bias Priæ-næus, Cleobulus Lydius, & Periander Co-rinthiorum tyrannus; verum postremi duo non merito, sed astu, ac vi etiam aperta, deco-ram hanc nomenclationem sibi arrogarunt, ac deinceps usurparunt, convocatis ad se reliquis, nec resistere tum quidem ausis, qui tra-men, ubi libertati pristinae sunt restituti.

Quæ
Græco-
rum?

Qui in
iis sa-
pientes?

pollini Delphico litteram, (quæ Græcis quinquarium indicat) dicarunt, hoc facto contestati in suo sapientium ordine non contineri, nisi quinque. Nonnulli his præterea adiciunt Anacharsin Scytharum regis fratrem, Mysosnem Chenzum, Epimenidem Cretensem, ac Pherecydem ex Cycladum insula Syro oriundum. Porro sapientes hi politicam potissimum philosophiæ partem excoluerunt, condendis nempe sapientissimis legibus, stabiliendis rebus publicis, & informandis hominum moribus unice intenti; solus Thales ad geometriam quoque, in qua complura theorematum invenit; astronomiam, in qua eclipsum causam, ac modum eas præsagiendi detexit, & denum ad naturam corporum perscrutandam animum convertit, aliosque instituere cœpit: quo suo conatu id effecit, ut ingens philosophandi amor, disputandique de rebus obscuris fervor in popularibus suis accenderetur. Atque inde factum est, ut novelli hi philosophi pro diversis, quas tuebantur, sententiis in diversas quoque partes abirent, ac varias sectas (collectionem hominum uni magistro adherentium intelligo) constituerent, quæ jam breviter referendæ sunt.

Quæ se-
ctarum
origo?

Quæ di-
visio?

VI. Celebriores Græcorum philosophorum sectæ ad duas, ex quibus veluti fontibus reliquæ profluxerunt, præunte Laertio referri possunt. Prima harum est Ionica, quæ Thalesem; altera Italica, quæ Pythagoram fundatorem veneratur.

Quis
Thales?
Herod.
Clius p.
43.

VII. Thales Mileto Joniæ urbe oriundus, postquam ob ingentem doctrinæ famam, quam sibi diuturna per Asiam, Phœniciam, Ægyptum, & Grætam peregrinatione, & arctiori cum eorundem locorum eruditissimis, ac præcipue sacerdotibus consuetudine comparavit, sapientis, ut dictum est, compellationem obtinuit anno ætatis suæ 59, ludum aperuit,

hau-

haustamque scientiam cum altis communicare aggressus est. Orta inde secta, quæ Ionice nomen tulit. Inter discipulos præ reliquis eminuit Anaximander Mileti quoque natus, qui eidem demortuo in regenda schola successit, ejusque doctrinam, licet in Physicis non nihil immutatam propagavit. Anaximandrum excepit Anaximenes; hunc Anaxagoras Clazomenius *ἡρώδοτος* subinde a Lucretio decantatæ auctor; clarus is erat genere, & opibus; at earundem contemptu multo clarior, agros enim, & patrimonium reliquit, discendi, quærendique causa, divinæ oblationi toto se animo ut dederet. hunc denique Archelaus *Physicus* dictus, quod primus Physicam ex Jonia Athenas invexerit. In hoc Ionica secta, ac naturalis simul philosophia desiit.

VIII. Socrates enim ejus discipulus, ac successor neglecta physica totum se ad moralem doctrinam expoliendam, ac in ordinem redigendam applicuit. Primus a rebus occultis, & ab ipsa natura involutis, in quibus omnes ante cum philosophi occupati fuerunt, avocavit philosophiam, & ad vitam communem adduxit, ut de virtutibus, & vitiis, omninoque de bonis rebus, & malis quæreretur, præclarissima prorsus præcepta statuens hominibus, vel secundum se, vel ut patrifamilias, vel ut membro republicæ spectato observanda; atque hac ratione novam sectam a se socraticam appellatam instituit. Erat porro Socrates omnium eruditissimus testimonio, totiusque Græciæ judicio, cum prudentia, & acumine, & veritate, & subtilitate, tum eloquio, tum varietate, te, copia, quam se ex parte de disset, omnium facile princeps. Singularem in docendo æque ac disputando tenebat methodum, quærens multa, asserens pauca;

Quæ se-
de Jona-
ca?

Cic. 99.
ac. l. 9.

Cic. 99.
tuse l. 5.

Cic. l. 2.

Quis So-
crates.

Cic. 99.
ac. l. 5.

ejusque
secta?

Cic. de
orat. l. 3.

phon, Xenaphon, Æschynes, Simonias, Simon, Cebes, Glauco, & Terpsion doctrinam ejus amplexi, nulli, ceteroquin sectæ se addixerunt; alii præceptis morum egregie ab eo imbuti alia deinceps in republica munia susceperunt, quales fuerunt Critias, Alcibiades, Pericles orator apud Athenienses celeberrimus; alii denique diversa ex defuncti magistri disciplinâ apprehendentes capita in dissentientes inter se familias abierunt, novasque sectas constituerunt. Sed & sectarum irerum diversa fuit ratio, aliæ exiguo viguerunt tempore, vel „ reliquarum vi, & disparationibus fractæ, & extinctæ “ vel quod in obscuris orbis partibus plantatæ ætatem ferre non potuerunt, quales erant Cyrenæica, Megarica, Eliaca, & Eretrica; aliæ inflorentissima totius Græciæ urbe Athenis fundatæ longissimo temporis spatio perduraverunt: erant hæ Academica, ex qua subinde peripatetica exorta est; & Cynica, ex qua labente tempore stoica prodixit. Hæc primum; hæc postea referemus.

X. Aristippus sublato e vivis Socrate Cyrenæi Africæ, quæ ipsi patria erat, se contulit, ibique doctrinam magistri sui male intellectionem propagare nitens sectam erexit, quæ a loco quidem Cyrenæica, a doctrinâ vero Hedonica ab *idem* dicta est: sublato enim omni bonum inter ac malum discrimine finem hominis, perfectamque felicitatem in sola voluptate sitam esse docuit, atque fevdissimam hanc doctrinam luxuriosa etiam vivendi ratione, quæ a Socratis præceptis protus deflexit, egregie comprobavit. Successorem habuit Aristippum ex filia Arete nepotem, qui a teneris annis ab ipsâ sua parente institutus inter discipulos suos numeravit Theodorum quempiam, a quo nonnulli sectam Theodorianam derivant. Erat vero Theodorus

Quæ in
de novæ
sectæ
Cic. de
orat. l.
3. c. 17.

Quæ Cy-
renæica ?

Quæ
Theod-
ria ?

ho-

homo impius, Deorum contemtor, & acerrimus existentiae Numinis impugnator, ἄθεος propterea cognomento dictus. Resipuisse tamen morientem, ac superis iitosa etiam ligamenta sibi applicari voluisse ajunt. Theodoro Antipater, huc Epitimidēs, tum Paræbata, ac tandem Hegesias cum Anniceride successerunt: duo hi postremi, cum nonnulla de propriis adderent, novas sectas Hegesiacam, & Annicerianam paullo post iterum interituras condiderunt.

Quæ Hegesiaca, & Anniceriana?

Quæ Megarica?

XI. Euclides Megaris ortus (alius ab eo, qui post 95. annos in geometria excelluit) audito Athenis Socrate, cum disputationum litigiosarum plus æquo amans esset, novam in patria sectam constituit, quæ primum a loco Megarica, tum ab indole contentiosa Eristica, & demum Dialectica audit, quod questionibus, ac responsionibus eorum discursus absolverentur. Philosophicæ eruditionis tanto ferebatur desiderio, ut cum sub pœna capitis sancitum fuisset, ne quis Megarensium civium pedem Athenas inferret, ipse habitu muliebri, quo facilius lateret, tectus, singulis noctibus 1020. passibus confectis ad Socratem itaret. Successores in schola nactus est Eubulidem Soritis inventorem, qui Demosthenem instruxisse, & pronunciationem ὀρθῶς docuisse fertur: Aleximum, Euphantum, Apollonium Cronum, Diodorum, Ichtyam, Clinomachum, & Stilponem egregios sophistas, & famulos disputatores. Stilpo tamen inventionē etiam, ac eloquentia excelluit, dictus propterea a Cicerone „ homo acutus, & „ probus. “

Cic. de div. 1.2.

De fat.

Quæ Eliaca, & Eretria?

XII. Phædo Eliensis Socratis primum auditor, eique præ reliquis carus scholam demum in patria aperuit, quæ inde Eliaca; postea vero a Menedemo Eretriensi, qui secundus ab ipso (Plistanus epim intercesserat) eandem

dem rexit; Eretrica dicta est, Menedemum excepit Asclepiades, quocum hæc secta interit. Jam ad alteram divisionis (§. 9.) propositæ partem transeamus.

XIII. Academica secta, quæ præ reliquis Qua, & magnam nominis celebritatem consecuta est, quatuorplex Academia. nomen tulit a loco quopiam nemoroso in suburbio Athenarum sito, qui a possessore suo Hecademio primum Hecademia, tum vero Academia dictus est. Longissimo cum floreret tempore hæc schola, fieri non potuit, ut non quædam in doctrinam mutationes sæpius irrepererent; orta hinc Academiae partitio in veterem, mediam, ac novam, quibus aliqui quartam etiam, & quintam addunt.

XIV. Vetus Academia auctorem habet Platonem Athenis anno primo Olymp. 88^{ve}, 1^{ma} Junii secundum rationes a Stanlejo subductas, Quæ Academia vetus? Quis Platon? ante Christum 426^{to} prognatum. „ Divinus hic philosophus, & philosophorum Deus,“ ut illum Cicero frequentius appellat, octo primum annis, cum ætatis vigesimum attigisset, Socratis convictu usus est, haustaque ab ore magistri præcepta litteris consignavit, quamvis multa quoque de suo addiderit: eo vero vita functo primum quidem Megaras ad Euclidem, tum ad dispersos per Italiam Pythagoræos, Cyrenas ad Theodorum Mathematicum, Tarentum ad Eurytum, & Archytam, & denique in Ægyptum ad sacerdotes profectus est; iturus etiam ad Indos, & Persarum Magos, nisi bella Asiatica obstitissent, quæ in peregrinatione in physicis præcipue, & geometricis plurimum profecit; nec vana est suspicio, eum in Moysis libros incidisse, multaque inde in suam philosophiam transtulisse: ut videre est apud Eusebium (a), Iosephum (b), & Clementem Alex. quo referente Numenius philosophus dicere consuevit: „ quid est Plato, nisi Moyses atticis sans? (a) Prep. ev. 1. 2. (b) Can. tra A. p. 1. 2.

„sans ?“ Redux tandem Athenas in Academia docere aggressus est, sicque sectam Academicam instituit, dogmata Heracliteorum, Pythagoræorum, & Socraticorum commiscendo, illos in *sensibilibus*: hos in *intelligibilibus*: postremos denique in *politics*, & *moralibus* secutus. Discipulos & copiosos admodum, & præclaros nactus est, Speusippum ex sorore nepotem, Xenocratem Chalcedonium, Aristotelem, Dionem Syracusanum, Demosthenem, & Isocratem Oratores, aliosque complures, quos tamen geometriæ præceptis jam antea imbutos voluit; quod, ut omnibus notum fieret, scholæ foribus inscripsit: *ἀγεγενημένος γεωμετρίας ἵστω*, nemo geometriæ expertus huc intrer. Placita sua, quorum generale quasi compendium nobis Tullius reliquit, in dialogos 56. digessit, quibus vel Socratis, vel alterius philosophi celebrioris nomen præfixit: in eo, qui Phædo inscribitur, animæ humanæ immortalitas tanta verborum copia, & argumentorum pondere demonstratur, ut cum illum quondam publice legeret, ingens in auditoribus commotio secuta fuerit; Cicero addit Cleombrotum Ambraciorum ex eorum numero mortalis vitæ tadio correptum se se ex muro præalto in mare præcipitasse. Platone anno ætatis 80mo completo, ipsoque natalis sui die defuncto, scholæ in Academia ordines præfuerunt Speusippus, Xenocrates, Polemo, Crantor, Crates, qui omnes cum doctrinam magistri sui illibatam conservarent, id effecerunt, ut Academia vetus haud mutata persisteret, quæ ipso Ciceronis iudicio *Dogmaticis* (ii intelliguntur, qui se in pluribus veritatem assecutos esse asseverant,) accensenda est, cum ea, quæ intellectu percipiuntur, scientia vera teneri posse docuerit.

XV. At vero Arcesilaus, seu ut passim Cicero, Arcesilas, qui Crateri in regenda scho-

la

Q. a.
c. d. 1.
6. 8.

Laert. 1.
3.

Tusc. 1.
1. c. 34.

Acad. 1.
1. c. 8.

Quæ A.
cademia
m. d. a?

ta successit, doctrinæ formam immutando Academiæ mediam inchoavit. Quid eam novandi occasionem præbuerit, refert S. Augustinus. Zeno Stoicorum caput, Polemonis quondam auditor, & in doctrina Platonica enutritus secessionem fecerat, multaque in deteriorem sensum detorta docuerat: quam novam doctrinam latissime disseminari cum adverteret Arcesilaus, prudenti quadam œconomia usus Academiæ placita dissimulare constituit, ne Platonis mysteria publicata, vulgique notitiæ exposita vilescerent; eam in rem occultis Platonis dogmatis, & cum iis solum, qui in Academia consenescere decreverant, communicatis, impugnando aliorum, & præcipue Zenonis sententias, voluit potius dedocere male doctos, quam docere eos, quos dociles non arbitrabatur, „negans esse quidquam, quod „sciri possit: ne illud quidem, quod Socrates sibi reliquisset, se nihil scire.“ Inde intulit, nihil omnino affirmandum esse, neque in tanta rerum ἀνταρδιᾷ, seu incomprehensibilitate aliud sapienti relinqui; atque ἐποχὴν id est assensus, ac iudicii retentionem: dictus propterea cum suis asseclis *Acatalepticus*, seu *Ephecticus*. Arcesilaum secuti sunt Lacydes, Evander, & Egésinus in quo Academia media expravit.

XVI. Carneades siquidem, qui secundum eam scholæ curam suscepit, Novam instituit, asserendo eam *incomprehensibilitatem* non rebus ipsis, aut earum natura contineri, sed esse in iis omnino aliquid, quod verum sit, aut falsum: apparere tamen falsa ita finitima veris, ut ea inter se sine erroris periculo discerni prorsus nequeant. Aiebat proinde, nihil omnino esse, quod percipi possit, ne hanc quidem enunciationem: „nihil est, quod „percipi valeat: Verum ut ut fuerit acerrimus ἱπποχῆς Academicæ defensor, indulsit

Z. com-
tra A-
cad.

Quæ A-
cademia
nova?
Cic. 99.
acad. l.
5-

nam, ut sapiens quandoque assensum præstet iis, quæ non percipit, id est, ut opinetur; modo simul se opinari advertat, quandoquidem multa verisimilia sint. Carneadem excepit Clitomachus; hunc Philo, qui cum bello Mithridatico Romanus venisset, sermonum excellentia, & morum suavitatem magnam sui apud omnes admirationem excitavit, ipsumque Ciceronem in discipulis numeravit. Philoni successit Antiochus Ascalonita, qui „evidentiæ, ac sensuum causam susci-
De nat. Deor. 1. 1. a. 3. piens, “ ut ait Lipsius, ad Stoicos defecit, *Manud. ad Stoic. philos. 1. 2. diff. 3.* atque in media Academia Stoicam philosophiam professus est: at denique ubi consequitur, ad veterem Academiam rediit; cuius rei testem habemus Tullium, qui eum quodque a se Athenis auditum esse, licet novam ejus doctrinam quam maxime improbareret, refert.

XVII. Hæc de secta Academica, quæ cum vel maxime ad summam nominis sui celebritatem contenderet, efficere non potuit, ut non ex proprio gremio alia, sibi quæ adversa enascere, quo tantus gloriæ splendor non parum obumbrabatur. Platonis videlicet discipuli post magistri sui mortem in duas abierunt partes; una remansit in Academia, altera, duce Aristotele Lyceum (locum in Athenarum suburbio situm, atque a Pericle ad exercitationes militares conditum) magistratum non invito occupavit, novæque sectæ initium fecit, quæ a ~~peripatetico~~ Peripatetica appellata est, eo quod auditores cum magistro suo obambulando philosophari consueverint.

XVIII. Natus erat Aristoteles Stagyræ in Thracia, anno primo Olymp. 99th, qui est ante Christum 384^{us}, patre Nicomacho celebri medico, annorum cum esset 17, liberalibusque artibus jam egregie excultus, Athenas

nas se contulit philosophiæ addiscendæ caus-
sa; inde Platone prius per 20. annos audito,
cui ob ingenii, ac industriæ excellentiam ita
se commendavit, ut ab eo *mens, anima* suæ
scholæ vocaretur, in Macedoniam ab rege
Philippo evocatus, filioque ejus Alexandro
magister datus est. Munere hoc per 8. an-
nos ita præclare functus est Aristoteles, ut
omnibus, ac præcipue ipsi Alexandro quam
maxime probaretur, qui dicere deinceps so-
lebat: „ se a patre, ut viveret: ab Aristote-
„ le, ut bene viveret, habere “. Ex Mace-
donia Athenas ubi rediit, Xenoerate in Aca-
demia præidente, ipse in Lycæo novam scho-
lam instituit, eamque 13. annorum spatio non
sine magna sapientiæ fama gubernavit. At de-
nique inimicorum calumniis appetitus, diver-
sorumque criminum, & præcipue impietatis,
quodque opiniones Atheniensium sacris con-
trarias foveret, postulatus, clam Chalcidem
profugit, ibique fatis cessit annum agens.
63tium designato prius, cum instarent disci-
puli, Theophrasto, qui & librorum ab ipso
exaratorum hæres, & in regenda scola succes-
sor foret: hunc ordine insecuti sunt Strato ob
præclaram in physicis eruditionem *Physicus*
dictus; Lyco, Aristo, Critolans, ac denique
Diodorus; omnes tamen cum ducis sui libris,
qui a Theophrasti morte testamento ad Ne-
leum pervenerunt, destituerentur, ejus men-
tem in suis prælectionibus parum feliciter as-
secuti sunt.

XIX. Conscripsit vero Aristoteles ingentem
librorum copiam, si fides habenda est Laer-
tio prolixum eorum catalogum texenti, in
quibus omnes philosophiæ partes complexus
est: novisque inventis illustravit: in logica
syllogismos, eorumque figuras, ac modos pri-
mus pertractavit: in excolenda physica na-
tus est adiutorem longe nobilissimum, ipsum

Qui ejus
libri?

videlicet Alexandrum M. qui ei collecta magnis sumptibus omnis generis animalia submit-
sit, quo eorum naturas, ac proprietates per-
scrutaretur. Neleus porro Aristotelicos libros
secum Scepsin in patriam deportavit, mo-
riensque heredibus suis reliquit. Magna hi-
cura eos asservarunt, ita plane, ut timore
Attalicorum regum Pergami bibliothecam
instruentium eos subterranea in specu abscon-
derent, quo factum est, ut magnam partem
ab aere, vermibusque corroderentur. Eruti
tandem post 130. circiter annos venditi sunt
Teio Appelliconi, qui lacunas infelici soler-
tia sarcians, ut corruptissimi evaderent, ef-
fecit. Sed non unicum id erat, quod Aristo-
teles in suis scriptis acceperit vulnus; alterum
intulit Romæ Tyrannio Grammaticus; ubi
enim Sylia occupatis Athenis hos cum aliis
quam plurimis libris Romam deferri curasset,
Tyrannio Aristotelis studiosissimus usu eorum
obrento reliqua, quæ adhuc deerant, ex pro-
priis supplevit, eoque per homines satis im-
peritos describi curans id obtinuit, ut ab
exemplari suo quam maxime abscederent.
Maculatos denique hac ratione Aristotelicos
libros Andronicus Rhodius, qui eos a Tyran-
nionem acceperat, primus publicavit, digestis
antea in ordinem iis, quæ ad logicam, ethi-
cam, & physicam spectabant; cum vero re-
starent nonnulla, quæ, quod de ente in gene-
re agebant, ad nullam harum classium referri
posse videbantur, ea physicæ subjiciens *μὲν
τα φυσικὰ* inseripsit. Atque inde *metaphysica*
nomen sortum traxit, quod subinde ab Ale-
xandro Aphrodisæo primum usurpatum, Ari-
stoteli vero prorsus incognitum fuit; is enim
hanc philosophiæ partem, jam philosophiam
primam, jam sapientiam, jam theologiam ap-
pellare consueverat.

Quæ sc.
da Cynh-
ca.

XX. Ad Socratem tantisper redeamus :
erat

erat in ejus discipulorum numero Antistenes Atheniensis, cui præ reliquis magistri sui sermonibus ii arridebant, qui præclara de tolerantia, laboribusque, ac ærumnis fortiter perferendis monita suppeditabant: hæc ipsi occasio fuit, ut mortuo Socrate a reliquis secederet, novæque sectæ initium daret; Cynosargen locum non procul a portis civitatis dissitum, quo novam doctrinam excepturi convenirent, selegit. Ejus vero nominis origo hac est: Didymo Atheniensis domi suæ sacris operanti candidus canis victimam rapuit, eamque eo in loco deposuit; consultur hac super re Oraculum; respondet Pythia, templum Herculi sacrum ibidem extrui oportere, quod ubi erectum fuit, *Cynosargis* nomen tulit, quasi dicas: *τῷ κυνὸς ἀργύρου candidi canis templum*. Inde vero etiam Antisteni, ejusque sectatoribus Cynicorum nomen hæsit, canesque dicti sunt ab iis potissimum, qui eorum institutum non probabant; quamquam etiam canino vivendi genere, & acerbitate illa, qua hominum vitia publice perstringebant, hanc nomenclationem optime promeriti fuerint. Præcipuum ipsi doctrinæ caput erat, virtutem solam ad felicitatem sufficere: hoc nixus principio rejeclis omnibus artibus liberalibus, ipsaque adeo dialectica, ac physica ad solam ethicam animum appulit, in qua excolenda omnem modum prætergressus est. Neque vero externa vivendi ratio a doctrinæ severitate ablusit; abjecta siquidem tunica, sordido solum palliolo amictus, baculo item ac pera armatus, & promissa barba incessit, vitam agens omnino tenuem, ac pauperem, divitiasque, honores, ac dignitates velut mera vitiorum tegumenta abominatus, id quod omnibus deinceps ipsius asseclis in consuetudinem abiit. Antistenem secutus est Diogenes Sinopensis, qui præclare

Quis Antistenes?

Quis Diogenes?

re adeo Cynismum condidit, ut etiam magistrum superaret; cubili cum destitueretur, in dolio habitare cepit, sorte sua contentissimus, atque invidium in adversis quibuscunque præ se ferens animum: quo magnam sui apud omnes, & cum primis Alexandrum M. admirationem excitavit, qui eo conspecto dixisse fertur: „vellem Diogenes esse, nisi essem Alexander.“ Diogenem excepit Monimus, hunc Onesicritus: hunc Crates Thebanus nobili ortus genere, qui ducentis talentis, quæ ex vendito patrimonio acquisierat, inter cives distributis, addito hoc celebri effato: „Crates Cratetem liberat pecuniis nolens.“ Cratetem haberi ab istis, quæ tenet: „totum se Cynicæ Philosophiæ dedit, nactus discipulum, ac successorem Metroclem. Huic successerunt Menippus, & Menedemus, quorum ultimus eo venit dementiæ, ut habitu furiarum assumpto circumiret clamitans: se speculatorem ab inferis adesse, ut delinquentes observet, quæque perperam acta viderit, reddere iisdem nuntiaret. In hoc Cynicorum successio defecit.

Quis Zeno
no Citti-
cus?

XXI. Zeno enim Citticus, cum verecundior esset, quam ut Cynicam impudentiam animo inducere, complura doctrinæ capita, ac sordidum illud vivendi genus haud parum immutavit, novamque sectam conflavit. Relicto, quem aliquandiu sequebatur, Cratere Gynico; Stilponem Megaricum decennio integro audivit: ab hoc Xenocratem Platonicum addit; tum a Diodoro Crono in dialecticis instructus, demum Polemonis prælectiones excepit. Collectam diuturno labore eruditionem communicaturus *παιδαγωγὸν* (propterea variam ita a Polygnoti picturis compellatam elegit, ibique scholam, cuius 38. annis præfuit, aperuit, concurrente ingenti auditorum numero, qui primum a capite

pite suo Zenonii, tum a loco Stoici dicti
 sunt. Erat Zeno vie singulari continentia
 (unde natum illud: *Zenone continentior*) mo- <sup>Quæ se-
cta Stoic-
ca?</sup>
 rum severitate, mira in alios facilitate, glo-
 ria, & ostentationis contemptu insignis: præ-
 ter ethicam, quam Cynicorum more impri-
 mis excoluit, logicam quoque in qua multa
 de suo addidit, & naturalem philosophiam
 pertraxit. Præcipuum ipsi in moralibus
 dogma: virtutem propter se ipsam expeten-
 dam esse, atque in ea sola veram hominis
 felicitatem consistere, quod omnibus subinde
 ejus successoribus placuit, etsi ceteroquin in
 quam plurimis inter se dissiderent: constat
 enim opinionum dissidium sectæ huic præ re-
 liquis proprium, ac familiare fuisse. Zenoni
 successit Cleantes vir insignis tolerantia,
 cum enim mediis ad vitæ usum necessariis
 destitueretur, noctu hauriendæ in hortis a-
 quæ, aliisque duris laboribus operam dedit,
 ut comparato sibi victu interdum philosophia
 vacare liceret. Cleantem secutus est Chry-
 sippus quam singulari ingenio, & mentis
 acumine pollens, atque in dialecticis supra
 modum versatus, tam sui plenus, aliosque
 omnes præ se superbe despiciens: multa pro-
 pretea in antecessorum placitis innovavit, ac
 de suo addidit, conscriptis magno numero
 voluminibus, „ ut nihil sit a Chrysippo præ-
 „ terminatum in Stoicis. “ (a) Chrysippum
 ordine exceperunt Zeno Tarsensis, Diogenes
 Seleucensis, „ magnus, & gravis Stoicus
 „ (b) Antipater Sidonius, „ acutissimus. (c)
 „ Et inter magnos Stoicæ sectæ auctores, (d)
 „ Panætius Rhodius „ Stoicorum princeps, (e)
 „ & Stoicorum gravissimus (f). Denique
 Possidonius Apameæ in Syria natus, qui
 Rhodi, & reipublicæ, & scholæ præfuit:
 ab hoc quoque se institutum fuisse refert Ci-
 cero. Quin & Pompejum, qui illum, dum
 e Sy-

(a) Cic.
de fin. 1.(b) Id.
qq. tu se.

(c) Id. de

(d) off. 1. 3.

(e) Sene-
ca ep. 92.

(f) Cic.

qq. ac. 1.

4 & de

off. 1. 2.

De off. 1.

1.

22. 99. e Syria, redux ejus visendi causa Rhodum
 22. 1. 2. deflexit, acutissimis licet artuum doloribus
 cruciatum, nervose disserentem: nihil esse
 bonum, nisi quod honestum sit; & audi-
 vit, & suspexit. Hucusque pertingit non in-
 terrupta Stoicorum successio, quæ secundum
 ordinem a Diogene Laertio propositum in
 scholis a Thalete institutis derivatio est po-
 strema. Stoicorum quoque gravitatem, quod
 præterire hic nequeo, in Judæa, quamquam
 multo tardius, imitati sunt Pharisei: in sta-
 biliendo fato Chrysippum secuti videntur; ita
 enim illud admiserunt, ut simul perfectam ar-
 bitrii libertatem profiterentur: ut testis est
 Josephus ipse Pharisæus. Etsi porro nonnul-
 lam physicæ, & mathesi operam dederint,
 præcipuum tamen ipsis studium fuit legis avi-
 tæ, quam spuris traditionibus, & falsis inter-
 pretationibus admodum depravarunt. Floruit
 hæc secta jam Machabæorum ætate, Alexan-
 dro Jannæo Aristobuli filio imperium tenente;
 eversa vero subinde urbe, ac templo & ipsa
 paullatim concidit.

Quis Py-
 tagoras?

XXII. Rerum series jam postulat, ut ad
 sectam Italicam transeamus, quæ in ea Ita-
 liæ parte, cui coloniarum Græcarum fre-
 quentia magnæ Græciæ nomen imposuit, au-
 ctore Pythagora effloruit. Natus erat Pytha-
 goras in insula Samo anno tertio Olympi-
 531æ, ante Christum 564to, singulari mo-
 rum maturitate, ingenii vi, aliisque non or-
 dinariis animi dotibus, quæ jam in juvene
 supra vulgarem modum elucebant, a natura
 instructus. Primum Samii, cum nondum 18vum
 ætatis annum attigisset, præceptorem nactus
 est Hermodamantem; tum vero Phærecydem
 Syrum in Lebo commorantem, Anaximan-
 drum, & ipsum Thaletem Miletæ audit. Non
 poterat Thales ipsius ingenium, discen-
 dique aviditatem pro merito admirari, au-
 ctior-

Etque exstitit, ut in Phœniciam, atque Egyptum ad sacerdotes præcipue Memphiticos, Diospoliticos, ac Thebanos, a quibus ipse quoque omnem suam hausisset scientiam, se se conferret; quod consilium secutus cum esset, ipsos 22. annos familiari eorum consuetudine usus, atque omnibus Phœniciorum, ac Ægyptiorum sacris initiatus, religionis mysteria maxime recondita, omniumque Deorum initia, nec non astronomiam, & geometriam pro illorum temporum ratione perfectissime condidit. Deerat adhuc musica, ac numerorum doctrina: in his quoque a præstantissimis Chaldæorum, Persarumque Magis Babylone, quo subacta a Cambyse Ægypto, una cum reliquis captivis abductus fuerat, institutus est. Inde persoluto a quodam Crotoniatarum Principe redemptionis lytro in patriam rediit quidem, haud tamen diu in ea commoratus est; cum enim doctrinam de se obscuram, novis insuper numerorum, aliisque symbolis involutam exciperet nemo, unum si demas juvenem, quem ut discipulum haberet, alere quoque cogeatur, novam peregrinationem suscepit, in qua Delphos, Cretam, Spartam, Philiantem, aliaque invisit loca, & Jovis Cretensis mysteria, latas quoque a Minoe, & Lycurgo leges perscrutatus est. Tandem patriæ prorsus valedicens, quod in eam redux ad suscipiendum reipublicæ gubernaculum a civibus adigeretur, novam sibi sedem in Italia quæsit, atque Crotonæ, urbe in sinu Tarentino sita, summa civium lætitia, ac benevolentia exceptus, publicoque senatus decreto scholam aperire iussus est. Id quod regnante Romæ Tarquinio superbo contigisse refert Cicero.

XXIII. Ut primum publice docere agressus est Pythagoras, nactus est discipulos & copiosos admodum, & sapientiæ fama incly-

Storchenau Log.

B

tos,

*Q. 9. tu.
fr. 1. 1.**Qui ejus
discipulus
li.*

tos, quos inter præcipuo loco nominandi veniunt Empedocles Agrigentinus a duobus, quæ statuit rerum omnium principiis *Amicitia*, & *Discordia*: Archytas Tarentinus a mechanica in formam artis redacta: Timæus Locrus a libro de mundo, ex quo complura in suam Plato philosophiam derivavit, celebris; Alcmæon denique Crotoniates, Hippasus Metapontius, Eudoxus Gnidius, & Philolaus Crotoniates, qui primus annum terræ motum docuisse fertur. Discipulorum vero duplicem classem constituit; prima *Genuinos*, *Acroaticos*, sive *Pythagoreos* complectebatur, quorum sub initium jam 600. concurrisse scribit Laertius: communi hi utebantur victu facultatibus etiam suis in unum collatis, nec unquam, nisi diu probati, ad magistri conspectum admittebantur: sed noctu ejus post velum quoddam latentis instructiones excipiebant, arctissimo insuper silentio per quinquennium integrum adstricti. Docebantur autem primum arithmeticam, tum musicam & geometriam, tandem philosophiam, quæ in duas dividebatur partes, Theoreticam nimirum, & Practicam, quarum hæc elegantissimis præceptis de divino cultu, pietate in mortuos, reverentia erga parentes, observantia legum, temperantia, fortitudine, aliisque virtutibus referta erat, cujus omnis doctrinæ summa aureo Pythagoræ carmine, ut vulgo audit, continetur, quod non ab ipso, sed a discipulorum nonnullis, ut inter eruditos fere convenit, compositum videtur. Hac porro instituendi ratione ingentem sibi apud discipulos auctoritatem conciliavit, quæ per serpentem inter eos runiorem, cum Apollinem Hyperboreum, vel saltem bonum a Diis submissum genium esse, mirum in modum crevit; unde factum est, ut illius dicta oraculorum instar exciperent; neque aut du-

Quæ eorum
classes?

Quæ Pythagoræ
doctrina?

bitare, aut querere quidpiam; aut contradi-
cere fas esse putarent, illud perpetuo occi-
nentes: αὐτός ἴπα ipse dixit. Ad alteram ve-
ro classem *Acusmatici*, seu *Pythagoriste* spe-
ctabant; quibus se se adjungere cuilibet lice-
bat: his in amplissimo quodam ὁμαρειο, quod
interprete Clemente Alex. Ecclesiam deno-
tat, convenientibus ipse sapientissima, atque
cujusvis conditioni accommodata monita im-
pertiebat. Obiit demum Pythagoras secundam
mentem S. Justini anno 4^{to} Olymp. 76^{me},
mortis genus incertum est; eum nonnulli ob
tyrannidis affectatæ suspicionem occisum esse
volunt. Successit Aristæus, qui relictam ejus
uxorem Theanonem præclare quoque philoso-
phantem duxit, atque duos filios patre vi-
duatos Mnesarchum, & Telaugen instituit:
horum prior scholam deinceps regendam su-
cepit, eamque Tydæ Crotoniatæ reliquit,
qui paullo post ob publicas patriæ calamitates
mœrore confectus Pythagoræorum successioni
finem imposuit, etsi non defuerint, qui per
plurima dispersi loca hanc doctrinam longe,
lateque disseminarent. Certe adeo hæc secta
extincta non est, ut non obscura ejus vesti-
gia in Judæa quoque post reditum e captivita-
te Babylonica deprehendere liceat; mea enim
opinione Esseni, sive Essæi, nota inter Ju-
dæos secta, ad Pythagoræos propius acces-
serunt, atque, ut nonnulli volunt, ad Cyni-
cos. Non diffiteor equidem, ipsos adscita qua-
dam morum asperitate, & nimia in repre-
hendendis vitiis severitate nonnullam Cynismi
speciem præ se tulisse, longe tamen erant a
sordido illo, quod Cynicæ philosophiæ caput
fuit, vivendi genere remoti, utpote iteran-
di sæpius in die baptismatis assueti. Id ve-
ro cum Pythagoræis commune habuerunt, ut
silentii, ac solitudinis amore, & quadam asce-
ticæ vitæ ratione se se a popularibus suis se-

Qui Ec-
clesiæ?

pararent, præter ethicæ studium singulari industria in artem medicam condiscendam incumberent, nativamque herbarum, ac lapidum vim sollicitè indagarent. Alii urbes incolabant, alii in silvis delitescabant, nec parvo numero; Josephi siquidem ætate amplius quatuor eorum millia per Judæam sparsi fuerunt. Cæterum de Deo, ejus providentia, animæque humanæ immortalitate rectas cum Pharisæis opiniones foverunt.

De bell.
Jud. l. 2.
c. 2. & 7.

Quæ ex
Italica
oriundæ
sectæ?

Quæ se-
ctæ He-
raclitea?

XXIV. Italica hæc secta, quæ, ut vidimus, Pythagoram auctorem veneratur, in quatuor subinde partes scissa quatuor diversas sectas progeneravit. Heracliteam nimirum, Eleaticam, Pyrrhoniæ, & Epicuream, quæ nunc ordine referendæ sunt. Heraclitea & originem, & nomen, & fere etiam interitum accepit ab Heraclito Ephesio, homine perquam elati supercilii, aliorumque omnium contemptore, quorum etiam odio solitudinem petiit, vitamque in montibus herbis tantum & oleribus victitans egit, donec corporis ægritudine in urbem redire compelleretur. Cum junior esset, se nihil scire: ut vero conuenit, se nihil ignorare dicere solebat: audivit primum Xenophanem, tum Hippasum Pythagoræum, quorum placita cum iis, quæ ab Orpheo mutuavit, commixta in opus quoddam digessit, quod in Dianæ fanō eo fine occultavit, ut fortuito inventum sublimissimis mysteriis refertum, ac prope divinum crederetur; sed fraus ea successu caruit. Sectatores habuit paucos, eosque obscuri nominis, quod adscribendum videtur tum absurdis, quas fovebat, opinionibus, tum obscuritati, quam sive in docendo, sive in scribendo ita affectavit, ut passim ab omnibus obnoxii compelleretur.

Cle. de
fin. l. 2.
Quæ se-
ctæ Elea-
tica?

XXV. Eleatica secta ab urbe Elea, seu Velia magnæ Græciæ, ex qua præcipui ejusdem

dem philosophi oriundi erant, nomen: originem vero a Xenophane Colophonio obtinuit. Cum contenderet universum hoc æternum esse, neque fieri ulla ratione posse, ut quidquam ex nihilo fiat, systema male coherens, ac prorsus impium contexens, Spinozæ de una totius universi substantia, eaque divina perstulit. Xenophani in scholæ regimine successit Parmenides Eleates genere, & opibus clarus; verum clarior eo, quod absurdæ magistri sui doctrinæ aliam indiderit formam; hunc excepit Melissus Samius, quem insecuti sunt Zeno Eleates dialecticæ auctor, ut testatur Aristoteles apud Laertium: Leucippus pariter Eleates, qui antiquam Moschii Phœnicii de atomis doctrinam prius in Græciâ suscitavit: Democritus Abderites, Protagoras ob librum, quem his verbis exorsus est: „de Diis quidem statuere nequeo, an „sint, nec ne? Sunt enim plurima, quæ id „scire prohibent:“ ab Atheniensibus exilio multatus, concrematis publico in foro ejus scriptis: & denique Anaxarchus rursus Abderites, ob singularem animi constantiam, & vitæ tranquillitatem *Fortunatus* dictus. Democritus porro ex mente Apollodori ortus est anno primo Olymp. 80mæ, atque inde annis ante Christum circiter 458. Prima litterarum rudimenta Abderæ a Magis, & Chaldeis quos Xerxes ibi reliquerat, accepit; tum aliquo tempore Leucippum, & Pythagoræorum nonnullos sectatus, tandem Chaldæam, Persiam, Indiam, Æthiopiam, ac Egyptum eruditionis causa peragravit, ubi vero in patriam rediit, sectam Eleaticam, & imprimis Leucippi de atomis systema ad majorem perfectionem adduxit. Vir erat meditationi magnopere deditus, a qua ne tam facile avocaretur, in subterranea quadam ex-

Bayle
diss. crit.
art. Xeno-
ph.

Qui
Demo-
critus?

Cit. 99.
tuse. l. 5.
Quam se-
cta Pyr-
renis?

tra mœnia specu habitasse, & denique se ipsum oculis orbasse ferunt.

XXVI. Pyrrho Eleates natus anno ante Servatorem 374^{to}, primum Anaxarcho magistro usus est; deinde vero novam condidit sectam a se Pyrrhnam: ab inquisitione veritatis, Zeteticam ἀπο τῆ ζήτην, a suspensione iudicii, Epheticam ἀπο τῆ ἐπιχην, a dubitationibus, Aporeticam ἀπο τῆ ἀπορίας, ab eo demum, quod dispiceret semper, & verum non reperiret, Scepticam ἀπο τῆ σκεπτικῆ dictam. Docuit siquidem nihil omnino comprehendere posse, neque in rerum natura quidpiam esse, quod verum sit, aut falsum, honestum, aut inhonestum, justum, sive injustum; sed ea omnia ab hominum tantum opinione, lege, aut consuetudine proficisci, universim proinde de rebus omnibus dubitandum, nec ullum umquam assensum præstandum esse. Neque vero ab absurda adeo doctrina, vita, moresque abuserunt; ut enim se de rebus prorsus omnibus dubitare comprobaret, noluit umquam currus, equos, aliaque in via occurrentia declinare, passurus certo gravioris detrimenti quidpiam, nisi amici ejus interea saluti prospexissent: quamquam etiam aliquando, sui quasi oblitus, canem in se irruentem fugere sit deprehensus; eam ob causam cum a nonnullis rideretur, reposuit: „difficile est hominem penitus exuere, sed „contendendum tamen, primum quidem „agendo, quantum fieri potest, adversum „res, tum postea ratiocinando.“ Celebriores inter discipulos, quos nactus est Pyrrho, fuerunt Eurylochus, Philo Atheniensis, Hecateus Abderita, Nausiphanes Tejus, quem Epicurus audivisse fertur, & Timon Phliasius ejus in schola successor, quocum secta hæc penitus periisset; nisi postliminio a Prole-

lenæo Cyreneo fuisset restituta, ut refert *E. 9.*
 Menodotus apud Laertium, qui simul Ptole-
 mæi successores longa serie enumerat: sed non
 attinet eos hic singularim referre. Sextus so-
 lum Empiricus præteriri non debet; floruit is
 temporibus Antonini Pii Imp. conscripsitque
 decem de philosophia sceptica libros, qui ho-
 die adhuc in plurium versantur manibus.

XXVII. Epicurea secta auctorem habuit E- *Quæ E.*
 picurum Atheniensem, natum patre Neocle *picurea ?*
 Indimagistro, ut ait Cicero, anno tertio O- *De nat.*
 lymp. *109ma*, ante Christum circiter annis 340. *D. 1. 1.*
 Cum ætatis ageret annum *14um*, philoso- *c. 6.*
 phicts se studiis totum tradidit, in quibus
 tamen a nullo se institutum, sed omnino *Idem l. c.*
αὐτοδιδάκτων esse frequentius gloriari solebat:
 anno vero *32do* publice docere aggressus est
 primum quidem Mirilene, tum Lampsaci,
 postremo Athenis, ubi eum in finem hortum
 quemdam coemerat. Atque inde factum est,
 ut ejus sectatores *οἱ ἀπὸ τῶν Κηπῶν*, ex hor-
 tis philosophi dicerentur. Numerum discipu-
 lorum nactus est prorsus inauditum, quippe
 cum non modo ex Græcia, verum ex Asia
 quoque, & Ægypto frequentissimi conflue-
 rent, inter quos præ reliquis claritatem no-
 minis adepti sunt Metrodorus a Cicerone *De fin.*
 pæne alter Epicurus dictus; Polizæus ab ip- *l. 2. c. 28.*
 so moriente scholæ præfectus, & Leontius,
 omnes Lampsaceni. Neque vero deinceps ea
 sectatorum copia imminuta est; nam & con-
 tinua horti, sive scholæ præfectorum succes-
 sio, ut Suidas testatur, exolevit spatium 237.
 annorum ad tempora usque Julii, & Augusti
 Cæsarum, & ea quoque ætate inter viros
 summos, & reipublicæ principes Epicuræ se-
 ctæ adhæsisse quam plurimos, tantaque ma-
 gistrum suum veneratione prosecutos fuisse,
 ut ejus imaginem non modo in tabulis, sed *De fin.*
 in poculis etiam, & annulis insculptam ge- *l. 5. c. 1.*

Qui Sad-
duci?

starent, ex Cicerone palam fit. Quin & Pe-
lustinam pervasit hæc pestis; Sadducæi enim
quod nomen vel a suo capite Sadoc sacerdo-
te, vel a justitia, Hebræis שָׁדוּךְ, cujus exi-
mios sese cultores venditabant, obtinuerunt,
præcipua Epicuræ doctrinæ capita amplexi
sunt: Dei quippe providentiam, animi hu-
mani immortalitatem, & reliquorum spiri-
tuum sive bonorum, sive malorum existen-
tiam sustulisse feruntur. Epicuri porro philo-
sophia in tres erat divisa partes. Prima, sive
ut agebat, canonica, cum de veritate, ejus-
que criteriis breviter ageret, variosque de
sensibus prænotione, voluptate, ac vocibus ca-
nones proponeret, logicæ vices subiit: fusio-
rem enim veluti meras sophistarum cavilla-
tiones omnino respuebat, quod Cicero in il-
lo reprehendit. Altera continebat physicam,
in qua systema Democriti elaboravit, multa-
que de Deo, & anima humana impie pror-
sus effutiit, extrahens, ut ait Cicero, reli-
gionem cum Diis immortalibus, re tol-
lens, oratione relinquens Deos. Tertiã
demum partem constituabat ethica, in qua
principium, & finem vitæ vere beatæ in vo-
luptate situm esse contendit.

Asad.
V. 2.

De nat.
D. 1. 1.

Quam se-
cta Ecle-
siæ?

XXVIII. Hæc de antiquis Græcorum phi-
losophorum sectis dicta sufficiant, quæ dum
magna animorum contentione sive in ipsa
Græcia, sive in Italia inter se conflegebant,
aliud interea, novumque philosophiæ genus
Alexandriæ in Ægypto, imperante Romæ
Augusto, caput extulit. Alexandriam quippe
omnis generis eruditi id temporis confluxer-
ant, summa ad litterarum studia opportuni-
tate, quam Ptolemæorum liberalitas & insi-
gnis bibliotheca, quæ tum parem in orbe
non habuit, suppeditavit affecti. Ejus do-
ctrinæ summa erat, in nullius magistri verba
jurandum, sed veritatem ex omnibus philo-

sophorum sectis conquirendam, nec quidquam, nisi ratione consulta, & maturo judicio recipiendum esse.

Hujus inusitatæ adhuc, licet probatissimæ, ^{Quis e-} philosophandi rationis auctor exstitit Pota- ^{jus au-} mon, sectaque ab eo fundata (si tamen secta ^{tor?} dici possit) Eclectica ab ἐκλεγειν appellari consuevit: crevit autem plurimum, ubi Ægyptus veræ religionis lumine colu trata fuit, quod hauñ longo post tempore evenit; complures enim ex iis, qui hanc methodum sectabantur, philosophis doctrinam evangelicam amplexi celeberrimam eadem in urbe pro Christianis scholam erexerunt & gubernarunt etiam, ex qua subinde tot viri & morum integritate, & divina, humanaque sapientia clarissimi prodierunt, quales fuerunt S. Justinus M. Neapoli Syriæ oriundus, S. Irenæus, atque imprimis illud Alexandrinæ philosophiæ decus S. Catharina, quam Orthodoxi philosophi præsidem hodie suam venerantur.

XXIX. Primus, quantum constat, Christianus philosophus Eclecticus, scholæque rector ^{Qui in ea} teste Phil. Sideta fuit Athenagoras, quem ^{Christia-} secuti sunt Pantænus, & Clemens Alexandri- ^{ni?} nus, qui hanc philosophandi rationem & fu- ^{Stram. I.} sius declarat, & magnis laudibus effert; post- ^{I. c. 7.} quam enim multa attulisset in philosophiæ laudem, quam divino munere hominibus ob- tigrisse ait, subdit: Φιλοσοφίαν δὲ, ἢ τὴν σοικὴν λέγω, ἢ δὲ τὴν πλατωνικὴν ἢ τὴν ἐπικυρεϊοτὴ καὶ ἀειστυτελικὴν, ἀλλ' ὅσα εἴρηται παρ' ἑκάστη τῶν αἰρεσέων τετῶν καλῶς δικαιουσιν μετὰ δέσειβας ἀπποσημης ἐαδιδασκοντα, τετσομπαν τὸ ἐνλε- τικοι φιλοσοφίαν φημι,, Philosophiam autem „ non dico Stoicam, nec Platoniam, aut „ Epicuream; & Aristotelicam, sed quæcum- „ que ab his sectis recte dicta sunt, quæ „ docent justitiam cum pia sententia, hoc

„ totam selectam dico philosophiam . “ Hi porro philosophi Christiani , etsi ex diversis sectis , Ecclesiici cum essent , quidquid castissimæ religioni non adversaretur , seligerent , nihilo minus in moralibus præcipue Stoicos ; in dialecticis , & arte ratiocinandi Aristotelem ; in doctrina de Deo , geniis , animaque humana , & ceteris rebus immaterialibus Platonem sequebantur ducem , ita tamen , ut huic primas in omnibus partes deferrent , putantes ejusdem placita cum veræ religionis dogmatis facilius reliquis componi posse ; unde S. Augustinus de veteribus Platoniceis non dubitavit affirmare , „ eos , si hanc vitam

„ rursus agere possent , paucis mutatis ver-

„ bis , ac sententiis ad Christianam religio-

„ nem accessuros esse . “ Clementem & au-

„ divit , & in scholæ præfectura secutus est celeberrimus ille inter Christianos Doctor Origenes , qui ea sapientiæ laude inclaruit , ut non Christianorum modo juvenes , sed & ipsi gentilium philosophi maximo numero ad excipiendas ejus institutiones confluerent . Post Origenem floruerunt Heraclea ejusdem successor , S. Anatolius Laodiceæ Episcopus , qui a Platone deficiens primus Aristotelem Alexandriæ prælegit , Arnobius , Lactantius , Eusebius , Synesius , S. Augustinus cum plerisque Sanctis Ecclesiæ Patribus , qui omnes hanc philosophandi normam tenuerunt . Verum bellorum tumultibus , odiisque græcos inter ac latinos ferventibus , accedente denique etiam Leonis Isaurici in Philosophos , eorumque studia furore effectum est , ut jam a sæculo fere sexto omnis Ecclesiæ hujus scholæ splendor deflueret , & in toto pane Oriente sapientiæ studium elanguesceret , paucis solum relictis , qui claritate nominis temporum illorum barbariem illustrarent ; sæculo nimirum sexto Philoponus Alexandriæ mix-

tam

Lib. de
eccl. a
4.

tam ex Aristotelis, & Platonis placitis philosophiam professus est, infelix subinde absurdissimæ Tritheitarum sectæ auctor; sæculo octavo Joannes Damascenus & sanctitate, & sapientia inclytus: sæculo nono Leo Thessalonicensis Antistes, ac Photius Constantino-
 politanus Patriarcha floruerunt. Movebat tum quidem omnia Leo sextus Orientis Imperator ob insignem, quam sibi comparaverat, eruditionem, *Sapiens, ac Philosophus* dictus, ut rem litterariam erigeret; votis tamen, & conatibus eventus haud respondit, non nisi Psello quodam, ac Michaelē Ephesio sapientiæ fama tum quidem inlarescentibus. Sæculo demum undecimo Michael Psellus, conscriptis in Aristotelem commentariis, excoltaque Platonis doctrina viri eruditi nomen promeruit, eo quoque clarus, quod ipsum Imperatorem Constantinum Ducem instituerit, eique tantum litterarum amorem instillavet, ut palam professus sit: „ Malle se litterarum gloria, quam imperio cognosci. “

Zonar.
 annal. l.

XXX. Eadem cum Clemente Alex. ætate sub finem nempe sæculi secundi, & initium tertii vixit Ammonius cognomento Saccas, Eclecticus licet philosophus, novæ, tamen sectæ Juniorum Platoniorum auctor: Natus is erat a parentibus orthodoxis, atque in Christiana philosophorum schola vel ab ipso Clemente, vel a Pantæno institutus, ubi tamen virilem ætatem attigit, ad avitam idolatriam turpissime defecit, ut testatur Porphyrius, cui præ Eusebio id negante fidem hac in re habendam esse eleganter commonstrat Cl. Laur. Mosheimius. Homo hic vaferimus, quo religioni, quam deseruerat, quibus posset artibus, noceret, eo primum curas intendit, ut, cum ipsi Christiani Platonem ceteris præferrent philosophis, eumque non multum a suis dogmatis dissidere con-

2.
 Quæ se-
 cta Jun.
 Platon?
 Quis
 Ammo-
 nius e-
 jus au-
 ctor?

Diff. de
 turb. pet
 Plat.
 Eccl.

nus Romæ scholam aperuit. Fuit Plotinus celeberrimus post Herennium Ammonii discipulus, vir acris quidem ingenii, sed ultra modum fanaticus, nactus & ipse discipulos Amelium Tuscum, qui maluit Amerius nuncupari, Paulinum Scythopolitem, Eustochium Alexandrinum, Zethum Arabem, Zothicum, Castricum, Firmum, Marcellum, Orontium, Sabinillum, & Rogatianum Senatores Romanos; Serapionem Alexandrinum, quorum omnium facile princeps exstitit Porphyrius (Malchus patria lingua dictus) infensissimus hostis Christianorum, qui pestiferam hanc doctrinam per Siciliam, aliasque Romani orbis provincias partim ore, partim scriptis magistri sui a se emendatis, & in sex Æneadas digestis propagavit. Haud diu post Jamblychus Chalcidensis ex Cælesyria, qui una cum Theodoro Asinensi a Prophyrio institutus est, florere cœpit: cum Ægyptiam, & Pythagoræam philosophiam magis excoleret, atque facto ex ea, & Platonica delectu Eclecticam majoribus ornamentis, & firmioribus, ut putabat, contra Christianos armis instruere niteretur, eam sibi doctrinæ famam comparavit, ut passim *magnus philosophus, admirandus, divinissimus*, & a Juliano Imperatore *commune orbis emolumentum* compellaretur. Jamblycho successit Ædesius, ex cujus institutione prodierunt Antoniaus, eandem subinde doctrinam Alexandria professus, Chrysanthius, Sardianus Priscus, Eusebius Myndus, & Maximus; horum, ac præcipue quidem Maximi perversis doctrinis, ac eruditis fraudibus effectum est, ut Julianus imperatoriam, qua fulgebat, dignitatem fœdissima defectionis labe commaculavit. Sed neque Græcia a venenosis hisce erroribus diu immunis fuit: Plutarchus enim Atheniensis Alexandria, ubi Hieroclem, & Olympiodorum

*Secræ-
ript. ecclæ
l. 3. c. 20*

per Græ-
ciam?

audiverat, Theodosii Imp. ætate, sub finem nempe sæculi quarti redux philosophiam hanc male consarcinatam. Athenis publice prælegit, sectatoresque habuit, uti doctrinæ fama, ita acerrimo quoque, quo in orthodoxam religionem ferebantur, odio longe celeberrimos, Syrianum, Proclum, Marinum, Damascium, Simplicium. Ceterum hæc Juniorum Platoniorum, Christianisque adversantium secta, uti sub Juliano Apostata, qui ejus assecclas primis in republica muniis admovit, nihilque intermisit, quod ad illius incrementum quoquo modo facere posset, summum splendoris apicem attigisse videri poterat; ita hoc e vivis sublato magnis passibus ad interitum properavit, & jam sub finem sæculi quinti omnis fere Alexandriæ, Atheniensisque scholæ gloria defloruit; sæculo vero insequente ultimam eidem cladem intulit Justinianus Imp., qui Eclecticis hos philosophos, aut solum vertere, aut Christianam amplecti religionem jussit.

*Eneas
Gazaus
diul. de
immort.
anim.*

Quæ ira-
ter Ro-
manos
sectæ?

XXXII. Eclecticam philosophandi rationem Romam a Plotino inductam fuisse diximus, non tamen propterea illud sectarum studium, quod jam ab eo, quo Græcorum sapientia ad Romanos pertigit, tempore sese explicare sensim cœperat, extinctum est. Atque ut ab origine rem breviter persequamur: primum quidem Romani bellis solummodo intenti, ac philosophiæ cultu animos frangi autumantes non magnum litteris honorem habuere; inde nulli fere sub Regibus: pauci admodum sub Consulibus: complures vero Monarchia jam constituta sapientiæ laude inclaruerunt, qui prout diversas probarent opiniones, diversas quoque sectas excoluerunt: nimirum Academicam M. Brutus, M. Terentius Varro, M. Piso, & M. T. Cicero; Pythagoræam Ennius, & Nigidius Figulus; Stoicam Scipio

Afri-

Africanus, Mutius Scævola, Cato Uticensis, L. Annaeus Seneca Cordubensis Neronis magister, Epictetus Hierapoli in Phrygia natus, cujus omnis philosophiæ summa his continetur: *αἰετὸν, καὶ ἀπειλὸν, ὑπομῆναι, καὶ ἀσκήσασθαι*: Peripateticam Tyrannio cum Andronico Rhodio protractis in lucem Aristotelis, ac Theophrasti libris, Alexaneer Aphrodisiensis, qui in Aristotelem commentatus est, & primus Romæ scholam Peripateticam a M. Aurelio, & L. Vero Impp. erectam gubernavit, ac denique Boethius scriptis 5. de consolatione philosophiæ libris clarissimus: Epicuream Lucretius, latinis eam doctrinam versibus comp'exus, Plinius Junior, Lucianus, Laertius: Platonica demum dogmata adoptarunt Trasyllus, Alcinous, Taurus Berytius, qui Gellium auctorem noctium atticarum: Apulejus, Atticus, Numenius Maximus Tyrius, qui M. Aurelium Imp. & Plutarchus Cheroneensis, qui Trajanum, & Hadrianum Impp. instituit. Sed neque Romanis diu licuit esse philosophis: cum enim barbarorum incursionibus amplissimum eorum collaberetur imperium, respublica quoque litteraria prorsus concidit, Gothi non in homines modo, urbes ac ædificia, sed in ipsa etiam antiqua litterarum monumenta ultra modum sævientibus.

XXXIII. Exsul interea Romano imperio philosophia apud Arabes, qui sub finem sæculi octavi, & noni principium latissimum subactis quam plurimis in Africa, Hispaniaque provinciis dominatum adepti sunt, asylum invenit: Almaimonis tum regni gubernacula tenentis cura, ac sollicitudine effectum est, ut litterarum amor in populo ceteroquin inculto aliquantulum effloresceret. Primi ejusdem fructus exstiterunt versiones nonnullæ librorum Aristotelicorum e Græco in Arabicum, quæ tamen ob ignorantiam linguæ Græ-

Quomodo Philosophia in Arabia revixit? Salmafusus in præfat. ad tabul. Græc.

L. an-
tiq.
Lat. c.
2.

Quomo-
do in
Italia?

Græcæ satis infelicitè cesserunt : alii commentationes suas addiderunt, in quibus, cum auctoris mentem sæpissime non assequerentur, proprias opiniones substituerunt, atque hac ratione Aristotelis opera egregie corrupta sunt. Commentatorum horum celeberrimi fuerunt, Averroes Cordubensis, Alpharabius, Jacobus Alkindius, & Avicenna, qui præcipue judicio Rhodigini, Aristotelis textum mutilavit, inultaque commentitia intulit : alii demum ipsas has versiones Arabicas in latinum non meliori successu transtulerunt, novumque quasi Aristotelicæ philosophiæ corpus, quale nempe ex lacunis istis, ac ineptis versionibus fieri poterat, confecerunt, quod paullo post in Oxoniensem, tum & in Parisiensem, reliquasque Europæ Academiæ a Carolo M. jam antea fundatas illatum cum dominatum obtinuit ultra 500. annos duraturum, ut vel latum unguem a prætensa hac Aristotelis doctrina recedere religioni duceretur. Ita mutata repente rerum facie Plato ex Christianis scholis abire, locumque Aristoteli cedere est coactus, quem Oxonii Joannes Scotus, Robertus Pullus, Simon Duneimensis, S. Edmundus Episcopus Cantuariensis, Magister Hugo; Joannes Blond ordine prælegerunt. Occupata subinde anno 1453. a Turcis Constantinopoli complures Græci eruditione conspicui in Italiam confugerunt, allatis secum Græcis Aristotelicorum operum exemplaribus, ex quibus novas, multoque accuratiores versiones procuderunt, id quod ad emendandos, qui in prioribus irrepserant, errores non parum contulit. Interpretum horum præ reliquis famam sibi compararunt Theodorus Gaza, Joannes Argyropylus, Byzantinus, qui Græcorum primus Romæ peripateticam publice professus est, & qui huic successit, Georgius Trapezuntinus, ac deinceps

Gen-

Gennadius acris Platoniorum insectator; nam & tum nonnulli, ut Platonis philosophia restitueretur, operam dabant, quos inter fuerunt Gemistus, Pletho, Bessarion Trapezuntinus, Romana postmodum purpura insignis, Marsilius Ficinus editis latino idiomate Platonis libris celebris; his adnumerari meretur Joannes Picus Princeps Mirandulæ, & Concordiæ Comes natus anno 1436., qui ob amplam ingenii vim, ac eruditionem sæculi sui *Phoenix* appellatus est.

XXXIV. Hæc porro Aristotelis philosophia tanto studio, ac fervore propugnata, quoniam fere solâ in scholis saltem præcipuis dominabatur, scholasticæ cognomentum obtinuit; cumque contentiosa admodum esset, & dialecticæ subtilitates ultra modum promoveret, fieri non potuit, ut diu unanimis persisteret; nec in diversas quoque sectas antiquorum exemplo abiret. Atque ab origine quidem in duas discescebantur partes doctores scholastici; Nominales alii, alii Reales dicti, quod illi universales naturas in vocibus solum consistere, logicamque unice circa vocabula versari: hi reapse exstare, atque res ipsas logicæ objectum esse contenderent. Nominalium princeps exstitit Rucelinus Angelus: verum tum quidem brevi extinctâ postliminio revixit schola istæ in Guilielmo Occamio Oxoniensi Professore *Doctore invincibili*, quem insecuti sunt Richardus Suisset, Gregorius de Arimino, Gabriel Biel, Petrus de Aliaco Cardinalls Cameracensis, Joannes Gerson Cancellarius Parisiensis. Realium doctrinam jam olim a Boethio traditam sæc. 17mo. suscitavit Odo, seu Oudardus Abbas S. Martini Tornaci, postea Episcopus Cameracensis, hunc secutus est Petrus Lombardus Episcopus Parisinus Magister sententiarum dictus propterea, quod SS. Patrum antiquorum senten-

Quæ
Philoso-
phia
schola-
stica?

Quæ e-
jus se-
ctæ?

Morhof.
Polyhist.
t. 2. l. 1.
c. 13.

Abreg.
chron. de
Phil.
Eccl.
som. 1.
donz.
Siecl.

tias

tias in ordinem redegit, ac exposuit, in cuius opera commentatus est: Alexander Halensis *Doctor irrefragabilis & Fons vite*. Hos exceperunt B. Albertus M. Ratisbonensis Episcopus, & SS. Thomæ Aquinatis & Bonaventuræ præceptor, qui conscriptis quam plurimis libris Parisiis, & Colonia Agrippinæ docuit; D. Thomas Aquinas Doctor Angelicus, a quo schola Thomistica descendit; S. Bonaventura Doctor Seraphicus, postmodum S. R. E. Cardinalibus adnumeratus; Ægidius Romanus *Doctor Fundatissimus*; Joannes Duns Scotus *Magister subtilis*, qui cum vehementer D. Thomæ doctrinam impugnaret; novam scholam, quæ Scotistica appellata est, erexit. Duabus tamen hisce scholis tomisticæ nimirum, & scotisticæ, alii paullo post se opposuerunt, qui Neutrales dicti sunt, quod nulli alioquin parti adhærentes Aristotelis solum placita in plurimis saltem, ac præcipuis defendebant. Infelicius longe Aristotelem propugnavit Petrus Pomponatius Italus vir argutus ceteroquin, at impius, aperta enim in opere a se composito atheismi semina sparsit: ex ejus schola prodiit Jul. Cæs. Vaninus extremo ob atheismum supplicio Tolosæ affectus. Atque ab his Hobbesius deinceps, ac Spinoza monstrosæ illa abominandæ doctrinæ principia desumpsisse videntur.

Quomodo-
Philosophia
restaurata?

XXXV. Cum ita maximo animorum æstus Aristotelis in scholis agebatur, parum abfuit, quin omnis pæne philosophia in interitum rueret, relicta solum egregie de rebus abstractissimis disputandi arte, in quam illa denique desiit. Non potuit ea res non justissimam iis, quibus acrior inerat intelligentiæ vis, indignationem movere; quare complures, dispari tamen successu, in diversis Europæ partibus, qua libris editis, qua novis circa res naturales inventis, iisque publicam

in lucem datis in id operam contulerunt, ut philosophiæ laboranti succurreretur: qua demum ratione, accedente etiam summorum Principum cura effectum est, ut illa ad eum splendoris gradum, quem hodie feliciter tenet, tardissimis licet passibus, perveniret. Jam igitur Novatorum in philosophia præcipui sunt promendi.

XXXVI. Etsi jam olim Raymundus Lullus ex nobili inter Majoricanos genere anno 1235. progenitus conscribendo primum novam Logicam sub nomine Artis Magnæ, ejusque dein epitomen Artem Parvam, unde Ars Lullistica, a multis probata, a pluribus rejecta ortum traxit: tum etiam Laurentius Valla in Italia Aristotelem acerrime impugnando primam Novatorum gloriam quæsi-verunt, eam tamen Morhofius attribuit Bernardino Telesio Consentino ex oppido Calabriae, qui novem libris de rerum natura secundum propria principia anno 1587. compositis prægrandi Peripateticorum turbæ bellum indixit, ac Neapoli Academiam Consentinam auspicatus est. Eodem quoque tempore floruit Petrus Ramus natus anno 1515. Regius Parisiis eloquentiæ, ac mathematicum Professor, acerrimus omnium veterum insectator, ut nec Cicero mordaces illius dentes effugere potuerit: magno strepitu id egit, ut ejecto e scholis Aristoteli sua ipsius philosophia substitueretur, atque hunc in finem conscripsit tres dialecticarum disputationum libros munus novæ logicæ obituros; tum animadversiones adversus Aristotelis organum, ac denique dialecticam magno ab iis studio apprehensam, qui subinde Ramei, vel Ramistæ dici voluerunt. Verum non diu post philosophia hæc publico Francisci I. decreto ex Galliarum regno exulare jussa est. His accenseri possunt Thomas Hobbesius recentiorum tempo-

Qui Novatores in philosophia?

Polyhist. t. 2. l. 1. c. 25.

rum Epicurus, & Theophrastus Paracelsus Pater Enthusiastarum a Morhofio dictus; ille Malmesburi in Anglia anno 1588. prognatus præter logicam, quam computationum titulo edidit, conscripsit elementa philosophiæ in tres partes divisa, de corpore, de homine, de cive; his addidit librum Leviathanis nomine insignitum, in quibus doctrina prorsus virulenta, manifestaue atheismi, ac tyrannidis principia continentur; hic Eremum B. V. in Helvetia anno 1493. locum natalem habuit, Salisburgi vero, ubi diutius commoratus est, anno 1541. obiit; studio novandi abreptus mixtum quoddam ex theologia, ac philosophia chaos confecit. Qui ex ejus schola prodiderunt, Chymici appellati sunt, eorumque gregem duxit Joannes Espagnet Burdegalis Curia Præses.

Qui ejus
Instaura-
tores?

XXXVII. Meliori longe successu in reparandis litteris elaboravit Franciscus Baco de Verulamio Anglus, regnique Cancellarius vulgato circa annum 1620. novo organo ab adhuc notis & fine, & methodo, & inquirendi principiis prorsus diverso quod Peripateticorum logicæ, sicut & instaurationem magnam eorum physicæ opposuit: qua re, tum & muneris dignitate, & doctrinæ ingentis fama sæculi sui eruditos excitavit, ut adumbratam ab ipso novam philosophandi rationem & excolerent magis, & deinceps sequerentur. Id quod egregie præstiterunt Blasius Paschalis in Gallia, Galilæus, ejusque discipulus Evangelista Torricellius in Italia, Otto Guerickius in Germania, Robertus Boyleus in Anglia, aliique complures, qui omnes in excolenda philosophia, ac præcipue quidem physica non sine ingenti fructu desudarunt. Atque hac demum ratione effectum est, ut Aristotelis auctoritate in scholis sensim decrescente philosophia novam faciem induer-

duerit : at quod jam olim ejus incrementis plurimum obfuit, ne tum quidem satis præcaveri potuit, sectarum varietatem intelligo ; ea enim invalescente contingit, ut philosophi quam frequentissime, non quod in quaque re verissimam, sed quod magistri sui placitis magis conformatum videretur, adoptent ; neque tam veritatis inquirendæ, quam receptæ antea opinionis tuendæ studiosi efficiantur. Has jam sectas, quas communi nomine Recentiores, sive Neotericas vocant, breviter attingendas esse res ipsa loquitur.

Quæ novæ sectæ exortæ?

XXXVIII. Familiam in iis ducit Gassendistica a Petro Gassendo Presbytero Ecclesiæ Diniensis in Gallia præposito, ac Regio in academia Parisina matheseos Professore, nato anno 1592. Epicuri is partes suscepit, ejusque de atomis systema, repudiatis illis, quæ cum religione male cohærebant, emendatum physicæ recentiori accommodavit, quo labore multorum tulit approbationem, nec parvus est numerus eorum, qui eam doctrinam sibi sequendam esse putarunt, quos inter emi-nerunt Franciscus Bernerius, Neuræus, Gualterus Charleton.

Quæ Gassendistica, & quis Gassendus?

XXXIX. Renatus des Cartes (vulgo Cartesius) Hagæ Turonum anno 1596. ex illustri inter Armoricos genere ortus, aliam sub idem fere tempus sectam exorsus est, quæ ab ipso Cartesianæ cognomentum tulit. Postquam amœniore litteras egregie condidicerat, atque philosophiæ etiam curriculum Flexiæ emensus fuerat, complures annos partim militando, partim per Germaniam, Italiamque peregrinando consumsit ; tandem in Hollandiam se recipiens, amplissimis muniis, quibus seu in Anglia, seu in Gallia ornari poterat, rejectis, totum sese meditationibus philosophicis, instituendisque experimentis, ac naturæ effectibus ad leges geometricas revocandis in villa

Quæ Cartesianæ, & quis Cartesius?

villa Egmondana tradidit: hic assiduo 25. annorum labore novum philosophiæ systema ab aliis, & methodo, & dogmatibus plurimum discrepans confecit, atque in lucem dedit. Dici vix potest, quanta, quamque diversa animorum motione illud fuerit exceptum; obstrepentibus enim alis, & acerrime novam doctrinam impugnantibus, alii, & longe quidem plures ambabus, ut ajunt, ulnis eam amplexi sunt, quo etiam factum est, ut ea brevissimum intra tempus per totum Belgium, Galliam, Angliam, ac plures Germaniæ partes sese diffunderit, nasctaque sit sectatores, & quam plurimos, & quam clarissimos: eorum ex numero alii Cartesiana dogmata commentationibus suis illustrarunt, ut Joannes Claubergius, Joannes de Ræy, Thomas Cornelius, Christianus Hugenius, Daniel Lipstorp, quibus addi debet Cl. Cordemoi: alii ea in compendio exhibuerunt, ut Silvanus Regius, Franciscus Bayle, Antonius le Grane, Jacobus Rohault: alii denique nonnullis immutatis suas addiderunt opiniones, ut Robertus Boyle, Henricus Mohre Anglus uterque, Molierus, Hartsoekerus, Hamelius, Purchorius, Malebranchius: sed horum postremus modum excessit, & in peculiari suo de ideis systemate, quod Cartesii principiis superstruxit, ab entusiasmo, & fanaticismo prope abest. Huc quoque referri debet Benedictus spinoza, qui ubi Judaicam superstitionem, quam materno cum lacte combibebat, natus Amstelodami anno 1632. cum Christianis sacris commutasset, omnem tandem in superos pietatem exuens, Atheus evasit, ediditque principia philosophiæ Cartesianæ geometricè demonstrata, tum Ethicam methodo geometrica demonstratam, tractatum theologico-politicum, aliaque nonnulla opuscula, in quibus omnibus male interitis Cartesii

tesii principiis ad stabiliendum atheismum abusus est, & ut se genuinum Hobbesii discipulum testaretur, virus illud, quod is aliqua tamen ratione occultare studuerat, aperte evo-
muit.

- XL. At vero non longo post tempore potentem nata est philosophia Cartesiana in Anglia adversarium Isaacum Nevvtonum anno 1642. in lucem datum, a quo Nevvtonianorum secta ortum ducit. Oppositam ille prorsus inivit philosophandi rationem; cum enim Cartesius ad naturalium effectuum examen non descendendum esse; nisi cognitis antea caussis, putaret; ipse contra ex effectibus caussas inquirendas, docuit; id insuper adiciens: nullam unquam a philosopho causam assignari debere, nisi cujus veritas aut ratione, aut experimentis liquide demonstrari queat; quo principio fabulosæ Cartesii hypotheses penitus evertuntur. Doctrina hæc; novaque philosophandi methodus partim in opere quod inscripsit Principia Philosophiæ Mathematica, partim in optica proposita ita eruditis omnibus sese probavit, ut hæc, qua vivimus ætate, eorum fere nullus sis, qui eandem non profiteatur. Longum foret enumerare eos omnes viros & a scientia experimentalis, & a geometriæ, algebræque sublimioris peritia clarissimos qui inde jam ab origine hoc systema, & propugnandum, & doctis suis laboribus excolendum sibi sumserunt, quos inter præcipuum sibi locum vindicant S. Gravesandius, Mussenbroeckius, Clarke, Keilius, Mac-Laurinus, Jurinus, Desaguliers, Kraffrius, & celeberrimi in principia philosophiæ mathematica commentatores Le Seur, & Jacquier. His accensendus est sæculi nostri decus Rog. Josephus Boscovich olim in collegio Romano, dehinc in Regia Ticinensi academia mathematica

Quæ
Nevvtoniana,
& quis
Nevvtonus?

Quis
Bosco-
vichius?

tum Professor, qui tum in compluribus opusculis, tum & præcipue quidem in Theoria philosophiæ naturalis primum Viennæ anno 1758. edita, dein Venetiis anno 1763. recusa Nevvtonianam Theoriam ita vel deduxit, vel emendavit, ut eam sibi gloriam omni jure vindicaret, quæ systematum auctoribus & sectarum principibus debetur. Elaboratum a Boschovichio systema adoptarunt, & eruditis lucubrationibus illustrarunt Carolus Benvenuti Romæ, Carolus Scherffer, & Paulus Mako Viennæ, Leopoldus Bivvald Græcii.

Quæ
Leibni-
tiana,
& quis
Leibni-
tius?

XLI. Quo tempore Anglia suo gloriabatur Nevvtono, Germaniam nostram Gotofredus Guillielmus Leibnitius, magnum inter eruditos nomen, illustravit Lipsiæ anno 1646. mundo datus. Scholasticorum ille quidem philosophiam non ex integro repudiandam, in multis tamen emendandam esse censuit; eam in rem obscuras confusasque eorum notiones ad claras, & distinctas reduxit; terminos inanes, quibus illorum scripta scatebant, extirpavit; methodum denique mathematicam in auxilium vocavit. Atque hanc suam mentem tum in Thæodicæa, tum in Hypothesi physica nova, tum in aliis compluribus opusculis, quæ actis Lipsiensibus eorum temporum inserta sunt, palam fecit, Hoc porro labore, tum iis etiam, quæ in mathesi sublimiore præstitit, excellentis doctrinæ famam sibi comparavit, nactusque est sectatores in Germania præcipue non paucos, ex quibus Leibnitianorum secta hodie in metaphysicis præcipue florent conflata est. Omnium antesignanus est Christianus Volfius magno editorum voluminum numero clarissimus, quibus omnes philosophiæ partes, ac mathesin universam est complexus: hunc ingens turma comitatur eorum, qui logicam, ac metaphysicam ad mentem Leibnitii con-

Quis
Volfius

cin-

cinnarunt; sed non attinet eos nominatim recensere, cum in omnium fere manibus versentur, nec nisi Volfiana premant vestigia. Prætereundus tamen non est Joach. Georgius Daries, qui in Elementis Metaphysices Jenæ anno 1753. recuisit Leibnitium, Volfiumque ita sequitur, ut vere solam ipsorum methodum retinuisse, cetera de suo attulisse videatur. Ad extremum hic loci dissimulandum non est, Leibnitium, uti eruditis suis laboribus ad logicæ præsertim, & metaphysicæ splendorem plurimum contulit, ita abstractis, quibus plus æquo indulsit, ratiociniis, ad opiniones quasdam non parum absurdas delapsus fuisse; id quod in metaphysica solidis rationibus demonstratum ibo.

XLII. Adnectendi hic forent ii, qui ab eo, quo instauratæ sunt litteræ, ad nostra usque tempora eclecticam philosophandi libertatem secuti, seu privato studio, seu conjuncto cum aliis labore vel philosophiam universam; vel quampiam illius partem nominatim excoluerunt; sed infinitus prope horum est numerus, & longior ne sim; prohibet præstituta operi brevis. Quare commemorare nolo Peurbachium, Regiomontanum, Copernicum, & Tychonem Brahe utrumque systematis mundi conformatione celebrem, Keplerum, Hevelium, de la Hirium, Cassinium, Hombergium, l'Emerium, Moriotum institutis de motu, plantis, aquis, coloribus &c. tentaminibus, ac Ottonem Guerickium inventionem machinæ pneumaticæ clarum; tum neque Maraldum, Malapertium, Levvenhockium, Jabbertum, Noletum, Bernoullium utrumque, Eulerum. Prætereo quoque complures alios illustres viros: Clarium, Scheinerum, qui primus in sole maculas detexit, Guldinum, Kircherum, Schotum ex Germania: Cabeum, Zucchium, Grimaldum, Ricciolum, „ qui in

Qui
præterea
Philosophia
celebre?

Polyt. A.
phil. i. 1.
l. 4. 5. 8


„re astronomica præ ceteris omnibus laudanda, unus bibliothecæ instat esse potest.“ ut ait Morhofius, Casatum, Philippum Bonani, Franciscum de Lanis, cujus fontibus (libro Magisterium naturæ & artis inscripto) plures recentiorum Physicorum suos hortulos irrigarunt, ex Italia: Fournierium, Claudium Miliet, de Chales, Pardies, Daniel, Tourne- mine, Regnault, Castel ex Gallia oriundos. Prætereo denique quam plurimos alios, quorum doctis laboribus hodierni eruditi plurimum debent: atque huic prolegomeno finem impo- no, id solum adjungens: tum demum maxima philosophiæ incrementa accessisse, ubi suam in tutelam summi terrarum Principes eandem susceperunt, ejusque commoda qua erectis Aca- demiis, qua constitutis doctissimorum virorum societatibus promoverunt, summo & litteras, & litteratos homines favore prosequentes; qua in re quid olim Carolus M. in Germania, Gallia, & Italia; quid deinceps in Italia Paulus II. P. P. & Leopoldus Magnus Hetruriæ Dux; in Anglia Carolus II.; in Gallia Ludovicus XIII. & XIV.; in Germania Leopoldus M. Imp. Rom. in Borussia Fridericus Rex; in Moscovia Petrus Imp. præstiterint, notum est: quanta vero ab Augusta Magnæ Theresiæ Nostræ munificentia in hanc Academiam profluxerint ornamenta, argumentum est non tam exiguo in opere pertractandum, quam grato omnium nostrum animo recolendum.



PROLEGOMENON

I N

LOGICAM.



§. XLIII.

MEntem, sive animam nostram facultate cognoscendi pollere, nemo est, qui in se non experiatur. Facultas hæc, etsi per sese ad veritatem tendat, frequenter tamen longo ab ea intervallo aberrat: normam igitur sequatur quampiam, necesse est, qua in operationibus suis dirigatur.

XLIV. Quamdiu naturali tantum prudentia regimur, normam hanc distincte non cognoscimus, neque rogati, cur hoc, vel illud ratiocinium vitiosum sit? rationem clare edicere possumus: fieri tamen interea potest, ut quis per longiorem usum, & exercitationem habitum quemdam, sive facilitatem obviam in compluribus rebus veritatem detegendi sibi comparet. Habitus hic ipsa est *logica naturalis*.

Quid
logica
naturalis?

XLV. Quodsi norma hæc distincte evolvetur, legesque, ex quibus coalescit, deducantur, oritur inde *logica artificiosa*, quæ pro-

Quid
artificiosa?

C 2

inde

inde aliud non est, quam scientia, quæ propositis explicate legibus facultatem cognoscitivam in cognoscenda veritate dirigit.

COROLL. 1. Logica artificiosa a naturali quoad substantiam non differt; eadem enim in uraque leges obtinent.

COROLL. 2. Leges, quas logica artificiosa perspicue proponit, ex ipsa naturali mentis constitutione desumendæ sunt, quas nimirum ipsum rationis lumen, experientiæ, & observationes, ac denique diuturna meditatio suppeditant.

Quæ
partitio
totius
operis?

XLVI. Ex data logicæ artificiosæ definitione palam fit, quid in ea pertrahere oporteat: agendum nempe est primum de facultate cognoscitiva, quæ dirigitur; tum de veritate, quæ cognoscitur; demum de ipsa veritatis cognitione, quæ expetitur. Atque hæc est generalis hujus operis partitio.

Quæ
utilitas
logicæ
artificio-
sæ?

XLVII. Utilitas logicæ artificiosæ latissime patet; absque ea enim non modo nemo in scientia quacumque profundam, solidamque eruditionem obtinere; sed neque in difficilioribus communis vitæ actionibus sat providus, cautusque esse potest; cum, qui sola utitur logica naturali, & minus a frequenti errandi periculo removeatur, & majori commissum errorem emendandi difficultate prematur.

COROLL. Logica igitur primo loco ante omnia severiora studia condiscenda est, quod & inde confirmatur: quia, antequam veritates speciales, quæ in aliis disciplinis occurrunt, investigentur, natura veritatis generatim spectatæ perspecta esse debet. Actum proinde agunt, qui cum Henrico Vinklero logicam metaphysicæ postponendam esse in ordinata studendi methodo contendunt.

SCHOL.

SCHOL. Logicam maximis passim laudibus efferi audias. Cicero eam vocat „artem „omnium maximam, sine qua nihil recte „excogitari, nihil acute dici possit, veri, „ac falsi disceptatricem, & judicem, “ S. Augustinus: disciplinam disciplinarum, scientiarum judicem, atque formatricem. “ Et vero non esse majora meritis hæc præconia vel exinde pater, quod ubi primum logica magis exulta est, omnes illico scientiæ reliquæ lætius efflorescere cœperunt. Instauratæ potro logicæ gloriam post Laurentium Vallam, Rudolphum Agricolam, Petrum Ramum, & Verulamium jure sibi vindicant Petrus Gassendus, Renatus Cartesius, auctorque artis cogitandi, quem alii Antonium Arnaldum; alii Nicolium; alii Trognyum, vel complures ex portu regio scriptores fuisse affirmant; hi tamen omnes efficere non potuerunt, ut logica eum splendoris gradum attingeret, ad quem ea subinde doctissimis Nicolai Malebranchii, Joannis Lockii, Buffierii, Honorati Fabri, Natalis Regnault, Fortunati a Brixia, Christiani Wolfii, Georgii Dariesii, Antonii Genuensis, aliorumque hac nostra ætate eruditorum elucubrationibus evecta est.

Qui Instauratores logicæ?

P A R S P R I M A

L O G I C Æ .

D E

FACULTATE COGNOSCITIVA MENTIS HUMANÆ.

§. XLVIII.

Quæ ope-
rationes
faculta-
tis co-
gnosciti-
væ.



Riplici modo mens nostra faculta-
tem cognoscendi, quam habet,
circa res cogitabiles exercet; vel
enim 1.) rem quamvis sibi
duntaxat repræsentat, atque in
rei sic repræsentatæ contemplatione quodam
modo conquiescit, tumque ea *apprehendere*,
vel *percipere*; actus vero ipse *simplex rei ap-
prehensio*, *perceptio*; *idea*, vel *notio* dicitur: ut
cum apertis oculis solem intueor: vel 2.) rei
ita apprehensæ aliquid per affirmationem ad-
dit, aut per negationem demit; tum ipsa *ju-
dicat*, actus autem *judicium* nuncupatur: ut
cum de sole prius simpliciter apprehenso co-
gito: *est rotundus*: vel *non est quadratus*: vel
3.) ex facto jam tali iudicio novum aliud de-
ducit, & tum ipsa *rationatur*, actus vero *ra-
tiocinatio*, sive *rationium* compellatur; ut
cum ex præcedenti iudicio infero: *ergo sol est
corpus sphericum, sive globus*.

Quæ co-
gitatio-
num si-
gna?

XLIX. Cogitata nostra cum aliis quoque
communicare oportet: istud absque signis sen-
sibilibus, quorum vices potissimum vocabula
subeunt, fieri non potest. Idea exprimitur
per

per terminum; iudicium per enunciationem :
 ratiocinatio per argumentationem.

SCHOL. Cum hac in parte de facultate cognoscitiva agendum sit (§. 46.), res ipsa postulat, ut harum trium operationum ab ea facultate elicitarum natura, proprietates, legesque, quibus reguntur, dilucide exponantur, ac suis etiam in locis addantur ea, quæ ad rectum signorum sensibilibus usum pertinent. Id quod jam ordine exsequemur.

Quod argumentum partem priorem?



C A P U T I.

D E

IDEIS, EARUMQUE OBJECTIS.

L. *Idea* est simplex rei cuiusdam repræsentatio in mente facta; ut cum mihi simpliciter solem repræsentō, & quasi mente intueor, habeo *ideam solis*.

Quid idea?

COROLL. *Idea* existit in mente: est proinde quid spirituale, seu spiritualis quædam mentis affectio.

LI. *Objectum* idæ est res quæcumque per ideam menti repræsentata. Sic idæ, quæ mihi solem repræsentat, *objectum* est sol.

Quid est idæ? id est objectum, & quod simplex?

COROLL. 1. Omnis res, de qua cogitari potest, potest nobis per aliquam ideam repræsentari, atque adeo objectum nostrarum idearum est omnis res cogitabilis.

COROLL. 2. Res cogitabilis vel actu existit; ut *hic mundus*; vel non existit quidem, at tamen potest existere, ut *mundus alter*; hinc

objectum nostrarum idearum aliud est *possibile*, aliud *existens*.

COROLL. 3. Nihilum, seu impossibile non est res cogitabilis, igitur per ideam representari non potest, hoc est: *Nihili nulla datur idea*.

SCHOL. Nimirum illud tantum percipio, quod mihi idea representat, & toties aliquid percipio, quoties habeo aliquam ideam. Jam fingamus, ideam quampiam representare nihil: igitur ope hujus ideæ percipio nihil; si vero hoc: tum nihil percipio, hoc est; nullam habeo ideam; nam *percipere nihil*, & *nihil percipere*, & *nullam habere ideam* prorsus idem sonant.

Quomodo igitur, inquires, cogito de nihilo? Quatenus cogitas de privatione, aut ablatione cujuspiam rei. Sic mons sine valle est nihilum, neque illius potes habere ideam, & quando cogitas: mons sine valle est impossibilis, idem est, ac si cogitares: mons necessario adjunctam habet vallem.

Quid
objecto-
rum no-
tæ.

LII. Nota dicitur id, per quod res una differt ab alia, estque vel *constans*, quæ nunquam a re abesse potest; vel *mutabilis*, quæ adesse, vel abesse potest. Constantes porro dividuntur in *essenciales*, & *attributa*; illæ primo concipiuntur; hæ ex illis profluunt. Similiter notæ mutabiles duplicis generis sunt; aliæ in ipsa re insunt; proptereaque *interne*, sive *modi* dicuntur: aliæ extrinsecus tantum rei cum alia comparatæ conveniunt, & *externæ*, sive *relationes* nuncupantur. Sic in homine nota essentialis est *vis sentiendi*, item *vis ratiocinandi*, attributum *capacitas eruditionis*, modus *actualis eruditio*, relatio denique *magnitudo ipsius*, vel *nobilitas*.

COROLL. Quælibet res cogitabilis ab omni alia differt: igitur certæ quædam notæ ei conveniunt;

niunt : cumque omnis res cogitabilis objectum
nostrarum idearum esse possit (§. 51. cor. 1.),
idem de quovis ideæ objecto sentiendum .

LIII. Ideæ inter se comparatæ vel quoad
modum repræsentationis, vel quoad objectum
repræsentatum differunt. Illa differentia *forma-*
lis, hæc *materialis* audit. Utraque attentionem
meretur .

Quæ &
quotu.
plex i-
dearum
Differen-
tia?

C A P U T II.

D E

F O R M A L I I D E A R U M D I F F E R E N T I A .

LIV. Idea *clara* est, quæ objectum ita di-
lucide repræsentat, ut illius ope id illico,
& omni tempore ab omni alio discerni queat :
quæ vero id non præstat, *obscura* dicitur . Sic
de *sole* omnes habemus ideam claram; at vero
obscuram *plantæ alicujus peregrinæ*, cum du-
bitamus, num eadem sit & alias visa .

Quid i-
dea cla-
ra & ob-
scura?

COROLL. Objecta idearum per certas notas di-
scernuntur (§. 52. cor.) : igitur necesse
est, ut idea clara notas objecti aliquo mo-
do repræsentet .

LV. Notæ objectorum repræsentari pos-
sunt vel simul omnes, & quasi in confuso ;
vel seorsum, & distincte : in casu priori idea
clara erit *confusa* : in posteriori vero *distin-*
cta . Sic de *coloribus* & *odnribus* habemus i-
deas tantum confusas; sed qui in *sole magni-*
tudinem, *figuram*, *splendorem*, *distantiam*,
motum discernit, habet solis ideam distinctam .

Quid
confusa
& distin-
cta?

COROLL. Idea distincta objecti complectitur in se ideas claras notarum objecti, atque ex iisdem quasi conflatur: sic idea solis distincta constat ex ideis claris magnitudinis, splendoris, figuræ, distantiae, motus solis. Contra idea confusa ex obscuris notarum ideis coalescit.

SCHOL. Qui ideam distinctam alicujus objecti habet, scit per accuratam notarum enumerationem illud explicare; secus, qui ideam habet solum confusam: sic nemo verbis alteri exponere potest, quid sit color albus, aut sonus, neque ulla declaratione ingenerari poterit aut cæco coloris albi, aut surdo soni idea. Patet hinc, qua sollicitudine philosophus ad comparandas sibi distinctas rerum ideas, ubi id fieri potest, eniti debeat, quodque signum sit manifestum, eum id genus ideas consecutum esse.

Quid
comple-
ta, & in-
comple-
ta?

LVI. Idea distincta dicitur *completa*, si tantumtaxat notas distincte repræsentet, quot sufficiunt ad objectum ab omni alio discernendum: in casu opposito est *incompleta*. Sic idea auri est *completa*, quæ distincte *colorem* ejus, & *gravitatem specificam* repræsentat, his enim duabus solum notis jam aurum ab omni alio metallo discernitur.

Quid a-
dæquata
& inadæ-
quata?

LVII. Cum notæ objecti seorsum, ac distincte repræsentantur; tum rursus harum notarum notæ ab se invicem discernuntur, vel non: si in quopiam objecto notæ notarum ab se invicem discernantur, idea distincta, quæ ita objectum repræsentat, est *adæquata*; si non, *inadæquata*. Sic qui in *solis magnitudine*, *figura*, *splendore*, *distantia*, *motu* novas notas discernit, ideam solis habet adæquatam.

COROLL. Idea adæquata objecti complectitur in se ideas notarum objecti distinctas, ac
ex

De Formali Idearum Diff.

ex iis quodam modo componitur. Sic idea adæquata solis constat ex ideis distinctis magnitudinis, splendoris, figuræ, distantia, motus solis. Contra idea inadæquata ex confusis notarum ideis coalescit.

SCHOL. Facile patet, in ideis adæquatis diversos perfectionis gradus dari; possumus enim ulterius progrediendo novas de notis notarum notas investigare, & sic porro: quæ idearum adæquatarum formatio a philosophis *idearum analysis* nuncupatur. Nec minus perspicuum est, scientiarum incrementa ab hac idearum analysi pendere, ut adeo in id præcipue incumbendum videatur, ut ideæ nostræ magis semper, atque magis adæquatæ evadant. At vero non tam primum est illuc pervenire: quare necesse est, ut antea in claris distinctisque ideis efformandis egregie exerceamur: eam in rem non inutiliter observabuntur sequentes

Leges de conformandis claris, & distinctis Ideis.

1.) Neque plura objecta, neque plures ejusdem objecti notæ simul contemplandæ sunt; est enim secundum vetus illud: pluribus intentus minor ad singula sensus.

2.) Objectum, quod contemplationi objicitur, illico in suas notas resolvatur, atque in earum quavis novæ ulterius notæ investigentur, quæ actio, quamdiu fieri potest, continuari debet.

3.) Attentioni, quæ requirit, ut mens longiore tempore in uno eodemque objecto contemplando defigatur, quæque vividis juvenum animis adeo difficilis videtur, omnino assuescendum cavendaque opposita eidem præcipitantia, quæ vel ex naturali quadam levitate, vel nimia ingenii fiducia potissimum oritur.

4.) Adjuvetur, si necesse sit, attentio symbolis algebraicis, aut geometricis, brevi in charta adnotatione, aut etiam imaginibus corporeis per phantasiam effictis, quæ tamen in rebus insensibilibus & rarissime, & cautissime adhibendæ sunt.

5.) Objectum expendendum in omnes partes versetur, comparaturque cum alijs aliunde notis, ut quid iis commune, quid diversum, quid cuius proprium sit, acutissime videatur.



C A P U T IV.

D. E.

MATERIALI IDEARUM DIFFERENTIA.

Quid determinatum?

LVIII. *Determinatum* hoc loco dicitur illud, quod, cum pluribus, iisque diversis modis esse possit, nunc hoc potius, quam alio modo est: sic marmor quoddam potest esse vel existens, vel tantum possibile: quadratum, vel rotundum, album, vel rubrum: in hoc, vel illo ædificio: in hoc vel illo ædificii latere: sit ergo existens, quadratum, album, in fronte palatii locatum: en marmor quoad existentiam, figuram, colorem, & locum determinatum.

Quid. objectum, & idea singularis?

LIX. Objectum quoad omnem sui partem determinatum *singulare*, vel *individuum*, uti & idea illud representans *singularis* audit. Sic idea *amici* mecum colloquentis singularis est.

SCHOL. Cogitanti perspicuum est, omnimodam alicujus rei determinationem aliud non esse, quam

quam collectionem certarum notarum, quæ ita eidem conveniunt, ut simul sumtæ nulli prorsus alteri convenire queant. Notæ hæc pervulgato illo versiculo continentur: *forma, figura, locus, tempus, stirps, patria, nomen*. Si jam porro attentionem nostram per res omnes existentes ducamus, nullo negotio deprehendemus, similem notarum collectionem cuiuslibet, quæ demum cumque ea sit, convenire: omnis proinde res existens singularis est, sive aliquod individuum: ut *Cicero, Cæsar, hoc palatium, hæc mensa, hic liber, hic equus, hic canis*. Atque inde patet, qua via perveniat ad ideas singulares: sensibus nimirum percipimus, ea quæ existunt, igitur usu sensuum comparantur ideæ singulares.

LX. Objectum non undequaque determinatum, sive *indeterminatum* est illud, in quo omnes determinationes, quæ sunt, aut esse possunt, non percipiuntur; cumque illud semper pluribus conveniat, *universale*, sive *commune*: ac idea id repræsentans *universalis* audit. v. g. objectum *homo* est quidem determinatum quoad notas (*vita, sensus, ratio*), quæ in eodem percipiuntur, non tamen quoad reliquas, ut *forma, ætas, doctrina, dignitas*, quæ per ideam *homo* non exprimuntur; est igitur *homo* objectum indeterminatum, & quia pluribus, nimirum Cæsari, Ciceroni, Cajo, & ceteris hominibus, convenit, universale, ac proinde etiam idea *hominis* est idea universalis.

Quid ob-
jectum,
& idea
universa-
lis?

LXI. *Abstrahere* dicimur, cum mentem nostram a consideratione aliorum objectorum, vel a contemplatione aliarum partium, sive notarum in eodem objecto avocamus, ut eam in unum aliquod objectum, vel in unam ejusdem partem, sive notam attentius defigamus. Hæc proinde *abstractio* quasi quædam mentis ab-

Quid ab-
tractio?

ab

ab aliis avocatio ut alia attentius meditemur. Sic dum in serie librorum *unum* præ reliquis considero, abstraho a *ceteris*, quos non considero: hominis mecum loquentis solam *eruditionem* admirans, abstraho ab illius *dignitate*, *pietate*, *forma*, *patria*.

COROLL. 1. Per abstractionem ex objecto singulari, sive undequaque determinato efficitur objectum indeterminatum, ac universale. Abstraho v. g. in objecto singulari *Cicero*, *principatum eloquentiæ*, *consulatum Romanum*, *civem Romanum*, *etatem*, qua vixit, ipsam denique *existentiam*, & acquirō objectum indeterminatum, ac universale *homo*.

COROLL. 2. Igitur etiam per abstractionem ab ideis singularibus ascendimus ad universales; est proinde hoc medium, & quidem unicum comparandi nobis ideas universales.

SCHOL. Universalia non existunt extra mentis nostræ conceptum, quidquid enim existit, singulare est, & undequaque determinatum (§. 59. Schol.), estque hoc ita evidens, ut omnis in contrarium disputatio inanis sit, ac futilis: ubi enim quæso, deprehendes talem aliquem, in quo id solum, quod per vocem *homo* exprimimus (*vita* nimirum, *sensus*, *ratio*,) insit, prætereaque nihil. Profecto hæ notæ, etsi insint in unoquoque homine, ita tamen cum aliis quemlibet determinantibus conjunguntur, ut ab iis realiter separari nequeant: patet inde, quid de secta Realium (§. 34.) sentiendum sit. Neque tamen propterea universalia in intellectus nostri figmentis censenda sunt, etsi enim ut ita abstracta non existant, existunt tamen reipsa in individuis ut conjuncta cum aliis notis determinantibus: usus præterea eorum est ingens, utilitas maxima in comparandis quibusvis scientiis, quæ omnes in veritatibus quibusdam uni-

ver-

versalibus consistunt . Denique & illud hic monuisse juverit , quæ extra mentis conceptum , sive nemine cogitante existunt , dicuntur a philosophis *actus* , *actualiter* , *physice* , *realiter* , vel etiam *a parte rei* existere ; quæ vero soli mentis nostræ conceptui existentiam debent , *logice* , *mentaliter* , aut *ratione nostra* , sive *nostro cogitandi modo* secundum eosdem existunt .

LXII. *Compositio* mentis est ea actio , qua per omnes objecti notas cogitando progredimur , dum tandem per continuam novarum notarum adjectionem ex objecto indeterminato efficiamus objectum undequaque determinatum , sive individuum . Sic ex objecto indeterminato *homo* , quod menti obversatur , per continuam notarum determinantium additionem mente factam , (v. g. *existentiam* , *etatem* , qua vixit , *locum* , *jus civitatis Romane* , *consulatum Romanum* , *principatum eloquentiæ* .) efficio objectum singulare *Cicero* : Quid compositio?

COROLL. I. *Compositio* , cum via contraria incedat , directe opponitur abstractioni (§. 61) : sicut igitur per abstractionem ab ideis singularibus ascendimus ad universales (§. cit. cor. 2.) , ita vicissim per compositionem ab ideis universalibus descendimus , ac veluti regredimur ad ideas singulares . Hinc compositio est via altera obtinendi ideas singulares (conf. §. 58. schol. fin.)

COROLL. 2. Si per compositionem objectum ideæ universalis variis modis determinetur , pervenitur successive ad singula individua , quibus illud objectum commune est , quæ propterea *subiecta* vel *inferiora* ideæ universalis , atque in ea *includi* dicuntur . Sic ideæ universalis *homo* subiecta sunt , *Cæsar* , *Cajus* , *Cicero* , & quævis individua humana ; si enim objectum indeterminatum *homo*

va-

variis modis. v.g. per certum *statum*, *tempus*, *patriam*, *nobilitatem*, *eruditionem* &c. &c. determinem, veniam successive ad *Cæsarem*, *Cajum*, *Ciceronem*, & reliqua individua humana, quæ in hac idea universali includuntur.

Quid i-
dearum
compre-
hensio &
extensio?

LXIII. In qualibet idea universali duo sunt, quæ attentionem merentur. *Comprehensio*, quam constituunt notæ omnes collectim sumtæ, quæ per ideam repræsentantur: sic ideæ universalis *homo* comprehensionem absolvunt hæ notæ: *vita*, *sensus*, *ratio*, in ea repræsentatæ. *Extensio*, quam efficiunt subjecta ipsius ideæ simul sumta, id est, omnia illa individua, quibus notæ illæ repræsentatæ conveniunt: sic ad extensionem ideæ *homo* pertinent omnia *individua humana*, quibus supradictæ notæ conveniunt.

COROLL. Idea igitur universalis ad ea omnia se extendit, quæ in se includit (§. 62. cor. 2.).

SCHOL. Id nimirum obtinet, si idea universalis secundum se accipiatur, sive ut ajunt, secundum totam suam extensionem; contingit autem frequenter, ut eam solum secundum partem aliquam extensionis usurpeimus, ad quod indicandum utimur illis particulis *aliquis*, *quidam*, *nonnullus*. Atque idea hoc modo accepta *particularis* audit; particulæ vero illæ dicuntur *signa*, sive *notæ particularitatis*; ut cum cogito: *aliquis homo*, ideam habeo particularem.

Quid i-
dea par-
ticularis?

Quæ
compre-
hensio-
nem in-
ter, ac
extensio-
nem pro-
portio?

LXIV. *Comprehensio* & *Extensio* inter se comparatæ ejus sunt naturæ, ut una aucta minuatur altera, & vicissim imminuta una augeatur altera: sic si in idea *animal*, quæ *vitam* & *sensum* repræsentat, augeatur *comprehensio* adijciendo nimirum notam *ratio*, minuitur *extensio*; nam hæ notæ *vita*, *sensus*, *ratio*, solis *hominibus*, & non etiam, *belluis*, quæ ad

ex-

extensionem ideæ *animal* spectabant, conveniunt; item si in idea *homo* minuaturs comprehensio, rejiciendo notam *ratio*, augetur extensio; nam *vita* & *sensus* non solis *hominibus*, sed *belluis* etiam conveniunt: & ab opposito, si in priori restringi debeat extensio ad solos *homines*, augenda erit ejus comprehensio addendo notam *ratio*, & si in posteriore augeatur extensio, ut nempe ad eam non soli *homines*, sed *bruta* quoque pertineat, minuenda erit comprehensio resecando nimirum notam *ratio*.

COROLL. 1. Si igitur comprehensio augeatur, quantum est possibile, minuitur contra extensio, quantum fieri potest: id fit, cum ex idea universali per compositionem ad singulariorem descendimus (§. 62. cor. 1.): Quare idea singularis habet comprehensionem maximam, omnes nimirum notas objectum undequaque determinantes; extensionem vero minimam; aut quasi nullam, ad unicum nimirum objectum, quod est ipsum illud individuum.

COROLL. 2. Quo magis minuitur comprehensio, eo idea, crescente extensione, fit magis universalis, atque adeo idea, quo magis universalis est, eo pauciores in se notas complectitur: jam vero quo pauciores uno, eodemque tempore notas contemplor, eo accuratius eas intueri, ac pervidere possum (§. 57. schol. l. 1.). Patet igitur hinc iterum egregius usus, ac utilitas Idearum universalium in procuranda sibi quacunque eruditione (conf. §. 61. scol.).

LXV. Objectum universale in tres præcipue classes distribui potest; est enim vel *species*, vel *genus*, vel *differentia*. Atque hinc etiam idea universalis triplex est: *specificæ*, *genericæ*, & *differentialis*.

LXVI. *Species* est illa nota essentialis, (seu plu-

Objectum universale
triplex?
Quid species ejusque ideæ

plures per modum unius consideratae,) in qua plura individua inter se comparata perpetuo conveniunt, & idea eandem notam repræsentans dicitur *specificæ*: Sic *Cajus*, *Cicero*, *Cæsar*, & reliqua individua humana, si inter se conferantur, perpetuo in eo conveniunt, quod habeant *vitam*, *sensum*, & *rationem*; quæ vocabulo *homo* exprimuntur: igitur *homo* est species. Item individua brutorum perpetuo in eo conveniunt, quod habeant *vitam*, & *sensum* absque *ratione*, quod per vocem *brutum* indicamus: igitur *brutum* est species.

Quid genus ejusque idea?

LXVII. Genus est illa nota essentialis, (seu plures per modum unius acceptæ,) in qua duæ vel plures species inter se collatæ perpetuo conveniunt, & idea eandem notam repræsentans est *generica*. Sic *homo* comparatus cum *bruto* in eo perpetuo convenit, quod habeat *vitam* & *sensum*, quæ per vocem *animal* denotantur: igitur *animal* est genus.

Quotumplex genus?

LXVIII. Genera ipsa inter se collata rursus in nota quadam essentiali perpetuo convenire possunt: ea nota constituit *genus* quoddam *altius*, seu *superius*; est igitur *genus altius* seu *superius* ea nota, (vel plures in unam collectæ,) in qua duo genera inter se comparata perpetuo conveniunt: idem de idea eandem repræsentante sentiendum. Sic inventum *genus animal*, seu *vivens sensitivum* collatum cum alio genere *vivente non sensuivo* convenit in eo, quod *vivat*, igitur *vivens* est genus *altius*, quam *animal*.

SCHOL. I. Cum eodem modo ex genere jam superiore ad aliud rursus, per collationem nempe generum superiorum inter se, deveniri queat, diversæ dantur generum classes, quas ita distribuimus, ut id, quo altius nullum est *supremum*: id, quod nullum genus infra se habet, *infimum* vel *proximum*: reli-

liqua, quæ his intercipiuntur, quorumque semper unum altero est superius, generarum *subalterna*, sive *intermedia* compellemus. Sic genus hominis supremum est *ens*, infimum seu proximum *animal*: *subalterna* directe ascendendo: *vivens*, *substantia*, *exsistens*.

SCHOL. 2. Genera inferiora respectu superiorum, sub quibus continentur, nonnumquam species: respectu vero inferiorum, quæ sub se continent, genera dicuntur; tum vero ad confusionem evitandam ea species, quæ individua solum sub se complectitur, species *infima* audit. Sic *vivens* respectu *substantiæ* est species, & genus respectu *animalis*: *animal* est species respectu *viventis*, & genus respectu *hominis*: *homo* vero est species infima.

SCHOL. 3. Prout diversorum adjunctorum, ac proprietatum ratio habetur, ita quoque diversa rerum genera, ac species statui possunt. Sic attendentes ad brutorum diversitatem deprehendimus classem unam aliquam, quam nomine equi; aliam quam nomine canis; aliam, quam leonis, cervi &c. designamus: erunt igitur species, *equus*, *canis*, *cervus*, *leo* &c., quæ inter se collatæ sub genere *bruti* continentur, ac proinde *brutum* erit genus, quod (§. 66.) pro specie assumimus. Item si in ipsis canibus, equis, &c. diversitates varias examinemus, novas *canum*, *equorum* &c. species inveniemus, quarum respectu *canis*, *equus* &c. erit genus. Similiter bruta possunt dividi in *terrestria*, *aerea*, *aquatica*, quæ singula sunt genera sub genere superiore *bruti* contenta, & alia adhuc genere infra se habentia, ut eorum, quæ quatuor pedibus instructa sunt, quæ repunt &c. Patet igitur in statuendis speciebus, ac generibus plurimum ab arbitrio nostro pendere. Id unum tamen hic monitum velim, ut in subordinandis generibus accura-

ta comprehensionis ideæ ratio semper habeatur, atque secundum eam ita disponantur genera, ut quo sunt altiora, eo minorem habeant comprehensionem, & majorem extensionem.

Quid,
& quotu-
plex dif-
ferentia
ejusque
idea?

LXIX. *Differentia* est illa nota essentialis, per quam individuum ab individuo: species a specie: genus a genere differt. Prima vocatur *individualis*, seu *numerica*; altera *specificæ*, ultima *genericæ*. Idea eam notam repræsentans pariter *differentialis* audit. Sic differentiam individualement inter *homines* constituunt notæ illo versiculo contentæ (§. 59. schol.); differentia specifica inter *hominem* & *brutum* est *ratio*, & differentia generica inter *animal*, & *plantam* est *sensus*.

SCHOL. Res dicuntur *toto genere* differre, cum sub eodem genere proximo non continentur: sic *homo* toto genere differt a *planta*, quia ille pro genere proximo habet *animal*, hæc vero *vivens*.

Quod
concre-
tum &
abstra-
ctum?

LXX. Quatenus nota cum objecto, quocum conjuncta est, ut conjuncta accipitur, eatenus objectum dicitur *concretum*; ut *marmor rotundum*, *homo doctus*: *abstractum* vero, dum nota, absque objecto, vel objectum absque nota, quocum realiter conjuncta est, consideratur: ut *rotunditas*, *doctrina*.

Quotu-
plex con-
cretum?

LXXI. In concreto quolibet duo attendenda sunt: *subiectum*, & *nota*, seu ut ajunt, *forma*, quæ cum illo conjungitur. Et quia tribus diversis modis forma cum subiecto conjungi potest, triplex inde oritur concretum. *Metaphysicum*, quando forma a subiecto non reapse, sed nostro solum cogitandi modo distinguitur, & sic per cogitationem separata eidem quasi inhærere a nobis concipitur: e-
jus-

jusmodi sunt omnia genera, & species, ut *animal*, *homo*; nam notæ in iis repræsentatæ reipsa inter se non differunt. *Physicum*, cum forma a subjecto, cui inhæret, potest separari: ut *homo doctus*, *corpus rotundum*. *Logicum*, si forma subjecto non inhæreat, sed mente duntaxat nostra ad illud referatur: ut *cognitum*, *volitum*, *desideratum*, *visum*, *auditum*; cognitio enim, & volitio menti inhærent quidem, referuntur tamen a nobis ad rem, quæ cognitione, aut volitione attingit.

LXXII. Idea, quæ objectum concretum repræsentat, pariter *concreta*; quæ abstractum, *abstracta* dicitur: sic idea *hominis docti* *concreta*; *doctrine* vero *abstracta* est.

Quid
idea con-
creta &
abstracta?

COROLL. 1. Universim illa idea est *concreta*, quæ conjunctim exhibet ea, quæ reipsa conjuncta sunt; & *abstracta*, quæ conjuncta separatim repræsentat.

COROLL. 2. Eadem idea potest sub diverso respectu simul *concreta*, & simul *abstracta* esse: sic idea referens *marmor rotundum* *concreta* est, quatenus *rotunditatem* conjunctim cum *marmore* repræsentat; & *abstracta*, quatenus *marmor rotundum* ab aliis notis reipsa conjunctis v. g. *magnitudine*, *colore* &c. separat.

COROLL. 3. Omnes ideæ universales (§. 60.) *abstractæ* sunt; in iis enim nota pluribus communis, ut separata ab aliis, quibuscumque reapse conjuncta est, repræsentatur.

LXXIII. Sicut res extra nos existentes percipimus, ita periter ea, quæ intra nos, seu in anima nostra insunt, aut fiunt, idearum nostrarum objecta esse possunt: horum objectorum ideæ, cum reflexione supra nosmetipsos facta obtineantur, *reflexa* dicuntur. Id ea proinde *reflexa*, quæ & *sensus intimus*, & *conscientia* frequentius compellatur, ea est,

Quid
idea re-
flexa?

est, cujus ope existentiam, ideas, ceterasque mentis nostræ mutationes, seu affectiones percipimus.

SCHOL. In usu idearum, de quibus hoc in capite tractatum est, graviores nonnumquam errores subrepunt; quos ut facilius evites, sequentes te docebunt.

Leges de usu idearum singularium, abstractarum, & universalium.

1.) Ideis singularibus, quas per compositionem mentis efformamus (§. 62. cor. 1.), non semper responder objectum reipsa existens; unde ex eo solum, quod rei alicujus ideam claram, ac distinctam concipiam, inferre nequeo, realiter existere; sic concipio *montem aureum*, quin is propterea uspiam existat.

2.) Idea abstracta ea separat, quæ reapse conjuncta sunt (§. 72. cor. 1.): igitur ejus quoque objectum ita in se constitutum non est, prout repræsentatur: sic non existit *rotunditas sine corpore rotundo*, *numerus sine rebus numeratis*, aut *motus sine re mota*; ac universe nulla forma sine suo subjecto, qua in re veteres philosophi admodum hallucinati sunt.

3.) Ideæ abstractæ de se mutuo affirmari nequaquam possunt, cum quælibet idea abstracta necessario sit hæc, & non alia idea: sic, licet cum veritate cogitare queam: *hic doctus est pius*, aut *hic homo est doctus*: nequeo tamen affirmare: *hæc doctrina est pietas*, aut *hæc humanitas est doctrina*. Quod si quandoque contrarium videatur contingere, id inde est, quod idea aliqua abstracta pro metaphysice concreta usurpetur; ut cum genus de specie, vel alio genere affirmatur: verb.

verb. grat. *homo est animal*, vel *temperantia est virtus*.

4.) Ut rectus nostrarum cogitationum ordo habeatur, a quo omnis in literarum studio progressus; & doctrinæ soliditas pendet, ordinentur ideæ universales in mente secundum majorem earum universalitatem, hoc est, prior semper locus ei tribuatur, quæ majorem habet extensionem; tum succedat ideæ minoris extensionis, sic *vivens* ante *animal*, & *hoc* ante *hominem* concipiatur (conf. §. 68. schol. 3. fin.).

C A P U T IV.

D E

I D E A R U M S I G N I S.

LXXIV. *Vocabula* sunt soni articulata voce prolata, quibus ideæ mente conceptas significamus. Quid
vocabu-
lum?

COROLL. 1. Unaquæque ideæ, dum in mente existit, individua, seu undequaque determinata est (§. 59. schol.): igitur quodlibet vocabulum ideam quandam determinatam; seu ut loquimur, in individuo denotat, ac veluti determinat. Atque inde est, quod vocabula apud philosophos more recepto *termini* audiant. Quid
termi-
nus?

COROLL. 2. Ideæ res ipsas repræsentant: igitur termini mediantibus ideis res quoque ipsas secundo denotant.

SCHOL. Patet id ex quotidiana sermonis consuetudine; etenim dum sermocinantem audimus jure quodam exigimus, ut is & rebus ipsis, & suæ menti congruenter loquatur, eumque, qui

in

Lucret.
de nat.
ven. l. 5.

Herodot.
l. 2.

Quotu-
plex ter-
minus?

in priore deficit ignorantia: qui in posteriore, mendacii rerum agimus. Quod vero ad primam vocabulorum originem attinet; uti dubio caret, primos homines ab ipso auctore Deo ea fuisse edoctos, ita pariter perspicuum est, eorum vocabulorum, quæ progressus temporis obtinuerunt, significationem ab arbitraria, ac libera prorsus populorum institutione, & retentione provenire. Non moror hic insulsam Epicureorum opinionem, qui homines ex tellure progenitos, prorsusque elingues primum statuerunt; tum vero sonos, quos aliunde perceperint, fuisse imitatos, tandem in ordinatos prorupisse, eosque commodi, delectationisque causa perpolivisse subinde, ac multiplicasse. Nec minus a vero aberrant ii, qui cum Psammetico Ægypti Rege primos homines lingua quadam naturali, ac vocabulis, ipsam rerum naturam exprimentibus usos fuisse autumant, quam linguam etiamnum infantes locuturos contendunt, si ab omni ceterorum hominum commercio remoti educarentur. Nam si id ita habeat, cur non una adhuc etiam inter homines lingua toto in orbe obtinet? cur surdi, quorum ceteroquin lingua præpedita non est, loquela deprivantur? quod demum etiam necessaria vocabula inter, ac rerum naturas connexionis vestigium deprehendere licet? & nonne naturalem plurimorum rerum constitutionem ignoramus, quas tamen certis vocabulis perpetuo designamus?

LXXV. Termini pro diversitate idearum, quas denotant, in diversa genera tribuuntur: est nimirum *singularis*: ut Cicero, *hic homo*: *universalis*, isque vel *genericus* ut *animal*: vel *specificus*, ut *homo*: vel *particularis*, ut *aliquis homo*: *concretus*, ut *doctus*: *abstractus*, ut *doctrina*. Addi etiam potest *simplex*, & *complexus*; ille uno vocabulo, ut *homo*: hic plu-

pluribus simul sumtis constat: ut *homo doctus*,
marmor rotundum.

SEHOL. Contingit videlicet frequentius, ut nos
deficiat vocabulum ad ideam mente efforma-
tam accurate exprimendam aptum: quo in
casu aliud insuper, vel etiam plura in con-
sortionem assumere cogimur, ut ea tandem
duorum vel plurium vocabulorum conjunctio
exsurgat, qua cogitationem nostram ad a-
mussum cum aliis communicemus. Ea res vi-
detur occasionem dedisse Lockio, aliisque;
ipsas quoque ideas in *simplices*, & *complexas*
distribuendi, quarum illa termino sim-
plici, altera termino complexo exprimere-
tur, tametsi id pro omni absolute casu ne-
cesse non sit; nam cum ex mente Lockii il-
la idea dicatur *simplex*, in qua ne mente
quidem plura discernere licet, ut sunt *ideæ*,
colorum, *odorum*, *sonorum*, *gaudii*, *tristitiæ*,
verbo omnium *sensationum* nostrarum; *com-
plexæ* vero, in qua contrarium obtinet, ut
idea solis, *adificii*, *hominis*, fieri utique, &
quidem frequentius potest; ut etiam idea
complexa unico solum vocabulo accurate de-
signetur. Hanc porro idearum divisionem
adeo non improbo, ut eam potius retinen-
dam esse censeam; neque enim in re quid-
piam novi continet: si quidem idea simplex
cum confusa; complexa vero cum distincta,
vel adæquata eadem est, ut expendenti (§§ 55.
& 57. cum coroll.) patebit: quate ipsis hisce
vocabulis quandoque in sequentibus utar, ut
eo facilius aliorum quoque auctorum, ac præ-
cipue Lockii mentem in opere *de intellectu
humano* expressam tiro assequatur. Vide
Leibnitium.

*Novum
sua signi-
ficata sur-
t' intend.
hum. liv.
2. ib. 2.
Quid ter-
minus
materialis
est, &
animalis?*

LXXVI. Terminus quilibet duas in mente
idea excitat; alteram sui ipsius, quatenus est

Storchenau Log.

D

sq-

sonus articulatus, alteram rei, quam significat. Si primo modo spectetur, sumitur *materialiter*; ut cum dico: *Cicero est vox trium syllabarum*; si altero: *formaliter*, ut cum dico: *Cicero est princeps eloquentiæ*.

Quotu-
plex ter-
minus
formalis?

LXXVII. Terminus formaliter acceptus vel denotat aliquam reipsa ideam, & *positivus*, ut *res*, *domus*, *Cicero*: vel absentia alicujus ideæ, & *negativus*, ut *nihil*, *ignorantia*, *sterilitas*, *tenebræ*: vel nullam nullo modo ideam, & *inanis* dicitur, ut *circulus quadratus*, *mons sine valle*, *atramentum album*, *ferrum ligneum*, & quæcumque sunt impossibilia, cum impossibilibus, sive nihili nulla sit idea (§. 51. cor. 3. & schol.)

SCHOL. Dici nequit, terminos negativos ad nullam ideam proprie pertinere, aut nullam prorsus significare, nam si hoc verum foret, nihil absolute significarent; licet igitur positivam ideam non exprimant, referuntur tamen ad ideas positivas, earumque absentiam designant, Contra terminus, quem *inane* dicimus, est revera inanis sine mente sonus; illo enim ita tantum utuntur, qui, dum ideam quampiam sibi habere videntur, reapse nullam habent, apparentem tamen eam ideam, quam Wolfius propterea *fallacem*, sive *deceptricem* appellat, aliquo vocabulo exprimere nituntur.

Quotu-
plex ter-
minus
positivus?

LXXVIII. Terminus positivus, qui constanter eandem ideam invariata denotat, *fixus* compellatur, estque vel *proprius*, si uni, eademque rei significandæ semper inserviat, ut *Cicero*, *Plato*: vel *univocus*, si pluribus rebus sub eadem significatione tribuatur, ut *homo*, *animal*, & omnia vocabula generum, & specierum. Qui vero non constanter eandem ideam, sed modo hanc, modo illam significat:

De Idearum Signis.

vagus, vel *equivocus* dicitur: ut *mundus*, quæ vox jam solum globum terraqueum, jam collectionem omnium corporum mundanorum, jam totam rerum creatarum universitatem notat.

LXXIX. Terminus *equivocus* vel casui, vel consilio originem suam debet. *Casu equivocus* est, cum multiplicis significationis ratio præter arbitrium primorum linguæ institutorum dari nulla potest, ut *calx*, *liber*. *Consilio equivocus* est, cum res diversæ, quibus idem terminus tribuitur, aliquam inter se convenientiam, similitudinem, sive, ut ajunt, analogiam habent, unde nominatim hic terminus etiam vocatur *analogus*, ut *ardens*, qui de corpore ignito, & homine irato propter similitudinem agitationis dicitur; *sanus*, qui homini, colori vultus, medicinæ, & pulsui arteriæ tribuitur propter aliquam licet diversam ad sanitatem relationem, item *caput*, *pes*.

Quotuplex *equivocus*?

LXXX. Dici quoque non absque ratione potest, terminum nonnumquam errore fieri *equivocum*, cum nempe ad unam quidem rem significandam a pluribus assumitur, reapse tamen diversas in se res denotat, idque obertoneam de natura rei significandæ opinionem, qua eo vocabulo utentes imbuti sunt; id genus est vox *Deus*, quam idololatæ ex erroneo circa naturam divinam judicio etiam statuis manufactis; impius vero Spinoza toti mundo aspectabili attribuit; item terminus *vera religio*, cum cuiuslibet sectæ homines suam religionem veram prædicent, quod tamen de sola Romano-Catholica ex vero dici potest.

LXXXI. Vocabulis ideas mente conceptas significamus (§. 74.): igitur non sunt signa idearum, quæ in audientium animis existunt; sed earum duntaxat, quas loquens in mente habet, quasque per eadem exprimer cupit.

Quas ideas vocabula significant?

COROLL. 1. Cum pro diversa cognitione diversæ in diversis hominibus de eadem re idæ sint, necesse est, idem vocabulum a diversis pronunciatum diversum etiam sensum contineat: sic infans in metallo, quod audit *aurum* compellari, nihil observat præter *fulgentem quemdam colorem flavum*; alius præterea *gravitatem specificam majorem*, tertius *malleabilitatem*, quartus *ductilitatem*, quintus *solubilitatem in aqua regia*, & forte plura ejusmodi cognoscit: omnes hi data occasione pronunciant hanc vocem *aurum*; quare evidens est in cujuslibet ore per idem vocabulum aliam ideam multum discrepantem exprimi; hinc videmus ab infantibus quamlibet rem, quæ simili colore imbuta ipsis occurrit, aurum vocitari.

COROLL. 2. Si igitur verum vocabuli significatum determinare velis, ut aliorum sensa assequaris, noli ea interpretari ex propriis ideis, sed ex scribentis, aut loquentis mente; sic si audis enunciari vocabulum *Deus*; vide, num is, qui eo utitur, Idololatra? an Spinozista? an Christianus sit?

SCHOL. Verum res hæc multis nonnumquam difficultatibus obsepta est, propterea præcipue, quod idæ nostræ, dum aliorum vel scripta legimus, vel sermones audimus, latenter subrepunt, efficiuntque, ut aliorum sensa in nostram sententiam iniquissime detorqueamus. Inde certo evenit, ut passim experiamur, multos etiam ex doctioribus in antiquis philosophorum scriptis ea ad præconceptam suam opinionem stabiliendam invenire, de quibus ii ne somniarunt quidem. Exemplo sit Cudvorthus, qui dum seu pro philosophia, ut ait, corpusculari, seu pro natura genitrice acerrime depugnat, eas opiniones apud omnes Græcorum philosophos se deprehendisse sibi videtur, quod tamen quam

quam falsum sit, Cl. Moshemius in eruditissimis suis adnotationibus commonstravit. Curandum itaque, ut animo ab omnibus ideis vacuo ad sermones audiendos, aut legendos libros accedamus, neque alias vocabulis ideas substituamus, atque eas, quas auctorem ipsum in mente habuisse expensis omnibus simillimum vero est. Sed hac de re in ultima parte plura dicemus.



C A P U T V.

D E

VOCABULORUM USU, ABUSU, EJUSQUE REMEDIIS.

LXXXII. Vocabula sunt signa idearum, quas mente concipimus (§. 74.): hæc porro signa vel ad nos tantum, vel ad alios referuntur. Quatenus ad nos: memoriæ inserviunt; cum enim a pueritia assueverimus suam cuilibet vocabulo ideam affigere, nexus hic ideam inter, ac vocabulum, licet arbitrarius sit, labente tamen tempore ita invalescit, ut in naturalem propè abeat. Hinc fit, ut numquam fere sine vocabulorum usu etiam taciti cogitemus, & frequenter vocabula prius animo occurrant, quam ideæ ipsæ.

Quis vocabulorum usus comparate ad nos?

SCHOL. In hoc vocabulorum usu non est magnopere laborandum circa eorum delectum, neque metuendum, ne iis male utendo in errorem prolabamur; cum enim nobis, non aliis loquamur, omnesque soni æque indifferentes sint, quodlibet vocabulum aptum erit ad ideam, quam cupimus, in memoriam revocandam, si modo id observemus,

ut constanter eandem eidem vocabulo subi-
ciamus.

Compa-
rate ad
alios?

Quota-
plex fer-
mo?

LXXXIII. Quatenus hæc signa ad alios re-
feruntur, communicationi inserviunt: sermones
enim instituendo per vocabula aliis cogitatio-
nes nostras manifestamus. Est porro sermo no-
ster vel *civilis*, quem in usu quotidiano, &
ordinario cum hominibus commercio adhibe-
mus, ut negotia nostra pertractemus, & reli-
qua vitæ civilis commoda procuremus: vel *phi-
losophicus*, quos in scientiis utimur, dum vel
veritatem ipsi quærimus, vel inventæ jam alios
quoque participes efficere studemus, vel *æsthe-
ticus*, quem amœniores litteræ deprecant.

SCHOL. Civilis sermo magnam accurationem
haud postulat; facile enim intelligimus alios,
& intelligimur, cum de rebus ad communes
vitæ usus necessariis agitur. Leges, quibus
æstheticus adstringitur, separata ejusdem no-
minis disciplina subministrat. Restat igitur,
ut vitia, quæ in philosophico potissimum ser-
mone cavenda sunt, non nihil expendamus,
ac opportuna simul remedia suppeditemus.

Quæ in
eo vitia,
& quo-
modo vi-
tanda?

1.) Nonnulla ex naturali vocabulorum im-
perfectione ortum ducunt; ipsa quippe eorum
natura efficit, ut plurimorum significatio val-
de dubia, ac incerta evadat. Et primum qui-
dem, cum vocabulorum numerus relate ad i-
deas, quas mens humana sibi comparare potest,
admodum exiguus sit, necessitate quadam com-
pellimur, ut diversas, ac multum etiam discre-
pantes inter se ideas una, eademque voce ex-
primamus. Deinde vero ut loquentis sermo ri-
te intelligatur, requiritur, ut ideam, quam
vox quælibet significat, accuratissime concipiamus, ac mente retineamus: id vero est,
cujus exsecutio quandoque difficillima evadit,
ac

ac præcipue quidem in tribus casibus. 1.) Quando ideæ per voces significandæ admodum complexæ, & ex quam plurimis partibus quasi compositæ sunt; inde sæpius contingit, ut vix duo homines eandem prorsus, invariataque de eadem re ideam habeant, etsi eodem utantur vocabulo: tot, tamque diversæ populorum opiniones in rebus quam plurimis, præsertim moralibus, id luculente evincunt, ut cum quæritur, *quid justum, injustumve sit?* 2.) Quando ideæ partiales, ex quibus una complexa consurgit, seu quando notæ illæ, quæ distinctam objecti ideam efficiunt, absque naturali inter se connexionem prorsus ex arbitrio, atque sine respectu ad objectum reipsa existent colliguntur, sicque collectæ certo designantur vocabulo; sicut enim hæc idearum colligatio sine certa lege fit, ita prorsum est, ut termini eandem denotantis significatio diversa sit in diversis mentibus: ejusmodi sunt termini *honor, gloria, gratitudo*. Atque inde est, quod veterum scripta tantum quandoque obscuritatem præferant, quam doctorum commentationes adeo non tollunt, ut etiam augeant. 3.) Quando significatio vocis refertur quidem ad objectum reapse in natura existens, cujus tamen interna, ac realis constitutio nos latet; id contingit vocabulis fere omnibus, quibus corpora naturalia exprimimus: sic quis determinet, quam accurate ideam terminus *aurum* designet? an in ea solus color cum soliditate reluceat? an etiam *ductilitas? gravitas? malleabilitas? solubilitas in aqua regia?* num aliæ præterea proprietates solis fortasse chemicis notæ?

Huic porro obscuritatis ex naturali vocum imperfectione oriundæ ex parte medemur, si vocabula, quibus utimur, accurata definitione declaremus, atque hac ratione eorum significatum determinemus; si enim notæ omnes,

quas una idea complecti volumus, enumerentur, evanescet difficultas prope omnis, quam nos audiens experitur in eo, ut tot solum ideas partiales, nec plures, nec pauciores, hæc & non alias in unam complexam componat: sic non est timendum, ne enunciatis vocabula, *gloria*, *benefactas*, *aurum* non rite intelligat, si enumerando notas omnes quamlibet ideam his terminis subjectam distincte declararem. Quodsi talis notarum enumeratio fieri nequeat, ut contingit in omnibus ideis confusis, siue simplicibus, obscuritas tolletur quandoque adhibendo vocabulum synonymum, quod vulgo notius esse solet; semper vero, & certius vel designando aliquod subjectum auditori alioquin non incognitum, in quo objectum illius ideæ simplicis deprehendatur: vel ponendo etiam ante sensus ipsum subjectum, quod sua impressione eam in alterius mente ideam exciter: sic si quis ignoret, quis sit *color caruleus*, jubendus est de die, tempestate admodum serena cælum intueri, vel vero corpus aliquod eo colore imbutum ante ipsius oculos ponendum.

2.) Alii vocabulorum abusus partim ex voluntaria socordia, partim ex neglectu debite attentionis, partim aliis etiam ex causis proficiscuntur. Abutimur nimirum vocabulis, cum iis claram, aut distinctam ideam non affigimus, aut, quod deterius est, prorsus nullam, ut termini enunciati sint inanes sine mente soni. Vitium hoc ex eo potissimum oritur, quod a teneris annis voces prius memoriam imprimamus, quam ideam per eas significatam accurate in mente conformemus; immo per longam ab ipsa pueritia consuetudinem habitum quemdam contrahimus, vocabula quædam ideo solum pronunciandi, quod ad linguam veniant, quin unquam de eorum significatione determinanda solliciti simus, quo

quo fit, ut persæpe non tam hominum, quam psittacorum more loquamur. Sed & pertinacia, qua nonnulli opinioni etiam falsæ adhærent, frequenter in causa est, ut ejusmodi vocabula excogitentur, tamquam firma desperatæ causæ propugnacula, intra quæ ab adversariorum telis sese tutos existimant. Scateant certe terminis inanibus multorum, præsertim veterum philosophorum scripta, qui non alio ex fine conficti videntur, quam ut non intelligantur, litesque, ac disputationes, in quibus fere solis doctrinæ profunditatem reposuerunt, diutius protrahantur.

Sed promptum est huic vitio remedium: prius ideam in mente concipiamus, tum de signo, quo ea exprimatur, solliciti simus; ab ideis enim vocabula dirigi, ac ordinari debent, non vicissim a vocabulis ideæ, quippe ideas ex verbis, non verba ex ideis discimus. Oportet igitur ideas absque vocabulorum adjuumento efformare, ita ut menti nostræ repræsentemus id, quod de qualibet re cognoscimus, quin sonus, compositio, aut vocabulorum suavitas quidpiam immutet, addat, aut minuat ex eo, quod antea nitide, ac distincte concepimus. Id porro eo majori cura præstandum erit, quo idea enuncianda magis fuerit complexa: quam multi quotidie vocem *justitia* usurpant, qui tamen rogati, quam idearum collectionem per eam significant, responsi loco tacere coguntur, quod nempe ideas illas partiales, quæ hanc complexam ingrediuntur, numquam clare conceperunt, neque earumdem numerum accurate definiverunt.

3.) Cum in continuo sermonis decursu eandem vocem in diversa significatione adhibemus; quod vitium valde pervulgatum est; ac sæpe quidem ex vocabulorum penuria, frequentius tamen ex incuria quadam, aut etiam malitia proficiscitur. Ejusmodi homines Lo-

ckius, qui toto libro tertio de intellectu humano præstantissima de vocabulorum usu præcepta tradidit, unde complura huc transtulimus, cum eo comparat, qui, dum rationes quasdam componit, eodem caractere 8. jam septem, jam novem designaret, prout sibi commodius videretur. Talis profecto aut insanæ, aut insignis doli notam effugere haud potest.

Sensus igitur vocabulorum in eodem sermonis filo constanter idem retineatur. Quodsi necessitas quandoque contrarium exigat, præmoneatur auditor, vel lector, nisi id adjuncta manifeste ostendant, quod tamen facile præsumi non debet, cum auditorum mens sensui primum stabilito intenta sæpius ad eadem non reflectat. Præcipue id de terminis æquivocis intelligendum, quibus, ut optandum foret, prorsus abstinere non licet. Non equidem grande erroris periculum est, cum res diversæ per æquivocum terminum indicatæ nullam inter se relationem aut nexum habent, sic nemo propterea confusas ideas concipiet, quod voce *vertex* jam ad extremitatem capitis humani, jam ad montis, aut arboris summitatem denotandam utar; præterquam enim quod hæc, & similia jam fere in vulgus nota sunt, etiam inter caput humanum, & montis summitatem nullus datur nexus. At ubi res illæ inter se nexu quodam copulantur, vel relationem causæ, & effectus habent, tum omnino obscuritatis, & confusionis periculum ingens est. Notum est inter philosophos, quanta fiducia Malebranchius post Cartesium pronuntiaverit; *calorem* in nobis esse, contra Peripateticos, qui eundem in igne latere contendebant; notum est pariter, quanta, quaque diuturna inde lis exarserit; & tamen tota dissidii causa alia non fuit quam terminus æquivocus *calor* diversis rebus inter se tamen con-

connexis attributus. Si Cartesiani ex una parte declarassent, se per terminum *calor* intelligere sensationem illam, quam admoto nostro corpori igne sentimus; & si Aristotelici ex altera præmonuissent, se per *calorem* denotare illam facultatem, quam ignis habet eam in nobis sensationem caussandi, lis tota uno pæne momento decisa fuisset: tam parum enim quispiam negasset calorem secundum Cartesianorum mentem in nobis, ac eundem in sensu Aristotelicorum in igne esse, quam parum aliquis de vulgo ignorat, dolorem in nobis, pungendi vero facultatem in acu admota inesse.

4.) Cum obscuritatem de industria affectamus, captantes inde reconditæ cujusdam, ac sublimioris doctrinæ famam. Fit id potissimum vel adhibendo vocabula barbara, ac peregrina ferientæ imaginationi apta, quod alchemistis perfamiliale est; vel utendo terminis receptis in significatione nova, inusitata, ac ad arbitrium privatum instituta, vel introducendo terminos novos, quin ulla declaratio præmittatur; vel denique usitatos etiam terminos præpostere conjungendo, ut sensus ordinarius confundatur, & quedam quasi ænigmata prodeant. Omnes diversæ antiquorum philosophorum, & hæreticorum sectæ obscuritatis hujus affectatæ exempla prope infinita nobis suppeditant. Sed & nunc quoque ea a nonnullis, ut subtilitas quedam, ac nescio, quæ mentis penetrantis vis appareat, adoptatur, cum tamen aliud in se non sit, quam docta ignorantia.

Utamur igitur vocabulis usitatis, receptaque eorum significatione; etsi enim hæc quo ad originem suam arbitraria sit, non tamen propterea cuivis privato eam jam in usum inductam immutare licet. Quis namque te intelligat, si illam belluam, quam *equum* vulgo vo-

est, *canis* nomine compelles, & vicissim, licet, utrumque vocabulum ex æquo indifferens sit ad hanc, vel illam denotandam? Quæ porro sit usitata vocabulorum significatio, a consuetudine vulgi, desumendum non est; is enim notissimum non nisi vagas, ac indeterminatas ideas terminis subjicit, nec in retinendo eorum sensu constans esse solet. Illi multo maxime attendendi sunt, qui studio, & labore perfectiores de rebus ideas sibi compararunt, & in quorum scriptis, ac sermonibus accuratior vocabulorum usus communi doctiorum suffragio elucet. Eam in rem doctissimus P. Buffier suadet, ut consuetudinem cum iis artiore colamus, qui distinctas ac præcisas rerum ideas, quibus imbuti sunt, clavis, nitidisque verbis exponere satagunt; confusio enim idearum, ut ait, est quedam quasi pestis, quæ tacite ab iis, quibus familiarius utimur, in nos serpit. Sed quamvis sermonis nitore vocabula longo usu comprobata requirat, id tamen rerum, idearumque novitas non semper admittit; cum enim scientiæ novas perpetuo accessiones obtineant, necesse est, ut multa decursu temporis inveniantur, quæ primis linguarum institutoribus prorsus ignota fuerunt, ad quæ proinde significanda antiquitas nullas nobis voces transmisit. In huiusmodi igitur casibus licebit recentibus, ac minus etiam sonantibus vocabulis uti; quin immo si necessitas ita postulet, de novo quoque confingere, si modo ideam, quam communicare cupimus, accurate antea determinemus. Veniam hanc facit ipse oratorum princeps Tullius: „ Quibus etiam verba partienda sunt, „ imponendaque nova, novis rebus nomina, „ quod quidem nemo mediocriter doctus mirabitur, cogitans in omni arte, „ cuius usus „ vulgaris communisque non sit, multam novitatem nominum esse, cum constituentur

Lib. 2.
cap. 19.

De fin. 1.
3. 4. 1.

earum rerum vocabula, quæ in quaque arte versentur. " Atque hinc etiam minus recte agunt ii, qui vocabula *artium*, ea intelligo, quæ in quavis arte, ac disciplina jam civitate donata sunt; universim, omnia, quod cum debita sermonis elegantia non cohæreant, expuncta volunt; id genus enim voces eo potissimum fine inventæ sunt, ut magno compendio id convenientissime significant, quod sæpe non nisi per multas ambages, longasque periphrases explicari posset. Neque vero ex eo, quod termini hi vulgo, aut artis illius imperitis ignoti sunt, ulla ratione conficitur, sermonem nostrum ex merito obscurum dici posse; cum enim ipsa objecta a talibus ignorentur, quid mirum, si terminos quoque, quibus eruditi eadem exprimunt, non intelligant? nolim tamen, ut quis putet, me eorum his comprobare morem, qui ejusmodi vocabulis utuntur, quin distinctam eis ideam subijciant, aut eo solum fine, ut ignorantiam suam tegant.

5.) Cum sermo noster tropis, figurisque oratoriis nimium abundat. Hæc equidem ornamenta tum merito adhibentur, cum placere tantum cupimus; at quando instruendus est auditor, quando veritas communicanda, quando judicium corrigendum, eorum usus tolerari non debet; ornatus nimis imaginationem auditorum ferit, attentionem a rebus ipsis avertit, affectionesque vehementiores in eorum animis concitat; unde consequens est, ut veritas minus clare pervideatur: judiciaque perturbatis animi motibus magis, quam ratione congrua efformentur. Sit ergo stilus philosophi planus, nitidus tamen: abstinence a tropis, & figuris, ceterisque elegantis, quæ veritati cognoscendæ plurimum obsunt. Caveatur præterea nimia brevitæ, & importuna loquacitas; utraque enim est mater obscuritatis; illa omittit multa, sine quibus auditor men-

tens

tem nostram assequi non potest: hæc nimia verborum copia animos obruit, ac attentionem distrahit.

6.) Cum vocabula accipimus pro rebus ipsis, aut per eadem reales rerum essentias vere exprimi putamus. Termini abstracti huic potissimum periculo subjiciuntur, neque est ulla philosophorum antiquorum secta, quæ vocabula quædam abstracta, sibi quæquam familiaria pro rebus ipsis reapse existentibus non venditasset; sic Aristotelici *formas substantiales*, *animas vegetativas*, *horrorem vacui*; sic Platonici *ideas æternas*, *animam mundi*; sic alii denique *genera & species* res esse realiter existentes sibi persuaserunt. Essentiæ deinde reales rerum quam frequenter nos latent. Quis pro certo definiat, quæ proprietates requisitæ sint, ut quidpiam ex vero dicatur *aurum*? An sola *gravitas cum colore*? An etiam *ductilitas*? *malleabilitas*? An omnes simul? An sublata una cesseret esse aurum, & qua? Et quoties tamen, dum declarationem cuiuspiam vocis audimus, ea internam res ipsius constitutionem exprimi firmissime putamus? Inde vero duo hæc necessario consequuntur, ut primo auctori, qui eodem, quo nos, vocabulo utitur, nostras ideas affingamus, contra monitum (§. 81. cor. 2.): deinde ut rem eam arcto adeo nexu cum determinato vocabulo colligemus, ut quamprimum aliud licet synonymum enunciarî audimus, perturbemur, aliudque objectum designari arbitremur.

Caveamus proinde, ne umquam vocabula ad res ipsas transferamus, autumantes, omnia, quæ in rebus insunt, per eadem accuratè denotari: sed illud alte menti infixum hæreat: tantum per vocabula de rebus ipsis significari, quantum loquens de iis cognoscit.

C A P U T VI.

D E

DEFINITIONE.

LXXXIV. *Definitio* est oratio, qua ideam distinctam (§. 55.), & completam (§. 56.) termino cuidam respondentem explicamus; *definitum*, seu *res definita* est idea termino illi subjecta, vel res ipsa per eam ideam representata: sic *signum ideæ in mente latentis articulata voce prolatum* est definitio; *res definita est vocabulum*: item *simplex res representatio in mente facta* est definitio *ideæ*.

Quid definitio, & definitum?

COROLL. In definitione igitur debent distincte enumerari notæ objecti, quas idea illa representat, & quidem nec plures, nec pauciores, quam quæ sufficiunt objecto ab omnibus aliis semper discernendo.

COROLL. 2. Cum idea distincta eadem sit cum idea complexa (§. 75. schol.), in definitione per notarum enumerationem nihil aliud fit, quam ordinata idearum partialium, e quibus idea complexa definienda coalescit, evolutio: sic idea complexa, quæ termino *logica* exprimitur, constat ideis partialibus, 1. *scientia*, 2. *quæ facultatem cognoscitivam dirigit*, 3. *propositis explicatæ legibus* 4. *in cognoscenda veritate*.

COROLL. 3. Hinc ideæ cunfusæ, seu simplices definiri nullo modo possunt (conf. §. 55. sch. & §. 83. schol. n. 1. fin.). Sic ideæ *luminis*, *coloris*, *soni*, & omnium *sensationum* nostrarum definiri nequeunt.

LXXXV.

Quo fun-
damento
definitio
dividen-
da?

LXXXV. Plures ideæ partiales in unam complexam, quæ definiri debeat, colligatæ vel inter se pugnant, & una consistere nequeunt, ut ideæ *rotunditatis*, & *quadrature*: quo in casu idea complexa deceptrix est, ac reipsa nulla, & proinde etiam ejus definitio inanis sine mente sonus (§. 51. cor. 3. & 77. cum schol.); vel vero eæ inter se non opponuntur, ac simul consistere possunt, atque propterea etiam res ipsa per ideam complexam repræsentata est possibilis (§. 51. cor. 1. & 2.): ut ideæ, *figure*, & *rotunditatis*; item ideæ *animalis*, & *rationalis*. Hanc porro possibilitatem rei, quæ per ideam complexam definiendam repræsentatur, vel manifestat ipsa definitio, vel non.

In no-
minalem,
& rea-
lem?

LXXXVI. Definitio *nominalis* est, qua solum spectata nondum constat rem eam esse possibilem: ut eclipsis lunæ est *defectio luminis lunæ plenæ*. Circulus est *spatium lineæ curvæ in se redeunte, & undique æqualiter a centro distante clausum*. Definitio, quæ simul ostendit rem per ideam complexam exhibitam esse possibilem, dicitur *realis* vel *generica*: id vero obtinetur, si causa, & modus, quo res illa oriri potest, distincte exponatur: ut eclipsis lunæ est *defectio luminis lunæ plenæ, quæ oritur ex umbra telluris solem inter ac lunam interpositæ*. Si lineæ quædam recta in uno puncto fixa circumducatur, alterum ejus extremum describit circulum.

Quomo-
do nomi-
nalis in
geneti-
cam con-
verten-
da?

SCHOL. I. Definitio nominalis quoque in geneticam transit, sive potius geneticæ æquiparatur, quam primum rei per ideam complexam repræsentatæ possibilitas certis argumentis evincitur; cum enim omnis idea, qua objectum vel possibile tantum, vel reapse existens repræsentat, vera sit ac realis (§. 51. cor. 2.), hoc ipso quod constet rem
eam

eam esse possibilem, constat quoque ideam definitam non esse deceptricem (conf. §. 85.). Sic in exemplo definitio nominalis Dei, quod sit *ens necessarium*, vel *infinite perfectum*, evadit genetica, si solide comprobetur ens, quod necessitate absoluta ad existendum, aut infinitis perfectionibus pollet, in se non repugnare. Contra ubi rei per ideam definiendam exhibita repugnantia demonstratur, notum fit eam ideam fallacem esse, ac deceptricem, adeoque reipsa nullam; proinde etiam definitionem ipsam ipsam inanum duatata sonorum collectionem atque adeo sine mora reptudiandam. Ita definitionis nominalis, quam impius Spinoza Deum ponit *substantiam cogitantem*, *individuum*, *ac infinite extensam*, absurditas patefit, cum id genus substantiæ pugnantia involvere demonstratur. Atque inde manifestum fit primo, definitionem eo usque solum permanere *mere* nominalem, quoad nec possibilitas, nec impossibilitas rei evidenter elucet: deinde qua ratione definitiones nominales probandæ sint; id quod in primis philosopho curæ esse debet, nisi in paralogismos, erroresque quam plurimos delabi velit.

SCHOL. 2. Quod ad definitiones reales attinet; eæ nomenclationem hanc propterea solum sortitæ sunt, quod ideam *realem*, id est, *realiter* in mentem existentem exprimunt, Qui earum *realitatem* latius extendit, & cum veteribus existimat, per eandem *realem*, seu physicam rei per ideam representatæ naturam, aut essentiam significari, vehementer fallitur. Physica siquidem rerum essentia non in una, vel altera proprietate, quæ ceterorum fons sit, & origo; sed in reali, ac integra omnium proprietatum collectione consistit, quæ nobis, ut plurimum incognita est. Definitiones nimirum nostræ non exprimunt

munt nisi naturas rerum *ideales*, hoc est, prout eas mente concipimus, & quantum de his in idea nostra representatur. Quodsi natura, vel essentia rei idealis eadem sit cum natura, vel essentia rei physica, & reali, tum omnino ex vero dici potest per definitionem exprimi realem rei naturam; sed istud eo solum casu contigit, cum nobis ipsis sine attentione ad rerum existentias ex arbitrio ideas complexas in abstracto efformamus; tum enim objectum ideæ ejusdem est in se præcise tale, etsi ut tale non existat. Ita agunt geometræ, cum ideam *circuli*, vel *trianguli*, abstrahendo ab illius reali existentia, concipiunt, ac subinde ex ejusdem natura per definitionem cognita, vel potius arbitrarie statuta diversas deducunt proprietates. Ita quoque se res habet in moralibus, cum quis ideas quasdam partiales in unam complexam componit, eique terminum attribuit, v. g. *parricidii*, *sacrilegii*, *justitiæ*, parum sollicitus, an umquam actus talis extiterit, aut existiturus sit: id quod primis legum conditoribus frequentius evenit.

Quid definitio essentialis, accidentalis, & descriptiva?

LXXXVII. Res per essentialia & attributa semper: per modum vero, & relationes pro aliquo tantum tempore ab aliis discernitur (§. 52.); cum igitur in definitione notæ, per quas res ab omnibus aliis semper differt, enumerandæ sint (§. 84. coroll. 1.); evidens est quamlibet definitionem fieri debere vel per essentialia, vel per attributa. Definitio, in qua notæ rei essentialia enumerantur, dicitur *essentialis*, ut homo est *animal ratione præditum*; triangulum est *spatium tribus lineis clausum*. Definitio, in qua attributa rei recensentur, *accidentalis* audit: ut homo est *animal veræ eruditionis capax*; triangulum est *figura, quæ habet tres angulos*.

los. Ea vero de Snitio, in qua modi, & relationes adducuntur, impropria est, & potius *descriptio* compellari meretur: ut est hominis apud Tullium; *animal providum, sagax, multiplex, acutum, memor, plenum rationis, & consilii*, vel si dicam: *Venus est stella, quæ hodie vespere paulo post occasum solis oritur, videturque ex hac fenestra in linea recta cum vertice turris S. Stephani,*

SCHOL. 1. Ideas generum & specierum definimus, cum in illis essentialia, & attributa facile discernamus; contra vero, cum istud in ideis rerum singularium præstare nequeamus, eas describimus. Sic physici plantas, lapides, aliaque corpora naturalia; historici provincias, urbes, & facta particularia; poetæ hortos, palatia &c. longa singularum partium, proprietatum, & affectionum enumeratione depingunt. Judices quoque in litteris accusatoriis, quibus reum fugitivum persequuntur, ejusmodi descriptiones adhibent, cum externum ejus habitum, magnitudinem, faciei conformationem, ceteraque omnia, per quæ discerni possit, enumerant.

SCHOL. 2. Cum dicunt definitiones nominales esse arbitrarias, id non ita intelligendum est, quasi cæco arbitrio sine ullis legibus termini significatio determinari, aut ideæ cujuslibet definitio concipi possit; sed arbitrariæ sunt, quia cum eadem res vel per essentialia, vel per attributa, eaque diversa definiri queat, quibus horum quis uti velit, optio datur; ut adeo de eadem re plures diversæque definitiones æque bonæ condi possint. Sic definimus Deum vel per *ens, quod sibi omnia cognoscibilia, distinctissimo representat*; vel per *ens infinitum*, aut *necessarium*, vel per *ens a se, a quo tota rerum universitas in existendo pendet*. Ex his tamen, & similibus definitio-

Defini-
tiones
nomina-
les quo
sensu ar-
bitrariæ?

nibus ea semper deligenda est, quæ metho-
do, quæ in præsentī res tractatur, commodius
inservit; atque in genere ea definitio cere-
ris præstantior habetur, quæ clarior, fecun-
dior, atque ad finem propositum accommoda-
tior est. Deinde cum vocabula necessariam
cum ideis connexionem non habeant (§. 74.
schol. fin.), si solum de eo agitur, ut mens
mea aliis patefiat, arbitrarium utique mihi
erit meam ideam per quodcumque vocabu-
lum exprimere, ac definitionem nominalem
quancumque condere. At si vulgatus termi-
ni significatus attendi debeat, uti debet sem-
per, nisi ratio gravissima obstat (§. 83.
schol. n. 4.), non utique in meo positum
est arbitrio, ut terminum sic potius, quam
alter definiam. Nunc quæ ad bonam defini-
tionem requirantur, videamus.

Leges Legitimæ Definitionis.

1.) *Definitio sit clara, & perspicua*; cum
enim ea sit quedam declaratio, si obscura
sit, finem suum non obtinebit. Fit porro de-
finitio obscura quinque potissimum de causis:
1. si omnibus vocabulis definitionem ingre-
dientibus eadem confusa idea, quæ ipsi ter-
mino definito respondeat; ut si dicas: *logi-
ca est scientia, quæ tradit regulas logicas, vel
idea clara est illa, qua mihi aliquid clare
repræsentat*. 2. Si adhibeantur termini per se
obscuri, æquivoci, improprii, aut prorsus
inanes; ejusmodi sunt complures definitiones
Aristotelis, ejusque assecrarum, ut motus, *quod
sit actus entis in potentia quatenus in potentia*,
vel luminis, *quod sit actus transparentis, qua-
tenus transparentis*: vel animæ, *quod sit primus
actus corporis physici potentia vitam habentis*.
Sic definitur obscurum per obscurum. 4. Si ip-
sum definitum in definitionis membris recurrat,
ut

ut sunt illæ veterum: quantitas est *accidens*, a quo res dicitur *quanta*, vel existentia est *id*, quo res actu existens redditur. Sic definitur idem per idem. 4 Si in definitione ponatur terminus, qui iterum per rem prius definitam definiri debeat, ut adeo definitum antè ingrediatur definitionem posterioris; anterioris; ut si dicas: naturale est *effectus*, qui contingit absque miraculo, & miraculum est *effectus non naturalis*; vel lex est *voluntas superioris obligans inferiores*; & superior est, qui habet potestatem ferendi legem. Sic committitur circulus vitiosus, qui non in quibus tantum definitionibus, sed in pluribus etiam sibi succedentibus contingere potest. 5. Si recenseantur notæ auditori incognitæ. ut si geometriæ imperito dicas: *hypothenusæ est illa trianguli rectanguli linea, cujus quadratum æquatur quadratis cathetorum simul sumtis*. Est quidem hæc obscuritas solum relativa, quantum tamen fieri potest, evitanda; loquimur enim, ut intelligamur ab iis, qui nos audiunt: definitione utimur, ut in iis, quibuscum agimus, ideam distinctam, & completam, quam ipsi antea concepimus, excitemus. Peccant proinde, qui non accommodate ad auditorum suorum captum loquuntur, & inaniter sibi ipsis sapientes videntur, quod ab iis, ad quos verba faciunt, non intelligantur (conf. §. 83. schol. n. 4.).

2.) *Definitum & definitio sint salva veritate convertibilia*, hoc est: debent sibi posse mutuo substitui, quin sensus mutetur, aut veritas lædatur; cum enim in definitione evolvantur idæ partiales, quibus idea complexa, quæ definitur, constat (§. 84. cor. 2.); totum vero sit æquale omnibus partibus simul sumtis, necesse est, ut idem prorsus obtineatur sensus, sua ipsa idea complexa, id est, defini-

definitum, seu illius ideæ partiales simul omnes, hoc est, definitio ponatur: sic idem est, seu dicam, *logice operam do*; seu, *scientia, quæ facultatem cognoscitivam propositis explicare legibus in veritate cognoscendæ dirigit, operam do*. Contra hanc legem duobus fere nobis peccari potest. 1. Si definitio sit *latior* suo definito, id est, si integra definitio etiam rebus a definito diversis conveniat; qualis foret hæc: vocabula sunt *signa idearum*, quippe etiam suspiria, gemitus, gesticulationes idearum signa esse queunt. Vel hæc: genus est *essentialis plurium similitudo*, nam hoc quoque de specie cum veritate affirmatur. 2. Si definitio sit *angustior* suo definito, id est: si definitio non conveniat omnibus, & singulis, quæ sub definito continentur; ut si dicas, *homo est animal ratione & doctrina præditum*, excluduntur enim alii homines non docti. Vel idea est *representatio distincta notarum objecti*, quod non convenit ideæ confusæ. Utrumque porro hoc vitium facile vitatur, si, quod alioquin idea completa exigit (§. 56.), tot duntaxat notæ recenseantur, quæ præcise requiruntur ad hoc, ut res definita ab omni alia discerni possit; quando enim pauciores sunt notæ allatæ, definitio erit deficiens, latiusque patebit; si plures: ea redundabit, ac justo angustior, saltem potissimum, efficietur. Verbo, ut definitio perfecte sit reciproca suo definito, necesse est, ut sit *adequata*, hoc est, ut *soli*, & *omni* definito conveniat.

De part.
c. 12.

3.) *Definitio constat genere proximo, & differentia ultima*, ut docet Cicero. Debet enim primum per definitionem declarari definitum, id quod eo facilius præstat, quo ideæ adhibentur clariores; sunt vero universales, qualis quoque est idea generis, clariores singularibus (§. 64. cor. 2.). Accipitur por-

porro genus proximum, quia altiora genera notas sufficientes non continent, quarum proinde defectu definitio evaderet latior, ut pater, si dicas: homo est *vivens rationale*, quod omni spiritui competit. Debet deinde per definitionem definitum discerni ab omni alia re; unde necessitas est, ut differentia, sive ex notæ adferantur, quæ illud discrimen efficiant; sufficit vero, ut illæ notæ recenseantur, per quas definitum differt ab omni alia re sub hoc genere proximo contenta, id quod philosophi per *differentiam ultimam* denotare volunt; sic etsi homo per *rationem* non differat a puro spiritu, quia tamen per eam discernitur ab omni eo, quod sub genere proximo *animal* continetur, bonam condens definitionem dicendo: homo est *animal ratione præditum*. Talis enim differentia conjuncta cum genere proximo jam plenum efficit rei definitæ ab omnibus aliis discrimen; defectu differentię ultimæ vitiosæ sunt hæ definitiones: homo est *animal quoddam*; vocabula sunt *signa idearum*.

4.) *Definitio non sit negativa*: hac enim ratione non declararetur idea termino respondens; sed indicaretur solum, quæ idea termino illi subiecta non sit; unde palam quidem fieret quid res definita non sit, non vero, quid sit, quod tamen per definitionem consequi cupimus; ut si dicas: *logica non est scientia, quæ tradit regulas honesti*; *templum non est locus aptus pro convivio*. Lex hæc, licet universe obtineat, in duobus tamen casibus exceptionem patitur. 1. Quando affirmativa definitio in potestate non est: ut cum agitur de rebus per se obscuris, aut supra humanæ mentis caput positis. 2. Quando duo adsunt contradictoriæ sibi opposita; tum enim altero eorum jam affirmative definito, alterum recte negative definitur; & ratio est: quia satis

con-

constat, quid res sit, cum oppositi per definitionem præmissam jam cogniti definitio de eadem negatur: sic ubi *impossibile* affirmative definitum fuerit dicendo: *esse id, quod in notis essentialibus contradictionem involvit*, facile patebit, quid sit *possibile* priori oppositum, si de eodem prior definitio negetur; dicendo: *esse id, quod in notis essentialibus non involvit contradictionem*: sic pariter postquam definiti compositum esse id, *quod constat ex partibus reipsa inter se diversis*, definiam simplex esse id, *quod ex ejusmodi partibus non constat*.

Quis usus
definitionum?

LXXXVIII. Per definitionem nominalem terminorum significatio figitur; definitio enim generatim ideam distinctam, & completam termino cuidam respondentem significat (§. 84.) Igitur & definitio: sive ut mere nominalis, sive ut jam reali æquipollens (§. 86. schol. 1.) spectetur, præsentem termini significatum ita explicat, ut nullus de eo prudenter dubitandi locus auditoribus, sive lectoribus relinquatur; sed hoc est terminorum significationem figere: ergo pater propositum.

SCHOL. Atque inde est, cur nonnulli cum veteribus definitionem nominalem eam esse putent, quæ significationem termini explicat. Ceterum quanti momenti sit, fixos, & constantes vocabulorum significatus habere, vel ex iis patet; quæ supra (c. 5.) copiose diximus. Sed & alia quoque est definitionum utilitas in omni omnino disciplina latissime patens. Definitiones imprimis nominales prima præbent ratiocinandi principia, ut inde deducantur, quæ de rebus cognosci possunt; nam ubi natura idealis per definitionem vocabuli statuta est, variæ inde consecutiones deducuntur, ac veritates deteguntur, quarum omnium collectio perfectam, completamque scientiam una hac de-

definitione, tamquam fundamento, innixam constituit: ut v. g. est geometria, quæ omne initium ducit a definitione puncti, & lineæ; unde ea tamen ad sublimissimas veritates, quas evidentissime demonstrat, progreditur: idem quoque magna ex parte in metaphysica obtinet, ubi ea, ut oportet, methodo scientifica pertractatur. Id unum tamen cavendum hac in re, ne veritate, quæ ex sola essentia ideali per definitionem expressa profluunt, ad rerum existentias, realesque earum naturas ante transferantur, quam rei non modo possibilitas, sed ipsa quoque existentia demonstretur. Definitiones deinde reales, cum modum, quo res quælibet oriri possit, causasque distincte explicent (§. 86.), ad id conducunt, ut eorum, quæ rei inest, aut inesse possunt, rationes inveniantur. At vero licet definitiones in quavis scientia usum præstent maximum, non ideo tamen nimium accumulari debent, ut est ingens ea in re nonnullorum libido; nam præterquam, quod ideæ simplices alioqui definiri nequeant (§. 84. cor. 3.), multa de se eam præferunt claritatem, quæ definitionis ope magis obscurari, quam illustrari possit: & profecto, si non darentur quædam, quæ amplius definiri nec debeant, nec possint, necesse foret, ut absque ulla verum sensum umquam assequendi spe in infinitum progrediamur.

C A P U T III.

D E

D I V I S I O N E .

Quid di-
visio?

LXXXIX. *Divisio* est vel *ideæ complexæ* in suas *partiales* (§. 75. schol.), vel *ideæ universalis* in sua *subjecta* (§. 62. cor. 2.) *distributio*. *Idea*, quæ *distribuitur*, *divisum*: illæ vero, in quas ea fit *distributio*, *membra dividenda*, dicuntur. Sic *divido philosophiæ* in *theoreticam*, & *practicam*, *logicam* in *naturalem*, & *artificiosam*.

Quid
condivi-
sio?

XC. Idem *divisum* sub *diverso respectu* *consideratum* varie quandoque *distribui potest*; id si fiat, habentur *condivisiones*, atque *membra condividenda*: sic *idea respectu habito ad modum representandi* *dividitur* in *claram*, & *obscuram*: in *relatione vero ad objectum* in *universalem*, & *singularem*; item in *abstractam*, & *concretam*.

Quid sub-
divisio?

XCI. Quod si *membrum dividens sursus* in *alia distribuatur*: oritur *subdivisio*, quæ quandoque *diutius continuari potest*: sic *idea clara* *novum* *dividitur* in *distinctam*, & *confusam*; *distinctam* porro in *adequatam*, & *inadequatam*: item *universalis* in *genericam*, *specificam*, & *differentialem*.

Quam uti-
litas di-
visionis?

SCHOL. *Utilitas divisionis* major est, quam a multis existimetur: numquam enim *res ipsa* melius *pernoscitur*, quam si *singulæ ejusdem partes successiva meditatione perlustrentur*. Profecto inde fit, ut *mens nostra clare*, ac *distincte pervideat id in singulis partibus*, quod in *objecto integro propter nimiam ejus*
com-

compositionem obscure solum, aut confuse intueri posset. Quid quod, dum objectum ex omni sui parte contemplandum offertur, via præcludatur vitio, in quod homines quotidie fere ruere videmus, cum id, quod non nisi uni, aut alteri parti convenit, ipsi toti attribuant. Universim denique, ut recte cogitemus, aut loquamur, frequentissima divisione utendum est; sermones enim nostri ut plurimum sunt de objectis admodum complexis, quæ multis ex partibus considerari debent, quodque de illis relate ad unam partem cum veritate affirmatur, frequenter falsum est, relate ad aliam partem. Ut porro hæc nobis commoda adferat divisio, certis ea legibus adstringi debet, quas ipse oratorum Princeps præscribit: has ubi retulero, ad alteram facultatis cognoscitivæ operationem (§. 48.) exponendam gradum faciam. De invent. l. 1.

Leges legitimæ Divisionis.

1.) *Divisio habeat brevitatem*, quæ vetat, ne ad partes minimas descendatur, sicut enim maxima, ita minima difficulter comprehendimus, nimiaque partium quam plurimarum enumeratio ita repente obruit mentem, ut claritatis loco, quæ unice per divisionem quæritur, permagna obscuritas, & confusio oriatur.

2.) *Divisio habeat absolutionem*, enumerando nimirum omnia membra, quæ sub diviso continentur, ita ut, ea simul sumta exæquent divisum, atque cum eo reciproca sint; finis enim divisionis, qui in eo consistit, ut ope successivæ partialium idearum contemplationis tota idea complexa melius pervideatur, omissa una, aut altera parte minime attingeretur: sic male dividis *homines in musicos, & poetas*, dantur enim, qui ad neutram classem referri possunt; vel *notas objectorum in es-*

sententialia, & *attributa*, omittis enim *modos* & *relationes*.

3.) *Divisio habeat paucitatem*, quæ in eo consistit, ut nullum membrorum otiose, ac superflue adducatur; id vero contingit, quando membra dividentia se invicem complectuntur, ut unum de altero affirmari possit. Necessesse est igitur ut ponantur membra, quorum unum non contineatur in altero, secus enim unum bis, adeoque superflue poneretur, nempe una vice explicite, & altera implicite: sic mala est divisio *entis* in *simplex*, *compositum*, & *cogitans*; *cogitans* enim in *simplici* jam continetur. Item si *globum terrestrem* divides in *Europam*, *Germaniam*, *Asiam*, *Africam*, *Americam*; *Europa* quippe continet *Germaniam*. Vitio porro huic facile medemur per (subdivisiones (§. 91.)): est scilicet distributio primum facienda in membra maxime generalia; tum vero, cum ad quodvis eorum ventum fuerit, evolvenda erunt ea, quæ in illo includuntur: sic dividatur primum *ens* in *simplex*, & *compositum*; tum *simplex* subdividatur in *cogitans*, & *non cogitans*; aut *globus terrestris* in *Europam*, *Asiam*, *Africam*, *Americam*; *Europam* dein in *Germaniam*, *Galliam*, *Italiam* &c. rursum *Germania* &c. in suas *Provincias*.

C A P U T VIII.

D E

J U D I C I O.

XCII. Quodsi duas ideas mentis observantes Quid ju-
diciū?
inter se comparamus, & quamdam inter illas
convenientiam, aut repugnantiam detegimus,
fit persæpe, ut huic convenientiæ, aut repu-
gnantiæ mente annuamus, atque convenientes
quidem ideas per affirmationem, quæ in ipso
hoc annutu consistit, jungamus, & repu-
gnantes per negationem separemus. Tum vero
judicare dicimur. *Judicium* proinde est ille a-
ctus, quo mens duas ideas annutu convenientiæ
visæ præstito per affirmationem conjungit, vel
annutu repugnantiae visæ præstito per negationem
separat. Sic judico cogitando, *anima humana*
est spiritus, vel anima humana non est corpus.

COROLL. 1. Judicium a simplici representatio-
ne, sive idea discernitur; hæc enim nihil
affirmat, aut negat (§§. 48. 50.).

COROLL. 2. Judicium non est sola perceptio
convenientiæ, aut disconvenientiæ duarum
idearum, ut vult Lockius, & ejus compila-
tor Clericus; etenim cum mens judicat, qua-
si decidit perceptam idearum convenientiam,
aut repugnantiam reipsa dari, atque ideo
per ipsam hanc decisionem aliquid quodam
modo addit huic perceptioni: & nonne fre-
quenter, mente ad alia conversa, judicio
abstinemus, etsi ea idearum inter se relatio
nobis clare reluceat?

COROLL. 3. Quodlibet judicium vel affirmati-
vum, vel negativum est.

E 3

SCHOL.

SCHOL. Quod in primo, & secundo corollario dictum est, nihil quidem difficultatis patitur, ubi negotium est cum ideis simplicibus, aut non admodum complexis; verum in casu opposito incauti facile in errorem inducuntur. Sciendum igitur: quantumcumque idea sit composita, lateque patens; ut si mihi repræsentem hominem, qui primum rei domesticæ angustiis pressus animum ad litterarum studia applicat, tum facto insigni in iis progressu egregiæ doctrinæ formam, ac splendidum in republica munus consequitur: non propterea ipsa in iudicium degenerat, sed manet, quæ fuerat, idea, cum nondum aliquid affirmet, aut neget; sed solummodo objectum pluribus adiunctis vestitum repræsentet. Ipsum alterius hominis iudicium, quamdiu duntaxat menti meæ repræsentatur, comparate ad me nihil nisi idea est: audio exempli causa ab aliis dici, *dari impios, qui religionem revelatam extinctam cupiunt*, quamdiu mihi hoc aliorum iudicium solum repræsentor, quin annuam, vel abnuam, nihil in mea mente, nisi idea existit; at ut primum cogito: *ita est: sunt impii, qui religionem revelatam extinctam cupiunt*; iudicium fero. Animadversio hæc cum in vita civili, tum in morali magni est momenti, servitque ad excludendas animo anxietates, quibus ii obnoxii sunt, qui, dum ejusmodi ideas sibi quandoque nec liberas iudiciorum loco habent, de admissæ culpa frustra anguntur.

Quid i-
dea sub
jecti &
predica-
ti?

XCIII. In iudicio duæ ideæ vel per affirmationem conjunguntur, vel per negationem separantur, idque visa earum vel convenientia, vel repugnantia (§. præc.): igitur ut iudicium rite formetur, requiritur, ut præter duas ideas conjungendas, aut separandas, quarum illa, de qua aliquid affirmatur, vel negatur *subiectum*, altera *predicatum* audiat, non apparenter tantum,

tum, sed reipsa adsit, mentique reluceat earum inter se vel convenientia, vel repugnantia. Sic ut rite judicem, debeo non tantum ideas *animæ humanæ*, & *spiritus*, sed earum quoque convenientiam menti præsentem habere.

SCHOL. Atque hinc fuit lex universim in ferendis judiciis accuratissime observanda; ut videlicet numquam judicium formemus, antequam idearum convenientiam, aut repugnantiam intine pervideamus: quare eleganter Tullius præcipit: „ ne incognita pro cognitis habeamus, hisque tenere assentiamus, „ quod vitium effugere qui volet, omnes „ autem velle debent, adhibebit ad considerandas res & tempus, & diligentiam. „ Quoties hoc monitum negligimus, gravissimo errandi periculo non absque insignis temeritatis nota exponimus. Est equidem hoc adeo apertum, ut non facile a quopiam in dubium trahatur; pauci tamen interea sunt, qui illud ipso etiam usu comprobent. Ex una nimirum parte magna ad judicandum aviditate rapimur, cum hæc sit species quædam judiciaræ potestatis, ac jurisdictionis, quam amor propriusquam qui maxime exercere ambit; verum quam potestas hæc est scenica, similisque magistratui comico, qui incognita potissimum causa pronunciat sententiam? Ex altera vero parte naturalis quidam animi torpor, desidia, ac vanitas laboris impatiens nos avocatur a sedula earum rerum contemplatione, de quibus judicare aggredimur. Quid aliud faciunt ii, a quibus novellas, ut ajunt, accipimus? Nonne judicant de negotiis regnorum, provinciarumque gravissimis? De consiliis in aulis Principum occulte agitatibus? Quid vero de his satis exploratum habent? Quis est etiam infima de plebe homo, qui belli tempore, licet artis bellicæ imperitus,

Quæ ferendi iudicii lex?

De off. l. 1.

adjunctorum præsentium, machinationumque ab hoste susceptarum ignarus, non tamen ausu prorsus temerario de ignava belliducis tarditate, aut inconsulta præcipitantia, aliisque sententiam ferat? Judicia, quæ in rebus litterariis fiunt, non magis a temeritate quandoque absunt; judicantur enim frequenter ab illis, qui eam scientiam vix supremis degustarunt labiis. Quid jam de illis cogitandum, qui de ipsa religione, de cultu Dei externo, aliisque rebus sacris temeraria, & absurda in vulgus judicia spargunt? Noverit igitur philosophus naturalem hanc ad judicandum propensionem sibi omni vi esse coercendam, si solidum in litteris progressum facere, plurimaque incommoda in civili, ac morali vita a se avertere velit: numquam judicet, nisi convenientia, aut repugnantia idearum clare ac distincte cognita.

C A P U T IX.

D E

ENUNCIATIONE ET EJUDEM VARIIS SPECIEBUS.

XCIV. *Enunciatio, vel propositio est oratio, quæ judicium mente conceptum aliis significamus; ut si dico: anima humana est spiritus.*

COROLL. 1. Quælibet enunciatio duos requirit terminos, quorum unus ideam *subjecti*; alter *prædicati* exprimit, quippe propterea eadem sortiuntur nomina: accedit *copula*, quæ annuntium convenientiæ visæ præstitum denotat.

COROLL. 2. Enunciatio omnis quatenus ad logicam pertinet, tribus solum partibus absolvitur:

tur: nimirum *subjecto*, *prædicato*, & *copula*; quidquid præterea in eadem occurrit, vel ad *subjectum*, vel ad *prædicatum*, ut ejusdem *affectio* refertur, & non nisi ideam eam complexam esse ostendit (§. 75. & schol.): ut si dicas: *mens humana natura sua immortalis est appetens bonorum æternorum, quæ sola ejus desiderium satiare possunt*, in hoc exemplo *mens* est *subjectum*: *humana natura sua immortalis* est *affectio* *subjecti*; *appetens* vero est ejus *prædicatum*, cujus affectionem constituunt omnia ea, quæ sequuntur.

SCHOL. Copulam solum verbum substantivum, & quidem in præsentis tantum tempore agere potest, debet enim ea assensum, quem actu mens convenientiæ duarum idearum nunc sibi præsentis præstat, indicare, unde hæc propositio: *hoc marmor fuit rotundum*, hunc sensum facit, *hoc marmor est illud, quod fuit rotundum*, in qua verbum est copulam agit, *illud* prædicatum, *quod fuit rotundum*; affectionem prædicati. Necesse tamen non est, ut copula semper explicite ponatur; sed quandoque ommissa subintelligitur, quandoque in apposito verbo abjectivo latet; ut si dicam: *mens cogitat*, resolvi debent, *mens est cogitans*. Idem quoque de *subjecto*, & *prædicato* notandum venit, ut cum dico: *cogito*, id est: *ego sum cogitans*. Nunc diversas propositionum species examinabimus.

XCV. *Propositio simplex* est, quæ unicum *subjectum*, & *prædicatum* habet; ut *anima humana est substantia spiritalis*. *Composita* vero quæ aut plura *subjecta*, aut plura *prædicata* continet; ut *anima humana est spiritalis & immortalis*. Quid enunciatio simplex & composita?

XCVI. *Propositio simplex vel enunciativa* si- Quid pura, & modali?
mul modum, quo prædicatum convenit, aut

repugnat subjecto, vel non; in primo casu *modalis*; in altero *pura* audit.

SCHOL. Modi, quibus prædicatum subjecto convenire, aut non convenire, potest, sunt hi quatuor: *necesse*, *contingens*, *possibile*, *impossibile*. Erunt igitur propositiones modales hæ, aut similes: *circulus necessario est rotundus*: *mundus contingenter existit*: *possibile est, ut alter mundus existat*: *impossibile est, ut circulus sit quadratus*. Puræ vero propositiones erunt, *circulus est rotundus*: *mundus existit* &c.

Quotuplex enunciatio composita?

Quid conditio-nalis?

XCVII. Propositio composita, quatenus ad usum nostrum pertinet, est quadruplex, videlicet *conditionalis*, *causalis*, *copulativa*, *disiunctiva*.

XCVIII. *Conditionalis*, vel etiam *hypothetica* propositio ea dicitur, quæ prædicatum de subjecto sub quadam conditione per particulam *si* expressa affirmat, vel negat; ut cum dico: *si Cajus in litteras sedulo incubuerit, eruditus evadet*; vel *si anima humana est ens simplex, ea est incorruptibilis*.

Quæ sunt partes?

CONOLL. 1. In conditionali propositione duæ sunt partes per particulam *si* conjunctæ, quarum prima *conditio*, vel *hypotesis*, vel *antecedens*, altera *conditionatum*, vel *consequens* appellatur.

CONOLL. 2. Ipsa conditio continet in se rationem, cur in conditionato prædicatum subjecto conveniat, vel repugnet; sic, cur *incorruptibilitas* animæ humanæ competat, ratio est, quia ea est *ens simplex*.

SCHOL. Propositio simplex, quatenus spectatur, ut opposita conditionali, id est, quatenus absolute, & nulla adjecta conditione aliquid affirmat, vel negat, dicitur *absoluta*, sive *ca-*
rega.

negativa, qualis foret hæc: *anima humana est incorruptibilis*. Igitur eadem propositio simplex sub alio respectu *absoluta*, sub alio *pura* esse potest (conf. §. 96.)

XCIX. *Causalis* propositio ea est, in qua Quid causalis? ratio, cur prædicatum subiecto conveniat, vel repugnet, effertur per particulam causalem, quia: ut *anima humana est incorruptibilis*; quia non constat ex distinctis partibus; Cujus est eruditus, quia egregiam operam litteris impendit.

C. *Copulativa*, vel *conjuncta* est propositio, in qua plura subiecta, vel prædicata per Quid copulativa? particulas copulantes: & . *etque*, *nec*, *neque* conjunguntur; ut: *intellectus, & voluntas sunt attributa anime humane*; vel, *nec intellectus, nec voluntas est attributum anime humane*.

CI. *Disjunctiva* denique, aut *disjuncta* illa Quid disjunctiva? dicitur propositio, in qua per particulas disjunctivas, *vel*, *aut*, *sive*, plura subiecta, aut prædicata colligantur; ut *note obiectorum vel sunt constantes, vel mutabiles, anima humana vel est substantia spiritalis, vel materialis*.

SCHOL. Disjunctio est completa, cum omnia Quid disjunctio completa? membra dividendia enumerantur, ita ut præter allata aliud non sit possibile; ut *anima vel perit, cum corpore, vel post mortem corporis est supervstes*. In casu opposito est *incompleta*; ut illa Ciceronis: *vel animus parvis cum corpore, vel post mortem corporis est beatus*; potest namque etiam perpetuo infelix esse.

C A P U T X.

D E

DIVERSIS ENUMERATIONUM
PROPRIETATIBUS.

Quid e-
nuncia-
tionis
qualitas?

CII. Proprietates enunciationum hic exami-
nandæ sunt *qualitas*, *quantitas*, & *oppositio*,
de quibus ordine agemus. *Qualitas* proposi-
tionis est ejusdem affirmatio, vel negatio; est
autem omnis propositio, uti judicium (§. 92.
cor. 3.), vel affirmativa, vel negativa, prout
videlicet ea judicium affirmans, vel negans
significat; ut *anima est spiritus*, *anima non
est corpus*.

Quid e-
nuncia-
tio nega-
tiva?

CIII. In judicio negativo affirmatur repu-
gnantia inter prædicatum & subjectum, sive,
quod idem est, negatur convenientia inter
prædicatum, & subjectum, ut ex natura judi-
cii (§. 92.) patet: cum igitur copula deno-
tet assensum convenientiæ præstitum (§. 94.
cor. 1. & schol.), non potest assensus re-
pugnantiae idearum præstitus aliter indicari,
nisi negando copulam: hoc est, ad hoc ut
propositio judicium negativum exprimat, seu
sit ipsa revera negativa, requiritur, ut parti-
cula negans, vel aperte, vel implicite refera-
tur ad copulam; ut *anima non est corpus*; *nul-
lus homo est sine defectu*.

Quid in-
finita?

COROLL. Propositio igitur, in qua particula
negans non ad copulam, sed vel ad prædica-
tum, vel ad subjectum pertinet, in negativis
haberi non debet; sed speciem habens negati-
væ reipsa affirmativa est, & a philosophis di-
ci solet *infinita*. Ut si dicam: *judicium potest
esse*

esse non negativum; item homo est non bellua, vel non bellua est homo; faciunt enim hunc sensum, homo est aliquid aliud, quam bellua; aliquid, quod non est bellua, est homo.

CVI. In omni propositione affirmativa prædicatum non secundum totam suam extensionem, sed solum secundum aliquam ejus partem accipitur; adeoque in omni propositione affirmativa prædicatum denotat ideam particularem (§. 63. schol.). Et ratio est, quia ad hoc ut affirmatio sit vera, non requiritur, ut omnia, & singula, quæ ad extensionem prædicati pertinent, conveniant subjecto; sed sufficit omnino, si aliqua sub extensione prædicati contenta connectantur cum subjecto; sic si dicam: *anima humana est spiritus; vel temperantia est virtus*, sensus est: *animam esse aliquem spiritum; temperantiam esse aliquam virtutem.*

Quantum in enunciatione affirmativa prædicatum?

CV. Contra vero in omni propositione negativa prædicatum sumitur secundum totam suam extensionem, quam habet, ac proinde ideam universalem denotat (§. 63. coroll.). Nam ad hoc, ut prædicatum cum veritate negetur de subjecto, necesse est, ut nullus prorsus inter utrumque nexus sit: id vero tum tantum contingit, quando nihil eorum, quæ sub extensione prædicati continentur, subjecto convenit; sic cum dico: *otium non est virtus*, sensus est, *otium esse nihil eorum, quæ sub prædicata virtutis continentur*, adeoque nec esse pietatem, neque fortitudinem, neque temperantiam, neque ullam aliam virtutem.

Quantum in negativa?

COROLL. Quantitas igitur cujuslibet prædicati a qualitate propositionis pender, hancque sine exceptione legem sequitur: in omni affirmatione prædicatum particulariter, in omni negatione universaliter accipitur.

Quæ lex de quantitate prædicati?

Quid e-
nuncia-
tionis
quantita-
tis?

Quid e-
nuncia-
tio uni-
versalis?

CVI. *Quantitas* propositionis est ejusdem extensionis, penderque constanter ab extensione subjecti. Cum itaque hæc vel *universalis*, vel *particularis*, vel *singularis* esse possit (§§. 75. 63. cor. schol. 64. cor. 1.), omnis quoque propositio ratione suæ quantitatis in hanc triplicem classem distribuitur. *Universalis* ea est, in qua subjectum, quod de se ideam universalem denotat secundum totam suam extensionem sumitur, ita ut prædicatum singulis individuis sub illo subjecto contentis, etiam seorsum accepis, conveniat: id quod denotant particule, *omnis*, *nullus*, *nemo* subjecto præfixæ, que propterea *notæ universalitatis*, audiunt; ut *omnis virtus est appetenda*, vel *nullum vitium est honestum*.

Et quo-
suplex?

SCHOL. 1. Ejusmodi propositiones dicuntur *complete universales*, ut distinguantur ab iis, in quibus prædicatum non singulis individuis; sed tantum singulis speciebus sub subjecto contentis convenit, quæque propterea *incomplete universales* sunt; ut si dicas: *omne animal fuit in arca Noe*; vel *omnia mania ab infimo ad summum in republica a Cajo administrata sunt*.

SCHOL. 2. Sed est & alia propositionum universalitas; nimirum *moralis*, sive *in sensu accommodato*, quando enuncians propositionem ceteroquin vere universalem non ita stricte intelligi vult, ut prædicatum singulis prorsus individuis subjecti attribuitur, quo unum, vel alterum inde excipi possit, & harum respectu superiores (§. 16.) dici possunt *metaphysice universales*, cum earum universalitas secundum omnem rigorem metaphysicum accipiat. Sic, cum dicimus: *omnes homines sua solum commoda querunt*; non volumus significare nullum prorsus hominum ab hoc vitio immunem esse, sed tantum de plurimis id cum veritate dici

dicti posse. Utimur similibus propositionibus perfrequenter in vulgari cum omnibus consuetudine, & mos jam ita obtinuit, ut fere, quod plurimis convenit, universim omnibus tribuamus; nemo tamen est, qui propterea mentem nostram minus assequatur, si modo, quid usui tribuendum sit, non ignoret. Quin propositiones ejusmodi sæpius in libris historicis, aut etiam dogmaticis occurrunt: unde necesse est, ut vel ex adjunctis, vel ex collatione aliorum locorum, vel denique adhibitis aliis adjumentis suo loco suppeditandis determinetur, utrum auctoris propositio, quæ universaliter enunciatur, *metaphysice*, an *moraliter* accipienda sit.

CVII. *Particularis* propositio ea est, in qua subjectum, quod de se ideam universalem exprimit, secundum partem tantum suæ extensionis sumitur, ita ut prædicatum non omnibus, sed aliquibus solum individuis seorsum acceptis conveniat: id quod denotant particularæ adjectæ: *aliquis*, *quidam*, *nonnullus*, quæ ea de causa *notæ particularitatis* appellantur, ut *quidam homines sunt eruditi*; vel *quidam philosophi doctrina sua ad stabiliendos errores abutuntur*.

Quid particularis?

CVIII. In propositione particulari vel illa individua subjecti, quibus prædicatum convenire asseritur, in se jam determinata sunt; vel non, sed aliqua tantum ex omnibus possibilibus disjunctive accepta intelligi debent. In priori casu propositio est *determinata*, si-
 ve ut ajunt, *supponit determinatæ*; ut est hæc: *aliqui philosophi negant immortalitatem anime humane*; *aliquis huic edificio ignem supposuit*. In posteriori vero est propositio *indeterminata*, seu, *vaga*, vel *supponit indeterminatæ*. Ut *aliquis calumnias requiritur ad scri-*

Quid particularis determinata, & indeterminata?

scri-

scribendum; aliqua navis est necessaria ad navigandum.

Quod e-
jus in il-
lium? SCHOL. Quotiescumque prædicatum *actionem*,
aut *passionem* quampiam denotat, propositio
est determinata; cum enim actio & passio pro-
ficisci nequeat, nisi a re actu existente; omnis
autem res existens singularis sit, ac individua
(§. 59. schol.), necesse est, ut objectum il-
lud, de quo propositio enuncietur, in se cer-
tum sit, ac omnimode determinatum. Quodsi
vero prædicatum *necessitatem* aliquam, *exigen-
tiam*, *debitum*, aut *cupiditatem* exprimat,
non requiritur, ut objectum illud sit existens,
ac in se jam determinatum, sed unum ali-
quod vage, ac indeterminate sumtum ex om-
nibus omnino possibilibus duntaxat denotabi-
tur, ut patet ex exemplis supra allatis. Id
insuper advertendum, aliud esse: objectum *in
se* non esse determinatum, & aliud objectum
quoad nos non esse determinatum; hoc enim
posterius toties contingit, quoties nos illud
objectum defectu notitiæ determinare, seu
potius designare nequimus; sic etsi in se jam
determinatus sit ille, qui ædificio ignem sup-
posuit, fieri tamen potest, ut mihi nondum
constet, atque adeo ut a me nondum desi-
gnari queat, non tamen propterea proposi-
tio illa erit minus determinata.

Quid e-
nuncia-
tio singu-
laris? CIX. *Singularis* propositio ea est, quæ in
subje-
cti loco habet terminum singularem (§.
75.) ut *Plato fuit discipulus Socratis*; vel
*hoc ædificiū est secundum omnes architectoni-
cæ leges exstructum.*

SCHOL. Dantur quædam propositiones, quæ
speciem quampiam universalium præseferunt,
re ipsa tamen in singularibus habendæ sunt.

Ni-

Nimirum vocula *omnis* vel sumitur *distributive*, si nempe omnia singulatim accipienda esse denoter, tumque est nota universalitatis (§. 106.): vel vero *collective*, ut totam omnium summam, sive collectionem per modum unius individui accipi debere significet: tum vero ea efficit propositionem singularem, ut cum dico: *omnes partes totum efficiunt*: vel *omnes litteræ faciunt alphabetum*: *omnes apostoli sunt duodecim*: in his vox *omnis* tantum adhibetur ad hoc, ut intelligatur, totam *partem*, *litterarum*, & *apostolorum* collectionem simul esse accipiendam; ut illis prædicatum cum veritate attribui possit.

CX. Notæ illæ, *omnis*, *nullus*, &c. *aliquis* &c. hic definiunt propositionis quantitatem (§§. 106. 107. 109.); unde propositio, cujus subiecto harum notarum aliqua præfixa est, dicitur *definita*; ut *omnis virtus est appetenda*, *aliquis homo est eruditus*. Cujus vero subiectum tali notâ affectum non est, *indefinita* audit; ut *virtus est appetenda*, *homines sunt eruditi*.

Quid dea finita, & indefinita?

SCHOL. Reducuntur hæc tamen ad definitas, & quidem ad universales, si prædicatum sit nota constans (§. 52.) subiecti; ejusmodi enim nota singulis individuis sub subiecto contentis convenit, Ita hæc *virtus est appetenda*: æquiparatur universali: *omnis virtus est appetenda*. Ad particulares vero referuntur, si prædicatum sit nota mutabilis subiecti; nota enim mutabilis numquam in singulis individuis deprehenditur; sic hæc: *homines sunt eruditi*, æquiparatur particulari: *aliqui homines sunt eruditi*.

Quæ lex de dijudicanda quantitate indefinita?

CXI. *Oppositio* propositionum est pugna, si ve diversitas duarum propositionum; quarum idem est subiectum, & prædicatum; inter se comparatarum quoad quantitatem, vel quali-

Quid & quotoplex oppositio?

tatem, vel utramque simul; hinc tres oriuntur oppositionis species.

Quid enunciationes subalternas?

CXII. Propositiones, quarum sola quantitas diversa est, dicuntur *subalternæ*; & in specie earum universalis *subalternans*; particularis vero *subalternata* audit; ut: *omnis definitio constat genere, & differentia*: quedam definitio constat genere, & differentia; vel *nullum vitium est honestum*; aliquod vitium non est honestum.

Quid contraria, & subcontraria?

CXIII. Propositiones, quarum sola qualitas diversa est, sunt vel ambæ universales, & *contrariæ*; ut: *omne vitium est fugiendum*, *nullum vitium est fugiendum*: vel ambæ particulares, & *subcontrariæ* appellantur; ut: *aliquod vitium est fugiendum*, *aliquod vitium non est fugiendum*.

Quid contradictoria?

CXIV. Propositiones denique, quarum & quantitas, & qualitas diversa est, *contradictoriæ* nuncupantur; ut: *nullum vitium est honestum*, *aliquod vitium est honestum*; vel *omnis virtus est appetenda*, *aliqua virtus non est appetenda*.

Quid contradictoria?

COROLL. 1. Cum id, quod universaliter de quodam subjecto affirmatur, vel negatur, affirmetur hoc ipso, vel negetur de quovis individuo in extensione subjecti contento, ut ex natura propositionis universalis patet (§. 106.), sequitur, per duas propositiones contradictorias ideam simul affirmari, & negari, & quidem ita, ut si utraque vera foret, idem simul esset, & non esset. Hinc contradictio dicitur esse *simultanea affirmatio, & negatio ejusdem de eodem sub eodem respectu*.

COROLL. 2. Duz propositiones singulares qualitate pugnautes affirmant idem simul esse, & non esse; igitur merito ad contradictorias referuntur; ut *Cicero est princeps eloquentiæ Romanae*, *Cicero non est princeps eloquentiæ Romanae*.

C A P U T XI.

D E

ENUNCIATIONIBUS IN METHODO SCIENTIFICA USITATIS.

CXV. Propositio, quæ duntaxat nexum subiectum inter ac prædicatum indicat; *theoretica*; ut *anima humana est immortalis*. Quæ vero aliquid posse, vel debere fieri affirmat, aut postulat, *practica* cognominatur; ut, *ad beatam immortalitatem consequendam opus est magno virtutum apparatu*. Utraque vel ita per se, & intellectus solum terminis manifesta est, ut nulla prorsus demonstratione egeat, vel non: in primo casu *indemonstrabilis*: in altero *demonstrabilis* dicitur.

Quid enunciatio theoretica, & practica?

Quid demonstrabilis, & indemonstrabilis?

CXVI. Propositio theoretica indemonstrabilis *axioma*: ut, *quod cogitat, existit*: vel *impossibile est idem simul esse, & non esse*. Practica vero indemonstrabilis *postulatum* appellatur; ut, *excolle mentem*; cum necessitate noli pugnare. Vel *ex puncto dato ad aliud datum ducere lineam rectam*.

Quid axioma, & postulatum?

SCHOL. Philosophi omnes propositiones, quæ unica nituntur definitione, in axiomatum loco habent; ut si dicam: *qui pollet logica, pollet scientia dirigente facultatem cognoscitivam*. Item illas, quæ oriuntur, si definitum cum sua definitione per copulam coniungatur; ut: *logica est scientia dirigente facultatem cognoscitivam*. Porro axiomatum usus in omni scientia est amplissimus; id solum magna cura cavendum, ne propositiones dubiæ, aut incertiæ pro axiomatis iactentur,

tur, quod merito multis veterum vitio damus. Sed de hoc alias.

Quid
theore-
ma, ejus-
que par-
tes?

CXVII. *Propositio theoretica demonstrabilis theorema* audit, constatque propositione, & demonstratione; ut si sit *propositio: anima humana est immortalis*; si jam adjungatur ejus demonstratio, theorema erit completum. Vel: *propositio: qualibet enuntiatio constat duobus terminis, & copula*. Demonstratio: *qualibet enuntiatio indicat judicium mente conceptum, in quo dua idea de se affirmantur, vel negantur; sed hoc fit, si duo termini per copulam conjungantur: ergo qualibet enuntiatio constat duobus terminis & copula*. q. e. d. En theorema integrum.

Quid
proble-
ma, ejus-
que par-
tes?

CXVIII. *Propositio practica demonstrabilis problema* dicitur, componiturque ex tribus partibus: prima aliquid faciendum postulat; altera modum suppeditat, quod id fieri debeat; tertia hoc modo rem petitam obtineri demonstrat; in exemplo, sit problema: *condere bonam definitionem cujuspiam rei*. Hæc est pars prima, quæ dicitur *propositio*. Enumera tot, non plures, rei notas, quot requiruntur, & sufficiunt ad eam rem ab omnibus aliis discernendam. Hæc est pars secunda, & vocatur *resolutio*. Tum conditur bona definitio, cum idea distincta, & complata enuntiatur; sed hoc fit, cum tot, non plures rei notæ enumerantur, quot requiruntur, & sufficiunt ad eam rem ab omnibus aliis discernendam: ergo bona conditur definitio, si tot, non plures, rei notæ enumerantur, quot sufficiunt, & requiruntur ad eam rem ab omnibus aliis discernendam. q. e. f. Hæc est tertia pars, ipsa videlicet demonstratio. En problema absolutum.

Quid
Lemma?

CXIX. *Lemma, vel porisma* vocatur propositio quæpiam, quæ ex alia scientia, vel scientiæ parte quasi mutuo accipitur, ut illius ope pro-

propositio nunc occurrens demonstretur; sic, ut in jure naturæ demonstretur *hominem esse eo fine conditum, ut perfectiones Dei manifestet*, assumitur propositio ex metaphysica: *finem toti mundo præfixum esse gloriam Dei externam.*

SCHOL. Hæ vero propositiones lemmaticæ quandoque supponuntur suo loco demonstratæ, vel demonstrandæ; quandoque tamen etiam; si id breviter, & commode fieri possit, ubi assumuntur, demonstrantur; sic physici, & astronomi plurimis propositionibus, quas geometria demonstrat, utuntur ad suas demonstrationes conficiendas. Quomodo eo utendum?

CXX. Corollarium, vel *confectarium* est propositio, quæ vel ex definitione quapiam, vel alia propositione jam demonstrata ita profluit, ut alia demonstratione amplius non indigeat; sic ex hac demonstrata: *pietas est ad omnia utilis*, sequitur *pietatem etiam ad profectum in litteris faciendum multum conferre.* Quid corollarium.

SCHOL. *Scholia* denique cuilibet propositioni, prout res postulat subungi possunt, in quibus obscura, aut dubia elucidantur; usus doctrinæ præsentis indicatur; aliorum seu veterum, seu recentiorum ea de re opiniones enarrantur; argumenta in oppositum resolvuntur; aut denique quicquid ad præsentem rem commodum, utile, aut non injucundum visum fuerit, adnotatur. Hæc de secundo exercendi facultatem nostram cognoscitivam modo dicta sufficiant; ad tertium (§. 48.) proinde transgrediamur. Quid scholion.

C A P U T XII.

D E

R A T I O C I N A T I O N E .

Quomodo
habitu
do
idearum
inter se
investi-
ganda?

CXXI. Cum idearum inter se comparatarum habitudo menti non relucet, iudicium rite formari nequit (§. 93. & schol.) ; ea proinde convenienter investigari debet : id quod hoc modo præstat. Assumimus ideam quampiam tertiam, quacum successive duas priores conferimus, ac visa earum convenientia, vel discordia colligimus eas quoque inter se vel convenire vel non convenire : hoc dum facimus, *ratiocinari* dicimur.

Quid
ratioci-
natio?

CXXII. *Ratiocinatio* igitur, sive *ratiocinium* est assensus, quam mens convenientiæ, vel repugnantiae quarum idearum præstat propter cognitam earundem cum tertia idea assumpta convenientiam, vel repugnantiam. Sic, ut sciam, num idea *incorruptibilitatis* conveniat idee *animæ humanæ*, assumo ideam tertiam *entis simplicis*, & cum hac successive duas prioris comparo; deprehendo igitur primum, maximam esse convenientiam inter ideam *entis simplicis*, & ideam *incorruptibilitatis*; dein etiam eandem convenientiam esse inter ideas *simplicis*, & *animæ humanæ*: visa igitur utriusque hujus idee cum tertia assumpta convenientia, affirmo eandem quoque inter ipsas dari, & judico: igitur *etiam anima humana est incorruptibilis*. Hoc iudicium erit *ratiocinium*.

Quid Ju-
dici-
um
intuiti-
vum &
discursi-
vum?

COROLL. Igitur *ratiocinium* a simplici iudicio (§. 92.) non differt, nisi in eo, quod iudicium

cium sit assensus præstitus convenientiæ duarum idearum ex sola earum collatione & quasi ipsa intuitione cognitæ, quare etiam iudicium *intuitivum* dici solet: contra verò ratiocinium sit ille assensus, qui præstatur convenientiæ duarum idearum ex earum cum tertia quapiam comparatione cognitæ, unde iudicium *discursivum* appellatur; *ratiocinari* enim, & *discurrere* philosophis idem sonat.

SCHOL. Tertiam illam ideam, quam assumimus, *mediam* posthac ex usu recepto vocabimus, sive quia medio inter utramque loco collocari debet, si naturalem cogitandi modum sequi velimus; sive quia illa mediante in notitiam convenientiæ, vel repugnantæ aliarum duarum pervenimus.

Quid
idea me-
dia?

CXXIII. Cum duas ideas inter se vel convenire, vel disconvenire colligimus ex comparatione earum cum tertia, ratiocinamur (§. 121.): igitur quodlibet ratiocinium duntaxat tres ideas admittit. Et quia porro hæc comparatio unius ideæ cum altera sine iudicio non fit, tria semper concurrunt iudicia: duo, quibus ideæ illæ seorsum cum media conferuntur, simul sumta efficiunt *antecedens* ratiocinii, tertium, quo ideæ illæ inter se conferuntur, *consequens* dicitur; ac in eo, proprie loquendo, actus ratiocinii consistit (conf. cor. §. præc.).

Quæ
ratioci-
nationis
partes?

CXXIV. Cum in ratiocinio convenientiam, vel discordiam duarum idearum colligamus ex eo, quod eæ cum quapiam tertia conveniant, vel non (§. 121.), necesse est, ut detur connexio inter consequens, & antecedens, illudque ex hoc profluat. Connexio hæc vulgo *consequentia* audit, estque requisitum adeo necessarium, ut absque eo ratiocinatio omnis illegitima ac nulla sit.

Quid
confe-
quentia.

SCHOL. Ratiocinatio, quatenus hæc tria iudicia (§. 123.):

(§. 123.), & consequentiam (§. 124.) in se complectitur, spectari solet a philosophis, ut quoddam compositum, cujus unam partem, quam *materiam* vocare placuit, tria iudicia absolvit; alteram vero partem, quæ *forma* cognominatur, consequentia constituit.

Quid
consequens
formale
& materiale?

CXXV. Si consequens verum sit propter antecedens, id est, si ratio, cur consequens verum sit, contineatur in antecedente, nullus potest esse dubio locus, quin detur nexus inter consequens, & antecedens. Pater igitur, in quo *consequentia* consistat, atque inde universim legis instar obtinet: toties habetur in ratiocinio consequentia, adeoque forma, quoties consequens verum est propter antecedens, & tale consequens ajunt esse *verum formaliter*, sive ratione, aut vi *formæ*, quod unicum est legitimum; cum sic v. gr. ratiocinor: *omne ens simplex est incorruptibile, & anima humana est ens simplex: ergo anima humana est incorruptibilis*: datur consequentia, ac consequens est legitimum, id est, formaliter verum; nam anima humana est *ideo* incorruptibilis, quia omne ens simplex, quale quoque anima est, est incorruptibile. Hinc quoque ab opposito, si consequens quidem verum sit, sed non propter antecedens, ratiocinatio carebit sua forma, ac proinde vitiosa erit. Dicitur hoc in casu consequens esse *verum materialiter*, sive ratione *materiæ*, quatenus nempe id præcise in se spectatur; ut est aliquod indicium, & aliis de causis contingit, ut, id ita se habeat, quod in eo enunciat: sic hoc ratiocinium nullum est: *anima humana est materia, & omnis materia est substantia, ergo anima humana est substantia*: nam licet verum sit animam humanam esse substantiam, id tamen non propter antecedens, quia nempe omnis ma-

materia est substantia, & anima humana est materia, sed aliis de caussis ita esse contingit; est proinde in hoc casu consequens tantum materialiter verum, non vero formaliter.

COROLL. 1. Consequens igitur *formaliter* verum, & *materialiter* falsum, est illud, quod licet in se spectatum falsum sit, tamen cum antecedente connectitur, ut: *omne vitium est fugiendum, & temperantia est vitium: ergo temperantia est fugienda*. Et contra consequens tam *formaliter*, quam *materialiter* falsum est, cum illud neque connectitur cum antecedente, neque ut in se præcise spectatum verum est; ut: *aliquis homo est eruditus, sed Cajus est homo: ergo Cajus est eruditus*, si eruditione cateat.

Quid
consequens
formaliter
verum &
materialiter
falsum?
Quid &
formaliter,
&
materialiter
falsum?

COROLL. 2. Universim facillime agnoscitur, num consequens sit *formaliter* simul, ac *materialiter* verum, adeoque legitimum, si illud resolvatur in propositionem causalem (§. 99.) quod fit, si ipsum antecedens per particulam *quia* jungatur cum consequente: quod si tum tota propositio causalis vera fuerit, etiam verum erit consequens tam *formaliter*, quam *materialiter*; sic in superiori ratiocinio tota hæc causalis vera est: *anima humana est incorruptibilis, quia omne ens simplex est incorruptibile, & anima humana est ens simplex: & ideo hoc in casu etiam consequens ratiocinii: anima humana est incorruptibilis: formaliter, & materialiter verum est*; contrarium contingit in altero ratiocinio, in quo, quia falsa ratio assignatur, conclusio est *formaliter* falsa, etsi *materialiter* spectata vera sit. Quod ratio in antecedente inclusa in se falsa quidem sit, attamen, si ex hypothese interea pro vera assumeretur, legitima foret ratio consequentis, tum ipsum consequens erit

Unde
agnoscitur?

formaliter verum, sed veritate materiali de-
stituetur; ut: omne corpus est ens compositum,
sed spiritus est corpus; ergo spiritus est ens
compositum; ubi resolutio fieri debet; spiritus
est ens compositum, quia spiritus est corpus,
& omne corpus est ens compositum (§. cit.)

COROLL. 3. Veritas materialis consequentis
 legitimi nexu perpetuo, ac indissolubili con-
 sociatur cum veritate materiali antecedentis,
 ita ut una absque altera nullo simpliciter in ca-
 su dari possit. Istud & inde patet: cum ratio,
 cur consequens legitimum verum sit, conti-
 neatur in antecedente (§. 125.), ipsum quo-
 dam modo consequens in antecedente includi-
 tur, atque adeo illud ipsum, quod in conse-
 quente explicite, ac aperte dicitur, jam prius
 in antecedente implicite & occulte dictum est,
 si ratiocinium vitio careat; sic dum dico: *om-*
ne ens simplex esse incorruptibile, & animam
esse ens simplex, jam implicite dico, *animam*
esse incorruptibilem, quod deinde in conse-
 quente aperte enuncio. Jam vero, si aliquid
 verum, vel falsum sit, dum implicite dicitur,
 etiam verum, vel falsum esse debet, cum ex-
 plicite enuncietur. Inde autem profluunt se-
 quentes canones, quorum tam in inquirenda,
 quam communicanda veritate usus est fre-
 quentissimus.

Que ra-
 tiocina-
 tionis se-
 gest

1.) Ex vero antecedente non potest legiti-
 me sequi falsum consequens.

2.) Si consequens legitimum falsum sit,
 antecedens quoque falsum sit, oportet.

3.) Ex falso antecedente non potest legiti-
 me sequi verum consequens.

4.) Si consequens legitimum verum sit, an-
 tecedens quoque verum sit, oportet.

5.) Quidquid stare potest, aut non potest
 cum veritate antecedentis, stare etiam po-
 test, aut non potest cum veritate legitimi
 consequentis, & vicissim.

CXXVI. Quando duas ideas cum tertia conferimus, tres nobis casus, nec plures, nec pauciores, contingere possunt: vel enim 1.) utraque idea cum media convenit; vel 2.) alterutra tantum; vel 3.) neutra. In primo casu concludendum est eas quoque inter se convenire; in altero, eas inter se non convenire; in tertio vero nihil concludi poterit. Hæc porro nituntur propositionibus quibusdam adeo per se clavis; ut in axiomatum loco (§. 116.) tuto haberi possint, suntque sequentes.

Quot
ratiocina-
nando
casus?

1.) Si duo conveniant cum uno tertio, ea quoque inter se conveniunt.

Quæ
xiomata?

2.) Si ex duobus unum conveniat cum tertio, alterum non, ea inter se non conveniunt.

3.) Si ex duobus neutrum conveniat cum tertio, ea possunt inter se vel convenire, vel non convenire.

COROLL. 1. Quando concludimus, proprie ratiocinamur (§. 13.): igitur in duobus tantum primis casibus ratiocinatio est possibilis, in tertio numquam, sed tum oportet aliam ideam mediani exquirere.

COROLL. 2. In primo casu ideæ comparatæ cum media inter se conveniunt, eaque convenientia in conclusione est affirmanda; in secundo eæ inter se non conveniunt; adeoque in conclusione convenientia est neganda: igitur in casu primo conclusio est affirmativa, in altero negativa.

COROLL. 3. Qualitas ratiocinii desumi debet a qualitate (§. 102.) conclusionis, cum in ea præcipue actus ratiocinii consistat (§. 223.): igitur ipsum etiam ratiocinium in primo casu est affirmativum, in altero negativum; ac consequenter omne ratiocinium vel affirmativum, vel negativum est.

COROLL. 4. In duobus tantum casibus ratiocinatio fieri potest: igitur omnis ratiocinatio alterutro ex duobus primis axiomatis niti necessario debet: quare duo hæc & requiruntur, & sufficiunt etiam; ea proinde, quæ ab aliis congeruntur, tuto hic negligimus.

SCHOL. Utor vocabulo *conveniunt* in sensu latissimo, ut intelligatur qualiscumque convenientiæ species; sensus proinde est: quocumque modo duo convenient cum tertio, seu sint *eadem* seu *similia*, seu quacumque ratione vel ad *partem*, vel ad *totum* quampiam relationem habeant, eodem prorsus modo ea inter se quoque convenire. Hæc porro axiomata similia a ponderibus petito tironi fere ad oculum illustrari possunt. Sint duæ massæ, argenti una, auri altera: cupis scire, num argentea in pondere conveniat cum aurea? accipe tertiam quamdam massam cupri noti jam ponderis v. g. duarum librarum. Si jam successive aurum cum cupro, argentum cum cupro ponderes, deprehendasque argentum, & aurum cum cupro convenire, nonne indubitanter concludes argentum quoque cum auro convenire, hoc est: aurum, & argentum inter se convenire quoad pondus, propterea quod quoad idem pondus conveniunt cum tertia massa cupri assumptâ? En casum primum, qui in proximo axiomate innititur. Pone porro argentum convenire cum cupro, non item aurum, nonne illico inferes, aurum cum argento non convenire, propterea quod unum tantum, non item alterum quoad pondus cum cupro convenit? En casum alterum, qui in secundo axioma innititur. Finge denique, facti examine neque aurum, neque argentum convenire cum cupro, quid jam inferes? aurum quoad pondus convenire cum argento? At hoc non constat, & contrarium est possibile; si enim aurum sit unius, argentum trium libra-

librarum, profecto non convenient cum cupro, quod ponitur esse duarum librarum; sed nec tamen inter se convenient. Inferes ne, igitur aurum quoad pondus non convenire cum argento? at neque hoc constat, & contrarium rursus est possibile; sit enim aurum trium, & argentum pariter trium librarum, neutrum cum cupro duarum librarum conveniet, convenient tamen inter se. Cum igitur utrumque sit possibile, ac quod eorum sit, ex sola comparatione instituta non elucescat, illatione abstinendum erit. En casum tertium, qui in tertio axioma innuitur.

C A P U T XIII.

D E

ARGUMENTATIONE, ET NOMINAT. DE SYLLOGISMO SIMPLICI.

CXXVII. *Argumentatio* est omnis ea oratio, qua ratiocinium mente conceptum aliis significamus.

COROLL. Argumentationi igitur omnia ea applicari debent, quæ de ratiocinio dicta sunt, ut quod sit vel *affirmativa*, vel *negativa*; quod constet *antecedente*, *consequente*, & *consequentia* velut forma; quod consequens contineatur in antecedente &c. &c.

SCHOL. Argumentatio est genus quoddam, diversasque sub se species continet, *syllogismus* videlicet, *enthymema*, *epicherema*, *dilemma*, *foriten*, & *inductionem*. Princeps in his locus dari solet syllogismo: igitur de hoc primum, tum de reliquis agemus.

CXXVIII. *Syllogismus* est argumentatio, quæ

Quid argumentatio?

Quæ eius species?

Quid & quotuplex?

Sillogismus?

quæ tria iudicia totidem propositionibus enunciat; ut: *omne ens simplex est incorruptibile; sed anima humana est ens simplex: ergo anima humana est incorruptibilis*. Dicitur *simplex*, cum ejus propositiones sunt simplices; *compositus* vero: quando una ejus propositio est composita: nunc de simplici tantum.

Quæ partes syllogismi simplici?

CXXIX. *Partes* syllogismi simplici: sunt termini, & propositiones præter consequentiam, seu formam, de quæ (§§. 124. 125.) jam satis actum est. Termini ideas in ratione occurrentes (§. 121.) exprimunt, prætereaque non nisi tres esse possunt, duo, qui ideas duas comparandas cum media denotant, & hi *extremi*: unus, qui mediam illam ideam, quacum reliquæ comparantur, significat, & hic *medius* vocatur. Extremorum unus est *major*, ille videlicet, qui in ultima propositione prædicatum agit: alter *minor*, qui ejusdem propositionis subjectum est.

Quid propositio n. a. jor, minor, & conclusio?

CXXX. Propositiones, quæ alteram syllogismi partem constituunt, pariter nonnisi tres esse possunt (§. 128.), variamque sortiuntur denominationem. Ea, in qua terminus major consociatur cum termino medio, *major*, vel *propositio* sine addito: ea, in qua terminus minor cum termino medio conjungitur, *minor*, vel *assumptio*: utraque simul *premissæ*: ea demum, in qua duo termini extremi inter se copulantur, *consequens*, *conclusio*, vel *complexio* dici solet.

SCHOL. Nimirum cum ex tribus tantum terminis (§. 129.) tres propositiones exurgere debeant, facile patet, quemlibet terminum bis esse ponendum, ut sic tria subjecta, & tria prædicata ad totidem propositiones construendas necessaria obtineantur, id autem consequimur, cum quemlibet terminum extremum

seor-

seorsum cum medio, & deinde duos illos extremos inter se jungimus; ut si sint tres termini: *anima humana*, *incorruptibilis*, *ens simplex*, quorum duo illi sint extremi, hic medius; conjungantur igitur primum unus extremus cum medio, dicendo: *omne ens simplex est incorruptibile*; tum alter cum eodem medio: *anima humana est ens simplex*: denique illi duo extremi inter se: *anima humana est incorruptibilis*. Hinc petitur regula universalis, cujus ope tiro promptissime in syllogismo quocumque dato terminos dignoscat: attendenda nimirum est primo loco propositio tertia, sive conclusio; duo termini in ea occurrentes sunt extremi, ita quidem, ut qui prædicatum agit, *major*; qui vero subjectum, *minor* dicatur; tertius deinde, qui in utraque præmissa deprehenditur, erit terminus *medius*. Denique hoc quoque tironem ignorare non oportet: etsi propositio major in sensu stricto ea sit, quæ in se continet terminum majorem, sive conclusionis prædicatum, jam fere tamen usus obtinuit, ut semper sine attentione ad terminum majorem primum in syllogismo propositione *majorem* vocitemus, etsi ea quandoque re ipsa *minor* sit; idque ideo, quia potissimum alias ob majorem cum naturali nostro cogitandi modo convenientiam *major* primo loco profertur.

CXXXI. Syllogismus, cujus conclusio est affirmativa pariter *affirmativus* est; ut: *omne ens simplex est incorruptibile; sed anima humana est ens simplex; ergo anima humana est incorruptibilis*. Cujus vero conclusio est negativa, *negativus* est; ut *nullum corpus cogitat; sed anima humana cogitat: ergo anima humana non est corpus*. Proinde omnis syllogismus vel *affirmativus* vel *negativus* (conf. §. 126. cor. 3.) est.

Quid syllogismus affirmativus & negativus?

SCHOL. Etsi cujuslibet syllogismi bonitas, sive formalis veritas conclusionis ex universalī illa lege (§. 125. cor. 2.) allata semper, & pro omni casu facillime detegatur, adeoque ea sola omnino & construendo, & dijudicando syllogismo cuilibet simplici sufficiat, ne quid tamen tironum commodo desit, præcipuas dialecticorum leges jam adducam. Harum aliæ ad terminos; aliæ ad propositiones pertinent. Illæ sunt numero quatuor. Prima terminorum numerum definit; secunda cum tertia terminum medium; quarta extremos dirigit. Harum binæ qualitatem; binæ quantitatem propositionum constituunt.

Leges Syllogismi Simplicis.

1.) *Tres tantum sint termini.* Patet id ex (§. 129.), & ipsa natura ratiocinii (§. 121.) cujus explicatio est syllogismus; sicut enim in ratiocinio tres tantum idæ, ita hoc ipso in syllogismo tres tantum possunt esse termini, cum quælibet idea uno termino denotetur. Contra hanc legem peccatur 1. si clare quatuor termini diversi adhibeantur, non tamen si sint synonymi: ut si diceres: *omne ens simplex est incorruptibile; sed anima humana est cogitans: ergo anima humana est incorruptibilis.* 2. Si terminus quispiam significationem mutet; est enim in eo casu æquivalenter duplex, cum idem sit, seu duæ idæ diversæ per unum terminum, seu per duos significantur; ut: *omne extensum est corpus; sed omne spatium est extensum: ergo omne spatium est corpus.* Vox *extensum* hic mutat sensum; in majori enim significat extensum in concreto, & in minori extensum in abstracto.

2.) *Terminus medius neque ex toto, neque ex parte ingrediatur conclusionem.* Cum enim
in

in conclusione termini extremi inter se conjungendi sint (§. 130.), locus non erit termino medio; siquidem unaquæque propositio præter copulam non nisi duos terminos, subiectum videlicet, & prædicatum admittit (§. 94. cor. 1. & 2.) Contra peccarent hi syllogismi: *omnis virtus est honesta; sed pietas est virtus: ergo aliqua virtus est honesta: omnis habitus honestus est laudandus; sed pietas est habitus honestus; ergo pietas honesta est laudanda.*

3.) *Terminus medius saltem in una præmissarum accipiatur universaliter, & quidem complete.* Nisi enim id fieret, mutaret sensum, adeoque æquivaleret duobus terminis, quod est contra L. 1. Nam si medius terminus in utraque præmissa accipiatur particulariter, in utraque adstringitur ad eum sensum particularem, quem præcise admittit alter extremus, quocum in ea propositione conjungitur; cum igitur duo extremi inter se sint diversi, diversa quoque in termino medio significatio oriatur, necesse est; ut si dicas: *omnis liber est aliquod compositum; sed aliquod compositum est quodvis libri folium; ergo quodvis libri folium est liber.* Debet porro hæc universalitas termini medii esse completa (§. 106. schol.); unde pariter vitiose sic concludo: *omne in republica munus Cajum ornavit; sed consulatus a Titio gestus est aliquod in republica munus: ergo consulatus a Titio gestus Cajum ornavit.* Excipitur tamen ab hac lege terminus medius, si sit singularis; cum enim determinatum semper individuum significet, omne æquivocationis periculum procul abest. Inde bene sic arguentor; *Plato fuit discipulus Socratis: sed Plato fundavit sectam academicam; ergo aliquis discipulus Socratis fundavit sectam academicam.*

4.) *Terminus extremus non sumatur uni-*

*universaliter in conclusione, quando in præmissis acceptus est particulariter. Ratio est: quia terminus extremus, quia in præmissis tantum particularis fuit, novum efficeret sensum in conclusione, si ibi acciperetur universaliter, unde quatuor evaderent termini contra L. 1. Quin & plus diceretur in conclusione, quam in præmissis, quod fieri numquam potest, tunc conclusio in præmissis contineri debeat (§. 125. cor. 3.), sic vitiosus foret hic syllogismus: *omne cogitans est existens; sed nullum corpus est cogitans: ergo nullum corpus est existens.* Vel Epicurus erravit in natura animi definienda; sed Epicurus fuit philosophus: ergo omnis philosophus erravit in natura animi definienda.*

5.) *Ambe præmissæ non sint negativæ.* Neutra enim idea conveniret cum media, adeoque haberetur casus tertius ratiocinii (§. 126.), in quo secundum axioma tertium (§. citat. schol.) nihil concludi potest; sic nulla est conclusio: si dicam: *nullum corpus cogitat; sed anima humana non est corpus: ergo...*

6.) *Si una præmissarum sit negativa, negativa quoque sit conclusio.* Si enim una præmissarum sit negativa, ex duabus ideis una convenit cum tertia, altera non: habetur proinde casus secundus ratiocinii (§. 126.), in quo per axioma secundum ideæ illæ inter se non conveniunt, atque adeo in consequente convenientia earum neganda est, quod non nisi conclusio negativa præstat; sic cum dicis: *nullum corpus cogitat; sed anima cogitat; inferre debes: ergo anima non est corpus.*

COROLL. Ex hac, & præcedente lege tiro colliget, nunquam in syllogismo legitimo unam tantum propositionem, vel omnes tres simul posse esse negativas; sed necesse esse, ut vel

omnes tres sint affirmativæ, vel duæ earum negativæ, & una affirmativa.

7.) *Ambæ præmissæ non sint particulares.*

Sit enim 1. Syllogismus affirmativus, erunt igitur duæ præmissæ affirmativæ per L. 6. Si jam duæ præmissæ essent particulares, medius terminus bis acciperetur particulariter contra L. 3. Nam omnes termini harum propositionum sunt particulares: ii duo, qui subjecta agunt, propterea, quia subjectum propositionis particularis semper est particulare (§§. 106. 107.); ii duo, qui prædicata agunt, propterea, quia prædicatum propositionis affirmativæ semper sumitur particulariter (§. 104.); sed inter hos medius terminus bis ponitur (§. 130. & schol.). Igitur & ipse bis particularis erit; ut: *aliqua res est virtus; sed a qua virtus est mansuetudo: ergo aliqua mansuetudo est ira.*

Sit 2. Syllogismus negativus, erit igitur una præmissa pariter negativa per L. 6. Jam in hac præmissa negativa medius terminus erit vel subjectum, vel prædicatum. Sit primo subjectum; iterum bis accipietur particulariter contra L. 3. cum enim medius terminus in negativa præmissa, quæ particularis est ex hypothese, ponatur esse subjectum, erit is quoque ibi particularis (§. 106. 107.). In altera autem præmissa, quæ est particularis affirmativa, idem ille medius terminus semper erit particularis, seu agat subjectum, seu prædicatum (§§. 106. & 104.): igitur bis accipietur particulariter; ut si dicas: *aliqua ira est laudabilis; sed aliqua ira non est approbanda; ergo aliquid laudabile non est approbandum.* Sit jam secundo medius terminus in præmissa negativa prædicatum: hoc in casu non orietur quidem hoc vitium, quod jam bis assignavimus; cum enim omne præ-

dicatum propositionis negativæ universale sit (§. 106.), medius terminus saltem semel accipitur universaliter, adeoque satisfiet L. 3 sed peccabitur contra L. 4. Videlicet terminus extremus, & quidem major in conclusione erit universalis, qui tamen in præmissis fuit particularis. Nam in hoc casu conclusio est negativa per L. 6. igitur terminus major, qui ibi prædicatum agit (§. 129.), in ea sumitur universaliter (§. 105.); in præmissis vero idem terminus major vel est subjectum præmissæ negativæ (cum ejus prædicatum ex hypothesi sit terminus medius) vel aut subjectum, aut prædicatum alterius præmissæ affirmativæ; quidquid horum sit, semper est particularis; subjectum enim utriusque præmissæ est particulare propter suppositam particularitatem utriusque propositionis (§§. 106. 107.); prædicatum pariter præmissæ affirmativæ est particulare per dicta; & (§. §. 104.): ergo ubicumque in præmissis in hoc casu ponatur terminus major, semper est particularis; sic u. g. *quidam impius non fuit philosophus; sed quidam Arheus fuit philosophus; ergo quidam Arheus non fuit impius*. Excipiuntur ab hac lege duæ propositiones singulares; verum tunc solum, quando ipse terminus singularis agit terminum medium, (conf. L. 3.); sic bene concludis: *Cicero fuit princeps eloquentiæ; sed Cicero fuit consul Romanus: ergo quidam consul Romanus fuit princeps eloquentiæ*; non vero sic: *Plato fuit discipulus Socratis; sed etiam Xenophon fuit discipulus Socratis: ergo Plato fuit Xenophon*.

8.) Si una præmissarum particularis sit, sit quoque conclusio particularis. Sit enim i. utraque præmissa affirmativa: cum una ex iis ponatur esse particularis, uterque terminus extremus in his præmissis erit particularis;

nam

nam tres termini harum propositionum sumuntur particulariter, nempe duo prædicata (§. 104.), & subjectum præmissæ particularis; & unicus solum universaliter, qui videlicet subjectum agit in præmissa universali. Hic vero, qui universaliter sumitur, necessario est terminus medius, qui propter L. 3. semel saltem debet accipi universaliter, ut si dicas: *omnis virtus est honesta; sed aliqua ira est virtus*: igitur in hoc casu uterque extremus in præmissis sumitur particulariter. Jam vero, si conclusio fieret universalis, utique ejus subjectum, nempe terminus minor fieret universalis, quod cum per L. 4. non liceat, necesse est, ut conclusio fiat particularis: igitur inferendum: *ergo aliqua ira est honesta*, non autem; *ergo omnis ira est honesta*. Sit 2. una præmissarum negativa: cum rursus una ponatur esse particularis, duo tantum termini in his præmissis erunt universales; nempe, si universalis sit negativa, hujus negativæ subjectum, & prædicatum, si vero universalis sit affirmativa, subjectum affirmativæ, & prædicatum negativæ; inter quos saltem semel debet esse terminus medius per L. 3. alter vero universalis poterit esse unus ex extremis: proinde unus extremorum certo in præmissis erit particularis, ut si dicas: *omnis virtus est honesta; sed aliqua ira non est virtus*: sive *nulla virtus est fugienda*; *sed aliqua ira est virtus*: Jam vero, cum in hoc casu conclusio fieri debeat negativa per L. 6. si ea foret universalis, uterque terminus extremus in hac conclusione numeretur universaliter (§§. 106. 105.); quod cum per L. 4. non licet, conclusio particularis sit, necesse est; igitur inferendum in primo; *ergo aliqua ira non est honesta*; non autem: *ergo nulla ira est honesta*; & in altero: *ergo aliqua ira non est fugienda*.

da, non autem: ergo nulla ira est fugien-
da.

COROLL. Ex hac, & præcedente lege tiro
rursum colliget, nonquam omnino in sylla-
gismo legitimo aut unam tantum, aut omnes
tres propositiones posse esse particulares;
sed necesse generatim esse, ut vel omnes
tres sint universales, vel due particulares,
& una universalis.



C A P U T XIV.

D E

SYLLOGISMO COMPOSITO.

CXXXII. Syllogismus *compositus* (§. 128.)
quatenus attentionem meretur, est triplex;
vel *conditionalis*, vel *conjunctivus*, vel *dis-*
junctivus. De his ordine. Syllogismus *con-*
ditionalis, sive *hypotheticus* est, cum una ejus
premissa est propositio *conditionalis* (§. 98.);
ut: *si mundus providentia regitur, Deus est;*
sed mundus providentia regitur; ergo Deus est.

CXXXIII. Syllogismus hic unica hac lege
ordinatur: *affirmata conditio affirmatur quo-*
que conditionatum; & negata conditio neg-
atur conditio. Cum enim in conditione con-
tineatur ratio, cur verum sit conditionatum
(§ 98. cor. 2.), quamdiu ratio subsistit, ve-
ritas quoque conditionati subsistere debet, &
si ab opposito veritas conditionati non detur,
neque ejus ratio in conditione dari poterit;
sic: *si anima humana est ens simplex, ea est in-*
corruptibilis; sed anima humana est ens sin-
plex; ergo anima humana est incorruptibilis; vel
si anima est corpus, ea est ex partibus composita;

ta; sed anima non est ex partibus composita & ergo anima non est corpus.

SCHOL. Si unica ratio, cur conditionatum possit esse verum, illa sit, quæ in conditione exprimitur; vera quoque prodit conclusio, cum negata conditione negatur conditionatum, vel affirmato conditionato affirmatur conditio; ut si dicas: *si otium virtus est, illud est honestum; sed otium non est virtus: ergo otium non est honestum*; vel *si anima ens simplex est, ea est partium experta; sed est partium experta: ergo est ens simplex*. Contra si præter illam, quam conditio continet, aliæ dentur rationes, cur conditionatum verum esse queat, conclusio hoc modo elicita falsa erit; ut si inferas: *si Cujus humicida est, est improbus, sed Cujus non est humicida: ergo non est improbus*; vel: *sed est improbus: ergo est homicida*. Verum ex ipsa hac diversitate satis patet, ejusmodi conclusiones, quando veræ sunt, esse solum ratione materiæ, non verò formæ veras, atque adeo hunc Syllogismos hypotheticos construendi modum pro lege generali statui non posse. lex enim, a qua formalis ratiocinii veritas pender, pro omni absolute materiæ valere debet.

CXXXIV. Syllogismus conjunctivus, sive ^{Quid} ^{conjun-} ^{ctivas} copulativus est, cujus una præmissarum est propositio copulativa (§. 100.), & quidem negativa, cujus membra ita sibi opponuntur, ut simul vera esse nequeant; ut cum dico: *nemo potest simul servire Deo & mundo; sed multi servantur mundo: ergo multi non servantur Deo*.

CXXXV. Syllogismus Copulativus hanc sequitur legem: *affirmato membro quocumque* ^{Quæ ejus} ^{lex} *ve: quæ negantur*; cum enim membra copulativa nequeant simul vera esse (§. præc.), hæc ipso, quod unum affirmando ponatur esse

se verum, reliqua negando tolli debent; ut
non potest anima simul æternum vivere, &
cum corpore perire; sed anima æternum vivit:
ergo non perit cum corpore.

SCHOL. Si membra copulata ita inter se pugnent, ut nec falsa simul esse queant, etiam negato uno reliqua cum veritate affirmantur, ut: *non potest aliquod corpus simul moveri, & quiescere; sed hoc corpus non movetur: ergo quiescit.* Sed nimirum hæc conclusio rursus tantum materialiter vera erit; cum id universim non obtineat; nam si omnia membra simul abesse, adeoque falsa esse possint, ex unius negatione haudquaquam vera conclusio ducetur; ut si dicas: *nemo potest simul esse Viennæ & Parisiis; sed Cajus non est Viennæ: ergo Cajus est Parisiis;* quod falsum est si, sit Pragæ vel alibi (conf. §. 133. schol.).

Quid dis-
 juncti-
 vas?

CXXXVI. Syllogismus *disjunctivus* est, cujus una præmissarum est propositio complete disjunctiva (§. 101. & schol.), cujus proinde omnia disjunctionis membra enumerantur; ut: *aut ver est, aut æstas, aut autumnus, aut hyems; sed ver est; ergo neque est æstas, neque autumnus, neque hyems.*

Quæ-
 ritur
 lex?

CXXXVII. Syllogismum disjunctivum hæc lex dirigit: *affirmato membro quocumque, aut pluribus, reliqua negantur; & negato uno, aut pluribus reliqua affirmantur.* Membra nempe disjunctionis completæ nec simul vera, nec simul falsa esse possunt. Sic: *vel anima humana perit cum corpore, vel post mortem corporis manet superstes; sed anima humana non perit cum corpore: ergo post mortem corporis manet superstes.* Item *Vienna vel est sita in Europa, vel in Asia, vel in Africa, vel in America; sed Vienna sita est in Europa: ergo neque in Asia, neque in Africa, neque in America.*

C A P U T XV.

D E

RELIQUIS ARGUMENTATIONIS
SPECIEBUS.

CXXXVIII. *Enthymema* est Syllogismus, ^{Quid enthymema?} cujus una præmissa in mente retinetur, propterea quod per se facile a quovis intelligi, ac suppleri potest; ut cum dico: *anima humana est ens simplex: ergo est incorruptibilis*, Prior antecedens: altera consequens audit.

CXXXIX. *Epicherema* nuncupatur Syllogismus, cujus vel alterutri, vel utrique præmissarum sua statim ratio adjungitur, quo adversarius uno velut impetu undique constringatur; ut: *omne ens simplex est incorruptibile; non enim habet partes, in quas resolvi possit; sed anima humana est ens simplex; nam impossibile est, ut ens compositum cogitet: ergo anima humana est incorruptibilis*. ^{Quid epicherema?}

CXL. *Dilemma* est argumentatio, in qua ex singulis propositionis cujusdam complete disjunctivæ- (§. 101. & schol.) membris aliquid contra adversarium infertur; ut est illud Tertulliani in apologia pro Christianis adversus Trajani Imp. decretum: *vel nocentes sunt Christiani, vel innocentes, si nocentes: cur inquiri prohibes? Si innocentes: cur delatris pœnam irrogas?* Vel illud contra Scepticos: *de omnibus dubitandum esse vel verum est, vel falsum; si verum; ergo habetur indicium, per quod verum a falso discernatur; si falsum: ergo habetur indicium, per quod falsum a vero discernatur*. ^{Quid Dilemma?}

Leges legitimi Dilemmatis.

1.) *Disjunctio sit completa*; si enim membra omnia simul falsa esse possunt, adversarius negando antecedens vim argumenti eluderet; sic male arguit Tullius mortem non esse timendam ex eo, quod animus vel pereat cum corpore, vel post mortem aeternum beatus sit futurus; disjunctio enim deficiente aliquo membro, non est completa. Potest nempe etiam animus post mortem esse perpetuo infelix, ac miser.

2.) *Quod inferitur, ex suo membro legitime profluat* secus adversarius negando consequentiam elabetur, si sic arguas: vel anima perit cum corpore, vel post mortem erit superstes: si perit: mors non est timenda, cum nihil sentiat amplius; si manet superstes, mors iterum timenda non est, cum sit beata futura; utraque illatio negari potest; neque enim in falsa hypothesis, quod anima pereat cum corpore, neque ex eo, quod maneat superstes, sequitur mortem non esse timendam, cum in primo casu possent gravissimi dolores ipsum interitum comitari: in altero, aeterna miseria mortem subequi.

3.) *Non sit arripitor, sive reciprocum*, quod tum contingit, quando adversarius eadem enumeratione disjunctiva uti, atque ex ipsius membris aliquid contra argumentum inferre potest; sic quispiam pro are voluit munus in republica suscipiendum non esse, usus hoc dilemmate: vel bene, vel male administrabis munus susceptum; si bene: offendes homines; si male: Deum. Quod inverti potest hac ratione: vel bene, vel male administrabis munus susceptum; si bene placebis Deo; si male: hominibus. Ejusmodi quoque est pervulgatum illud Protagorae contra Evathlum in jus vo-

catur: *vel pro me pronunciabunt iudices, vel pro te: si pro me: mercedem solves ex sententia iudicum; si pro te: eandem solves ex pacto*, quod ingeniose Evathlus retorsit, *vel pro me pronunciabunt iudices, vel pro te; si pro me: nihil solvam ex sententia iudicum; si pro te: nihil solvam ex pacto*. Protagoras nempe, referente Aulo Gellio, Evathlum in ^{Not.} ^{Att. l. 9.} ^{c. 10.} iure instruxit eo pacto, ut ubi primam causam in foro vicerit, alteram mercedis partem dependat; callidus vero discipulus, ut ne ad solvendam mercedem adigeretur, nullius causæ patrociniū suscepit.

CXLI. Sorites est argumentatio, in qua ^{Quid sorites?} plures propositiones ita copulantur, ut semper prædicatum præcedentis fiat subiectum sequentis, donec formetur conclusio, in qua subiectum primæ coniungitur cum prædicato ultimarum; ut: *anima humana est ens simplex, ens simplex non componitur ex diversis partibus; quod non componitur ex diversis partibus, non est resolubile in partes, quod non est resolubile in partes, est incorruptibile: ergo anima humana est incorruptibilis*. Vel: *quodlibet corpus est in aliquo loco, quod est in aliquo loco, potest etiam esse in alio loco, quod potest esse in alio loco, potest mutare locum, quod potest mutare locum, est mobile: ergo quodlibet corpus est mobile*.

COROLL. Natura hujus argumentationis inspicanti facile patet, plures syllogismos constrictos, ac velut truncatos in ea latere; unde etiam sorites semper in eosdem resolvi potest, & quidem universim in tot, quot sunt præmissæ, una tamen demta; sic superior sorites resolvitur in hos syllogismos: *ens simplex non componitur ex diversis partibus; sed anima est ens simplex: ergo anima non componitur ex diversis partibus*. Quod non com-

ponitur ex diversis partibus, non est resolvable in partes; sed anima non componitur ex diversis partibus: ergo anima non est resolvable in partes. Quod non est resolvable in partes, est incorruptibile; sed anima non est resolvable in partes: ergo anima est incorruptibilis.

Leges legitimi Soritis.

1.) *Nulla præmissarum dubia sit, aut falsa; cum enim ex falso antecedente non sequatur legitime verum consequens (§. 125. cor. 3.), conclusio in sorite falsa sit, aut dubia, necesse est, si vel una præmissarum talis sit; ita peccat sorites Velleii Epicurei apud Ciceronem. Dii sunt beatissimi, beatus quis non est sine virtute, virtus non est sine ratione, ratio non est, nisi in hominis figura: igitur Dii habent hominis figuram; ostendit vitium Cotta; nempe falsum esse, quod ratio non sit, nisi in hominis figura.*

*De nat.
D. I. I.
c. 18.
L. c. c.
30.*

3.) *Omnes præmissæ non sint negativæ; talis enim sorites resolvetur in syllogismo, quorum omnes propositiones forent negativæ, quales vitiosi sunt (§. 131. L. 5.). Sic nihil inferres dicendo: anima non est corpus, corpus non cogitat, quod non cogitat, non est necessario ens simplex &c. &c.*

*Cic. de
div. I. 2.
c. 4.*

SCHOL. *Sorites græce, latine Acervalis veteribus erat ut plurimum captiosa, atque ad fallendum instituta argumentandi ratio, ut nempe minutissimis additionibus, aut subtractionibus ab eo, quod evidenter verum est, ad aliquid aperte falsum adduceretur adversarius: ut si quis asserat, eum auctorem inter antiquos jure habendum esse, qui ante 101. annos scripserit; si jam quæras, quid vero, si ante 99. annos, pariterne antiquus dicendus, an non? Hocque concessio urgeas: quid si an-*

te 89. & sic porro instando ad triennium; vel biennium devenias, quærasque iterum, an is inter antiquos reputandus; an non? Cicero Epicuro hoc vitium vehementer exprobat. *Qq. A. cad. l. 4. c. 16.* Chrysippum quoque hoc argumentandi genere delectatum fuisse ex Laertio constat.

CXLII. *Inductio* est argumentatio, in qua, *Quid inductio?* quod de singulis sive generibus, sive speciebus, sive individuis affirmatum, vel negatum est, universim de toto genere, aut specie concluditur; ut si dicas: *aurum, argentum, cuprum, plumbum, ferrum, stannum, platina igni injecta liquefiunt: ergo omne metallum igni injectum liquefit: vel: infans, puer, adolescens, vir, senex suis subiecti sunt vitiis; ergo nulla hominum ætas a vitiis exempta est.*

CXLIII. *Inductio* est *completa*, si omnia individua, aut species, aut genera subiecta enumerentur: *incompleta* vero, si quædam omituntur. *Quota, plex inductio?*

SCHOL. *Inductio completa* robur habet invictum, cum fieri simpliciter nequeat, ut id, *Quod robur completae,* quod singulis individuis, aut speciebus competit, integræ speciei, aut generi, quod ea sub sua extensione complectitur, non conveniat. *& incompletae?* Minus firmiter concludit *incompleta*; magnam tamen, si rite adhibeatur, vim obtinet, itaque rem persæpe conficit, ut non nisi imprudens de veritate per ejusmodi inductionem stabilita dubitare possit; immo quandoque etiam eo pertingit, ut fere absolutæ demonstrationi æquipolleat. Sic per inductionem inducimur; ut putemus, eum, qui nobiscum loquitur, habere animam rationalem, ut nos, vitulum, quem coram vivum intuemur, habere jecur, lienem, reliquasque internas partes ita dispositas, prout in dissecto conspiciuntur: & quidem ita hæc tenemus, ut, non obstante absoluta in contrarium possibilitate, abs-

absque insanix nota hæc, & similia in dubium vocare nequeamus. Est hæc inductio, quæ etiam frequentius argumentum ab *analogia* petitum denominatur, physicis præcipue in usu, servitque ad investigandas generales corporum proprietates, ac universales naturæ leges constabiliendas, quibus in casibus inductio completa frustra potissimum desideratur. Eam in rem elegantissima monita suppeditat Cl. P. Boscovich, quæ in compendium redacta hic exhibeo.

*Dissert.
de lege
contin.*

Leges de legitimo Inductionis usu.

1.) Si existentia generalis cujusdam in natura legis per inductionem probanda sit, necesse est, ut ea in omnibus omnino casibus, qui in examen vocari possunt, iisque numero non paucis obtinere deprehendatur; sic physici, cum in omnibus corporibus, quæ sub experientiam cadunt, deprehendant unum ab altero loco excludi, hanc proprietatem, quam *impenetrabilitatem* vocant, omnibus omnino corporibus quantumcumque vel ob distantiam, vel ob exiguitatem a sensibus nostris remotis absque hæsitatione attribuunt. Hoc porro in casu non oberit, si quandoque contrarium fieri videatur, si modo illud examine accuratius instituto, neque melius perspecta cum lege stabilita certo quodam modo conciliari possit; sic non obest, quod sæpius unum corpus in alterum, ut aqua in spongiam, olea in marmor, penetrare videatur; cum hæc & similia cum impenetrabilitate generali facile concilientur, dicendo: id ob vacuos corporum poros fieri debere.

2.) Si quæpiam proprietas *absoluta*, quæ videlicet nullum ad sensus nostros respectum habet, universim in majoribus, ac sensibilibus corporum massis deprehendatur, ea quoque

que insensibilibus, & quantumcumque exiguis corpusculis attribui debet, nisi manifesta ratio obster; magnitudo siquidem, & parvitas respectu rerum, ut sunt in se, nihil mutant, totumque a nostrorum sensuum acumine pendet. Sic ex eo, quod omnia corpora sensibilia, *gravia*, & *impenetrabilia* sint, concludendum est *gravitatem*, & *impenetrabilitatem* minimis quoque earum partibus, ac corpusculis insensibilibus competere.

3.) Proprietas *respectiva*, quæ nempe solum comparate ad sensus nostros talis est, a majoribus corporum massis ad minima corpuscula transferri non debet; id enim magnitudinis discrimen, etsi respectu corporum sit accidentale, non tamen in relatione ad eas proprietates tale est; sic non est inferendum minima corpuscula esse *sensibilia*, *colorata* &c. ex eo, quod id in majoribus corporum massis deprehendatur.

4.) Proprietas pariter, quæ rei cuiuspiam solum rationem totius, aut compositionis convenit, a toto ad partes, a composito ad simplicia, ex quibus illud consurgit, transferri nequit; sic omni toti competit habere partes, sed non propterea quælibet pars suis iterum partibus constat; item de ratione cuiuslibet extensi est, ut habeat partes extra partes positas, sed non propterea debent in quavis extensi parte rursum plura diversa esse, quorum unum extra aliud positum sit.

CXLIV. *Poly syllogismus*, sive argumentatio polysyllogistica oritur, cum plures syllogismi inter se connectuntur, ac velut concatenantur. Fit id duplici modo: 1.) ut conclusio præcedentis fiat præmissa sequentis, sic v. g. *omne quod cogitat, est spiritus; sed anima humana cogitat: ergo anima humana est spiritus. Omnis spiritus est ens simplex; sed anima humana est spiritus: ergo anima humana est ens simplex.*

Quid
poly syl-
logis-
mus?

simplex. Omne ens simplex est incorruptibile; sed anima humana est ens simplex; ergo anima humana est incorruptibilis 2.) Ut una præmissarum præcedentis fiat conclusio sequentis syllogismi; ut si invertas dicendo: *omne ens simplex est incorruptibile, sed anima humana est ens simplex, ergo anima humana est incorruptibilis. Omnis spiritus est ens simplex; sed anima humana est spiritus: ergo anima humana est ens simplex. Omne, quod cogitat, est spiritus; sed anima humana cogitat: ergo anima humana est spiritus.*

Quid So-
phisma?

CXLV. Argumentatio, quæ vitio laborat, atque adeo forma sua (§. 124.) destituitur, *paralogismus*, vel *sophisma* audit; sic sophista evadis, cum argumentaris: *quod non perdidisti, habes; sed non perdidisti centum aureos: ergo habes centum aureos.*

Log. 1.
¶ 2.

SCHOL. De variis sophismatum generibus, eorumque resolutionibus copiose antiquiores, ac præsertim Peripatetici ad exemplum ducis sui Aristotelis disseruerunt; verum fructu permōdico: nec videtur e re discentium esse, eorum memoriam tanta copia præceptorum, quarum usus in praxi rarissimus est, obruere: præcipue cum, ut erudite observat P. Buffier, generalis omnium fere fallaciarum fons sit æquivocatio, quæ attenta mentis applicatione non difficulter detegitur. Suppeditavimus quoque (§. 125. cor. 2.) normam universalem, ad quam tiro cujuslibet ratiocinii conclusio- nem exigere, ejusque cum antecedente nexum detegere possit; quodsi tamen plura desideret hæc observet; cum cujuslibet syllogismi dati vitium, quod quæritur, vel in terminis, vel in propositionibus latere debeat, inspiciat primum terminos, videatque, num plures sint, quam tres? Num medius conclusionem ingre- diatur, aut bis particulariter sumatur? Num ali-

aliquis extremorum sit universalis in conclusione, qui particularis fuit in præmissis? Tum inspiciat propositiones, videatque, num utraque præmissa sit particularis, aut negativa? Num una præmissarum existente, particulari, aut negativa conclusio quoque talis sit? Hæc uti uno veluti intuitu mente percurrere potest; ita quoque uno quasi momento vitium syllogismi cujuslibet dati assignare poterit.



PARS SECUNDA

LOGICÆ.

DE

VERITATE COGNOSCENDA.

§. CXLVI.

Quod ar-
gument.
partis se-
cundæ.



Acultas cognoscitiva mentis nostræ per operationes suas veritatem attingere nititur, eaque in re a logica directionem spectat (§. 45.): quare, expositis jam natura, proprietatibus, legibusque universalibus operationum ab ea facultate elicitarum, ordo postulat, ut, quid veritas sit, quibusque ea indiciis ab inimica sibi falsitate dignoscatur, dispiciamus (§. 46.). Hæc est summa alterius hujus partis.

C A P U T I.

DE

VERITATE, AC FALSITATE IN GENERE, EARUMQUE DIVERSIS SPECIEBUS.

Quid ve-
ritas, &
falsitas
logica?

CXLVII. *Veritas*, quatenus ad logicam spectat, est convenientia nostræ cogitationis cum suo objecto; *falsitas* contra est disconvenientia nostræ cogitationis cum suo objecto.

Co-

COROLL. 1. Veritas igitur est affectio quæpiam, sive modus (§. 52.) nostræ cogitationis ab eaque pendet, nec per se sine ea realiter subsistere potest.

COROLL. 2. Cum porro ipsa cogitatio aliud non sit, quam affectio quæpiam mentis cogitantis, palam est, veritatem realiter extra mentem cogitantem non existere.

COROLL. 3. Falsitas contradictorie opponitur veritati, & consistit in ipsius negatione; cogitatio enim, quæ non convenit objecto, hoc ipso disconvenit.

SCHOL. Neminem latere potest, veritatem hoc modo intellectam solum in abstracto (§§ 70. 71.) considerari, quæ si in concreto accipiat, erit ipsa cogitatio suo objecto consentanea. Hæc porro veritas logica compellatur, ut discriminetur ab ea, quam metaphysica, ac illa, quam philosophia moralis in contemplationem vocat. *Veritas metaphysica* in eo consistit, ut res actu existens habeat omnia, quæ ad ejus realem, ac naturalem constitutionem requiruntur; sic enim dicimus *verum* esse aurum, cum res omnia habet, quæ ad realem auri naturam per se requiruntur: huic veritati nihil opponitur; nequit enim res non esse id, quod est. *Veritas* deinde *moralis* est convenientia sermonum cum mente, & sensu loquentis; nam *veracem* eum dicimus, qui, ut sentit, loquitur, etsi forte res se aliter habeat: huic adversatur *mendacium*.

Quid veritas in concreto?

Quid metaphysica, & moralis?

CXLVIII. Cogitationes nostræ referuntur vel ad objectum, quod realiter extra nos tale non existit, quale a mente nostra concipitur: vel ad objectum, cui existentia etiam realis extra nos, ac independentem a nostro conceptu competit (conf. §§. 51. cor. 2. 73.). Oritur hinc duplex veritatis species maximi in recta cogitandi methodo momenti.

Quotuplex veritas logica?

Quid ve-
ritas in-
terna, &
externa.

CXLIX. Veritas interna, sive formalis est convenientia cogitationis nostræ cum objecto, quod realiter extra nos saltem tale non existit, ut cum cogito: *circulus est rotundus*: vera est mea cogitatio, etiamsi nullus existeret circulus; tales sunt veritates omnes pure geometricæ. Veritas externa, sive objectiva est convenientia nostræ cogitationis cum objecto, quod realiter extra nos existit; ut, cum cogito: *tellus est minor sole*: datur etiam veritas externa, vel objectiva; ut cum cogito: *mons aureus præruptus difficulter scanditur*; hæc cogitatio erit quidem interne, vel formaliter, non vero externe, aut objective vera.

COROLL. Quamdiu veritatem solum internam possidemus, non possumus judicare de existentia reali objecti extra mentem; at per veritatem externam certi reddimur, objectum, quod est in nostra cogitatione, etiam extra eandem realiter ita existere.

SCHOL. Veritas interna est clara, distincta, simulque indefectibilis; clare enim, & distincte discernere possumus, num una idea sit conveniens alteri, cum hæc ideæ sint ipsa mentis nostræ actio, per quam illa intime de se ipsa, ac de suis operationibus judicat. Contingit id in geometria pura, quæ aliud non est, quam systema quoddam, sive collectio veritatum internarum, in qua, remota omni cura, ac sollicitudine de reali objectorum extra nos existentia, ex hypothesis quadam in mente posita deducuntur conclusiones diversissimæ, quæ totidem veritates internas, ac irrefragabiles constituunt; sic demonstramus: *globum etiam integrum terraquæsum, si perfectio in æquilibrio constitueretur, in minimæ acutæ cuspide sustineri posse*; parum solliciti, num hoc æquilibrium reipsa detur, aut dari possit. At vero ve-

ritas externa frequentar admodum obscura, dubia, ac fallibilis est; persæpe enim scire non conceditur, an cogitationes nostræ ipsis objectis, quæ extra nos reapse existunt, conveniant. Atque inde est, quod præstantissimi etiam logici, ac geometræ ingentia volumina egregiis quidem veritatibus internis, at simul gravissimis erroribus impleverint; cum enim veritas interna sine externa subsistere possit, facile contingit, ut ea cum falsitate externa, ac objectiva quandoque jungatur. Exemplo sit Cartesius: posito, ut vult, omnem extensionem esse materiam, necesse omnino erit, dari ubique materiam, ubi extensio concipi potest: jam vero, cum impossibile sit, ut extra hunc mundum non concipiatur extensio, extra mundum quoque materia dabitur, atque adeo mundus erit absque limitibus in infinitum extensus: porro cum quoque ante creationem mundi aliquam extensionem concipere queam, oportet, ut materia jam ante creationem mundi exstiterit; quæ, cum extensionem eam absque initio concipiam, nec initium habuit, nec creata fuit, unde sequeretur materiam non a Deo factam, sed a se ipsa exstitisse. En veritates internas cum gravissimis erroribus, ac falsitatibus objectivis copulatas: omnes hæ conclusiones sunt verissimæ, ac irrefragabiles, quamdiu in mente duntaxat considerantur; at falsæ, ac absurdæ, si ad realem materiæ existentiam referantur. Non foret difficile, complura ejusmodi exempla, si res posceret, hic adducere, præsertim si decantata illa Leibnitii, Wolfique principia *rationis sufficientis*, ac *indiscernibilium* in examen paullo accuratius vocare liberet; sed de his alias erit dicendi locus.

CL. Cum cogitamus, vel ideas tantum, vel judicia etiam, ac ratiocinia efformamus (§. 48.):

igitur, quæ de veritate cogitationum in genere adhuc dicta sunt, jam nominatim ad triplicem hunc cogitandi modum applicari debent.



C A P U T II.

D E

VERITATE IDEARUM, JUDICIORUM, AC RATIOCINIORUM.

Quid
veritas
ideæ in-
terna, &
externæ?

CLI. Cum omne idearum objectum vel possibile tantum, vel actu existens sit (§. 51. cor. 2.), istudque vel intra nos, vel extra nos tale esse possit (conf. §. 73.), perspicuum est, ideam ad triplicis generis objecta referri posse. Idea est *interne*, seu *formaliter vera*, quando objecto vel tantum possibili, vel actu intra nos existenti, ad quod refertur, convenit. Idea est *externæ*, seu *objective vera*, quando objecto extra nos reapse existenti, ad quod refertur, convenit. Hæc porro convenientia habetur, si notæ, quas idea ut cum objecto conjunctas repræsentat, revera in, & cum objecto conjunctæ sunt; ut idea *solis*, cum *eam magnitudinem, cum colorem, splendorem, motum*, reliquasque notas, quæ in sole insunt, repræsentat. In casu opposito idea *objective falsa* est; nimirum si notæ, quas repræsentat, non sint in objecto reali: ut idea, quæ *turrim quadratam* longe distantem, ut *rotundam*, vel *verum* aquæ immersum ut *curvum* exhibet.

An idea
umquam
interne
falsa?

CLII. *Omnis idea est interne, seu formaliter vera*. Fieri enim absolute nequit, ut idea objecto solum possibili, aut actu intra nos existenti, ad quod refertur, non conveniat; non certe istud? quia non potest id non esse in mente, quod ipsa in se percipit; sed neque illud:

lud: nam hoc in casu mens ipsa sibi notas quasdam componit, quæ, quia inter se non opponuntur, in uno, eodemque objecto simul consistere possunt, atque adeo ipsa sibi suum objectum simus, & ideam conformat, quæ propterea inter se discrepare minime possunt. Omnis igitur idea, quamdiu non refertur ad objectum externum actu existens, vera est. Tales sunt ideæ *figurarum* a geometris formatæ, ita etiam in moralibus formatur idea v. gr. *parricidii* conjungendo notas, quæ sibi non opponuntur sine attentione, utrum notæ sic conjunctæ umquam exstiterint; sic item primi legislatores ideam pœnæ, qua parricidæ mulctandi essent, conformarunt.

SCHOL. 1. Si quis notas, quæ, quia sibi opponuntur, simul in uno objecto consistere nequeunt, in unam ideam componere tentet, is obtinet ideam deceptricem (§. 77. schol.), quæ, cum re ipsa nulla sit (§. cit. & §. 51. cor. 3. cum schol.), nec vera, nec falsa dici potest; quales sunt: *Dei creati*; *creatura infinita*; *circuli quadrati*; *ligni ferrei* &c.

SCHOL. 2. Est & aliud idearum genus, quas *imaginarias* vocant; cum videlicet ob quampiam similitudinem nobis fingimus, quod non est, ut quasi per imaginem objectum oculis præsens sistamus, ut cum nobis *memoriam* ut *idearum receptaculum* repræsentamus; uti enim in receptaculo quodam reposita alio, quando lubitum fuerit, tempore resumimus, ita quasi ideas in memoria reponimus, & alio iterum tempore resumimus. Pater autem ejusmodi ideas imaginarias, quatenus fingunt, quod non est, falsas: quatenus vero id, quod est, sub aliquo quasi involucro designant, veras esse; unde a Wolfio *vicariæ realium* compellantur: earum usus in metaphysica patebit.

Quid
idea ima-
ginaria,
ejusque
veritas,
ne falsitas?

Quid
veritas,
& falsitas
interna
judicii?

CLIII. Judicium affirmativum *interne*, seu *formaliter verum* est, cum idea prædicati convenit ideæ subjecti; ut: *circulus est rotundus*. Negativum: cum idea prædicati non convenit ideæ subjecti, ut *circulus non est quadratus*. Si oppositum obtineat, utrumque *falsum* erit; ut: *circulus est quadratus, circulus non est rotundus*.

Quid
conve-
nientia,
aut pu-
gna
idearum:
in judi-
cio?

SCHOL. Est videlicet veritas interna judicii quædam comexio, aut repugnantia unius ideæ cum altera, quarum utraque simul præsens est menti, quæ earum convenientiam, vel repugnantiam percipit, quin necesse sit, ut aliquid extra mentem judicantem re ipsa existat, quod sit realiter tale, quale illud est, quod actu in cognitione eidem obversatur. Consistit porro hæc convenientia idearum relate ad judicium affirmativum in eo, ut idea subjecti in se includat ideam prædicati, ita, ut nequeat destrui idea prædicati, quin hoc ipso destruaturs idea subjecti; ut cum judico: *circulus est rotundus*, idea circuli continet ideam rotunditatis, & si nulla daretur rotunditas, nullus quoque daretur circulus. At falsum est hoc judicium: *circulus est quadratus*, possum enim destruere ideam quadraturæ, quin destruaturs idea circuli, cum possit dari circulus sine quadratura. Ab opposito, in judicio negativo requiritur, ut idea subjecti non contineat, sed a se excludat ideam prædicati; sic verum est: *circulus non est quadratus*; falsum contra: *circulus non est rotundus*. Atque hoc universim obtinet, neque circa judicia, quæ in materia contingente versantur, ulla est exceptio facienda; sit enim hoc judicium *marmor est rotundum*; videtur quidem idea rotunditatis tolli posse, quin tollatur idea marmoris; at eo momento, quo hoc judicium formatum verum est, ipsa idea marmoris inلودir

dit omnia adjuncta, ac notas marmoris tum convenientes, atque adeo ipsam quoque rotunditatis ideam, quæ hoc ipso destrui non potest, quin simul destruat ea marmoris idea, quæ tum subjectum agit. Generationem igitur judicium affirmativum veritate interna gaudet, quoties idea prædicati repræsentat notam vel constantem, vel mutabilem (§. 52.) in idea subjecti tum inclusam; & judicio negativo eadem veritas competit, quoties idea prædicati repræsentat notam vel constantem, vel mutabilem in idea subjecti tum non contentam.

CLIV. Judicium *externe*, seu *objective* verum est; cum idea prædicati ita affirmatur, vel negatur de idea subjecti, ut res ipsæ realiter existentes per has ideas repræsentatæ congruunt, vel non congruunt: sic verum est hoc judicium: *tellus est minor sole*. In casu opposito erit illud *objective falsum*: ut *tellus est major sole*. Quid veritas, & falsitas externi judicii?

CLV. Omne judicium vel verum est, vel falsum; cum enim falsitas contradictorie opponatur veritati (§. 147. cor. 3.), fieri nequit, ut aliquod judicium simul verum sit & falsum, aut nec verum, nec falsum: veritas hujus per se patet; nititurque duobus axiomatis notissimis: impossibile est, ut aliquid simul sit, & non sit: quodlibet est, vel non est. An omne judicium verum aut falsum est?

CLVI. Judicium est *necessario verum*, sive, ut ajunt, *in materia necessaria*, cum ita verum est; ut sine contradictione falsum esse nequeat; ut *circulus est rotundus*; *Deus existit*. Contra *necessario falsum*, sive *in materia impossibili*, cui veritas pro omni casu repugnat; ut *circulus est quadratus*, *Deus pendet ab alio*. Cum autem judicio veritas ita competit, ut tamen pro aliquo casu sine contradictione falsum esse possit, aut vicissim, erit Quid judicium necessarium, vel contingentem verum, aut falsum?

illud in *materia contingente*, atque *contingen-*
ter verum, ut *mundus existit*, vel falsum,
ut: *tellus est major sole*.

COROLL. Cum *propositio* iudicium internum
enunciet (§. 94.), quæ de hujus veritate,
aut falsitate adhuc dicta sunt, ad eam quo-
que applicari debent.

SCHOL. Non est tamen semper pronum rironi
de cujuslibet propositionis veritate, aut fal-
sitate iudicium ferre, qua in re ne offendat,
leges quaspiam suppeditabimus.

*Leges de dijudicanda Propositionum Veritate,
aut Falsitate.*

Quando
proposi-
tio falsa
aut vera?

Modalis?

Causalis?

Copula-
tiva?

1.) *Propositio*, quæ non est vera secundum
omnes partes, & respectus, quos ex usu recepto
affirmare, vel negare intelligitur, simpliciter
inter falsas reponi debet. Inde falsa est 1.)
propositio modalis (§. 96.), si prædicatum
non conveniat subjecto eo modo, qui enuncia-
tur, etsi ceteroquin convenientia daretur; ut:
circulus est contingenter rotundus, mundus ne-
cessario existit. 2.) *Propositio causalis* falsa
est (§. 99.), si vel alterutra pars, vel ipsa
ratio allata falsa sit; ut: *anima humana est*
substantia, quia est corpus, vel est corruptibi-
lis; quia est corpus; ut igitur ejusmodi propo-
sitis vera sit, requiritur primum, ut utraque
pars sit vera, deinde etiam ratio per particu-
lam quia prolata debet esse vera, ac legitima
ratio, cur in altera parte prædicatum conve-
niat subjecto; ut: *anima humana est incorru-*
ptibilis, quia est ens simplex. 3.) *Propositio*
copulativa (§. 100.) falsa est, si vel unum
illius membrum falsum sit; ut: *anima huma-*
na est spiritualis, & mortalis, vel pietas, ca-
ssimonia, otium laudes ac premia merentur; e-
jusmodi nempe composita propositio est quasi

aggregatum tot simplicium, quot sunt ejus subjecta, vel prædicata, unde qui compositam dicit veram, affirmat implicite singulas quoque simplices esse veras, quod utique falsum est, si vel una ex iis falsa sit. 4.) Contra vero ad veritatem disjunctivæ (§. 101.) propositionis tantum requiritur, ut una disjunctionis pars vera sit, una enim solum disjunctarum partium in ea affirmatur; sic vera est hæc, *vel animus perit cum corpore, vel post mortem corporis est superstes*. Falsa autem erit, si nullum disjunctionis membrum verum sit, quod contingit, cum disjunctio est incompleta (§. cit. schol.); ut: *vel animus perit cum corpore, vel post mortem corporis erit beatus*. 5.) Pariter, ut propositio conditionalis (§. 98.) vera sit, non requiritur, ut id, quod in conditione, & conditionato ponitur, verum sit; sed solum, ut in conditione ratio conditionati contineatur, id est, ut ea detur connexio inter conditionem & conditionatum, ut unius veritas ab alterius veritate pendeat (conf. §. cit. cor. 2.). Ratio est: quia conditionalis propositio eam solum connexionem affirmat; abstrahendo, utrum conditioni, aut conditionato per se veritas competat; sic vera est hæc: *si anima humana est corpus, ea est corruptibilis*; & falsa hæc, *si anima humana est corruptibilis, ea est spiritus*, nam adhuc posset esse ens simplex materiale.

Disjunctiva?

Conditionalis?

2.) Si vera est propositio subalternans (§. Subalternantes? 112.), vera quoque est ejus subalternata; quod enim universaliter omnibus convenit, necesse est, ut etiam quibusdam sub iis contentis conveniat; ut: *omnis virtus est laude digna, aliqua virtus est laude digna*. Si subalternata falsa sit, subalternans quoque erit falsa; prædicatum enim, quod aliquibus non competit, multo minus omnibus competere potest; ut:

aliquod vitium est honestum, omne vitium est honestum. In materia contingente (§. 156.) potest subalternans esse falsa, quin ejus subalternata falsa sit; potest enim nota mutabilis convenire aliquibus, quin conveniat omnibus: ut, omnis homo est eruditus, aliquis homo est eruditus. Non vero in materia necessaria, vel impossibili; ut: omne vitium est honestum, aliquod vitium est honestum. Ob eandem rationem potest in materia contingente vera esse subalternata, quin vera sit ejus subalternans: ut: aliquis homo virtutem colit, omnis homo virtutem colit. Non vero in materia necessaria; ut: aliqua virtus est honesta, omnis virtus est honesta.

COROLL. In omni igitur materia valet conclusio a veritate subalternantis ad veritatem subalternatæ, & a falsitate subalternatæ ad falsitatem subalternantis: sed a veritate subalternatæ ad veritatem subalternantis, & a falsitate subalternantis ad falsitatem subalternatæ tantum in materia necessaria concludere licet.

Contra-
dictoriae

3.) Propositiones contradictoriae (§. 114.) neque simul verae, neque simul falsae esse possunt; si enim primo simul verae essent, idem de eodem cum veritate simul affirmaretur, & negaretur, adeoque idem simul esset, & non esset, quod fieri nequit ob axioma notissimum: impossibile est, ut aliquid simul sit, & non sit; sic si utraque vera foret: omnis virtus est honesta, aliqua virtus non est honesta, tum aliqua virtus esset simul, & non esset honesta, cum propositio universalis praedicatum affirmet implicite de singulis sub subiecto contentis (§. 106). Si deinde simul falsae essent, tum aliquid simul nec esset, nec non esset, quod repugnat axiomatico: quodlibet est,

est, vel non est; sic si falsa est hæc: *omnis virtus est honesta*, tunc, aliqua virtus non est honesta, & si iterum falsa est hæc: *aliqua virtus non est honesta*, tunc, aliqua virtus non est non honesta, id est, aliqua virtus nec esset, nec non esset honesta: idem citius patet in duabus singularibus, quæ contradictoriis æquipollent (S. cit. cor. 2.); sit enim utraque vera, *Cicero est eloquens*, *Cicero non est eloquens*: erit igitur Cicero simul eloquens, & simul non eloquens; sit jam utraque falsa; erit igitur Cicero nec eloquens, nec non eloquens.

COROLL. 1. In omni igitur casu a veritate unius contradictoriæ ad falsitatem alterius, aut a falsitate unius ad veritatem alterius valet illatio.

COROLL. 2. Ex duabus propositionibus contradictoriis, una semper est determinate, & in se vera, altera determinate, & in se falsa: & quia idem est, seu propositio sit de præsentī, seu de præterito, seu de futuro; datur determinata in se veritas de futuris contingētib; ut: *Cajus evadet eruditus*, *Cajus non evadet eruditus*, harum alterutra nunc jam, cum enunciatur, quoad se determinate vera est.

4.) Propositiones contrariæ (S. 113.) nunquam possunt simul esse veræ; si enim veræ fierent, tunc, cum sint subalternantes, veræ quoque forent earum subalternatæ per L. 2. Id vero est, quod fieri nequit: nam in hoc casu, cum una subalternata sit alterius subalternantis contradictoria, duæ contradictoriæ fierent simul veræ, quod est contra L. 3. Sic si vera esset utraque contraria, *omnis virtus est honesta*, nulla virtus est honesta; veræ etiam forent earum subalternatæ: *aliqua virtus est honesta*, *aliqua virtus non est honesta*; & sic

& sic veræ simul forent duæ contradictoriæ, nam prima subalternata opponitur contradictorie secundæ subalternanti, & secunda subalternata primæ subalternanti. At vero possunt propositiones contrariæ simul esse falsæ in materia contingente, non tamen in materia necessaria. Ratio primi est: quia, quod contingenter tantum speciei convenit, potest inesse aliquibus individuis, aliis non; unde tam universalis affirmativa, quam universalis negativa simul falsa esse potest; sic reipsa falsæ sunt hæ: *omnis homo est eruditus, nullus homo est eruditus*. Ratio secundi est: quia, quod integræ speciei necessarium est, singulis quoque individuis sub ea contentis competere debet; sic falsæ esse nequunt hæ duæ: *omnis virtus est honesta, nulla virtus est honesta*.

COROLL. Igitur in materia necessaria rite concluditur ex veritate unius contrariæ ad falsitatem alterius, & a falsitate unius ad veritatem alterius; sed in materia contingente valet quidem illatio a veritate unius ad falsitatem alterius, non tamen vicissim a falsitate unius ad veritatem alterius.

Subcontrariæ?

5.) Propositiones subcontrariæ (§. 113.) numquam possunt esse simul falsæ; nam cum subcontrariæ sint subalternatæ, si eæ simul essent falsæ, falsæ quoque forent earum duæ subalternantes per L. 2., atque adeo duæ contradictoriæ forent simul falsæ, quod est contra L. 3. Sic si hæ duæ forent simul falsæ; *aliquis homo est eruditus, aliquis homo non est eruditus*; etiam simul falsæ essent earum subalternantes: *omnis homo est eruditus, nullus homo est eruditus*; sed inter has quatuor duæ semper sibi contradictorie opponuntur (conf. L. 4.), adeoque duæ contradictoriæ forent simul falsæ. Sed tamen veræ possunt simul esse in materia contingente; non vero in materia

necessaria. Ratio primi est: quia prædicatum, quod speciei contingenter convenit, potest convenire aliquibus individuis, aliis non; sic potest utraque esse vera; *aliquis homo est eruditus, aliquis homo non est eruditus*. Ratio secundi est: quia, quod necessario convenit, vel repugnat toti speciei, necessario etiam convenit, vel repugnat omnibus, & singulis individuis sub illa specie comprehensis; sic nequeunt simul esse veræ hæc duæ: *aliqua virtus est honesta, aliqua virtus non est honesta*.

COROLL. Igitur in propositionibus subcontrariis semper valet illatio a falsitate unius ad veritatem alterius; sed a veritate unius ad falsitatem alterius tantum in materia necessaria, non in contingente legitime concludo.

CLVII. Ratiocinium *interne*, seu *formaliter* *verum* est, cum conclusio sequitur legitime ex antecedente, id est, cum datur consequentia, seu connexio inter consequens, & antecedens (§. 125.), sive dein antecedens illud verum sit, sive falsum; ut *omne corpus est ens compositum; sed anima humana est corpus: ergo anima humana est ens compositum*. Hac porro consequentia deficiente illud erit formaliter falsum, sive deinde singula judicia vera sint, sive falsa; ut: *aliqua virtus est æstimanda; sed pietas est virtus: ergo pietas est æstimanda: vel: aliquis homo est eruditus; sed Cajus est aliquis homo: ergo Cajus est eruditus*.

Quid veritas ratiocinii interna?

CLVIII. Ratiocinium *externe* seu *objective* *verum* est, cum singula ejus judicia objective vera sunt; ut: *nullum ens simplex est corpus; sed anima humana est ens simplex: ergo anima humana non est corpus*.

COROLL. I. Ratiocinium igitur formaliter si *verum*, & objective verum est, quando & singula.

Quid externalitas?

gulorum judiciorum veritas habetur, & consequens legitimo nexu ex antecedente profuit, quale est illud (§. præc.) allatum.

COROLL. 2. Conferenti (§. 125. & cor.) patebit toties ratiocinium, aut ejus consequens esse objective verum, quoties illud est materialiter verum, atque adeo hæc duo pro eodem haberi posse.

CLIX. Cum ex vero antecedente falsum consequens legitime non deducatur (§. 125. cor. 3. can. 1. & 2.), necesse est, ut quando consequens ratiocinii est objective, siue materialiter falsum, etiam alterutrum, vel utrumque judicium antecedentis objective falsum sit; sic quia in superiori exemplo (§. 157.) consequens: *anima humana est ens compositum*: objective falsum est, falsum quoque est aliquod antecedentis judicium, nempe hoc: *anima humana est corpus*..

COROLL. 1. In omni ergo ratiocinio formaliter vero: valet illatio a veritate objectiva consequentis ad veritatem objectivam totius antecedentis, id est, utriusque judicii, quo antecedens constituitur, & vicissim; item a falsitate objectiva consequentis ad falsitatem saltem unius judicii in antecedente, ac vicissim.

COROLL. 2. Inde numquam in ratiocinio legitimo concessio jam antecedente negari potest consequens.

COROLL. 3. cum argumentatio sit ratiocinatio verbis explicata (§. 157.), adhuc dicta ad eam quoque, & præcipue ad syllogismum, in quo pariter concessis præmissis conclusio negari nequit, extendi debent..

C A P U T III.

D E

INDICIIS VERITATIS, CERTITUDINE,
ET EVIDENTIA.

CLX. Veritas cogitationum nostrarum per certa indicia, quæ rationem in se continent, cur ea adesse intelligatur, se manifestare solet; hæc sunt *sufficiëntia*, si nullo in casu fallant: *insufficiëntia* vero, si quandoque fallant.

Quid & quotus plex indicium?

SCHOL. Cum in inquisitione veritatis, ad quam rationem philosophum præsentī hoc labore aptum efficere cupimus, totum denique negotium eo delabatur, ut iudiciorum nostrorum, sive, quod idem est, propositionum veritatem detegamus, jam fere de hac sola in futurum nobis sermo erit; quæ interea ad veritatem quoque idearum, ac ratiociniorum pertinebunt, facile a quovis dijudicari poterunt.

CLXI. Qui indicia sufficiëntia, quæ scit nullo in casu fallere, adesse cognoscit, ita iudicat de cogitationis suæ veritate; ut ne suspicionem quidem, etsi vellet, de opposita eidem falsitate prudenter in animum admittere possit, tumque dicitur *certus* esse de veritate; ut cum iudico: *totum majus est sua parte*. Quia indicia solum *insufficiëntia* perspicit, habet se modo opposito, estque *incertus* de veritate, ut cum iudico: *dantur in planetis incole*. *Certitudo* igitur est affectio quædam, sive status mentis sine omni sollicitudine, aut formidine de opposito veritati per indicia sufficiëntia cognita adhaerentis.

Co-

COROLL. 1. Cum fieri possit, ut unus indiciorum, quæ adsunt, sufficientiam perspiciat, alter non; fieri quoque potest, ut de eadem veritate unus certus est, alter incertus; sic olim incerti erant de veritate hujus propositionis: *dantur antipodes*; nos contra jam certissimi sumus.

COROLL. 2. Affectionem meæ mentis præter me nemo cognoscit: igitur præter me nemo certitudinis meæ, neque ego alienæ judex esse possum; cujuslibet proinde conscientia de sua certitudine judicat.

de quo-
tuplex?

CLXII. Certitudo ex indiciis sufficientibus orta est triplex; vel enim ea indicia sunt ejusmodi, ut nullo absolute in casu fallere possint; vel fallere non possunt, quamdiu universales naturæ leges obtinent; vel denique secundum leges humanæ prudentiæ fallere nequeunt. In primo casu certitudo habetur *meta: physica*, sive *mathematica*; ut in hac propositione: *circulus est rotundus*: in altero *physica*; ut in hac: *corpus non suffultum cadit*; in tertio *moralis*; ut in hac, *Cæsar Gallos devicit*.

SCHOL. Cum communes naturæ leges ab earum auctore Deo immutari possint, ut in metaphysica demonstratur, non est absolute impossibile, ut indicia certitudinem ceteroquin physicam habentia quandoque fallant. Verum non est propterea certitudo hæc minus vera; adhuc enim omne prudens dubium de opposita falsitate excludit, cum aliunde constet Deum, qui mundum secundum leges universales a se statutas gubernat, non nisi raro, & ex causis gravissimis majestatem suam decentibus miracula patrare, atque illum eo etiam in casu alia suppeditaturum indicia, ex quibus facta legis communis mutatio satis manifeste colligi pos-

possit. Profecto tanta est hujus certitudinis firmitas, ut ad eam quotidianas vitæ nostræ actiones indubitanter conformemus, neque contrarium sine maximæ insanix nota agere possimus; quis enim, exempli causa dictum sit, ab insanix procul abesse eum judicaverit, qui, dum domum quæpiam transiens regulam ex recto decidentem, capitique directe imminentem conspicit, loco tamen cedere renuat, hoc ductus principio, non esse metaphysice certum, fore, ut tegula lapsum ulterius continuer? Idem cum proportionem de altera, quam moralem diximus, certitudine intelligendum est; neque enim etiam humanæ prudentiæ assensum suadenti prudenter oblectari, aut de veritate dubitare possumus, ut contingit, cum factum quoddam historicum unanimi scriptorum testimonio confirmatur, vel quando rei oppositum rarissime prorsus, & non sine summa difficultate contingere potest; quæ enim raro, & non nisi difficillime eveniunt, ex legibus humanæ prudentiæ ad impossibilia referuntur: sic moraliter certi sumus, nec prudenter dubitamus de actu ponendo ab homine, qui, ubi multis jam annis validissimum ejusdem habitum contraxit, rursus in eam se occasionem immittit, in qua vehementer ad eum actum ponendum allicitur. Utramque vero hanc certitudinem firmitate longe superat metaphysica; quidquid enimingas, etsi ad ipsam confugas Dei efficacissimam potestatem, fieri tamen nequit, ut ejus indicia ullo modo fallant; sic numquam efficies, ut *circulus non sit rotundus*, foret enim simul, & non foret circulus.

CLXIII. Certitudo (§§. 161. 162.) exposita refertur ad mentem, & vulgo *formalis* nuncupari solet: quod si ea, ut nonnullis placet, ad ipsa judicia, seu propositiones refe-

Quid certitudo
formalis
& objectiva?

ratur, oritur inde certitudo *objectiva*, quæ tum habetur, cum pro iudicii, aut propositionis veritate tales pugnant rationes, quæ, si perspicerentur, indicia præberent sufficientia.

SCHOL. Omnis nimirum propositio indiciiis sufficientibus instructa dicitur *in se* vel *quoad se*, vel *objective* certa. Sed facile patet, hanc certitudinem, nisi cognoscatur, nihil prodesse, cum igitur ejus accedit cognitio, oritur in nobis certitudo *formalis*, quæ solum in vero sensu certitudo est, ac propositio compellatur *quoad nos* vel *subjective*, vel *formaliter* certa; sic propositio illa: *dantur antipodes*: etiam fuit olim *objective* certa, sed ubi instituta navigatione in certam eorum existentia cognitionem pervenimus, effecta est *subjective*, seu *formaliter* certa. Me porro non monente manifestum est, certitudinem quoque *objectivam* in triplicem illam classem distribui posse; est videlicet propositio *metaphysice certa*, cum absque contradictione falsa esse nequit: ut *totum est majus sua parte*; *physice certa*, cum secundum naturæ cursum falsa esse haud potest: ut *globus ex tormento ejectus confringet murum sibi oppositum*; *moraliter certa*: cum secundum humanæ prudentiæ leges falsum subesse non potest: ut *Roma existit*.

Quid evid.
dentia.

CLXIV. Cum indicia veritatis sufficientia clare, & distincte percipiuntur, mens nostra quodam quasi lumine collustratur, quod illi veritatem ita clare proponit, ut eam quasi oculis intueatur, nequeatque ullo modo eidem assensum denegare: lumen illud *evidentiam* voco.

COROLL. 1. Evidentia igitur supponit certitudinem, eique suo quasi modo superadditur, atque inde omne iudicium, aut propositio evidens est quoque certa; at non vicissim omnis certa est evidens.

COROLL. 2. Cum evidentia certitudinem comitetur, ea quoque in *metaphysicam*, *physicam*, & *moralem*, ratione ipsius certitudinis habita (§. 161.) distribui debet.

SCHOL. Eadem est Tullii opinio, cum perspicuitatem illud lumen mentis appellat, „ quod „ per se se ea, quæ sint, nobis ita, ut „ sint, indicat. “ Est nimirum evidentia menti fere id, quod lumen solis est oculis; uti desituri lumine in tenebris versamur, ita sublata evidentia caligo menti offunditur, & sicut apertis oculis objectum a sole illuminatum, atque ante eos positum necessario, modo animus majori ad alia attentione non distrahatur, videmus, nec nisi clausis, aut aversis, ab eo oculis id impedire possumus, ita mente ad evidentiam applicata necessario rapimur, neque assensum, nisi intellectu ad alia converso, negare possumus.

CLXV. Cum mens hoc lumine collustrata veritatem perspicit, consequens est, ut eidem convenientia, aut repugnantia prædicati cum subjecto quam clarissime reluceat: duplici id modo contingit; vel enim ex sola comparatione, unicoque quasi intuitu patet ideam prædicati contineri in idea subjecti, aut ab ea excludi; ut in his iudiciis: *circulus est rotundus*; *ens simplex non est corruptibile*: tumque habetur evidentia *immediata*: vel in idea subjecti distincte perspicitur ratio, ob quam eidem idea prædicati certissime vel conveniat vel repugnet; ut in hoc iudicio: *anima humana est incorruptibilis*; in idea enim animæ humanæ continetur *simplicitas*, quæ est ratio
in

invicta, cui rei competat *incompactibilitas*, tumque adest *evidentia mediata*.

SCHOL. Inde quoque propositio alia est *immediate evidens*, cum videlicet intellectis solum terminis, clare, & distincte cognoscitur esse vera, ut sunt omnia axiomata; e. c. *totum est majus sua parte*: alia *mediate evidens*; quæ mediante quadam ratione, sive, ut ajunt, medio termino, evidentiam obtinet: ut hæc: *anima est incompactibilis*, ubi ejus simplicitas fuerit: evicta (conf. §. 115.).

An ea in
proposi-
tionibus
falsis?

CLXVI. *Evidentia non reperitur in propositionibus falsis*: Evidentia non datur, nisi in propositionibus certis (§. 164. cor. 1.); certæ autem propositiones nec sunt, nec umquam possunt esse falsæ (§. 163. schol.) igitur evidentia non reperitur in propositionibus falsis.

Solvitur
dubium.

SCHOL. Veritas hujus theorematis ex eo quoque patet, quod falsitas, cum mera sit veritatis negatio, sive carentia, si ita loqui liceat (§. 147. cor. 3.), nihilum sit; omne autem, quod evidenter perspicitur, necessario sit aliquid. Quid quod, si propositiones evidentes ullo in casu falsæ esse possent, saltem quandoque inter eas repugnantia deprehenderetur, qualis frequentissime inter obscuras occurrit; at vero evidentia evidentibus semper sint consentanea, hominumque actiones, experimenta & artium regulæ, quæ evidentia reguntur, constanter rite procedunt, ut quotidiana docet experientia. Brevitatem quidem, ac imbecillitatem mentis nostræ caussantur nonnulli, eaque putant effici posse, ut ab ipsa quandoque evidentia in errorem inducamur: verum inde quidem fit, ut non omnia, aut plura simul evidenter percipiamus, non tamen, ut vel
pror-

prorsus nihil evidenter perspiciamus, vel ut ea etiam falsa sint; quæ evidenter percipimus, quemadmodum fere imbecilla oculorum nostrorum acies in causa est, ut valde distantia, aut minuta nimis objecta non videamus; non vero, ut nihil cernamus, aut ut de iis dubitemus, quæ, cum debitam habeant comparatæ ad oculum positionem, clare videmus. Cum igitur prælucente evidentiâ numquam erremus, necesse est, ut spurio quodam lumine, falsosque splendore deludantur ii, qui, quando quidpiam quam maxime perspicuum esse autuant, in errores tamen prolabuntur. Evidentiâ eo casu solum *apparentem* adesse dicimus, quæ, cum reapsæ nulla sit, idoneum veritatis testem agere nequaquam potest. Contigit id Malebranchio, qui adeo evidenter se cognovisse putavit, nos omnia in Deo videre, ut asseruerit, malle se vocari fanaticum, quam de sententiâ decedere; contigit id Cartesio, qui manifestam in vacuo repugnantiam evidenter deprehendisse sibi visus est; contigit Leibnitio, ac Wolfio, dum maximam mundi hujus perfectionem demonstrarunt; contigit id denique compluribus aliis, ceteroquin doctissimis viris, iis præsertim qui vel de quadratura circuli vel mobili perpetuo ab se perspicue invento gloriati sunt. Verum hæc nos eo abripere non debent, ut in scepticismum delabamur, atque cum Academicis profundiciemus: falsa ita esse finitima veris, ut ne per evidentiâ quidem rite discerni queant. Quin potius eo curæ nostræ dirigantur, oportet, ut certos, constantesque characteres, qui omni in casu evidentiâ *veram* ab *apparente* discernant, deregamus. Hanc in rem sequentes tironi philosopho suppeditamus.

Quid
evidentiâ
apparentem?

Cic. 99.
acad. 1.

Characteres vere Evidentiæ.

1.) *Vera evidentia longe vivacius nos afficit, fortiusque in assensum rapit, ac apparens, quæcum major perpetuo obscuritas conjuncta est.* Equidem non diffiteor, etiam per evidentiam veram nos non semper cognoscere objectum omni ea claritate, qua illud in se cognoscibile foret; unde hoc sensu omnem evidentiam quæpiam obscuritas comitatur. At hoc non efficit, quo minus ipsam prædicati cum subjecto convenientiam clarissime perspiciamus, mensque attenta eo in lumine prorsus conquiescat; haud aliter fere, ac ut nobis objecta diversimode a sole illuminata conspicientibus obtingit; non enim minus vere cernimus objectum sole oriente, quam eo in meridie constituto, licet tum illud minori longe cum claritate nobis repræsentetur. Evidentiæ contra apparens in ipsa idearum convenientia exhibenda obscuritatem præ se fert, neque unquam menti accurate rem expendenti penitus satisfacit.

2.) *Vere evidentia claritas menti tranquille atque ab affectionibus perpurgatæ semper apparet eadem; fucatus contra evidentia apparentis splendor examen sæpius repetitum haud sustinet: mutatur enim, minuitur, ac evanescit etiam, ubi rem frequentius, atque diversa ex parte contemplamus, non secus ac colores illi, qui pro mutato oculi versus objectum situ aut variantur, aut prorsus disparent.*

3.) *Evidentiæ vera eadem quoque est omnibus doctioribus, eaque in arte versatis, si modo attentum præbeant animum.* Haud quidem negavero, posse nonnumquam eandem propositionem uni non item alteri, esse evidentem; sed id tum solum contingit, cum aut termi-

ni ipsi, aut rationes invictæ defectu attentionis debita, quam præpotentes animi affectiones, præjudicia, aliaque causæ sæpius impediunt, non satis perspiciuntur; ubi vero requisita adfuerit attentio, evidentia vera sanum cujusvis intellectum perstringere, atque occulta quadam vi in assensum inclinare debet. Contrarium accidit apparenti solum evidentia: neque enim vanus splendor compluribus aut potest, aut solet idem videri, id quod tanta discordia, quam in eruditorum circa res nondum evidentes judiciis quotidie experimur, satis comprobatur.

4.) Evidentia vera numquam præbet fundamentum falsæ conclusionis inde legitime deducendæ; cum enim evidentia vera non detur, nisi in propositionibus veris (§. 166.); ex vero autem falsum legitime non sequatur (§. 125. cor. 3.), patet propositum. Quare si ex propositione, quæ tibi evidens videtur, nihil absurdi aut a te, aut ab aliis umquam deduci posse clare, & distincte appareat, eam evidentiam verissimam purato.

CLXVII. Veritas est vel interna tantum, vel etiam externa. (§. 149.); de utraque certitudinem, ac evidentiam consequi possumus: igitur necesse est, ut dentur utriusque indicia sufficientia. Ea proinde duplicis sunt generis, alia nimirum de mera objecti possibilitate, aut ejusdem etiam intra nos existentia: alia de reali objecti extra nos existentia nos certos efficiunt.

Quæ indicia veritatis internæ, & externæ?

SCHOL. Indicia sufficientia universim omnia, sive, ut aiebant, omne veritatis criterium olim sustulerunt Academici; & qui dein errorem hunc ad insaniam usque provexerunt, Pyrrhonici, hoc unum hominibus certum esse contententes: *nihil esse certum*. At vero doctrina hæc adeo per se absurda est, ut non

Storchenaui Log. H ram

tam refutatione, quam medico egere videatur;
 quid enim? si sceptici hoc axioma: *nihil cer-*
tum est: indubitanter ut verum assumunt; si
 aliarum sectarum dogmata ut falsa coarguunt,
 vel habent criterium quoddam, per quod hic
 falsitatem a veritate, ibi veritatem a falsi-
 tate discernant, vel non? Si primum: tol-
 lendo criterium illud stabiliant, ac propte-
 rea manifestæ contradictionis rei tenentur; si
 alterum: impudentissimæ audaciæ notam haud
 effugiant, cum ea præfractæ jactitent, quæ ad-
 struendi omni prorsus ratione destituuntur.
 Historiam scepticismi copiose, ac erudite per-
 tractavit Gassendus. Sed missis his (neque e-
 nim logicam inaniter contentiosam ad Stoico-
 rum, aut Peripateticorum normam conscriben-
 di animus est) indicia sufficientia quæcumque
 ad hæc quatuor verissime reduci autumo; ad
sensum videlicet *intimum*, *sensum nature*
communem, *testimonium sensuum externorum*,
auctoritatem denique *Dei*, *hominum* quæ,
 quorum primum veritati internæ; reliqua vero
 externæ infallibiliter detegende inserviunt;
 de his jam ordine agam, sequarque hæc in re
 mentem Cl. P. Buffier, ex cujus præstantissi-
 ma de primis veritatibus doctrina in commo-
 dum tironum, quorum egregiis hisce principiis
 solide imbui quam maxime interest, complura
 desumam. Si quis dissentire velit, atque ad
 inanes de verbis contentiones deflectere, non
 morabor, id solum peto, ut pacato animo,
 ac veritatis unice studioso, positisque omnibus
 anticipatis opinionibus serio conscientiam
 suam consulat; dispiciatque attente, quid
 illud sit, propter quod de aliquorum judi-
 ciorum veritate prorsus non dubitet? Ne
 is semper unum ex his indiciis, neque ali-
 lum unquam aliud, quod ad ea reduci ne-
 queat, adesse deprehendet.

C A P U T IV.

D E

SENSU INTIMO, ET SENSU
NATURÆ COMMUNI.

CLXVIII. *Sensus intimus est indicium sufficiens veritatis internæ* : nequit enim ullo in casu fallere. Per sensum quippe intimum percipimus convenientiam, sive repugnantiam idearum inter se, existentiam, actualesque mentis nostræ affectiones (§. 73.), atque adeo id, quod nobis intime præsens est, & quidem ea evidentiae claritate, ut majoris per naturam nostram ne capaces quidem simus; nihil enim datur, quod nos propius, certius, ac efficacius vincat de convenientia cogitationis nostræ cum suo objecto : ipsum siquidem objectum, nostraque cogitatio, atque sensus hic intimus, quem de ea habemus, aliud reipsa non sunt, quam nosmet ipsi, qui cogitamus, existimus, atque intimum ejus sensum habemus. Jam vero qui fieri queat, ut in iis fallamur, quæ tanto nobis splendore sese manifestant? Est profecto id ita cujusvis menti impressum, ita per se clarum, ut quidquid in confirmationem adduci posset, non tam ad declarandum, quam ad obscurandum serviret; quærat quispiam rem ipso solis lumine clariorem, nã is densissimis sese tenebris involvet.

Sensus
intimus
quale ve-
ritatis in-
dicium

COROLL. Per sensum igitur intimum a nobis evidenter cognoscitur veritas propositionum universalium per se evidentium, sën axiomatum abstractorum, quale est illud : *impossibile*

est idem simul esse, & non esse; cum in his nihil consideretur præter convenientiam idearum, id est, actionum nostrarum; eorum item, quæ in anima nostra contingunt, ut eam existere, cogitare, dolere, lætari, libertate pollere &c. Et denique eorum, quæ ex his legitima demonstratione deducuntur, ut sunt conclusiones pure geometricæ, ac metaphysicæ, quin in his omnibus ullum respectum ad realem objecti extra mentem nostram existentiam habemus.

SCHOL. Qui nullam aliam evidentiam, præterquam eam, quæ in sensu intimo fundatur, admittunt, eumque hac de causa unicum omnis veritatis criterium esse autumant, coguntur, si sibi concordēs esse velint, omnem certitudinem evidentem eorum negare, quæ nec in se experiuntur, nec ex interna experientia legitimo ratiocinio concludunt. Jam vero sunt quam plurima præterea quorum evidentiam nemo ullus, qui quidem sana ratione utatur, in dubium vocare queat. Investiganda igitur nobis sunt indicia sufficientia veritatis externæ, quorum nimirum ope de reali objecti extra nos existentia judicia certa, ac evidentia conformare liceat, & præcipuo quidem loco de iis, quæ maxime ad nos attinent, atque ad usum, vitæque nostræ rationes cumprimis necessaria sunt.

Quid sensus
nature
communis?

CLXIX. *Sensus nature communis* est quedam animi comparatio ipsius nature habitu cunctis hominibus indita, per quam illi rationis usum consecuti circa res quasdam, quæ non sunt objecta sensus intimi; quæque sub omnium captum, atque intelligentiam cadunt, commune, & in universum consentiens, atque a nullo alio principio pendens judicium ferat; ejusmodi judicia sunt: *existunt præter me alii homines in mundo; omnes homines non conspiciunt*

rant ad me fallendum, & decipiendum, in
iis, quæ concordî judicio afferunt: ex fortuito
parsium concursu non potest exurgere totum a-
liquod ordinatum, quod constantes ac deter-
minatos motus edat.

CLXX. *Exsistunt sensus nature communis*; An exi-
um enim, experientia perpetua omnium sœ-
tatur. culorum id contestante, deprehendantur inter
homines, ceteroquin ætate, genio, tempera-
mento, educatione, affectionibus, moribusque
inter se infinitis prope modis discrepantes, ju-
dicia quædam constanter consentientia de re-
bus compluribus, quæ sensu intimo non per-
cipiant, etsi reliqua eorum judicia sint diver-
sissima, necesse prorsus est, ut si commune
quoddam omnibus principium, in quo ea in-
nitantur; universim enim quivis effectus gene-
ralis generalem quoque causam requirit, si-
cut ab opposito ex diversitate effectuum diver-
sitatem causarum, & ex diversitate judicio-
rum diversitatem quoque principiorum rite
colligimus. Jam vero quod potest aliud esse,
vel cogitari commune omnibus hominibus
principium, nisi natura rationalis, ob quam
sunt, & dicuntur homines? Licet enim natu-
ræ diversorum hominum in quam plurimis dif-
ferant, ut fere eorum facies, semper tamen in
essentialibus, quæ naturam nimirum huma-
nam, & rationalem constituunt, perfecte con-
veniunt, ut iterum diversæ hominum facies in
præcipuis partibus haud discrepant: exstat igitur
principium quoddam in ipsa natura huma-
na, & rationali fundamentum, id est quædam
animi comparatio, seu propensio naturalis,
ex qua ejusmodi judicia omnibus communia
proficiscuntur. Et profecto sine hac potior
hominum pars deficientibus principiis, sive
necessariis adjumentis nullum judicium verum,
ac certum ferre posset de rebus extra se ex-
sistentibus, quæ tamen ad vitæ consuetudinem

apprise sunt necessariæ; quod qui asserit, asserat quoque, necesse est, maximam hominum rationalium partem ratione, actionumque usu destitui.

SCHOL. Etsi vero hæc naturalis animi propensio ad rite de objectis quibusdam judicandum omnibus hominibus indicta est, non tamen in omnibus incorrupta permanet; cum enim homines libertate polleant, fieri potest, ut quis distortis animi affectionibus nimium indulgendo contrarios habitus contrahat, suamque naturam magnopere depraveret; atque inde fit, ut numquam fere omnes prorsus homines in idem judicium conspirent, neque sit opinio quantumcumque absurda, quæ non aliquos saltem fautores nacta fuisset. At vero nemo propterea inserat consentiens ceterorum plurium, atque magis proborum judicium non esse naturale; sensus enim hic naturæ, qui nos ad recte judicandum impellit, conferri debet cum alio naturæ sensu, qui nos ad amandum, ac desiderandum incitat: profecto quis negaverit naturalem esse parentum in proles suas amorem? Interea tamen novimus parentes fuisse, in quibus sensus hic naturalis prorsus suppressus, ac extinctus fuit. Ita igitur non minus commune quoque plurimorum in unum consentiens judicium inter naturalia reponi debet, tametsi nonnulli ab eo dissentiant. Quamvis videlicet natura regulatiter, & ordinate in suis operibus procedere soleat, possunt tamen ea quandoque deformia, & ex parte imperfecta esse; & sicut in corporibus nonnumquam monstra, & abortus deprehendimus, ita pariter monstra subinde, & animorum abortus inveniuntur, quæ tamen non tam naturæ tribuenda sunt, quam ipsis hominibus, qui ob perversum libertatis usum lumen illud a natu-

ra insitum extinguunt, ac frena pravis affectionibus laxando propria culpa in monstra degenerant. Porro depravationis hujus præcipuos fontes detegere non erit inutile.

Fontes corrupti Communis naturæ Sensus.

1.) *Cupiditas quæpiam sciendi inordinata*, ac justos ultra limites provecta, quæ nos impellit, ut curiosius ea perscrutemur, quæ mentis humanæ captum longe excedunt: unde consequitur, ut tenebris, ac obscuritatibus involuti, omnisque ductu luminis privati in gravissimos errores cæcorum instar prolabamur.

2.) *Vanitas quædam ridicula, inanisque gloriæ studium*, quo fit, ut ab aliis, ac præcipue quidem ab indocto vulgo discerni cupiamus: inde a judiciis communius receptis discessionem facimus, aliterque de rebus omnium captui expositis, quam vulgus soleat, pronunciamus; simul vero, dum elatione animi aliorum sensa rejicimus, communem naturæ sensum repudiamus.

3.) *Insita quædam jam ante menti opinio*, & fortuita quasi adhesio ad sectam quampiam, quæ se novitate, falsoque doctrinæ, ac veritatis splendore aliquo tempore commendat; cujus rei exemplo Academici olim, & Sceptici fuerunt. Cum enim se solos sæculi sui eruditos, ceterorumque magistros jactarent, omnes ab ea doctrina alienos superbe præ se despiciebant: & quasi commiseratione dignos intuebantur, ab iisdem ipsis interea jure merito derisi.

3.) *Studium proprii commodi*, quod frequenter, repudiato communi naturæ sensu, nos reperturos speramus; sunt nimirum veritates quædam in sensu naturæ fundatæ hominibus voluptatum studiosis per quam molestæ, pro-

pterea quod, si iisdem assentirentur, ex earum prescripto vitæ sue rationes instituere, moresque etiam suos ad eas conformare cogerentur; quare, ut gravissimum hoc ab humeris suis jugum avertant, veritatem etiam clarissimam contra communem omnium fere hominum consensionem agnoscere nolunt. Ita

De nat. Deor. l. 1. olim Epicureus ille apud Tullium adversus Dei providentiam depugnavit: „Imposuisti „in cervicibus nostris sempiternum dominum, quem dies, & noctes timeremus. “ Habet quippe voluntas ingens in intellectum imperium, eoque frequenter efficit, ut reje-ctis veritatibus evidentissimis opiniones quam maxime absurdas, præsertim si suavem sensui voluptatem polliceantur, ambabus quasi ulnis amplectatur.

*An um-
quam
fallit;*

CLXXI. *Sensus nature communis nunquam fallit*; cum enim hæc animi comparatio, seu propensio ad judicandum de rebus quibusdam, quando eæ menti debite proponuntur, fundetur in natura nationali, si ea umquam falleret, ipsa natura rationalis nos per sese in errorem induceret; atqui hoc fieri nequaquam potest: foret quippe eo in casu natura rationalis, eodemque tempore non rationalis, quod contradictionem implicat; rationalis quidem; est namque natura humana, quam qui ratione expoliat, hominem belluis æquiparat: non rationalis vero; cum enim error rationi, ratioque errori adversetur, necesse est ut ea, quæ nos per sese in falsum iudicium impellit, natura ratione careat. Est hæc veritas omnium fere antiquorum philosophorum suffragio confirmata; audi Tullium, omni autem in re consensus omnium gentium lex naturæ putanda est. „Multa dare solemus, inquit Seneca, præsumptioni omnium hominum: apud nos veritatis argumentum est, „aliquid omnibus videri. “

Ep. 17.

COROLI. Nullum igitur iudicium, ad quod formandum a sensu communi inducimur, ullo in casu potest esse falsum, atque adeo fieri nequit, ut quis vere iudicet de re, quæ sub omnium intelligentiâ æqualiter cadit, quando a communi plurimorum sana ratione utentium iudicio dissentit; aut comprobet, necesse est, in se solum, ac in parvo ipsi similium manipulo residere naturam rationalem, reliquis vero omnibus, ac proinde toti fere generi humano eandem deesse.

SCHOL. I. Profecto ut tanta in diversis hominibus circa res quam plurimas iudiciorum diversitas non potest non esse evidens falsitatis character; ita ab opposito in ipsâ hac ingeniorum, affectionumque diversitate perpetuus omnium, aut fere omnium in idem iudicium consensus summa cum ratione pro certissima veritatis nota accipiendus est, quique eam respuit, ab insania procul abesse non potest. Veritati huic, posita jam Dei existentis demonstratione, maximum inde robur accedit, quod hæc naturalis animi comparatio non provenire queat, nisi ab ipso naturæ auctore, cujus veriloquio, providentiæ, & bonitati nullo pacto congruit, ut eas nobis facultates naturales indat, quibus etiam bene utentes directe in errorem impellamur; talis enim error in ipsum redundaret, ipseque nos fallere dicendus foret, quod vel cogitare absurdissimum est. Ex his manifeste conficitur, iudicia ex sensu communi profecta non minus certa esse, atque ea, quæ ex sensu intimo feruntur: est tamen inter illa nonnullum evidentiae discrimen; hæc quippe evidentia claritatis maximæ pollent (§. 168.), ut ne umbram quidem dubii admittant, quod de illis ex vero dici nequit; cum enim iudicia in sensu communi fundata respiciant, objecta extra nos existentia, non possunt vivacem adeo in nobis impressionem

nem efficere, ut illa, quorum objectum ipsam intra nos existit. Inde tamen nemo inferat, judicia sensus communis non esse vero sensu evidentia: nam æque naturaliter, infallibiliter, & necessario intellectum ad consensum determinant, minorque ejusdem luminis vivacitas efficit solum, ut objectum minus clare; non autem, ut minus vere, ac realiter cernatur. Æque proinde insipientium in numero collocari meretur, qui judicia sensus communis serio negare, aut in dubium trahere tentat, atque is, qui judiciis e sensu intimo perfectis assensum abnuere præsumit, hoc solum discrimine; quod hic a se ipso quodam modo discedere; ille vero rationi, ipsique naturæ rationali renunciare censendus foret.

Quo modo
de ob-
jectis
omnibus
occurrere
dum?

SCHOL. 2. Verum adhuc disputata non omnibus omnino probantur; contendunt enim nonnulli, complura judicia omnibus fere hominibus communia falsa fuisse, ac erronea: cujusmodi fuerunt de polytheismo, in quem omnes olim nationes, excepta solum Judaica, conspirarunt: de motu solis annuo circa tellurem; de non existentia antipodum: & denique, nonne ajunt, commune fere omnium hominum judicium est solis diametrum vix duos pedes æquare, ac nisi a philosophis contrarium evidentiter demonstraretur, omnes ad unum homines sibi relictis id firmissime judicarent? At vero hæc, & similia judicia ex sensu naturæ communis profecta esse vehementer nego; nam ut ab eo, quod postremum est, exordiar, hunc esse sensum communem eorum, qui, ut de magnitudine solis judicium ferant, idonei sunt, aperte falsum est. Et enim quis est etiam de rudissima plebe, qui hac in re non philosophorum porius, ac astronomorum, quam suorum oculorum testimonio fidem habeat? Quis unquam seria mente affirmavit, solis diametrum sine ratione a pedibus

bus majorem haberi? Aut fingamus fuisse talem: an non uno quasi momento errorem dedoceri potuisset provocando ad experientiam, qua certissime constat, objectum quodcumque pro ratione majoris distantiae minus apparere? Profecto vel imperitissimus novit plerumque suis se oculis de vera rerum magnitudine decipi; quare quo tempore absque consideratione censet solis diametrum duos duntaxat pedes complecti, ita simul comparatus est animo, ut tantilla attentione accedente in contrariam partem judicando abeat, priusque judicium erroris condemnet: illud igitur primum judicium non proficiscitur ex sensu naturae communi, cum evidenter erroris vincatur, per ipsum communem, & puriorem quasi naturae rationalis sensum, qui per attentionem paullo accuratorem obtinetur. Atque idem sentiendum est de reliquis erroribus popularibus, qui ratiocinii non adeo sublimis, aut notae alioquin experientiae ope nullo prorsus negotio refutantur, ut polytheismo contingit, qui longe clariori, ac evidentiori ratione ad rudium etiam captum refelli potest; quamquam & is non ubique receptus fuerit, & ubi viguit, consociatus erat cum aliqua notitia unius, supremi, & praepotentis Dei, Deorum, hominumque parentis, ut suo loco in metaphysica demonstratur.

Addunt deinde axioma pervulgatum, *veritatem non esse in multitudine querendam*, vel cum Cotta quaerunt, num res tanta opinione stultorum placeat judicari; Sed his alio quoque axioma occurri potest, videlicet: *vox populi vox Dei*. Ut igitur superiori dicta suo constet veritas, id ita accipiendum est, ut intelligatur ea veritas, ad cujus investigationem singularis attentio, major ingenii vis, difficilior ratiocinium, aut exquisita experimenta requirantur, quae omnia utique frustra in mul-

Cle. de
nat. D. I.
3. c. 4.

ritudine desiderantur. At veritas, quæ sola mentis applicatione absque longiori ratiocinatione cognosci potest, æque in vulgo, si is naturæ ductum sequatur, quam in sapientissimo quovis philosopho residere potest: judicium proinde vulgi in sensu naturæ fundata nequaquam inter stultorum opiniones, ut disputationis gratia contendit Cotta, referri possunt. Denique, ut similibus objectis penitus satisfiat, rite advertendum est, non agi hic de quacumque hominum singularium, sed de ipsa naturæ humanæ, ac rationalis auctoritate, neque hanc per qualemcumque majoris hominum partis in aliquod judicium consensionem, sed per eam solum, quæ ex ipsa naturali propensione omnibus indita proficiscitur, constitui: quare philosophi quam maxime interest, nosse ea, quorum ope duplicem hanc hominum consensionem accurate discernere queat; eam rem sequentes ei suppeditamus.

Characteres Consensionis in sensu naturæ fundatæ.

2.) Consensio ex sensu naturæ communis proficiscitur, si nullam habeat aliam originem, quam quæ ipsius naturæ, ac sponte prorsus, & naturaliter, sine ulla institutione, ac doctrina in hominum animis exoritur; sic Dei existentia, religionisque naturalis nullam causam, nisi naturam, nullum initium, nisi naturæ originem deprehendimus: „ nec enim „ id collocutio hominum, aut consensus effi- „ cit, non institutis opinio est confirmata, „ non legibus: contra polytheismi, divinationis causas, initia, progressus obscure saltem novimus; novimus item, ex quo principio orta sint illa judicia: solem motu annuo circa tellurem moveri; non divi antipodes: illud nempe ex sensuum apparentiâ, quæ, nisi spe-

Act. 99.
Insc. 1. 1.
4. 3.

speciali animi attentione vulgi caprum potissimum superante corrigatur, frequenter in errorem inducit; hoc, quod præjudicio quodam abrepti intelligere non potuerunt, quomodo homines, qui ob gravitatem suam constanter deorsum tendunt, in inferiore telluris parte hæerere, & ambulare possint.

2.) Si ea consensus sit universalis, ac per omnes omnino nationes diffusa, non obstante temporum, ac locorum diversitate, ingeniorum, ac motuum repugnantia, propriorum etiam commodorum oppositione; unde Cicero: *L. 6.*
 „ firmissimum hoc argumentum afferri videtur, cur Deos esse credamus, quod nulla
 „ gens tam fera, nemo omnium tam sit immanis, cuius mentem non imbuerit Deorum opinio; “ Item, nulla gens est, neque *De leg. l. 1. c. 3.*
 „ tam immansueta, neque tam fera, quæ non, etiamsi ignoret qualem Deum habere deceat, tamen habendum sciat. “ Id si obtineat, haud oberit, si in quavis atiam natione nonnulli dissentiant, si modo ii, qui reliquos aut doctrinæ præstantia, aut morum probitate antecellunt, præ reliquis quoque eisdem iudicio firmiter adhæreant; quid enim natura doceat, ex ea desumi debet, quæ minimum a naturali sua perfectione recessit.

3.) Si iudicium communi consensione fuerit acceptum, & retentum sine speciali sectæ cuiusdam commodo, neque impugnatum, nisi ab eo, qui palam præjudicatis opinionibus, ac sinisteris affectionibus agitur, aut principia alias jam a se stabilita, quibuscumque sumtibus, pertinaciter defendere constituit, opponentibus sese illico omnis ex parte melioris notæ sapientibus.

4.) Si sensus ille sit connexus cum aliis veritatibus certis, ac ab ipsa natura dictatis, tamque alter animo infixus, ut nulla vel industria, vel violentia prorsus extirpari queat, quia

quin identidem etiam invito redeat, actionesque hominis quotidianas, cessante saltem affectionum tumultu, clam dirigat, ac gubernet.

§.) *Si sensus ille procedente tempore, crescente literarum, morumque cultura crescat, roboratur ampliusque inter homines diffunditur;* verissimum enim est id, quod ait Tullius, „ id nisi cognitum, comprehensumque animis „ haberemus, non tam stabilis opinio permaneret, nec confirmaretur diuturnitate temporis, nec una cum sæculis, ætatibusque hominum inveterare potuisset. Etenim videmus ceteras opiniones fictas, atque vanas diuturnitate extabuisse; quis enim hyppocentaurum fuisse, aut chimæram putat? opinionum enim commenta delet dies, naturæ judicio confirmat. “

De nat.
D. I. 2.
c. 2.

An sensus communis indicium veritatis sufficiens?

CLXXII. *Sensus naturæ communis est indicium sufficiens veritatis externæ.* Etenim sensus hic nunquam fallit (§. 171.); ejusmodi vero indicium veritatis est sufficiens (§. 160.): igitur sensus naturæ communis est indicium sufficiens veritatis, non internæ (§. 168. 169.): ergo externæ (§. 148.).

Quod ob-
jectum
sensus
commu-
nis?

SCHOL. 1. Sensum nature communem dico indicium sufficiens veritatis externæ; non enim existentia alicujus objecti extra nos satis demonstratur per solam idearum, quæ intra nos sunt, convenientiam, sive per nudam existendi possibilitatem sensu intimo cognitam; sed solum legitime concluditur ex sensu, quem natura omnibus hominibus indidit ad formandum tale circa eam judicium. At quæret aliquis, omnesne ergo veritates externæ sensu communi decidendæ erunt? Cui respondemus, videri quidem omnes ultimo ad eum tandem reducendas esse, cum ipsum sensuum exteriorum testimonium, hominumque auctoritas, de qui-

quibus paullo post agetur, omne suum robur, ac pondus ab eo mutuuntur; interea tamen illa solum proprie dicuntur *objecta* esse sensus communis, ad quæ nos natura instituit, lumineque suo dijudicanda proxime dirigit. Sunt nimirum veritates quæpiam externæ ita alte animo impressæ, ut citra maximam mentis aberrationem negari a nobis, aut in controversiam vocari nequeant; quæ, licet per sensum intimum non reluceant, adeo tamen obviæ sunt, ut nullo prorsus sublimi ratiocinio egeant, sed proma plane conclusione a quovis etiam rudiori, modo sana utatur ratione, facillime formanda deprehendantur, quæ denique ad humanæ vitæ usum, & consuetudinem, ad morum quoque honestatem vel apprimè necessaria sunt, vel saltem proximam cum iis connexionem habent. Ejusmodi iudicia sunt: *dantur præter me in mundo alia entia, & præcipue homines, qualis ego sum: existit aliquod ens supremum, cujus providentia tota hæc rerum universitas sapientissime gubernatur: Namen supremum aliqua religione coli debet: datur post hanc vitam alia, in qua iusta erit representatio premiorum & poenarum &c. &c.* Quæ talia non sunt, quæque, quod sublimiorem exigunt ratiocinationem, inter ea referri nequeunt, ad quæ proxime a natura ordinamur, sensu communi dijudicari non possunt, qualia sunt ea, quæ supra attulimus *de motu, ac magnitudine solis; de incolis in America, & his similia.*

SCHOL. 2. Restat ad extremum eximendus scrupulus iis, qui sensum naturæ communem de subsellio indiciorum veritatis sufficientium id eo solum deturbant, quod putent, fieri non posse, ut iis unquam certo, ac infallibiliter deregatur; qui enim, ajunt, fieri potest, ut sciamus, quid circa objectum quoddam determinatum omnes homines senserint, cum & sen-

Quomodo sensus communis detegendus?

sensus iste ipsis internus, & maxima hominum pars extra nostrum commercium posita sit? At vero, etsi omnes homines, eorumque interna sensa non pernoscamus, sine erroris tamen formidine concludimus, eos habere quoque animam rationalem; propriæ felicitatis desiderio teneri; alimentis ad vitam sustentandam secundum naturæ cursum indigere, & quæ sunt similia. Ita prorsus de sensu communi discurrendum; non eget illa anxia inquisitione, ut detegatur, se ipsum cuilibet animum advertenti manifestat; est enim adeo evidens, atque in quovis reperitur homine, ut ii, qui dissentiunt, rationem exuisse videantur. Sunt nempe quædam quasi a natura nobis insculpta, quibus repugnare nequaquam possumus; & quidem eo minus, quo magis constanti experientia confirmantur, quin ea a quopiam sanæ mentis in dubium vocari, aut impugnari intelligamus. Adjumentum igitur præcipuum, latentem circa nonnulla objecta aliorum sensum pernosceendi est ipsa propensio naturalis, cujus nobismet ipsis consci sumus: examinemus nostramet animi sensa, & positis omnino præjudiciis videamus, num quasi occulta quadam naturæ vi ad idem de hoc, vel illo objecto iudicium semper ferendum impellamur; hanc animi comparisonem si in nobis deprehendimus; jure eam in aliis quoque inesse persuasum animo habebimus; cum & ii eandem nobiscum naturam humanam, & rationalem sortiri sint: ita desiderium veræ felicitatis, quod in nobis sentimus, omnibus aliis hominibus, etiam quos numquam vidimus, de quibus nihil legimus, absque ulla hæsitatione attribuimus. Aliud non minus efficax suppeditat ipsa aliorum vivendi ratio exterius manifestata; sensus enim naturalis vel invitis nobis actiones nostras externas moderari solet: inde fit; ut ii etiam, qui quo demum cumque mo-

tivo

tivo impulsus, a communi nonnunquam iudicio dissentientes videri volunt, factis tamen suis, ac vitæ rationibus sese eidem ad ceterorum normam accommodent, quo latentem in animo sensum, quantumcumque verbis repugnent, luculenter manifestant; sic olim Scepticis, etsi de existentia corporum sese incertos esse palam simularent, non tamen propterea rebus externis minus usi sunt, ac ii, qui se certissimos de ea esse profitebantur; sic illi quoque, qui libertatem humanam funditus sublata[m] volunt, non propterea minus acriter injurias ab aliis sibi illatas persequuntur, quod facere neutiquam possent, si vere, serioque intra se judicarent, actionem illam, quam sibi ut injuriosam apprehendunt, cum absoluta necessitate fuisse positam, quam ob rationem damnum ab amente, aut bruto illatum inter injurias non reponunt? Denique nec rejiciendi sunt libri, ac commentarii, in quibus majores nostri animi sui sensa posteris consignata reliquerunt.

Atque ex his, quæ adhuc copiose allata sunt, cuilibet satis parere arbitror, eum, qui communem naturæ rationalis sensum in sufficientibus veritatis indiciis non numerat; ab impudenti scepticismo, aut fanatismo non procul abesse, quin propemodum monstrum aliquod abortivum naturæ rationalis esse, eoque miseriæ devenisse, ut ipsi nullum cum reliquis hominibus iudiciorum commercium esse possit; siquidem sophistarum arguitas, vana mentium aberrantium deliria, vulgi commenta, ac dubitationes in sola rerum possibilitate fundatas communi, atque in universum consentienti totius generis humani iudicio anteponit.

C A P U T V.

D E

TESTIMONIO SENSUUM EXTERNORUM.

Quid sensus externi?

CLXXIII. *Sensus externi*, sive *organa sensoria* sunt exteriores illæ corporis nostri partes, quarum ope, si nimirum in iis mutatio quæpiam accadat, mens nostra objecta extra se posita percipit; videlicet: *oculi*, *aures*, *nares*, *palatium*, & *fibrille* per totum corpus diffusæ, que sensum *tactus* constituunt.

SCHOL. In acceptione hujus vocabuli *sensus* prorsus hic non recedo a significatione usitata, nec aliud intelligo, quam quod omnes vulgo intelligunt, cum de *sensibus* loquuntur: quo vero modo fiat, ut sensuum ope mens quidpiam percipiat, explicare non est hujus loci; ea enim res ad psychologiam pertinet.

Quid testimonium sensuum externorum?

CLXXIV. *Testimonium sensuum externorum* est illa *idea*, quæ occasione mutationis in sensibus externis contingentis in mente nostra excitatur.

SCHOL. Dicuntur nimirum ex usu recepto sensus, quando ab objectis externis varie afficiuntur, nobis aliquid de iisdem renunciare, sive *testari*: testimonium proinde ipsorum ipsa hæc est annunciatio, quæ si accuratius expendatur, non in alio consistit, quam, quod vi unionis inter corpus, & animam alio in loco exponendæ cum determinata in sensibus affe-

seccione determinata quoque in mente idea
coexistat.

CLXXV. *Testimonium sensuum de multis* An de
rebus externis nullum datur; etenim 1.) sen- omnibus
sus nobis non annunciant naturam objectorum rebus ex-
internam, neque in quo apparentes illæ pro- ternis
prietates, sive qualitates corporum consistant; datur?
percipimus quidem evidenter in corporibus
extrare quidpiam seu *dispositionem* quampiam,
seu *vim* vocare placeat, unde in nobis oria-
tur *sensatio coloris, caloris, &c. &c.* sed quid
illud reapse in se sit, ope sensuum non per-
cipimus. 2.) Sensus nobis non annunciant
partes minimas, earumque dispositiones et-
iam in extrema corporum superficie latentes;
quin integra quoque objecta vel ob molis suæ
exilitatem, vel ob nimiam a nobis distantiam
acutissimam etiam sensuum aciem effugiunt.
Patet id ex telescopiis, & microscopiis; il-
lorum enim ope objecta remotissima, ut stel-
las libero oculo haud videndas, solis, lunæ-
que maculas; horum minutissima, ut mini-
mos in liquoribus verniculos, in speculis et-
iam politissimis cavitates, ac colliculos de-
tegimus, quarum omnium rerum ne ideam
quidem ante habebamus; & quid non effice-
rent tubi, ac microscopia adhuc perfectio-
ra? 3.) Sensus nos non docent impressionem,
& affectionem, quam eadem objecta in alio-
rum hominum sensibus efficiunt: id siquidem
pendet ab ipsa organorum conformatione,
quæ in diversis hominibus, ut eorum facies,
diversissima est. Inde cibus, qui uni sapit, al-
teri dissipit; idem liquor huic dulcis, alteri
amarus; idem odor huic gratus, alteri ingra-
tus accidit: numquam igitur certo mihi con-
sare potest, num alii eandem, quam ego,
præsentem quopiam objecto sensationem in se
experiantur. 4.) Sensus non referunt veram
ma-

mutate quandoque impressionis causam; cum enim, experientia teste, tam objecta ob perpetuum in partibus minimis motum, quam ipsa sensuum organa varias subeant mutationes, sola sensuum ope definiri nequit, utri horum ea causa, organone videlicet, an objecto externo attribuenda sit.

*Richer-
ch. de la
vérité.
liv. 2.
ch. 5.*

COROLL. Ex his canon Cl. Malebranchii manifestus fit: de rebus, quales in se sunt, ope sensuum, cave, ne umquam iudices; iis solum utaris, ut cognoscas, quomodo res mutua relatione sibi invicem respondeant.

*L. c. ch.
11.*

SCHOL. Negari tamen nequit errorem hunc esse inter homines pervulgatum: nosque vulgo tribuere, ut advertit laudatus auctor, sensationes nostras objectis, quando ea motu partium oculos effugientium in nos agunt, non vero, quando ipsa, eorumque actio sub visum cadunt. Sic *lucem, colorem, sonum, odorem* in objectis esse putamus, non tamen *dolorem* in acu.

*An quandoque
dubium?*

CLXXVI. *Testimonium sensuum quandoque dubium est*; res enim frequenter non ita se habent, ut sensibus apparent: quo in casu solum eorum testimonium non omne de reali objectorum veritate dubium nobis eximere potest, sed necesse erit, ut certitudo aliunde petatur; sic cum oculi *remum integrum aquae immersum ut curvum, vel turrim admodum remotam ut rotundam, cum tamen quadrata sit,* repræsentant, spectato solum hoc oculorum testimonio dubium utique remanet de vera, ac reali objecti constitutione.

*An quandoque
certum
ac evidens?*

CLXXVII. *Testimonium sensuum in rebus compluribus est certum, ac evidens.* Nam ipsa experientia teste, ac unanimi etiam, quod in communi naturæ sensu fundatur, iudicio testimonium sensuum ita frequenter nobis satisfacit.

facit, ut non modo omnem animo dubitationem pellat, sed ea quoque claritate menti veritatem proponat, ut ea prorsus conquiescat, nec quidquam aliud, quo amplius confirmetur, indaget; sic alium quempiam de rei cuiusdam veritate penitus convicturi dicimus, nos propriis eam rem oculis usurpasse, putamusque efficacissimum, quod iis in adiunctis possibile est, veritatis argumentum a nobis allatum fuisse; neque falli nos vel exinde liquido patet, quod alterum responsione hac, si modo nos reipsa vidisse credat, prorsus tranquillum, nec aliud quid requirentem dimittamus. Sed & inductione quoque veritas præsentis theorematis demonstratur. 1.) Sensus nos certos reddunt de sensatione actuali; de qua dubitare absolute impossibile est; qui enim ambigam me percipere talem colorem, aut talem sonum occasione hujus corporis; quod nunc meos oculos, aut aures determinato quodam modo afficit, dum id re ipsa percipio? 2.) Sensus fidelissime semper referunt id, quod ipsis apparet, cum enim sint instrumenta tantum, causæque necessariæ, neque vi propria, neque ex arbitrio agere possunt, sed solum eam, quam ab objectis externis recipiunt, affectionem, sive impressionem menti renunciant; hæc proinde renunciatio eidem affectioni nequit non esse conveniens; sic cum nobis, dum provehimur portu, montesque, urbesque recedunt, demonstrant optici, eam reapse in oculis impressionem fieri. 3.) Id, quod sensibus apparet, fere semper congruit veritati objectorum externæ, ac reali, cum agitur de rebus ad vitæ usum, ac consuetudinem necessariis: sic sensus satis ostendunt ea objecta, quæ ad corporis nutrimentum præ reliquis serviunt; quin, quo res sunt nobis magis salubres, aut noxiæ, eo potissimum pluribus obijciuntur sensibus, diversasque in nobis sensationes,

quæ

quæ ad eas discernendas conducunt, excitant; iam non enim testimonio sensuum certissime convincimur, hoc corpus esse liquidum, illud solidum; panem præbere firmum corpori nostro nutrimentum; aqua contra illud dilui; certis quibusdam horis diem, aliis vero noctem, quandoque æstatem, alias autumnum, ver, hyemem esse, & quæ sunt ejusmodi? ea porro, quæ sensuum opè non discernimus, ad vitæ usus nequaquam sunt necessaria; sic adeo necessarium non est, ut minimos in aqua, aceto, vino vermiculos videamus, ut hoc potius in maximum nobis cederet detrimentum. Sensuum igitur munus non est, hæc, & similia referre: quodsi proinde hisce in casibus quandoque decipiamur, nobis ipsis, non sensibus error adscribendus est. Quilibet testis verum duntaxat dicit de eo, quod scientia comprehendit; quod si cogatur de rebus sibi ignotis testimonium ferre, error non ipsis, sed vim inferenti tribuatur, oportet.

4.) Sensus nos certissimos efficiunt de reali diversorum corporum existentia: etiam primum ipso naturæ rationalis ductu impellimur, ut judicemus, impulsionem in corpore nostro factas naturalem cum corporibus extra nos existentibus connexionem habere; deinde sensatio illa, quam sensuum opè acquirimus, non est simplex quædam, & nuda perceptio intima, sed amplius quid, quædam videlicet mentis modificatio, quæ præter specialem quampiam sensus intimi vivacitatem menti ideam rei cujuscumque existentis, quam corpus compellamus, ingenerat; nam ad nosmet ipsos reflectentes, ingens deprehendimus discrimen inter ideam rei absentis per solam imaginationem reproductam, & inter eam, quæ dependenter ab actuali sensuum affectione in nobis excitatur; sic quantumcumque mihi vivaciter imaginer, ignem corpori applicari, ea

tamen ideam semper in immensum differet ab ea sensatione, quam igne reipsa applicato percipio. 5.) Sensus denique evidenter testantur esse quidpiam in corporibus, quod vim vocamus, ac per quod ea in nos agendo sensus nostros hac, vel illa ratione afficiunt, & immutant, etsi neque ejus naturam, neque internam corporum constitutionem nobis annunciant.

COROLL. Numquam igitur, si quod res est, fateamur, sensus nos fallunt; ipsi nos decipimus occasione eorum, quæ illi nobis fideliter annunciant, neque enim a sensibus exigere debet, ut mentem admoveant de eo, quod est, munerique ipsi suo satisfaciunt, si id referant; quod ipsis apparet; mentis porro erit rem ulterius investigare, atque dijudicare; hinc verissime ait Malebranchius: non a sensibus, sed a mente ad judicandum nimis propensa nos decipi.

SCHOL. Veritas hujus theorematismis nullo modo infringitur ex eo, quod saltem per absolutam Dei potentiam testimonio sensuum possit subesse falsum; fateor enim lubens, certitudinem hanc, ac evidentiam esse solum in ordine naturali; physicam proinde, non metaphysicam (§. 162. & schol.); neque vero major in objecto certitudo cum ratione desiderari potest, quam ea sit, cujus ipsum per essentiam suam capax est. Sed neque majorem vel natura nostra admittit, vel conditio requirit: cum enim sensus nobis solum dati sint ad præsentis vitæ usus; satis utique serviunt, si nobis res eas, quæ naturæ nostræ vel conveniunt, vel adversantur, certo, & evidenter cognoscendas præbeant: & quis id ab iis fidelissime præstari negabit? an de ignis existentia ambigere poterit, qui jam illius vim quondam expertus est? Est igitur certitudo hæc tanta, ut sit securissi-

Quomodo oblationibus occurrendum?

ma actionum nostrarum regula; tanta ut nos in acquisitione boni, aut fuga mali, quod a rebus externis in nos derivari potest, optime deducat; tanta denique, quanta voluptas, aut dolor, quem ex earum rerum usu percipimus, atque inde tam parum quis de existentia aliorum entium extra se, quam de ipso illo sensu, quo se ab iis interne affici sentit, serio dubitare potest; ex quo patet veram utrinque, licet non æque vivacem, dari evidentiam. Ceterum etsi Deus in uno vel altero casu per miraculum efficere possit, ut id, quod sensibus apparet, non existat; ut tamen hoc constanter evenire admittat, quin hoc ipsum alia nobis ratione patefaciat, id enim vero illius & bonitati, & sapientiæ & veriloquio omnino adversum esse dubitari vix potest. Opponunt hic alii imaginationes phreneticorum, ac furiosorum, qui res, quæ nusquam sunt, tamquam præsentis intuentur, indeque consequi putant, ut prudenter ambigi queat, num sensationibus nostris objecta reapse existentia respondeant. At vero ejus rei ratio in aperto est, eaque dilucide in psychologia explanatur: Interea, quod pro præsentis sufficit, tam clara, tam manifesta est differentia inter ideam ope imaginationis reproductam; & eam, quæ actu ope sensuum in mente excitatur, quam clare sentimus differentiam, quæ inter duas ideas realiter distinctas intercedit. Profecto diversissimas habemus ideas, cum de die solem intuemur, & cum noctu de eo cogitamus; cum rosam odoramur, aut rem quampiam dulcem gustamus: & cum præteriti odoris, aut gustus solum recordamur; neque enim imaginatio tam vivaciter nos afficit, neque voluptas, & dolor, quæ potissimum sensationes nostras comitantur, cum ideis per phantasiam reproductis redeunt. Eleganter hanc in rem ait Lockius „scribens nunc video me
„ pos

„ posse hanc chartam varie modificare, atque
 „ etiam prædicare, quæ nova idea occasione
 „ earum figurarum, quas ope calami in ea de-
 „ pinxero, momento subsequente sit in men-
 „ te excitanda: profecto si id mihi tantum
 „ imaginarer, hæ figuræ in charta nusquam
 „ apparerent. Igitur non est merus imagina-
 „ tionis lusus, cum deprehendam characteres
 „ secundum meam phantasiam prius formatos,
 „ jam non amplius ab eadem pendere, neque
 „ cessare, quomodocumque mihi imaginer il-
 „ los non esse, immo permanere & constanter
 „ & regulariter, atque meum, & aliorum, qui
 „ legerint, sensum pari ratione affecturos. “

phil. con-
 cer. I.
 entend.
 hum. I.
 4. ch. II.
 §. 7.

Ad somnia confugiunt alii, voluntque evincere,
 ex vigilantium ideis existentiam rerum actua-
 lem nequaquam certo colligi posse; quemad-
 modum neque ex somniantium imaginationi-
 bus ejus generis conclusio fieri potest. At istis
 quidem respondere parum refert; si enim res ita
 se habeant, obijciendo somniant, & si mera
 sint somnia, nulla exsistit veritas, nullaque
 est cognitio; vana proinde sunt omnia ratio-
 cinia; inutilia omnia argumenta, quæ seu ad
 stabiliendam, seu ad refutandam eam rem ad-
 ferri posse viderentur. Sed tamen ne nihil
 dicamus: valet huc primum responsio supra
 data; differentia enim immensa est inter ima-
 ginationem, quam somnians habere possum,
 me esse in igne, & inter actualem sensatio-
 nem, quam eo in casu experire; neque vo-
 luptas, aut dolor ea, qua vigilantes solet,
 vivacitate somniantes umquam afficit. Deinde
 cum vigilamus, clarissime agnoscimus absur-
 dam quæ in somniorum phantasmatis perpetuo
 occurrit, confusionem; somniantem vero eam
 non discernimus; denique cum vigilantes de
 somnio cogitamus, optime perspicimus sta-
 tum eum magnis esse tenebris involutum; cum
 vero somniantibus de vigilia forte cogitatio

venit, eandem ut statum clariorem, vel saltem æque clarum percipimus.

An testi-
monium
sensuum
indiciū
sufficiens
veritatē
externæ?

CLXXVIII. *Testimonium sensuum externo-
rum certis arctatum limitibus est indicium suffi-
ciens veritatis externæ*: cum enim hoc testimo-
nium de compluribus rebus certum fit, ac evi-
dens (§. 177.) in quibusdā adjunctis num-
quam fallit (§. 161.), ac proinde iis recur-
rentibus infallibiliter indicat adesse veritatem:
atqui hoc est esse indicium veritatis sufficiens
(§. 160.): ergo patet propositum.

SCHOL. Veritatis aīo *externæ*; sensu enim ex-
terni nobis nihil annunciant de objectis intra
nos existentibus: addo, *certis arctatum limi-
tibus*; cum enim testimonium sensuum quan-
doque nullum sit, etsi fortassis adesse falso vi-
deatur (§. 175.), quandoque vero dubium
(§. 176.), patet illud certis intra fines con-
cludi debere. Verbo, ut rem brevissime absol-
vam; sensum ope eā nobis veritates patefiunt,
quas obtinere possumus de rebus ad vitæ usus,
nostrique conservationem necessariis, utilibus,
aut noxiis, quo actiones nostras, communisque
vita societatem regamus, ac tueamur. Deus
quippe optimus, uti nobis magnam hac in tel-
lure rerum ubertatem concessit, ita etiam iis-
dem in bonum nostrum nos uti voluit; jam ve-
ro si sensus vel prorsus nobis deessent, vel
constanter falsum repræsentando nos perpetuo
deluderent, omnium harum rerum cognitione,
commodisque inde profluentibus destitueremur.
Atque inde manifeste consequitur nobis
hominibus eo fine a supremo Auctore sensus,
datos esse, ut iis in examine rerum nobis uti-
lium, aut noxiarum uteremur, neque iis nos
constanter decipi posse, nisi summa sapientia
sibi ipsi quodam adversaretur, utpote quæ vel-
let, ut iisdem modiis quæ nobis ad cognoscen-
das,

das, quibus urimur, res dedisset, in errores inducamur (conf. §. 177. schol.). Verum ut in his ipsis rebus testimonio sensuum absque errandi periculo fidamus, necesse est, ut discamus certam a dubio quovis in casu infallibiliter discernere; id porro ad sequentia attendendo haud difficulter consequemur.

*Adjumenta discernendi testimonium sensuum
certum a dubio.*

1.) Spectandus est *finis*, ad quem sensus nobis ab Auctore concessi sunt; dati nimirum nobis sunt sensus, ut supra dictum est, primario ad nostri conservationem, ususque vitae necessarios, non ad comparandas scientiæ pure theoreticas, quantumvis eæ ad meliorem animi culturam plurimum faciant: huic porro fini aptissime semper sensus congruunt; nam & summa pernecitate, totque modis diversis, dolore videlicet, aut voluptate, jucundis, vel injucundis affectionibus mentem de rebus, quæ ad conservationem vitæ vel necessariæ, vel utiles, vel noxiæ sunt, admonent, & aliorum cum nostro corpore convenientiam, si ve discordiam evidenter edocent. Inde quo corpus nobis est propius, eo fortius; quo vero remotius, eo debilius nos afficit; remotiora quippe universim minus prodesse, vel obesse nostri corporis conservationi possunt.

2.) Spectandum est *objectum peculiare* cujuslibet sensus. Quilibet namque sensus ex naturali sua institutione ad res duntaxat aliquas, easque determinatas nobis exhibendas ordinatur; unde decipi nos mirum non est; cum illius ope res alias, ad quas ille directe se non extendit, cognoscere volumus. Multi cum Malebranchio acerrime contendunt, ab oculis nobis perpetuo imponi, atque argumentum ducunt ab eo, quod eorum renunciatio de obje-

storum magnitudine, ac distantia potissimum falsa sit. At vero, si rem accurate expendamus, deprehendemus utique proprium oculorum objectum solos esse colores, licet, ut consuetudo fert, ex angulo per radios luminis in oculi retina formato de ipsa etiam objecti colorati magnitudine, aut distantia judicare fere soleamus; verum hoc iudicium non magis ad visum, quam ad auditum pertinet, si quidem ex diversa quoque soni intensione, aut remissione de magnitudine, & discordia corporis sonori perfrequenter iudicium ferimus. Quodsi jam ejusmodi judicia falsa esse contingat, nullo jure oculis, aut auribus culpa attribui poterit, cum ea organa simili in casu non suo, sed alieno, tactus nimirum munere fungi propemodum invita cogantur; digiti nempe, pedes, palmi, cubiti, quæ pro rerum mensuris universim adhibentur, sunt partes corporis humani, in quibus sensus tactus præcipue viget, atque ad eas spectat explorare magnitudines, & distantias objectorum, mensurando videlicet per suam propriam extensionem eam, quæ est in objecto, ad quod applicantur. Nisi igitur testimonium oculorum de rei cuiuspiam magnitudine confirmetur per testimonium manus, aut alterius partis mensurabilis, certam fidem non meretur: neque tamen propterea oculi sunt fallaces, aut eorum functio imperfecta, cum ex se ipsis, & ex directa naturæ institutione ii nobis solum concessi sint ad indicandos colores, & solum per accidens ad discernendas magnitudines, & distantia adhiberi possint.

3.) Ipsa ratio consulenda est, quæ velut iudex sensuum externorum renunciationes in examen vocare debet: quodsi ea ex aliis aliunde certis principiis contrarium judicet, testimonium sensuum absque hæsitazione rejiciendum est. Sic cum nobis oculi solem exhibent,

bent, ut discum, cujus diameter duos circiter pedes complectatur; hoc visus testimonium nullum obtinet apud nos momentum, quia nempe ratio nostra ex evidentissimis aliunde argumentis invicte colligit solem esse corpus sphaericum, & in immensum tellure majus.

4.) Spectandum est *testimonium sensuum praecedens*; quodsi sensatio quæpiam præsens pugnet cum iis, quæ alias ope sensuum percepimus, gravis adest suspicandi caussa, vel objectum non esse debito modo collatum, vel mutationem quampiam seu in objecto, seu in organo nostro evenisse: est proinde testimonium præsens dubium, atque adeo iudicium eo usque retinendum, donec veritas clarius evolvetur.

5.) Spectandum est *testimonium præsens sensus alterius*; nam si duo testimonia actualia diversorum sensuum inter se opponantur, manifeste patet, alterutrum eorum dubium esse: quod vero illud sit, potissimum ratione objecti habita (n. 27) decidi poterit. Sic cum oculi remum aquæ immersum exhibet curvum, eodem simul tempore tactus eum representat rectum; credimus vero huic præ illo, quia partium in corpore distantias, cohesionem, quoriusque magnitudinem explorare proprie ad tactum pertinet; sic quoque infans primum se ipsum in speculo, aut aqua videns alium intus latere iudicat infantem; sed ubi speculum, aut aquam sæpius contigerit, emendat iudicium, & contra oculorum testimonium tactui fidem habet.

6.) Spectandum denique est *testimonium sensuum aliorum hominum*; si etenim aliis primis, ac fere omnibus, quos organis æque perfectis instructos esse tuto credere licet, aliud appareat, atque mihi, sana ratio exigit, ut me potius unum præ tot aliis falli iudicem; secus enim natura ipsa potissimam hominum

partem per se se in errores induceret, quod sine absurdo ne cogitari quidem potest.

*Trait.
des bre-
vie. de.
rit. p. I.
ch. 14. n.
107.*

SCHOL. Non attuli hic criterium, quod complures in debita organorum constitutione reponunt, agentes: attendendum esse vel maxime, num sensus nostri valentes, ac vegeti sint; id siquidem ipsum est, quod fere semper nos latet, neque præter dicta adjumenta ulla detur certa norma, ad quam nostrum ea de re judicium exigi possit. Refert P. Buffier fuisse hominem, cui ad annum ætatis fere trigesimum omnia objecta alio, ac ceteris hominibus, colore imbuta apparuerunt, quin tamen id a quoquam animadverteretur: in valetudine eo circiter tempore correpto albuginis quædam species ex oculis decidit, simulque glaucoma, quo adhuc ignorans laborabat, dispartit, ex eo vero tempore longe diversos in iisdem rebus, quas toties ante viderat, colores deprehendit. Jam quæso, potuine hic ante suam ægrotationem de recta oculorum suorum constitutione certus esse? censuerit id sane, at non sine gravissimo errore: deinde an non idem ipsum, quod homini huic per aliquod temporis intervallum contigit, quodque toto facile vitæ spatio perdurare potuisset, aliis etiam nonnumquam accidet? Patet igitur, quemadmodum, ut testimonium sensuum sit certum, requiritur, ut illi sint recte constituti: ita quoque ad id ipsum casu quovis singulari discernendum opus est, aliis rursus adminiculis, quæ tandem ad supra allata reducuntur.

C A P U T VI.

D E

A U C T O R I T A T E.

CLXXIX. *Auctoritas* est testimonium alterius, quatenus nos movet ad aliquod iudicium ferendum; & quia testimonium vel a Deo, vel ab homine proficisci potest, ea duplex est *divina*, & *humana*. Quid auctoritas, & quotuplex?

CLXXX. *Auctoritas* constituitur per scientiam, & veriloquium testantis; sic enim a natura comparati sumus, ut ad assensum relationi cuiuspiam præstandum non ante moveamur, quam firmiter persuasi simus narrantem neque decipi, neque nos decipere velle, illud autem scientia rei, quæ narratur: hoc veriloquium, seu veracitas præstat: igitur auctoritatem quancumque per scientiam, & veriloquium testantis constitui in aperto est. Quod est jus constitutum?

COROLL. Quo igitur quis certior est de scientia, & veracitate testantis, eo major comparate ad illum erit alterius auctoritas.

CLXXXI. *Auctoritas* divino parit certitudinem metaphysicam; cum enim in Deum nulla cadat imperfectio, ut in theologia naturali demonstratur, nullo pacto fieri potest, ut is vel rei alicujus scientia, vel veri dicendi voluntate umquam destituatur: quare Dei auctoritas, quæ per hæc constituitur (§. præc.), nullo in casu fallere potest; sed ejusmodi iudicium parit certitudinem metaphysicam (§. 126.): igitur auctoritas divina parit certitudinem metaphysicam. Quem cetera auctoritas divina?

Quando
& quale
indiciū
veritatis?

COROLL. Evidens igitur est auctoritatem Dei loquentis esse indicium veritatis omnibus numeris absolutum, in iis videlicet rebus spectandum, quæ per revelationem divinam nobis innotescunt, atque assensum ob eandem præstitum metaphysica quoque certitudinem pollere.

An aucto-
ritas hu-
mana
nonnum-
quam fal-
libilis?

CLXXXII. *Auctoritas humana in se specta-
ta quandoque fallere potest; cum enim quilibet* homo in se consideratus ob intellectus humani brevitatem errandi periculo expositus sit, fieri potest, ut quis de iis rebus, quas testatur, non sit satis instructus; cum item voluntas humana in malum propendeat, variisque affectionibus, ut spe, metu, commodorum, aut partium studio &c. persæpe agatur, fieri rursum potest, ut quis consulto etiam falsum pro vero propinando nobis imponat: quare cum ex alterutro horum fonte consequi necesse sit, ut assentientes ejusmodi auctoritati fallamur, manifestum est, auctoritatem humanam in se spectatam quandoque fallere posse.

An non-
num-
quam in-
fallibilis?

CLXXXIII. *Auctoritas humana certis in ad-
junctis est infallibilis, parisque certitudinem,
ac evidentiam moralem;* etsi enim quilibet homo seorsum acceptus errori obnoxius sit, concurrunt tamen ea quandoque adjuncta, ut nemo eorum testimonio refragari debeat, quin ut id homini sana ratione utenti impossibile evadat: suaderetur nempe ea efficacitate veritas, ut de ea nullo modo dubitare possimus, etsi tota, quæ in objecto inest, obscuritas non tollatur; sed hoc ad certitudinem, & evidentiam moralem sufficit (§. 162. & schol.). Quod si quis plura requirat, næ is veritatum, ac judiciorum naturas confundit, aut in vanam logomachiam declinat.

SCHOL. Et profecto si oculorum aliorumque
sen-

sensuum testimonio sua constet firmitas, ac certitudo, cur ea testimonium hominum certis in adjunctis denegemus? æqualem enim utrinque ipsa nobis natura quodam modo necessitatem imponit, ut uni æque, ac alteri testimonio veritatem subesse nobis persuadeamus. Indidit nempe natura omnibus hominibus eam animi comparisonem, ut veritatem discernere possint, quando eam ipsorum captum, ac intelligentiam non excedit, eamque aliis enuncient, nisi parva quadam affectione in transversum agantur; unde fieri nequit, ut omnes simul falsum pro vero accipiant, aut illud malitiose nobis obtrudant. Si quis ad ea, quæ in se experitur, animum advertat, sincerusque esse velit, fateri cogitur, se tam procul ab omni de existentia urbis Romæ dubitatione abesse, quam parum de existentia solis supra horizontem, dum eum suis intuetur oculis, ambigere potest; profecto sicut fieri omnino non potest, ut serio judicem, omnes cujusdam typographiæ characteres fortuito casu projecto ita feliciter convenire posse, ut inde oratio quæpiam Ciceroni, aut Virgilii æneis prodeat, ita quoque impossibile est, ut serio judicem, omnes homines, cum asserunt Romam existere, simul falli, aut in id, ut me fallant, conspirasse: igitur in hoc casu nullo modo liber sum, ut seria mente unanimi tot hominum testimonio contradicam, aut non assentiar: id quod ad certitudinem, & evidentiam moralem omnino sufficit. Interea tamen fatendum est, evidentiæ huic non eam inesse vivacitatem, qua metaphysica, aut physica gaudere solet; non tamen propterea minus vere, ac realiter nostrum ea consensum elicit: nempe non sum magis certus solem existere, quando eum video, quam certus sim dari Romam, quando id omnes af-

firmant, sed tamen priori illa certitudo vivacitatem in me impressionem efficit, atque hæc. Et hinc desumi debet, quem sensum contineat id, quod vulgo dici solet: *magis a nobis credi id, quod videtur quam quod solum auditur*: sensus videlicet hujus axiomatis est: nos longè vivacius affici eo, quod oculis usurpamus, quam eo, quod solum auditu percipimus, non autem illud præ hoc magis verum nobis videri. At quænam, quæret aliquis, sunt ea adjuncta, in quibus auctoritas humana certa evadit? accipe igitur

Caracteres certa Auctoritatis humane.

1.) *Objectum, circa quod testimonium versatur, sit res facti*; neque enim in rebus scientificis ullum habet auctoritas humana pondus. Sit præterea ejusmodi, ut eorum, qui testantur, captum non superet, quod tum obtinetur, quando iis neque vires intelligentiæ, neque copia indagandi veritatem defuerit.

2.) *Numerus testantium sit tantus, ut iis in adjunctis prudenter major desiderari nequeat*: numerum tamen non faciunt etiam quatinus plurimi, cum omnes rem ab uno desumunt.

3.) *Non sit locus prudenti suspicioni, an non testimonium ex parva quadam animi affectione profiscatur*; mens enim ejusmodi motibus agitata vel verum non videt, vel, si videat, occultat.

4.) *Testimonium sit unanime, & non nisi a paucissimis, quales numquam defunt, in dubium vocetur*: quod si neque illi, quorum causa agitur, quorumque proinde id dubium reddi vel maxime interesset, contradicant, maximum veritati pondus accedit.

CLXXXIV. *Auctoritas humana hisce caracteribus insignita est indicium sufficiens veritatis externa; est enim infallibilis, paritque certitu-*

firmitudinem, ac evidentiam moralem (§. 183.) : habet igitur ea, quæ ad indicium veritatis sufficiens requiruntur.

SCHOL. Veritatis nimirum *externæ* ; *internæ* non esse, patet alioquin ; at neque omnis *externæ*, ejus videlicet solum, quam nec sensibus externis, nec sensu naturæ communi, nec ratiocinio ex illis deducto consequi valemus. Verbo, ea nobis auctoritas humana vera esse indubitanter persuadet, quæ ad facta, ac historias attinent, iisque in suscipiendis consiliis, expediendis negotiis, ac cognoscendis illis quæ ad vitæ usus requiruntur, dirigimur. Qui in ejusmodi rebus omnem testimonio humano fidem abroga-
ret, is profecto non modo a ceterorum commercio veluti perversi, ac aberrantis animi homo excludi meretur, verum etiam sibi ipsi quam maxime noxius foret ; ex plerisque enim rebus a Deo hominibus ad usum concessis nullam utilitatem capere, & non nisi infelicem, brevemque in tellure vitam degere posset, cum nemo sit, qui ipsi propriis sensibus omnes res ad vitam sibi necessarias explorare, queat proptereaque in compluribus occasionibus aliorum instructione non egeat. Atque exinde patet, Deum optimum voluisse, ut nobis hominum testimonium quandoque serviat ad veritatem certo detegendam, eumque etiam dedisse hominibus facultatem determinandi, quid huic testimonio inesse debeat, ut fidem mereatur. Hæc de auctoritate humana dicta pro hoc loco sufficiunt, plura de eodem argumento dicemus, in parte tertia, ubi de fide agendum erit.

PARS TERTIA

LOGICÆ.

D. E.

COGNITIONE VERITATIS.

§. CLXXXV.

Quod ar-
gumen-
tum par-
tis ter-
tiæ est.



UM veritas indiciorum ope detecta-
menti obversatur, eandem *cogno-*
scere dicimur; eo vero in casu vel
scimus, vel *opinamur*, vel *credi-*
mus; triplex inde oritur cognitio-
nis species: *scientia*, *opinio*, ac *fides*, præci-
puum ultimæ hujus partis argumentum.

CLXXXVI. Potissimam fere cognitionum
nostrarum partem lectioni librorum debemus;
quare, cum de cognitione veritatis generatim
hoc loco agamus, ea quoque adferantur, o-
portet, quæ ad evolvendos utili lectione li-
bros, verumque eorum sensum assequendum
scitu necessaria sunt.

CLXXXVII. Denique, quando, ut, in a-
perto est, veritatis cognitio cum ignorantia,
& errore consistere nequaquam potest, non
erit inutile præcipuas utriusque causas, fon-
tesque detegere; his enim intellectis eam fa-
cilis dispellemus; hunc vero vitabimus; at-
que hac ratione cognitionem nostram pro hu-
mani intellectus viribus amplius semper, &
amplius extendemus. His in tironum commo-
dum, ne quidpiam desit, breve de concerta-
tione litteraria caput subnectemus.

C A P U T I.

D. E.

SCIENTIA, EJUSQUE DIVERSIS SPECIEBUS.

CLXXXVIII. Omnis cognitio certa, ac evidens *scientia*; atque iudicium, quod dependenter ab ea formatur, *scientificum* compellatur; ut cum iudico: *totum est majus sua parte.* Quid
scientia
& iudi-
cium
scientificum?

COROLL. Eam igitur propositionem scio, cujus veritas mihi evidenter relucet.

SCHOL. Sumo vocabulum *scientiæ formaliter*, seu *subjective*, quatenus videlicet refertur ad mentem; nam *objective*, sive relate ad objectum, illud notat vel quamvis veritatem evidentem, vel collectionem quampiam, seu systema veritatum demonstratarum, quale est geometria, metaphysica &c. &c. Significat quoque per aliquos *scientia* habitum demonstrandi longiori usu, & exercitio comparatum, atque hoc in sensu ille dicitur pollere *scientia* metaphysica, vel geometrica, qui facilitatem possidet complura saltem asserta ad geometriam, vel metaphysicam spectantia demonstrandi.

CLXXXIX. Cognitio certa, ac evidens vel ex sola idearum inter se collatione, vel opem idearum cujusdam mediæ obtinetur: duplex igitur est *scientia*; *intuitiva*, cum ex sola idearum comparatione earum convenientia, vel repugnantia relucet; sic intuitive scio *me esse*, *cogitare*, *circulum esse rotundum*, *totum esse majus sua parte*. &c. *Demonstrativa*, cum ea idearum Quota-
plex
scientia?

RUR

rum connexio ope unius, vel plurium etiam aliarum intervenientium detegitur; sic *animam esse incorruptibilem deprehendimus ope ideæ mediæ entis simplicis.*

COROLL. 1. Omnes igitur veritates, quæ immediate vel ex sensu intimo, vel ex sensu naturæ communis, vel ex testimonio sensuum externorum, profluunt, *intuitive* scimus.

COROLL. 2. Quando scientiam demonstrativam habemus, præstamus assensum convenientiæ, vel repugnantiam duarum idearum propter visam earundem cum tertio convenientiam aut repugnantiam; aut cum hoc facimus, ratiocinamur (§. 121.): igitur scientia demonstrativa involvit ratiocinium; atque inde omnes veritates, quas ex prædictis indiciis legitime ratiocinando deducimus, *demonstrative* scimus.

SCHOL. Dicitur scientia *intuitiva*, quia mens ex solo idearum intuitu, absque ulteriore cura, aut labore veritatem assequitur, eamque infallibiliter dijudicat: ut oculus apertus videt lumen solis; ita in hoc casu veritas sese menti attendenti manifestat, quin ipsi possibile sit de ea aut serio dubitare, aut ampliorem inquisitionem instituere. At vero scientiam *demonstrativam*, etsi eadem certitudo, non tamen eadem claritas, ac evidentia æque vivax comitatur; in hac enim mens non sine magno labore, & attentione per longas quandoque idearum mediarum progressionem ducta tandem convenientiam, aut repugnantiam idearum detegit (conf. §§. 164. & 165. cum schol.). De hoc plura in capite sequente,

CXC. Scientia, quam sensuum externorum Quid ex-
perientia, adjumento obtinemus, *experimentalis*, sive ex-
perientia audit: comparatur igitur attentione
ad eas mutationes, quæ in organis sensoriiis ab
objectis externis efficiuntur. Dicitur, *externa*,
ut

ut discernatur a sensu intimo, qui experientia
internae nomine frequentius venit.

CXCI. Experientia compellatur *observatio*; & quotu-
ejus vero objectum *phenomenon*, si illud ipsum plex?
objectum absque nostro labore tale existat;
sic solem mane *eriri*, vespere *occidere* *pheno-*
menon est, quod observamus. Observatio por-
ro vel absque instrumentorum subsidio, vel
eorum ope peragitur; in priori casu *vulgaris*
est, in altero *artificiosa*; sic *eclipsis lunae vel*
libero oculo cum vulgo, vel *cum astronomis ad-*
hibito telescopio, ut initium, finis, ceteraque
accuratissime adnotentur, observari potest. Si
denique experientiae objectum nostra nobis in-
dustria, ac labore praeparemus, *experimentum*
instituiamus; ut cum quis primo *globum aere*
plenum, tum eo extracto *vacuum bilanci ap-*
pendit, ut *aeris inde gravitatem exploret*.

CXCII. Quidquid non sentimus, illud per
experientiam notum non est; experientia enim
est scientiam per attentionem ad id, quod in
sensibus contingit, hoc est, ad ipsas sensatio-
nes comparata (§. 190.): errat igitur gravis-
sime, qui affirmet se quidpiam experiri, quod
non sentit; ut si quis dicat, *se experiri quif-*
se effluvium magneticum, quo *ferrum attraha-*
tur. Quid vi-
tium su-
breptio-
nis?

SCHOL. Vitium hoc *subreptionis* nuncupari a-
mat, comittiturque ab iis, qui vel nimium
imaginationi indulgent, vel nescio qua praeju-
dicata opinione acti, falso sibi persuadent se
aliquid experiri, quod non est, vel id quod
per legitimum ratiocinium ex praecedente ex-
perientia deducunt, pro ipsa experientia iusti-
tant. Atque id ipsum quoque ad experientiam
internam, sive sensum intimum pertinet; nam
& eo in casu facile incauti in id vitium in-
currunt. Quam multi ajunt se intus experiri,
corpus, ejusque membra ad anima efficiente
mo-

inoveri, cum tamen aliud non sentiant, quam quod eo quasi momento, quo anima vult, talis in corpore motus contingat; alii autumant diffusionem animæ per totum corpus ab experientia sibi certissimo constare; at miserrime hallucinantur, jam enim oppositum obtinere satis notum est inter philosophos.

De quibus datur experientia?

CXCIII. *Experientia est de rebus duntaxat singularibus*; ea enim tantum experimur, quæ in organa sensoria agunt (§. 190.); hæc vero omnia existunt, quod enim non existit, neque agere potest: porro quidquid existit, individuum, ac singulare est (§. 59. schol.): igitur res duntaxat singulares sub experientiam cadunt.

COROLL. 1. Qui universalia se experiri asserit, a vitio subreptionis immunis esse nequit.

COROLL. 2. Qui per experientiam quidpiam demonstrare nititur, adferat, necesse est, casum singularem, in quo id expertus sit, nisi is plane obvius, omnibusque per se notus sit.

Quomodo ope experientia cognitiones universales obtinentur?

SCHOL. Etsi vero iudicia nostra in experientia fundata de se singularia sunt, facile tamen in universalia commutantur. Si videlicet plures, ac diversi observationum casus inter se conferantur, notenturque ea, quæ omnibus communia sunt, levi negotio inde per abstractionem (§. 61.) propositiones universales efformari, sicque ope experientiæ cognitiones etiam universales obtineri possunt. Plura hic non addo, quæ enim in instituendis experimentis, machinarumque usu observanda sint, in physicæ prolegomenis doceri debent.

Quid scientia actualis, & habitualis?

CXCIV Scientia denique vel *actualis* est, quando eam præsens perceptio convenientiæ, aut repugnantia idearum comitatur: vel *habitualis*, cum mens nunc quidem actu hanc idea-

idearum relationem non percipit; ob memoriam tamen ejus perceptionis præteritæ ita est comparata, ut quotiescumque eadem ideæ recurrunt, veritatem indubitanter agnoscat, assensumque, vel dissensum absque omni formidine, aut errandi periculo præstet.

COROLL. Quivis igitur scit omnes veritates, quas in memoria quasi reconditas habet, vix evidens perceptionis præteritæ, in qua mens, quoties super eas reflectit, cum maxima fiducia innititur.

SCHOL. Neque hoc ullo jure in dubium vocari potest; cum enim intellectus nostri tanta sit brevis, ut paucissima solum uno eodemque tempore clare, & distincte concipereliceat, profecto magna admodum nostra ignorantia foret, si non sciremus, nisi, id, quod actu cogitationum nostrarum objectum agit; quique doctissimus inter homines habetur, ac plurimum scire putatur, vix unam, & alteram veritatem, quot videlicet simul in mente complecti posset, reapse sciret.

CXCV. Scientia habitualis rursum duplex est; vel enim ut primum veritates olim perceptæ recurrunt, mens simul mutuam idearum relationem clare & distincte pervidet; vel vero iis recurrentibus mens quidem de iisdem se antea fuisse convictam meminit, nullo tamen modo rationes, argumentaque revocare in memoriam potest.

Quotuplex habitualis?

SCHOL. Primum contingit in omnibus veritatibus, quas intuitive scimus (§. 189.); tum enim uno intuitu idearum recurrentium convenientia, aut repugnantia clarissime perspicitur; alterum vero in iis fere obtinet veritatibus, quas olim demonstrative scivimus; pronissimum enim est, ut iis recurrentibus earum simul demonstratio menti non recurrat; sic, qui

qui certo recordatur, se olim demonstrative scivisse; animam esse ens simplex, scit eam veritatem, quoties ea in mentem venit, ac nullo modo de ea dubitare potest, etsi demonstrationis amplius non meminerit. Est porro hæc veri nominis scientia, quantumvis enim convenientiam inter ideas animæ, entisque simplicis illarum idearum adjumento, quarum ope eam olim detexi, nunc non perspiciam, subingrediuntur tamen in earum locum aliz ideæ mediæ, quæ mihi non minus infallibiliter, licet fortassis minus perspicue dictam convenientiam actu ostendunt; quemadmodum impressionem magis vivacem sentio, dum rem actu video, quam cum solum me vidisse recordor: immutabilitas nimirum atque æternitas veritatum universalium efficit, ut mihi evidenter constet, nunc a vero abesse non posse id, quod olim verum fuit. Profecto nisi res se ita haberet, nulla geometrarum demonstratio pro omnibus universim casibus valeret; qualibet enim per se ad singularem circulum, vel triangulum &c. in charta depictum restringitur, neque suam universalitatem aliunde, quam ab immutabili, ac æterna circulorum, vel triangulorum &c. relatione accipit: & quis asserat insignem mathematicum nescire propositiones olim a se in librum congestas, demonstratasque, propterea quod ipsarum demonstrationum jam non meminerit? Id tamen consequens foret, nisi eum defectum immutabilis idearum inter se relatio, quam se aliquando clare, & distincte percepisse certo recordatur, abunde suppleret. Atque hoc memoriæ testimonium ita necessarium est, ut absque eo potior hominum pars aut ad scepticium declinare, aut singulis fere momentis sententiam suam mutare cogeretur, quoties nimirum quædam opponi audit, quibus plene satisfacere vitio memoriæ rationes olim perspectas non suggeren-

gerentis, extemplo nequit. Dissimulandum tamen non est multorum in erroribus pertinaciam inde potissimum oriri, quod de sententia semel apud se stabilita decedere nolint; verum id non inde provenit, quod memoriae confidant in iis rebus, de quibus rectum olim iudicium formarunt, sed potius, quod antequam eas examinassent, iudicium tulerint, qui enim pertinacissime suæ sententiæ adhærent, fere ii tantum sunt, qui nullum unquam serium examen instituerunt, quique ad tuendam quibuscumque suntibus receptam a se sententiam hac una ratione impelluntur, quod nunquam aliter iudicaverint. Quare, ubi res fuerint maioris momenti, non soli semper memoriæ fidendum; sed rationis etiam ipsæ de novo in examen vocandæ sunt. Id quod præcipue usuvenit; cum in probabilibus solum versamur, vix enim ullus unquam certus esse poterit, se omnia rationum momenta tam probabilienda, quam infringenda opinionis probabilitate sufficiente expendisse.

C A P U T II.

D E

PROBATIONE, ET DEMONSTRATIONE.

CXCVI. Ideæ mediæ, quarum ope convenientia, aut repugnantia duarum idearum determinatur, veritatem *probare* dicuntur; igitur *probatio* generatim accepta est talis rationum idearum mediarum dispositio, ut ejus ope relatio, quam aliarum duarum idearum ad sese habent, reluceat. Enunciationes ex illis ideis mediis conformantur, quibus velut totidem fulcris om-

Quid probatio, ejusque principia

nis

COROLL. 3. Propositio evidens falsa esse nequit (§. 166.); cum igitur propositio demonstrata fiat evidens, ut ea falsa sit, absolute repugnat; ac proinde, si quidpiam, quod a nonnullis demonstratum dicitur, falsum esse subinde detegatur, ea demonstratio illegitima; atque ad paralogismos ableganda erit.

SCHOL. Duplici potissimum ex capite demonstratio illegitima evadit; vel enim vitium formæ quod quidem rarius contingit, in argumentando admittitur; vel quod longe frequentius est, propositioni dubiæ, precariæ, aut plane falsæ inter principia locus datur. Exempla ejus rei complura tam in veterum, quam recentiorum philosophia prostant, ut cum Wolfius Leibnitii insitens vestigiis, cumque eo alii plurimi ejusdem sectæ fautores demonstrant mundum hunc esse omnium possibilium absolute optimum; Dei, hominumque voluntatem in actionibus, quas sensus intimus liberas esse tastatur, egere ratione sufficiente externa; non dari posse neque per Dei omnipotentiam duo perfecte similia &c. quæ tamen omnia ab aliis solidissimis argumentis refutantur. Opera igitur danda est, ut nullis nisi certis, ac evidentibus principiis utamur; cavendum, ne ex majorum solum instituto, aut aliorum auctoritate, aut longissimi temporis usu axiomatibus adnumeremus ea, quæ vere in se talia non sunt; in constituendis definitionibus nominalibus ab usu vocabulorum recepto non recedendum, ipsaque rei possibilitas clare evincenda (§§. 86. cum schol. §. 87. schol.): in realibus vero solide comprobandis vires omnes impendendæ. Accidit tamen nonnumquam, ut principiis dubiis, aut etiam falsis uti tuto liceat, quando videlicet congregiendum nobis est cum determinato quodam adversario, qui ea in certis, ac evidentibus habet; tum vero Κατ' ἀντίρροπον argumentari di-

cimus; sic veteres Christiani ex libris Trismegisti, Sybillarumque oraculis potissimam partem suppositis idololatriam impugnarunt, quod ad ea veluti genuina, ac prope divina ipsi gentiles provocarunt.

Quota-
plex da-
monstra-
tio?

CXCVIII. Demonstratio est *a priori*, cum principia, ex quibus ea petitur, rem demonstrandam vel actu, vel saltem cogitatione nostra antecedunt; ut si *ex simplicitate anime humane ejus incorruptibilitatem demonstras. A posteriori* vero, cum principia rem demonstrandam consequuntur, qualis est demonstratio *Dei exsistentis ex rebus creatis*.

COROLL. 1. Causa ante effectum, & essentialia rei ante attributa, hæc ante reliqua, quæ rei conveniunt, concipiuntur: igitur omnis demonstratio ex his principiis ducta est *a priori*, quales sunt pure geometricæ, & complures metaphysicæ.

COROLL. 2. Demonstrationem a posteriori habebis, si ab effectu ad causam, vel ab attributis ad essentialia argumentaris, & universim, quoties per experientiam aliquid demonstras; nam experientia non nisi de effectibus datur (§. 193.).

Quid di-
recta?

CXCIX. Demonstratio dicitur *directa*, seu *ostensiva* cum ex ipsa idea subjecti evincitur eidem convenire, vel repugnare prædicatum; ut cum sic arguis: *ens necessarium est æternum; sed Deus est ens necessarium: ergo Deus est æternus*.

Quomo-
do con-
denda?

SCHOL. Demonstratione directam conditurus primo ideam distinctam, ac completam tam subjecti, quam prædicati, propositionis demonstrandæ animo informet, eamque per legitimam definitionem exprimat; tum eliciat inde axiomata, aut recepta alioquin, atque ad præsentem materiam accommodata, uti & pro-

propositiones, si quibusdam egeat, alias jam demonstratas conquirit: hæc denique omnia in polysyllogismum coordinet. Ita si demonstrandam habeas hanc propositionem: *anima humana est incorruptibilis*: secundum instructionem datam sic progredieris: *quod cogitat, est ens simplex* (propos. demonstr. suo loco); *Sed anima humana cogitat* (defin. animæ): *ergo anima humana est ens simplex*; *ens simplex non habet partes* (defin.); *sed anima humana est ens simplex* (conclus. præc.): *ergo anima humana non habet partes*; *quod non habet partes, non potest resolvi in partes* (axiom.); *sed anima humana non habet partes* (conclus. præc.): *ergo anima humana non potest resolvi in partes*: *quod non potest resolvi in partes, est incorruptibile* (defin. incorruptibilis); *sed anima humana non potest resolvi in partes* (conclus. præc.): *ergo anima humana est incorruptibilis, quod erat demonstrandum*.

CC. Demonstratio indirecta, sive apogogica, Quid indirecta, & quomodo condenda? vel deductio ad absurdum fit, cum contradictoria propositionis demonstrandæ interea ut vera assumitur, atque ex ea legitime argumentando conclusio denique manifeste absurda deducitur; sic sit demonstranda indirecte hæc propositio: *Deus est æternus*; primum ejus contradictoriam pone esse veram; *Deus non est æternus*; tum vide, quæ conclusiones ex hac legitime profluant; igitur *Deus non sit æternus*: *ergo non semper fuit*: *ergo habuit initium existendi*: *ergo est productus*: *ergo vel a se, vel ab alio*: utrumque vero est evidenter absurdum; nam si a se est productus, aliquando simul existit, & simul non existit, si ab alio: *Deus est creatura*.

CCI. Demonstratio indirecta invicte conficit An invicte? veritatem propositionis demonstrandæ; cum enim con-

conclusio falsa, & absurda legitime deducatur ex contradictoria propositionis demonstrandæ (§. præc.), necesse est, ut ea contradictoria sit falsa (§. 125. cor. 3. can. 2.); porro ex falsitate unius contradictoriæ certo infertur alterius veritas (§. 156. schol. l. 3. cql. 1.): igitur vi demonstrationis indirectæ modo prorsus non fallibili elucet veritas propositionis demonstrandæ.

Quod
utrius-
que di-
scrimen?

SCHOL. In eo tamen hæc demonstratio a præstantia directæ deficit, quod intellectum veritatis percipiendæ avidum non satis illuminet; neque enim ostendit, quare, aut quomodo res sit vera; sed solum falsam non esse irrefragabiliter evincit, atque adversarium eas in angustias conjicit, ut aut evidenter absurda admittere, aut veritatem pertinaciter adhuc negatam fateri cogatur. Atque inde est, quod ejusmodi demonstratione non facile utamur, ubi directæ in promptu est, aut illam cum hac consociemus, ut majus veritati pondus accedat; quando præsertim de rebus majoris momenti quæstio instituitur.

Quid cir-
culus in
demon-
strando?

CCII. *Circulus vitiosus*, vel *circulus in demonstrando* committitur, cum una propositio per alteram demonstratur, ita videlicet, ut una alterius principium agat, & vicissim; ut si quis ex spiritualitate animæ humanæ ejus immortalitatem, & deinde ex immortalitate ejusdem spiritualitatem demonstrare niteretur.

SCHOL. Cum demonstratio brevis est, hoc vitium facile in omnium oculos incurrit, atque inde grande periculum non est, ut illud præsertim ab eruditioribus committatur; at vero ubi longiori ratiocinio opus est; ubi quæstiones suis in locis separatæ pertractantur, persæpe contingit, ut viri etiam doctiores post multas demonstrationum ambages rursus eo redeant,

deant, unde primum exorsi sunt. Quot enim infallibilitatem sensus communis a summa Dei bonitate, veriloquio, ceterisque ejus perfectionibus deducunt, & tamen ubi deinde de ipsa Dei existentia demonstranda agitur, sensu communi tamquam infallibili veritatis argumento utuntur? qui Cartesium ab hoc vitio immunem pronunciet, cum primum ex idea clara, & distincta Deum existere; tum vero ex Dei existentis bonitate ideam claram, & distinctam fallere non posse demonstravit? sed hæc alias: nunc res tironum exigit, ut ea adferantur, quæ ad demonstrationes legitimas condendas scitu sunt necessaria, quæ quidem ejusmodi sunt (uti & ea, quæ adhuc a §. 198. de demonstratione nominatim diximus), ut nullo negotio, paucis solum mutatis, ad quamvis in genere probationem applicari possint.

Leges Demonstrationis.

1.) *Status quæstionis quam accuratissime determinetur*; secum enim in incerto omnis vagabitur oratio. Sapientissime Tullius. „ Omnis enim, quæ a ratione suscipitur de re aliqua institutio debet a definitione proficisci, ut intelligatur, quid sit, id, de quo disputeretur. “ Id vero obtinetur 1. accurata vocabulorum definitione; 2. divisione quæstionis prepositæ in suas partes, si quas habeat; 3. resecando ea, quæ aut certo falsa, aut certo vera, aut huc non pertinere, aut prorsus inutilia esse perspiciuntur; 4. his præstitis corrigendo quæstionem propositam, & simplicissimis, quantum fieri potest, terminis exprimendo; 5. subordinando, si plures remaneant, quæstionis partes, ita ut eæ præcedant, quarum demonstratio aliis evincendis inservit, singulæque seorsum, ac suo in ordine pertractentur. Proferamus exemplum

De off.
l. 1. c. 2.

Storchenau Log.

K

que-

queritur in metaphysica, *utrum anima humana sit immortalis*; definienda igitur primum *immortalitas*, quod sit perpetua non tantum existentia, sed etiam vitæ duratio, tum dividenda in *essentialem, naturalem, & gratuitam*. Jam ulterius examinando facile deprehendes, essentialem immortalitatem animæ humanæ certo non competere; nun vero mere gratuita eidem conveniat, ex sola Dei revelatione certo sciri posse: resecabis igitur has duas partes, illam, ut per se certam; hanc ut ad metaphysicam non pertinentem, ac quæstionem simplicissime sic enunciabis: *utrum anima humana spectatis suis proprietatibus naturalibus sit æternum existura & victura?* En statum quæstionis, in qua cum duæ adhuc partes remaneat, singulæ seorsum demonstrandæ erunt, & priori quidem loco *existentia perpetua*; tum denique *vita*, quæ absque illa esse non potest. Summi hæc lex momenti est, proptereaque altissime omnium mentibus infigenda, frequentissime enim solum ob ejus neglectiorem ad veritatem non pervenitur, litesque inanes longissimo tempore inter philosophos aluntur. Exemplo est quæstio illa Cartesianos inter, ac Peripateticos tanta animorum, laterumque contentione agitata: *num calor in igne sit, an in nobis* (vid. §. 83. schol. n. 3.).

2.) *Constituto quæstionis statu attente expendendam, quid fortassis ipsa in re jam nunc sit, atque ab eo inchoandum*; ut enim teste Tullio „Admirabilis quædam est continuatio, seriesque rerum, ut alia ex aliis nexa, & omnes inter se aptæ, colligatæque esse videantur:“ ita veritarum tam arcta est inter se colligatio, ut ex una, etsi prima fronte levissima videatur, complures gravioris momentis successive profluant; quare eorum, quæ in quæstione jam nota sunt, habitudo,

De nat.
Deor. I.
A. S. 4.

tudo, relatioque ad incognita diligentissime indaganda est. Præclare hanc in rem monet Cartesius: „Plurimum interest cogitationes nostras certo ordine promovere, incipiendo scilicet ab iis rebus, quæ cognitu nobis sunt faciliores, atque ex his paullatim, ac veluti per gradus ad difficiliorum, magisque abstrusarum investigationem progrediendo &c. &c.“

De mte.
q. h. n. t.

3.) In toto demonstrationis progressu eadem conservetur evidentia; tum enim solum propositio demonstranda evidentiam consequitur, qui tamen demonstrationis finis est (§. 197. cor. 2.), cum ea ex principiis evidentibus evidenter profluit; id quod fieri nequit, si, antequam ad ultimam conclusionem perveniat, evidentia filum rumpatur. Opera igitur danda, ut mens in quolibet passu, quem ratiocinando facit, simplici intuitu convenientiam, aut repugnantiam ideæ mediæ cum extremis pervideat, quin necesse sit ad novas semper, & novas ideas medias recurrere, ut ea palam fiat. Hoc qui negligunt, in errores gravissimos facile præcipites eunt; ubi enim evidentiam securissimum viæ comitem dimiserunt, tenebris involvuntur; & veritas quandoque detecta non tam industriæ, aut ingenio, quam casui fortuito debetur. Id periculi subeunt illi, (ut de iis taceam, qui falsas propositiones subrepere patiuntur) qui nimio verborum ornatu delectari, stiloque copioso, ac prope declamatorio uti solent; fit enim hac ratione, ut mens speciosis verborum phaleris distracta id, quod maxime deberet, non videat, ipsumque ei evidentia lumen prorsus dispareat. His illud Tullii dictum velim: „Omne, quod de re bona dilucide dicitur, mihi præclare dici videtur. Istiusmodi autem res dicere ornate velle, puerile est; plane autem, & perspicue

„ expedire posse, docti, & intelligentis vi-
ri. „

4.) *Demonstratio tentanda non est, ubi successus prudenter sperari nequit; secus enim oleum perdes, & operam.* Accidit id 1. cum quæstio resolvenda postulat scientias, in quibus quis versatus non est; sic actum agit, qui geometriæ expertus ad resolutionem astronomicorum, aut physicorum problematum aggreditur. 2. Cum desunt adjumenta, ac necessaria ratiocinandi principia, ut in rebus physicis, naturalique corporum constitutione investiganda nobis frequenter usuvenit. Atque inde non continuo in falsis habenda sunt, quæ demonstrari nequeunt, neque res ideo duntaxat negari potest, quod inodus, quo ea fiat, ignoretur; tenenda potius est in his, ac similibus decantata S. Augustini regula: *tene certum, dimitte incertum.* Quo & illud spectat, ut non exigatur major demonstrationis certitudo, ac evidentia, quam objectum, circa quod ea versatur, admittat; sic utique in rebus naturalibus non oportet certitudinem, ac evidentiam metaphysicam quærere, cum eæ res per naturam suam non sint nisi physicæ capaces. 3. Cum res pertractantur, quæ limitatæ humani intellectus vires excedunt, qualia sunt mysteria, a Deo nobis revelata, quæ propterea a nobis quidem infallibiliter credi possunt; sciri non possunt: quare insignis temeritatis reum se facit, qui in iis evidentiam, ac demonstrationem postulat. In his, ut rursum sapienter monet S. Augustinus: *tota ratio facti est potentia facientis*, tenendumque certissime, Deum efficere plus posse, quam nos brevi nostro intellectu assequi. Errant proinde gravissime profani illi, qui rationem humanam adequatam rerum credendarum regulam constituent, noluntque inter sacrosancta religionis mysteria locum concedere iis rebus, quas lumi-

mine solum naturali investigare, ac perspicere nequeunt.

CCIII. Polysyllogismus duplici modo constituitur (§. 144.): cum igitur in demonstratione potissimum polysyllogismus adhibeatur (§. 196. schol.), patet eam quoque duplici modo confieri posse.

Quot
modis fit
demon-
stratio?

SCHOL. Nimirum vel propositio demonstranda est conclusio primi syllogismi, ejusque præmissarum una fit conclusio sequentis, idque eo usque continuando, dum denique ad principia universalia, & per se evidentia perveniatur: vel ab opposito principia illa universalia primo loco collocantur, eaque fit progressio, ut semper conclusio præcedentis syllogismi fiat præmissa sequentis, donec tandem ipsa propositio demonstranda in conclusione ultimi syllogismi inferatur.

CCIV. Demonstratio primo modo confecta propositionem singularem, & compositam, cujus veritas quærit, resolvit in sua principia, ideoque *analytica*: altera ex principiis universalibus, & simplicissimis componendo descendit ad propositionem compositam, & specialem demonstrandam, ideoque *synthetica* appellatur.

Quid a-
nalytica,
& syn-
thetica?

SCHOL. Exemplum demonstrationis syntheticæ habes (§. 199. schol.), quam si inverso ordine legas, obtinebis analyticam. Ceterum res tota eleganter illustrari potest duobus illis mentis actibus, quorum unum abstractionem (§. 61.), alterum compositionem (§. 62.), compellavimus; sicut enim per abstractionem ab idea singulari ad universalem ascendimus, atque hac ratione ideam singularem in suas partiales, ex quibus ea coalescit, resolvimus; & sicut per compositionem vicissim ab idea universali ad singularem descendimus: ita cum

propositione hic circa veritates versamur, progrediendo nimirum a specialibus ad universales per analysin, & ab his per synthesein ad illas regrediendo.

Quid
metho-
dus,

CCV. Cum propositio demonstrata falsa esse nequeat. (§. 107. cor. 3.), demonstrationis ope & ad veritatem infallibiliter pervenimus, & eandem aliis patefacimus; omnis igitur legitima demonstratio artem cogitationes ita disponendi ut vel veritas latentes detegatur, vel inventa cum aliis communicetur, in se complectitur. Ars hac vulgo *methodus* nuncupatur.

Quo-
duplex?

COROLL. Qui caller artem demonstrandi, caller quoque methodum; cumque demonstratio sit vel analytica, vel synthetica (§. 204.), talis quoque est methodus.

Quis
utriusque
usus.

SCHOL. Cum veritatem nondum notam quaerimus, utimur methodo analytica; tum enim investiganda sunt principia evidētia, ex quibus propositio data legitime profluit. Cum vero veritatem jam a nobis inventam cum aliis communicamus, sive cum aliis docemus, synthetica fere in usu est, propterea quod principia universalia, & immediate evidētia nullo negotio a quovis intellectu perspiciuntur; quare dum ab his inchoamus, ac sensim ad veritatis magis compositas descendimus, id obtinemus, ut discentem a facilioribus successive ad difficiliora, a simplicibus ad magis composita, quasi per gradus ducamus, efficiamusque, ut iis ea facilitate, ac claritate, qua principiorum veritatem perspexit, specialem quoque illam veritatem, de qua agitur, intime pervideat. Sed facile patet descensum hunc debere esse omnino lentissimum, ut nimirum ex principio non inferatur, nisi id, quod primo loco, & immediate ex eo profluit; ita enim so-
lum

Iam conclusionis cujuslibet cum suo antecedente connexio, quanta fieri potest, evidentia vivacitate discentis mentem afficiet. Quid id in primis curis non habet, quique adeo ex principio assumpto ad conclusionem remotiorem omissis mediis veluti per saltum transvolat, nunquam consequetur, ut veritas tota sua luce auditoris intellectum perstringat. Multa sunt præterea, quæ de methodo a philosophis præcipiuntur, sed præcepta accumulare non placet; ego enim sic sentio, quæ præter ea, quæ adhuc de demonstratione condenda copiose dicta sunt, requiruntur, longiori usu, & exercitatione, tum assidua librorum scientificorum lectione, tum & præcipue quidem algebra, ac geometriæ studio & facillime, & solidissime, quin etiam unice condisci posse.

C A P U T III.

D E

PROBABILITATE, ET OPINIONE.

CCVI. Cum indicia veritati sufficientia non adsunt, aderunt vel insufficientia, vel nulla penitus: quin indicia sufficientia perspicit, *certus* est de veritate, qui insufficientia: *incertus* (§ 161.); qui nulla: eandem prorsus *ignorat*. Quis
certus,
incertus,
& igno-
rans?

COROLL. Incertitudo igitur est status mentis medius inter certitudinem, ac ignorantiam, atque iisdem extremis veluti limitibus circumscribitur.

SCHOL. Ignorantiam hic solum ut limitem incertitudinis considero, fusius de ea, ejusque causis agetur in capite 6to. Nonnullis hanc ignorantiam *dubium negativum*, atque illud,

de quo paullo post dicam, *positivum* compellere placet; at hi quidem in suo sensu abundant; neque enim ulli de vocabulo litem movebo: mihi interea, & vocum proprietati, & usui recepto hac nomenclatione magis consuli videtur; etenim licet in hoc casu adsit iudicii recentio, ea tamen propterea tantum necessario fit, quod, quid judicandum sit, ignoretur, & nemo profecto rogatus, quid de stellarum numero sentiat, an par sit, an impar? respondebit se de eo *dubitare*, sed potius quam promissime reponet, sed id *ignorare*?

Quæ incertitudinis divisiō?

CCVII. Indicia veritatis insufficientia sunt, quæ quandoque fallunt (§. 150.). iam vero attendenti clarum est, fieri posse, ut vel sæpius non fallant, quam fallant: vel ut ex æquo toties fallant, quam non fallant: vel denique ut sæpius fallant quam non fallant. Inde triplex oritur incertitudinis status, videlicet in primo casu *probabilis*; in altero *dubius*, in ultimo *improbabilis*.

COROLL. Probabilitas igitur intra certitudinem, & dubium concluditur; atque ad hoc ad illam usque crescit; improbabilitas vero intra dubium, ac ignorantiam continetur, ac pariter ab eo ad hanc continue augetur.

Quæ nuntiatio probabilis, dubia, & improbabilis?

CCIII. Ut certitudo ad ipsa iudicia, sive propositiones refertur, indeque objectiva compelli solet (§. 163.), ita nihil vetat, quin minus incertitudo quoque in iisdem spectetur; datur igitur propositio *in se*, vel *quoad se*, vel *objectiva incerta*, eaque vel est *probabilis*, cum videlicet pro ejus veritate adsunt indicia haud quidem sufficientia, attamen talia, quæ sæpius non fallunt, quam fallant, vel *dubia*, cum ejus indicia toties fallunt, quam non, si ve quod idem est, cum pro utraque contradi-

ctio.

tionis parte rationes pugnant æque graves; vel *improbabilis*; quando indicia sæpius fallunt, quam non.

CCIX. *Probabilitas cum veritate; improbabilitas cum falsitate propositionis confundi non debet.* Ad probabilitatem sufficit, ut ea adsint indicia, quæ sæpius non fallunt (§. præc.): inde vero nequaquam sequitur eadem indicia in præsentē hoc, ac determinato casu non fallere, quod tamen ad propositionis veritatem requiritur, ut per se patet. Vicissim improbabilitas oritur ex indiciis, quæ sæpius fallunt (§. cit.); rursus vero nullo modo necesse est, ut indicia, quæ quidem alias etiam sæpissime fallunt, in determinato hoc quoque casu fallant, quod tamen ad propositionis falsitatem desideratur, ut iterum notum est: aliud igitur est propositionem esse probabilem, aliud esse veram; & aliud propositionem esse improbabilem, aliud eam esse falsam, ac proinde etiam probabilitas cum veritate, & improbabilitas cum falsitate propositionis confundi non debet.

Quomodo probabilitas a veritate; improbabilitas a falsitate distinguitur?

COROLL. 1. Igitur etiam propositio probabilis potest quandoque esse falsa, & contra improbabilis vera; si nimirum ibi indicia actu fallant; hic actu non fallant.

COROLL. 2. Inde unquam propositioni probabili, ut veræ, adhærendum; neque improbabilis absolute ut falsa respondenda est.

CCX. *Probabilitas, ac improbabilitas admittunt gradus*; cum enim illa a dubio ad certitudinem; hæc a dubio ad ignorantiam usque constanter crescat (§. 207. cor.), evidens est, eo maiorem fore probabilitatem, vel improbabilitatem, quo magis ad certitudinem, vel ad ignorantiam acceditur; sed hoc est habere gradus: igitur probabilitas, ac improbabilitas certis gaudent gradibus.

An gradus in probabilitate, & improbabilitate?

COROLL. 1. Dantur ergo propositiones magis, aut minus probabiles, vel improbabiles.

COROLL. 2. Propositio, quæ minimum distat a certa, habet summum probabilitatis gradum.

COROLL. 3. Quo indicia rarius fallunt, eo magis accedunt ad ea, quæ nunquam fallunt, id est, ad sufficientia; igitur etiam in genere eo probabilior est propositio, quo rarius fallunt indicia, quæ pro ejus veritate pugnant.

COROLL. 4. Inde etiam ab opposito eo improbabiliior est propositio, quo frequentius ejus indicia fallunt; & supremus improbabilitatis gradus habetur, cum quis quam proxime abest ab ignorantia.

SCHOL. Quo plura, atque firmitiora adsunt veritatis indicia, eo etiam experientia teste rarius fallunt; hinc generatim, ut inter probabiliores haberi possit propositio, necesse est, ut vel plura, vel saltem in pari numero firmitiora habet indicia. Recte igitur facimus, dum, ubi ad certitudinem liquidam pervenire non datur, complura ad sententiam propositam stabilendam argumenta conglobamus, cum hac ratione majorem saltem illi probabilitatem conciliemus. Hujus rei exemplum Tullius nobis præbet tum sæpe alias, tum præcipue in præstantissima illa, quam pro Milone dixit, oratione, quas enim non rationes accumulatur, quibus probabilissime conficiat structas fuisse a Clodio Miloni insidias? Id tamen hac in re probe tenendum, non tantum numerum, quam argumentorum pondus attendi debere; non enim infrequens est, ut unicum argumentum tanti sit roboris, ut complura etiam in partem oppositam infringat: pone e. c. *Cajum eam plateam ea hora, qua Titius confusus est, cum gladio cæcuto percurrisse*, unum profecto adjunctum vii plurium argumentorum, quæ pro ejus innocentia adferri possent, infringet; sed tamen certitudinem non efficiet, cum fie-

ri potuisset, ut Cajus objectum ab homicida
essem apprehenderit. At vero quomodo hoc
argumentorum pondus, & firmitas rite diju-
dicari possit, leges quidem nonnullas ex cri-
ticorum arte desumtas paullo post adferam,
interea tamen fatendum est, habilitatem quam-
dam, & singularem mentis variis scientiis, &
præcipue quidem mathematicis, ac criticis ex-
cultæ sagacitatem, tum & cautissimam ad mi-
nima quævis adjuncta attentionem hac in re
ferre plurimum præstare. P. Buffier jam sæ-
pius a me laudatus hos veræ, magnæque pro-
babilitatis characteres statuit, quos nosse e re-
tironum erit. 1. Cum id, quod probabile ju-
dicamus, summam habet cum veritatibus aliis
evidentibus convenientiam. 2. Cum, etsi pri-
mum de propositionis cujusdam veritate du-
bitemus, ea tamen semper magis, magisque
nobis persuadetur, quo nimirum frequentius
super eam reflectimus, eamque accuratius exa-
minamus; 3. Cum experientiæ antehac igno-
ratæ superveniunt iis, ex quibus primum ju-
dicium tulimus. 4. Cum majori jam rerum,
quas examinamus, usu in dies comparato ju-
dicium formamus. 5. Cum judicia jam olim
de rebus ejusdem naturæ lata labente tempore
vera esse deprehenduntur, quibus addi potest.
6. Cum rationes, ex quibus aliquid probabile
judicamus, valde propinquam cum principiis
cujuslibet disciplinæ propriis connexionem ha-
bere videntur. Hæc de probabilitate. Quod ad
improbabilitatem attinet, supremus ejus gra-
dus est nuda rei possibilitas; si enim stricte
loquamur, gradus hic differt ab ignorantia
plana, quæ & ipsam hanc possibilitatem in-
certam ponit; interea tamen gradus hic exi-
git adeo momenti est, ut in praxi sola possi-
bilitatis cognitio, cum de probabilitate, aut
improbabilitate agitur, cum ignorantia com-
paretur. Illud etiam hic monendum est, quan-

doque in sensu latiori probabilitatem tribui
omni propositioni, quæ nec certitudinem at-
tingit, nec etiam prorsus a nobis ignoratur:
quo in casu probabilitas hæc latissime acce-
pta ab ignorantia ad certitudinem usque cre-
scit, ejusque infimus gradus, omnique assi-
gnabili minor, a quo ea initium ducit, est
ipsa rei possibilitas, cum ante omnia con-
stare debeat rem esse possibilem; ut tamen
discrimen quoddam habeatur, quando a du-
bio ad certitudinem ascenditur, vocant pro-
positionem *verisimilem*, quod ea jam magis
ad veritatem, quam ad falsitatem accedere
videatur. Sed quidquid de hoc sit, cavendum
est universim quam maxime, ne propositio-
nem solum possibilem, inter probabiles re-
ponamus, cum fieri possit, ut ea sit possi-
bilis, etsi ejus indicia semper fallerent.

Quomo-
do defi-
niendi?

CCXI. Gradus probabilitatis in casu specia-
li definitur, si determinetur, quoties posito cer-
to casuum numero, indicia, quæ adsunt, non
fallant; cum enim eo major sit probabilitas,
quo rarius fallunt indicia (S. præc. cor. 3.) :
eo magis crescet probabilitas, sive quod idem
est, eo altior erit probabilitatis gradus, quo
plures sunt in determinato numero casus, in qui-
bus illa indicia non fallunt: si ex centum obser-
vationibus mihi constaret, rubedini cæli nocturna-
nonagesies successisse serenam alterius diei tem-
pestatem, major foret probabilitas, quam si id
octogesies tantum intra easdem certum observa-
tiones contigisset; si quidem in priori intra cen-
tum casus decies tantum, in posteriori vero in-
tra centum vigesies illud indicium, fefellisset.

COROLL. Universim igitur hæc proportio ob-
tinet: probabilitas est ad certitudinem, ut
numerus casuum, in quibus indicia non fal-
lunt, ad numerum casuum omnium; itaque
supe-

superius primo loco erit probabilitas ad certitudinem, sicut nonaginta ad certum, sive ut novem ad decem, ut norunt arithmetici; in altero: probabilitas ad certitudinem, ut octoginta ad centum; sive ut octo ad decem.

SCHOL. Nimirum cum incertitudo (§. 206. cor.), sive probabilitas in tota sua latitudine accepta (schol. præc. fin.) concludatur inter ignorantiam, & certitudinem, totum illud spatium conficiendum est, ut ab ignorantia ad certitudinem perveniat, & quo plures ex illo spatio confecerimus, eo propius ad certitudinem accedemus. Dum igitur probabilitatis gradum determinamus, assignamus partes in illo spatio confectas, quæ quo plures fuerint, eo major erit probabilitatis gradus; erunt autem eo plures, quo plures sunt casus in determinato numero, in quibus indicia non fallunt; si namque indicia nullo in casu fallerent, haberetur certitudo (§. 160.), sive totum illud spatium esset confectum: igitur tot gradibus ab ea receditur, quot sunt casus, in quibus indicia fallunt, & tantum, sive tot gradibus vicissim ad eam acceditur, quantus est numerus casuum, in quibus ea indicia non fallunt. Unde patet, quemlibet probabilitatis gradum exprimi posse per fractionem, cujus numerator denotet numerum casuum, in quibus indicia non fallunt, denominator vero numerum casuum assumptorum; utimur vero facilioris calculi causa fractionibus decimalibus, ad quas aliæ facile reduci possunt, ut in arithmetica docetur. Si igitur totum hoc, sive ipsam certitudinem pro unitate assumptam secemus in decem partes, has obtrinebimus fractiones: $\frac{10}{10}, \frac{9}{10}, \frac{8}{10}, \frac{7}{10}, \frac{6}{10}, \frac{5}{10}, \frac{4}{10}, \frac{3}{10}, \frac{2}{10}, \frac{1}{10}$. In hac serie prima fractio, quæ integræ unitati æquivalet, denotabit certitudinem; ultima ignorantiam; secunda vero, tertia, quarta, quin-

quinta *diversos probabilis gradus* exhibebunt; tum sexta fractio exprimet *dubium*; reliquæ vero, nempe septima, octava, nona, decima *gradus improbabilitatis varios* designabunt. Pater vero ex his etiam, ad hoc, ut propositio vero sensu sit probabilis, necesse esse, ut numerator fractionis sit major dimidio denominatore; quodsi idem numerator æquetur dimidio denominatori, indicia toties fallunt, quam non fallunt, quo casu propositio est dubia (§. 208.), adeoque dimidiata certitudo caussat *dubium*: ubi denique numerator a dimidio denominatore superatur, ultra *dubium* ad improbabilitatem devenitur: quæ eo magis crescit, quo magis idem numerator minuitur, dumque is fit æqualis Zero, ipsa etiam improbabilitas expirat, ejusque in locum ignorantia succedit.

*A priori,
vel po-
steriori?*

CCXII. Casus, in quibus indicia non fallunt, determinari possunt vel *a posteriori*, per inductionem videlicet casuum similium, qui per experientiam hucusque cogniti sunt; ut si decies *flante austro octies secuta est pluvia*; erit nunc *probabilitas pluvie supervenientis eodem spirante*, sicut $\frac{8}{11}$. Vel *a priori*, ex dispositione, & præparatione caussatum, ex quibus pronissimum est effectum in data casuum serie sequi, vel non sequi.

SCHOL. Cum de probabilitate eventuum futurorum agitur in errorem admodum proclives sumus, & res est periculi plena; interea tamen in usibus vitæ quoridianis necessitate quadam frequenter adigimur, ut de eventibus quoque futuris iudicium feramus, pendetque nonnumquam ab eo majus lucrum obtinendum, aut contra damnum evitandum. Eam in rem hæc ferre sunt, quæ a criticis præcipiuntur, solentque compellari

Le.

Leges Contingentium.

1.) *Dispiciantur, accurateque examinentur omnia adjuncta, quæ effectus existentiam præcedere solent, etenim ex iis solum prudenter judicari potest, cum effectus futurus sit, an non: „ omnis opinabilis divinatio conjectura nititur, ultra quam progredi non potest. „ Ea fallit fortasse nonnumquam; sed tamen ad veritatem sæpissime dirigit. Est enim ab omni æternitate repetita; in qua cum pæne innumerabiles res eodem modo eveniant, iisdem signis antegressis, ars est effectus eadem sæpe animavertendo, atque notando.* Cic. de div. cap. 14

2.) *Quod in certis adjunctis semper accidit, habendum est pro moraliter certo; quod nunquam: pro moraliter impossibili; quod vero quandoque evenit, quandoque non, prorsus contingens est, ejusque probabilitas determinatur per accuratum casuum, quam plurimorum examen (§. 211.); sic deprehendimus admodum probabilem esse crastinæ tempestatis serenitatem posita hodiæ serotina celi rubedine, quia hoc signum potissimum non fallit. Patet vero exinde, probabilitatem futuris eventus non infringi per hoc, quod quandoque contrarium acciderit, ac proinde etiam attentio habenda non est ad unum vel alterum casum præteritum: sic probabilitas jactus aleæ, si qua est, non mutatur ex noto jactu precedente: quoti tamen homines sunt, qui ad similia attendentes ita secum ratiocinantur: hoc contigit: ergo nunc non contiget; & alii ab opposito dum negotium quodpiam successu caruit, illud, aut simile quid rursum aggredi recusant ita inferentes: hoc nuper contigit: igitur nunc iterum contiget. Probe igitur, universimque tenendum argumentum probabile.*

bile per exceptionem casus particularis non infringi: si quis mihi asserenti, *hodie pluviam esse futuram*, propterea quod *mane celum rubuit*, contradicat, assertique mei veritatem impugnent ex eo, quod *heri eundem celi ruborem pluvia secuta non sit*, nã is insignem imperitiam malam faciet, cum enim ego id probabiliter solum affirmem, necesse utique non est, ut nullus detur casus, in quo contrarium accidit, sed id tantummodo requiritur, ut ii longe pauciores sint: hinc contradicentis munus erit ostendere, plures longe esse casus, in quibus hoc indicium sefellerit.

3.) *Contingentia non procedunt equaliter*, id est: adjuncta, caussæque similiter comparatæ ad plures diversosque effectus, modo hunc, modo illum producant; nam cum in ejusmodi caussa nulla detur necessaria determinatio ad certum effectum, æqualis est, ut ita dicam, determinabilitas, & consequenter etiam spes ad quemlibet effectum; sic cum *alea in se equaliter sit comparata ad quemlibet ex sex numeris exhibendum*, videmus etiam ejus *jectu modo hunc, modo illum obtineri*. Atque hinc quod potest ex æque fieri, aut non fieri, in innumeris adjunctis, & occasionibus aliquando fit, aliquando non fit. Ex hac regula ostenditur, nullo modo probabile esse, ut omnes homines contingentem in unum, eundemque errorem conspirent.

4.) *Quando in causis ad plures effectus habetur equalis dispositio, probabilitas pro effectu determinato est sicut unitas ad numerum reliquorum effectuum possibilium*; cum enim contingentiam equaliter non procedant, nullum effectus habet determinationem, ut præ altero frequentius sequatur: sic cum *factus aleæ sit equaliter comparatus ad omnes sex numeros*, erit probabilitas pro uno aliquo determinato sicut *unum ad sex*, hoc est, fere nulla, & me-

& mera solum possibilitas; unde eorum patet dementia, qui aleæ, aliisque id genus lusibus lucrî; adeo incerti spe impulsî, at simul cum ingenti jacturæ bonorum periculo operam dant.

§. 5.) Quando causa ad plures effectus est equaliter comparata, tanto major est unius effectus præ altero probabilitas, quo sapius dispositiones ad eundem effectum recurrunt; ponamus Cajum æque comparatum ad verba contumeliosa, mendacia, blasphemata proferenda, certe tanto probabilius est, eum frequentius contumeliosis, aut mendacibus usurum præ blasphemis, quo sapius eorum occasiones sese offerunt; sic quoque cum habentur duæ aleæ perfecte æquales, etsi quoad se probabilitas ad quemlibet numerum determinatum ex duodecim demta unitate sit, sicut unum ad undecim, tamen major est probabilitas de iis numeris obtinendis, quorum dispositiones sapius redeunt intra seriem casuum possibilium, ut sunt numeri 6. 7. 8. quorum dispositiones sex; deinde numeri 4. 5. 9. 10. quorum dispositiones bis recurrunt, quia nempe numerus 6. constituitur per 3. + 3, 5. + 1, 4. 2. : numerus 7. per 6. + 1, 5. + 2, 4. + 3. numerus 8. per 4. + 4, 6. + 2, 5. + 3. Numerus vero 4. tantum constituitur per 2. + 2, & 3. + 1. numerus 5. per 4. + 1, & 3. + 2. Numerus 9. per 6. + 3, & 5. + 4. numerus 10. per 5. + 5, & 6. + 4. hinc minima respective in hoc casu probabilitas est pro numeris 2. 3. 11. 12. cum eorum dispositiones necessariæ semel tantum recurrant; nam numerus 2. tantum consurgit ex 1. + 1. numerus 3. ex 2. + 1. numerus 11. ex 5. + 6. & numerus 12. ex 6. + 6.

§. 6.) Denique improbabile censendum est fore, ut eventus contingat, vis in adjunctis, quibus positis alias rarissimo accidere solet; indicium

eum enim, quod fere semper fallit, nullam parit probabilitatem: sic metus, fulminis im-
probabilis est, cum fortassis ex 200000 homi-
 num saepe vix unus fulmine tactus pereat. Er-
 ror hinc eorum corrigi potest, qui in vales-
 tudine sua curanda nimis morosi, & cauti
 sunt, & nescio quas possibles sibi infirmitates
 imaginantur; angores quidem hi boni sunt,
 quam diu hominem in officiis vitae Christianae
 continent, sed ubi ulterius progrediuntur, in-
 gentibus saepe malis, quia & dementiae origi-
 nem praebent.

Quando
 probabi-
 litas ex-
 spirat?

CCXIII. *Probabilitas propositionis prorsus ex-
 spirat, ut primum ejusdem veritas vel fal-
 sitas certe detegitur*; cum enim indicia suffi-
 cientia, vel nulla adesse cognoscuntur, in-
 sufficientibus amplius locus non est, atque
 adeo omnis quoque incertitudo, ac probabili-
 litas, quae ex his oritur (§§. 206. 207.); ex-
 sulare debet. Et aliunde, cum probabilis non
 dicatur propositio nisi, quatenus ponuntur e-
 jus indicia nunc non fallere, propterea quod
 constat ea frequentius non fefellisse, ea illi-
 co suam probabilitatem amittit, quod hac
 hypothesis amplius fieri nequit; sed id con-
 tingit; cum veritas vel falsitas certo deprehen-
 ditur; tum enim patet ea indicia vel actu non
 fallere, vel actu fallere: quod vero constat
 vel certo esse, vel certo non esse illud sup-
 poni non potest; nam *presumptio cedit verita-
 ti*, ut habet notum in jure axiomata; sic eva-
 nuit probabilitas utriusque hujus propositionis,
dantur antipodes, non dantur antipodes, post-
 quam per experientiam certam illius veritas,
 hujus falsitas detecta fuit.

COROLL. I. Cum ex veritate unius contradi-
 ctoriae legitime inferatur falsitas alterius (§.
 156. schol. l. 3. cor.), & vicissim, detecta
 unius contradictoriae veritate, aut falsitate
 ces-

cessat omnis alterius contradictoriae probabilitas.

COROLL. 2. Quidquid igitur sententiae certae opponitur, nullam habet probabilitatem, atque adeo ea impugnari cum ratione non potest; sic cum certa sit naturalis animae humanae immortalitas, vana sunt deliramenta, quaecumque ab hominibus profanis contra accumulatur.

CCXIV. Propositiones contradictoriae absolute, & secundum se spectatae possunt simul esse probabiles; at si ea inter se conferantur, comparatione instituta maior unius partis probabilitas minuitur; minor vero alterius partis probabilitas deficit degenerando ad improbabilitatem. Etenim primo negari haud potest, fieri posse, ut utraque contradictionis pars, quam diu seorsum, & secundum se spectatur, polleat iis indiciis, quae saepius non fallunt; secus enim nulla unquam posse dari propositio dubia (§. 208.); cum agitur de homicidio a Cajo parato, dari utique possunt & pro culpa, & pro innocentia Caji ejusmodi indicia; sed id, nec quidpiam amplius ad absolutam utriusque partis probabilitatem requiritur (§. cit.); ergo in aperto est, quod primo loco propositum fuit. Deinde vero in utriusque collatione minui probabilitatem majorem unius per probabilitatem minorem alterius sic ostendo. Probabilitas pro utraque contradictionis parte aequalis in comparatione sese mutuo destruit; oritur enim dubium (§§. 207. & 208.), in quo probabilitas exspirat (§. 207. cor.). ergo etiam probabilitas minor in comparatione saltem aequalem sibi partem in probabilitate majori destruit, atque adeo illi solum relinquuntur gradus, quibus ea ab hac antea excedebatur; sed hoc ipso minuitur probabilitas major: ergo; quod

arati

erat alterum. Sit pro culpa Caji probabilitas sicut novem ad decem; seu $\frac{9}{10}$ quæ nimirum uno gradu a certitudine deficiat; sit quoque pro innocentia Caji probabilitas sicut octo ad decem; sive $\frac{8}{10}$ quæ duobus gradibus distet a certitudine: erit illa quatuor graduum; hæc trium supra dubium: cum igitur inter se conferuntur, tres gradus hujus elident tres gradus alterius, atque adeo remanebit unicus, & probabilitas respectiva pro culpa Caji erit sicut sex ad decem, $\frac{6}{10}$; distans jam a certitudine quatuor gradibus. Denique probabilitatem minorem prorsus evanescere, atque ad improbabilitatem degenerare, quod tertium est, hæc fit ratione manifestum: probabilitas major ea sui parte qua minori æquatur, eam jam prorsus elidit, quasi detrudit ad locum dubii; nam si esset æqualis alteri, foret dubium (§. 107.); igitur ea parte, qua minorem excedit, ipsam infra dubium deprimit; sed infra dubium jam habetur improbabilitas (§. 207. cor.): ergo in hac collisione minor probabilitas ad improbabilitatem degenerat. Sic in superiori exemplo cum probabilitas major sit quatuor graduum, minor trium; tribus gradibus illius tres gradus hujus elidentur, sicque probabilitate minore expirante succedet dubium; sed remanet adhuc unus gradus probabilitatis majoris, qui cum etiam agat in partem oppositam, uno gradu infra dubium detruget probabilitatem minorem, erit adeo probabilitas respectiva pro innocentia Caji, sicut quatuor ad decem, $\frac{4}{10}$ distans a certitudine sex gradibus, quæ fractio jam exprimit improbabilitatem (§. 211. schol.).

COROLL. Cum probabilitas minor in concursu cum majore pereat, palam est, actiones nostras secundum eam, quæ majore probabilitate gaudet, partem moderandas esse; qui enim sequeretur minus probabilem, sequeretur sibi improbabilem, atque adeo imprudenter ageret.

SCHOL. Hæc probabilizatis diminutio universim hac ratione detegitur. Determinetur primum absoluta probabilitas utriusque partis in fractionibus ejusdem denominatoris, vel ad eundem reducantur; tum distantia a certitudine, id est, defectus numeratoris a denominatore unius fractionis addatur numeratori alterius fractionis, & vicissim; denique denominatores sibi invicem addantur: fractiones, quæ inde orientur, determinabunt probabilitatem, quæ propositionibus post institutam comparationem convenit. Sic probabilitas absoluta Cajum commisisse homicidium $= \frac{7}{10}$, & probabilitas pariter absoluta, Cajum non commisisse homicidium $= \frac{8}{10}$ (si etiam hæc esset $= \frac{9}{10}$, foret dubium, adeoque nulla pro utraque parte probabilitas: assumo igitur maximam, quam fieri potest, probabilitatem pro contradictoria, ut si ista transeat ad improbabilitatem, evidenter pateat omnes reliquas, cum minores sint, in simili casu quoque transituras.) Jam defectus numeratoris a denominatore in prima fractione est $= 1.$, & in altera $= 2.$; addantur ergo vicissim hi defectus, ac denominatoribus additis, prodibunt fractiones quæ $\frac{11}{10}$ & $\frac{9}{10}$, expriment probabilitatem ex collisione per comparationem facta residuam; erit nempe probabilitas affirmativæ, seu pro culpa Caji $= \frac{11}{10}$ uno solum gradu distans a dubio, adeoque octo gradibus imminuta, tot nempe, quot prius ha-

habuerat probabilitas minor: & probabilitas negativæ, si ve pro innocentia Caji erit $= \frac{9}{10}$

uno gradu depressa infra dubium, quo videlicet antea a majore probabilitate superabatur, ac consequenter vera improbabilitas. Ratio totius operationis hæc est: cum indicia, quæ pugnant pro affirmativa propositione intra decem casus sæmel fallant, casus utique iste favebit sententiæ negativæ; & ab opposito duo casus, in quibus rursus intra decem casus fallunt indicia, quæ pugnant pro negativa, favebunt affirmativæ: hinc indicia pro affirmativa spectari possunt, ac si intra viginti casus undecies non fallant, & indicia pro negativa, ac si intra eosdem viginti casus novies non fallant; cum enim pro duabus propositionibus contradictoriis adferuntur indicia seorsum probabilia, ut $\frac{9}{10}$ & $\frac{8}{10}$

tum pro dijudicanda absoluta veritate proponuntur intellectui viginti casus, videlicet decem casus ex parte affirmativæ, & decem alii diversi ex parte negativæ: pro affirmativa pugnant novem casus ex prioribus decem casibus, & duo ex posterioribus decem casibus; nam cum in posterioribus decem casibus indicia dicantur octies non fallere, bis autem fallere, affirmativa debet intra hoc decem posteriores casus bis vera esse. Igitur ex viginti casibus novem, & duo, id est, undecim pugnabunt pro veritate propositionis affirmativæ, & residui, qui tantum novem esse possunt, stabunt pro veritate negativæ. Id tamen in hac comparatione instituenda notandum, eam fieri haud posse, nisi indicia utriusque partis ejusdem sint rationis, nimirum vel omnia ex ratione, vel omnia ex auctoritate petita; sed de his in sequentibus.

CCXV. Si in legitimo ratiocinio una pars antecedentis sit tantum probabilis, altera certe, etiam consequens erit solum probabilis; cum enim consequens includatur in antecedente, atque propter illud verum sit (§. 125. & cor. 3.), fieri nequit, ut consequens majori firmitate polleat, quam totum antecedens; sed in hoc casu totum antecedenti non convenit certitudo: ergo neque consequenti ea competere potest; restat igitur, ut illud sit probabile. Et alioquin, quando absolute certum non est duo convenire cum uno tertio, nec certum esse potest ea inter se convenire.

Quando
confe-
tians in
ratioci-
nio pro-
babile.

COROLL. 1. Igitur etiam in syllogismo, si una præmissarum sit probabilis, conclusio quoque talis erit.

COROLL. 2. Si in polysyllogismum, quo demonstratio conficitur, irrepat vel una propositio solum probabilis, ea vim omnem, ac robur amittit, atque in probationem simpliciter probabilem degenerat (§. 197.).

SCHOL. Eadem rationis conclusione conficitur, gradum probabilitatis in consequente fore plane eundem, qui fuit in una antecedentis parte.

CCXVI. Si in legitimo ratiocinio utraque pars antecedentis sit probabilis, probabilitas consequentis erit tanta, quanta est probabilitas unius partis diminuta per fallibilitatem, alterius partis; consequens enim participat de fallibilitate utriusque partis; nam si jam consequens est probabile, etsi una antecedentis pars sit certa (§. præc.), utique existente utraque parte antecedentis tantum probabili probabilitas conclusionis minuetur; atqui utriusque partis fallibilitas obtinetur, cum probabilitas unius per fallibilitatem alterius minuitur: ergo consequenti convenit pro-

probabilitas unius partis diminuta per fallibilitatem alterius. *Sit probabilitas unius partis* $= \frac{9}{10}$ *erit fallibilitas illius, sive distantia a certitudine* $= 1$. *fit alterius partis probabilitas* $= \frac{8}{10}$ *erit fallibilitas illius* $= 2$. *Et probabilitas unius imminuta per fallibilitatem alterius erit* $= \frac{7}{10}$, *cujus fallibilitas est* $= 3$; *est vero etiam summa fallibilitatum utriusque partis in antecedente* $= 3$. *Igitur si consequens participet, ut fieri debet, fallibilitatem utriusque partium, ejus probabilitas erit* $= \frac{7}{10}$.

COROLL. 1. Igitur etiam in syllogismo, conclusio ex duabus præmissis probabilibus deducta, habet probabilitatem unius imminutam per fallibilitatem alterius, sive quod idem est, fallibilitas, vel distantia a certitudine ejusmodi conclusionis æquatur summa fallibilitatum, sive distantiarum a certitudine utriusque præmissæ.

COROLL. 2. Quia hæc fallibilitatum summa facile major evadit, ut ex inductione casuum singularium patet, talis conclusio frequentius amittit suam probabilitatem, atque vel dubia, vel prorsus improbabilis evadit.

Quando
probabi-
litate
uten-
dum?

SCHOL. Probabilitas supplet defectum veritatis, quam in rebus quamplurimis etiam optimo facultatum naturalium usu detegere non possumus; ubi enim mens nostra veritatem non assequitur, attingit ea nonnumquam magnam verisimilitudinem, atque ibidem, velut in loco veritati maxime vicino, interea conquiescit. Ut vero probabilitate utiliter utatur, hæc sibi tiro servanda sciat.

1.) In rebus pure *theoreticis* fere retinendum

dum est iudicium, nisi probabilitas quam maxima appareat; cum enim propositio quantumquemque probabilis possit esse falsa (§. 209. cor.), neque ulla nos in his casibus ad iudicandum necessitas impellat, sana ratio, ac prudentia suadet abstinendum esse iudicio, quo erroris periculum evitetur (conf. §. 93. schol.). Si tamen naturali ad iudicandum propensione satisfacere quis velit, circa id, quod evidens, non vero circa id, quod obscurum est, eam exerceat; iudicet nimirum sententiam esse probabilem, non autem eandem esse veram.

2.) In rebus vero *practicis*, cum necessitas agendi, vel non agendi incumbit, probabilioribus cogimur esse contenti, ut veris; nam relate ad praxim necesse est, ut agamus; qui indeterminatus hæsiteret, numquam ageret, quod perniciosissimum foret. Cum deliberamus, nulla cura nimia est; discutienda sunt omnia, ob quæ propositio ad veritatem, & ob quæ eadem ad falsitatem accedere videatur; ipsa rationum momenta accurate ponderanda; examini subijciendi omnes casus possibiles, in quibus indicia fallunt, aut non fallunt; at vero, ubi determinatio denique facta est, necesse est, ut relate ad actionem animum obfirmemus, ipsamque propositionem, ut veram, intueamur, aversis etiam mentis nostræ oculis ab iis, quæ pro ejus falsitate pugnare viderentur. Id qui renuit, in vitium inconstantiae, & timiditatis incidit: qui genuinus debilis, ignavæque mentis character est. Profecto in miserrimo statu versaretur ille, qui probabilitate major haud contentus, scientiam in omnibus, ac demonstrationem quæreret; qui enim manducare noller, nisi ubi demonstrative cognovit cibum hunc esse ad se nutriendum sine nocumento aptum, qui negotia sua tamdiu differret, do-

nec de felici eorum successu evidenter convincatur, quid haberet reliqui, nisi ut in quiete sua propemodum computrescat, ac brevis-
simum intra tempus pereat.

3.) Denique cum probabilitas fere omnis pendeat ex inductione casuum similium, aut ex legibus contingentium; raro autem constare possit, an sufficiens ejusmodi inductio facta sit, vel utrum omnia adjuncta ad eventum concurrentia satis expenderit, patet, modestè semper & sentiendum, & loquendum esse, ne nobis ipsis plus, quam oporteat, tribuisse videamur.

Quid
probabi-
litas in-
terna &
externa?

CCVII. Indicia, quæ propositionem probabilem efficiunt, vel ipsi rei, id est, subiecto, & prædicato insunt, vel non: illa ratione, hæc ab auctoritate petuntur. In casu priori probabilitas est interna, in posteriori externa.

Quando
literaria
atten-
denda?

SCHOL. In disciplinis, quæ probabilitatis internæ capaces sunt, probabilitas externa in doctorum auctoritate fundata non attenditur; neque rationi addita auctoritas probabilitatis gradum auget, quamvis ratio addita rationi id præstet, uti & auctoritas addita auctoritati externam probabilitatem majorem efficit. Ubi ergo negotium agitur probabilitatis internæ, sollicitè circumspicere, quot auctores pro hac sententia steterint necesse non est; ingens namque etiam eorum numerus majus non habebit pondus, quam ipsa sit ratio, qua impulsus in eam convenerunt opinionem: ea proinde magno studio investiganda erit. Id tamen quandoque illis præsertim, qui rationi internæ indagandæ non satis idonei sunt, usuvenit, ut prudenter præsumere possint, auctores, virosque doctos numquam tanto numero in unam abituros fuisse sententiam, nisi

nisi graves pro ea rationes perspexissent .
quo casu eam quoque amplecti licebit ,
non tam propter doctorum auctoritatem ,
quam propter rationem internam , quam
ipsos pervidisse prudens persuadet præsump-
tio . Hæc de probabilitate generatim ; qui
plura desiderat , adeat *prin. art. crit. Eu-*
sebii Amort , vel *J. s. Gravesande introd.*
ad phil. l. 2. p. 1. c. 17.

CCXVIII. *Opinio* latissime sumpta notat Quid
opinio
& judi-
cium o-
pinati-
vum ?
quamvis cognitionem incertam , oriundam ra-
men ex rationibus internis ; proprie vero est
cognitio interne probabilis (§. præc.) , judi-
ciumque dependenter ab ea formatum voca-
tur *opinativum* ; is namque *opinari* dicitur ,
qui propositioni interne probabili assensum
præstat , ut si quis cum Pythagoræis judicet
lunam inhabitari .

COROLL. 1. *Opinio* igitur late accepta potest Quod sit
scrimen
inter ju-
dicium
scientificum,
&
opinati-
vum ?
esse vel probabilis , vel dubia , vel impro-
babilis .

COROLL. 2. Cum propositio probabilis possit
esse falsa (§. 209 cor. 1.) , *judicium*
opinativum nunquam ita firmum est , ut
prudentem de latente falsitate metum ex-
cludat , in quo a *judicio certo* , aut a
scientifico præter evidentiam (§. 188.) dif-
fert .

C A P U T IV.

D E

F I D E .

Quid fi-
des, ac
judicium
fidel?

CCXIX. *Fides* est cognitio ex loquentis auctoritate obtenta, assensusque ob hoc motivum propositioni cuidam præstitus, *judicium fidei*; vel etiam frequenter *fides*; ipse vero, qui ita assentitur, *credere* dicitur: sic credimus a *Cæsar* Gallos devictos esse; *Ciceronem* consulatum gessisse.

Quotu-
plex fi-
des?

COROLL. Cum auctoritas Dei sit, & hominum (§. 179.), patet fidem quoque vel *divinam*, vel *humanam* esse.

Quotu-
plex fi-
des hu-
mana?

CCXX. Auctoritas humana vel sufficienter comprobatur, vel non, si primum; *fides humana* est *moraliter certa* (§. 183.); si alterum: *incerta*, atque vel *probabilis*, vel *dubia*, vel *improbabilis* (conf. §. 207.).

COROLL. 1. *Fides* igitur probabilis est assensus præstitus propositioni extrinsece probabili (§. 217.).

COROLL. 2. Hinc, quæ supra de probabilitate in genere dicta sunt, huc quoque applicari debent.

SCHOL. De fide probabili hic solum agam; eam enim, quæ certitudine morali pollet, fusius supra exposui (§. 183. &c.). De fide quoque divina: quantum ad logicam pertinet, actum est (§. 181.): reliqua ad theologiam naturalem referri debent.

CCXXI.

CCXXI. Referri possunt vel ea, quæ ad scientias pertinent, vel quæ fiunt, aut facta sunt; in iis auctoritatem non attendimus (§. 217. schol.): igitur fides locum duntaxat habet in rebus *facti* & sive *historicis*, vel, ut ajunt, in *credibilibus*. Quod ejus ob-
jectum?

COROLL. Facta, quæ eveniunt, singularia sunt (§. 59. schol.): ergo fides est de rebus singularibus, ac proinde universalia non *credimus*; sed vel *scimus*, vel *opinamur*.

CCXXII. *Testis* hoc loco est omnis ille, qui nobis aliquod factum seu ore, seu scripto refert, estque *idoneus*, cum habet auctoritatem, cui fides merito adhiberi possit. Quid te-
sti ido-
neus?

COROLL. 1. Quilibet historię scriptor testis nomine venit.

COROLL. 2. Cum auctoritas testantis per scientiam, & veriloquium constituatur (§. 108.), testis idoneus est, qui, quod narrat, scit, & ut scit, narrat, id est, qui rei notitia, & veri dicendi voluntate præditus est.

COROLL. 3. Antequam narrationi fidem habeamus, sollicitè indagandum est, num ea a teste idoneo proficiscatur.

SCHOL. Per se vero patet, requiri præterea, ut testimonium sit clarum, sive ut testis clare, & intelligenter loquatur; qui enim vel probabiliter mihi quidpiam persuadeat auctoritas, si loquentis sensa non assequar? Quare magnopere necesse est, ut tam testis ipse, quam qui ejus relationem excipit, vocabulorum abusus (§§. 82. & seqq.) relatos omni cura evitare studeat.

Quando veritas ve-
ritas? CCXXIII. *Quivis testis habendus est ve-*
ritas, dum contrarium probetur; ex lege enim
 quandam in ipso naturæ sensus fundata nemo
 præsumendus est: malus esse; nisi (id satis com-
 monstrari possit; jam vero, qui verax non
 est, sive, qui deliberato consilio contra men-
 tem, ac propria sensa loquitur, cum id sine
 animo alios fallendi numquam fieri queat,
 profecto ab omni malitia immunis esse non
 potest: igitur tamdiu quivis putandus est ve-
 rum loqui, quamdiu graves rationes contra-
 rium non evincitur. Et sane licet homines
 mentiri possint, & perfrequenter etiam men-
 tiantur, nihilo minus vel ex eo, quod natura
 quandam veritatis amorem omnibus indiderit,
 merito præsumimus, quemlibet in loquendo
 naturalem hanc propensionem sequi, nisi op-
 positum suspicandi gravis adsit ratio. Sunt
 autem hæc ferre.

Rationes dubitandi de veracitate Testis.

1.) Qui sæpius etiam ex imprudentia
 duntaxat falsum dixisse deprehensus est, aut,
 quod deterius foret, deliberata mente men-
 tiri consuevit, nullam meretur fidem; medi-
 dactum enim vel unicum est signum malitiæ
 in animo latentis, ex qua plura subinde pro-
 ficiuntur, fundatque proinde gravem suspi-
 cionem contra veritatem cujuscumque testi-
 monii. Arque hoc adeo verum est, ut id
 genus homini etiam credi non debeat,
 cum juramento rem confirmat; etsi enim
 ceteroquin testibus juratis propter jurisju-
 randi religionem apud omnes gentes maxi-
 mam, sine hæsitatione fides adhiberi so-
 leat, si quis tamen eo jam audaciæ devenit,
 ut ipso jurejurando abusus fuerit, gravissi-

ma

ma contra illum præsumptio firmatur, ne hac quoque in re, aut hoc tempore id sacrilegii genus admittat: quare Tullius: „Si quis semel pejeraverit, ei credi postea, „etiãsi per plures Deos juret, non oportet:“ Ab hac accusatione cumprimis immunes sunt viri illustres, in dignitate constituti, atque publica fama celebres; experientia enim teste in ejusmodi viros longe rarius, quam in rudes, ac de plebe homines mendacium cadit, cum illi præ his conservandæ nominis suæ gloriæ studiosiores esse soleant: amplitudo igitur nominis, ac viri dignitas non exiguum testimonio robur addit.

*Orat. pro
Rabir.*

2.) Cum res, quæ narrantur, non apte satis inter se cohærent, prudens de occultâ quadam repugnantia suspicio exoritur, cum vero res sunt admodum insolitæ, vel propterea, quod rarissime accidunt, creditu difficiles, ejus naturæ, ut incautus quisque facile circa eas decipi possit, novo examini subiciendæ erunt, quin quidpiam interea affirmare decidatur. At ubi relata clare perspiciuntur impossibilia, sine mora inter fabulas releganda sunt.

3.) Proclives sunt maxime homines ad alios decipiendos, quando sua ipsorum res agitur, atque ex veritatis occultatione commodi quidpiam in ipsos redundat, vel quando testimonium dicunt in eorum, a quibus testes esse jubentur, utilitatem; quare in ejusmodi casu fides degeneranda est, quam ab opposito vel maxime merentur ii, qui contento proprio commodo, ac utilitate etiam in suum nocuentum aliquid testantur. Exemplo sunt Apostoli, qui de Salvatore resurgente etiam cum periculo vitæ testimonium liberrime tulerunt. Universim partium studia, adulatio erga principes, immo-

deratus patriæ, gentisque suæ amor, ac importuna reliquarum affectionum turba frequentissime in causâ sunt, ut ne historici veritatem sincere pandant, efficiuntque, ut vel suorum vilia occultent, vel præclare gesta ultra modum extollant, atque alias gentes præ sua superbe deprimant. Quare dispiciendum sollicite, utrum in tres harum affectionum una aliqua, & quænam vehementius dominetur, id quod ex ejus moribus, institutione vitæ, scribendi fine, ceterisque similibus adjunctis facile cognoscitur. Sic Cæsar, ac Livius res romanas plus æquo extollunt, quin & Gallorum, Germanorum, & Chartaginensium facta ultra justos limites evehunt, ut ex relatis de iis victoriis major Romano nomini gloria accresceret; veteribus quoque Græcis nullo non tempore id vitio datum est, quod alias præ se nationes superbe despiciant, gloriamque gentis suæ per fas, nefasque amplificare studeant, unde a Latinis Græcia mendax, garula, levis jure dicebatur.

4.) Cum datur testimoniorum conflictus, ac relatio, cum iis non consentit, quæ alias percepimus. Acumine intellectus hoc in casu opus est; atque imprimis res ipsa spectanda, quæ si inter eventa locum habeat, præferimus eos, qui tempori illi, quo ex ea contigisse fertur, propriiores sunt; si vero res ad naturæ observationes pertineat, recentioribus plus tribuimus fidei; extra controversiam enim positum est, nostri temporis physicos majoribus adjumentis ad naturæ phænomena & observanda, & perscrutanda instructos esse: pervidendæ deinde quoque aliæ testium conditiones secundum ea, quæ jam dicta sunt, & porro dicentur. Denique ceteris paribus plurium testium major est auctoritas, numerusque ipse, ubi conspiratio nulla prudenter

rimeri potest, pondus, ac robur addit: quare in eo casu dispiciendum, utrum res ejus sit naturæ, ut plures in eam consentire per se ceteroquin arduum foret? utrum nec educatio, nec præjudicata quædam opinio, nec commune affectionum vinculum testes ipsos colligasse videatur? quod si nullum horum vestigium appareat, maximum utique veritati pondus accedet. At vero ubi collusionis prudens est suspicio, vel cum constat, omnes eos unius solum ea in re auctoritatem secutos fuisse, etiam centum historici non majorem merentur fidem, quam unus ille, ex quo reliqui id desumserunt. Hac impulsæ ratione nonnulli belli Trojani veritatem in dubium vocant, quod omnes historici id uno ex Homero, vel veteri quoddam Syargo, qui, ut *History*
var. f.
14. c. 23. Ælianus refert, primus illud bellum cecinisse putatur, accepisse videntur. Dixi autem ceteris paribus numerum esse attendendum, nam fieri utique potest, ut unus aliquis, licet reliquis contraria testetur, iis dotibus polleat, ut compluribus præferri mereatur.

5.) Si nimia appareat cura stili, qui enim stilum in scribendo affectant, sæpe non tam de veritate, quam de vocabulorum elegantia solliciti sunt, satisque sibi faciunt, modo res verisimiles conscribant: horum in numero ipse Tullius Xenophontis Cyropædiam reponit. Quare non abs re in historia stilum planum & nitidum requirimus; figure enim, tropi, ceteraque oratorum ornamenta veritatem occultant, poetarum vero schemata, fictionesque eandem involvunt. Ex hoc rursum capite maximam merentur libri Evangelici fidem, cum in illis res maxime insolitæ, prodigia prorsus stupenda sine inutili elegantiarum comitatu stilo prorsus simplici enarrantur: unde omnis exaggerationis cujusdam aut allegoriæ suspicio excluditur. Ut igitur

testimonio fides haberi possit, illud sit clavis, planisque verbis conceptum (conf. §. 222. schol.). Sed & aliud quoque est vitium, quod testimoni veritas frequentius labefactatur, quodque præterire hic non oportet. Sic fere sunt homines comparati, ut, quæ sibi ipsis admodum nota, & familiaria sunt, aliis perinde cognita esse existiment; itaque cum factum quodpiam referunt, necessaria quandoque rei adjuncta, locique, ac temporis rationes reticent, non dubitantes, quin ea ab audientibus alioquin intelligantur, ex quo fit, ut quæ eloquuntur, non perfecte congruant cum iis, quæ mente gerunt; cui & istud nonnumquam accidit, incommodi, ut de certis quibusdam facti adjunctis rogari, dum, quid quærat, non satis assequuntur, illico in animum inducens de iis quæri, quæ tum ipsi mente volvant, præcipue si eorum quædam connexio, aut similitudo, licet exigua, detur: unde consequens est, ut sapius respondendo affirmant, quod negare oportuisset, quodque etiam negassent, si questionem rite intellexissent.

Quando
testis ha-
bet noti-
tiam.

CCXXIV. *Notitia rei in teste non presumitur, sed positive comprobari debet; quod enim frequenter non fit, illud nequit in casu quovis particulari prudenter supponi factum fuisse, sed omnino necesse est, ut solidis evincatur rationibus; jam vero requisita inducuntur, ac labor, ceteraque, quibus rerum notitia, quæ nemini a natura ingenerata est, comparari debet, persæpe non adhibentur: igitur ea fuisse reapse adhibita, ac proinde etiam rei notitiam in teste adesse non præsumi, verum probari debet. Sunt autem hæc.*

*Rationes, quæ ostendunt testi non defuisse
notitiam.*

1. Si constet testem magna ingenii vi, ac
judicii sagacitate pollere; qui enim ejusmodi
sunt animum ad omnia adjuncta examinanda
serio applicant, cuncta rimantur; omnia acti
judicio expendunt; fabellas, ac vulgi rumo-
res acute discernunt; eaque solum, quæ ma-
xime ad veritatem accedere perspexerint,
seligunt, neque adeo tam facile sibi imponi
permittunt: ubi contra rudiores, rerumque
imperiti nimia fere semper credulitate labo-
rant, ac fraudibus detegendis impares, om-
nia promiscue amplectuntur; cuius relationi
acquiescunt; inanes vulgi rumores, ut ipsi
in veris habent, ita aliis quoque pro liqui-
dissima veritate obtrudunt. Hoc ex fonte in-
ter fabulas referimus pleraque, quæ in via-
torum, ac mereatorum diariis de atheismo,
vel religione populorum in America, & A-
frica degentium relata legimus; homines e-
nim ii nullo prorsus pacto idoneis erant ex-
rum gentium moribus, & religionis dogma-
ribus explorandis; quippe cum & necessaria
linguæ notitia destituti essent, & uni que-
stui intenti, nec unquam interiora illarum
regionum penetraverint. Quando tamen agi-
tur de re obvia, quæ a quoquoque, si modo
sensibus integris utatur, cognosci potest, ma-
jus ingenii acumen non attendimus: parem e-
nim cum quovis erudito auctoritatem obtinet
primus quisque de plebe, cum narrat pluviam,
aut grandinem alicubi cecidisse, vel incen-
dium, hoc, illove loco exortum fuisse.

2.) Si constet testem semper plus intelle-
ctui, ac rationi, quam imaginationi tribue-
re; illius enim, non hujus munus est, even-
ta, factorumque adjuncta explorare. Qui vi-

vaci nimirum phantasia laborant, facile se ea abripi sinunt, umbra, falsosque rerum splendoros pro rebus ipsis habent: atque excocta suo in cerebro phantasmata pro geminis veritatibus venditant; vident illi ea, quæ nusquam sunt, audiunt, tangunt, ac ægerrime ferunt, si quis contradicere audeant. *Enthusiastæ* hoc genus hominum compellamus, eorumque consortio magnopere cavendum est.

3.) Si testis narrationi suæ fontes habeat legitimos; nullam enim meretur fidem, cum documentis dubiis nititur; hoc ex capite Herodotus apud eruditos vapulat, qui non nisi populares rumores sectatus est, illicque omnes, qui ex fabulosis Ægyptiorum, Phœnicum, & Rabinorum traditionibus congestos de rebus antediluvianis libros nobis reliquerunt, vel qui nostro hoc tempore ex novellis publicis opus quoddam historicum consarcinant. Dispicendum igitur diligenter tum, quæ documenta, instrumenta, aut monumenta publica, quæ potissimum in inscriptionibus sepulchrorum, columnarum, & nummorum, & in antiquis scripturis, ac picturis consistunt; testis habuerit, & inspexerit; tum etiam, quantum & ipsa fides mereantur: estque hoc præcipuum ipsius testis munus, ut citando fontes scientiæ suæ rationem reddat; id ni faciat existimandus est vulgi rumores, privata nonnullorum adversaria, & quæ ejusmodi sunt, nullius auctoritatis monumenta secutus fuisse; illud enim præsumitur, quod frequentius fit, quodque adeo factum est pronissimum.

4.) Si testis sit oculatus, cœvus, domesticus; oculatus enim aurito, cœvus recentiori, domesticus, si modo ab omni partium studio remotus sit, externo omni jure præferatur; fama siquidem eundo crescit, aliud supprime, aliud addit; unde veritas tandem
omnis

omnis corrumpitur. Longe igitur majorem iūmerentur fidem, qui factō præsentes adfuerunt, remque suis ipsi usurparunt oculis, ac illi, ad quos de ea rumor solum pervenit. Hoc porro iudicium tanti est roboris, ut sapius unius coævi narratione, rejectis plurimorum recentiorum testimoniis, standum sit: neque alia est Tullii mens de animæ immortalitate disserentis, „ auctoribus uti optimis
 „ possumus; quod in omnibus causis, & de
 „ bet, & solet valere plurimum, & pri-
 „ mum quidem omni antiquitate, quæ quo-
 „ proprius aberat ab ortu, & divina proge-
 „ nie, hoc melius ea fortasse, quæ erant,
 „ vera cernebat. „ Multo vero utique magis id valebit in iis, quæ antiquis temporibus contigerunt; quare si æquales præsertim plures, ceteroquin vitæ conditione, studiorum ratione, religionis instituto discrepantes, idem testentur, auctoritatem habent maximam, cum omnino incredibile sit, ut cum plures diversis acti affectionibus in idem mendacium conspirent. Prærogativa hæc rursum præcipuo quodam modo pro scriptoribus Evangelicis pugnat; quæ enim mirabilia de Christo narrant, ea spīs fere inspexerunt oculis, aut ab iis, qui præsentes adfuerunt, proxime acceperunt, neque ullum in iis partium studium suspicari licet: cum ea, quæ retulerunt, in offensionem Principum, totiusque gentis opprobrium cesserint.

At vero, quid de factis antiquis dicemus, quæ, cum nulla jam existent documenta coæva, sola nunc traditione probari possunt? An ea universim rejiciemus? Nequaquam: sed indagandum sollicitè, utrum ea traditio a testibus coævis, fideque dignis, an vero aliunde ex quodam fonte suspecto ortum ducat? Illud jure arguitur, cum factum adjuncta habet admodum splendida, ac illustra,

29. me
 sc. l. 1.
 c. 12.

solemnitates publicas, exremonias, ac consuetudines ea occasione introductas; nequit enim profecto eventus ad magnam in vulgo motionem excitandam aptissimus a fraudulento quodam homine promulgari, quin sapientiores contradicant; neque fieri omnino potest, ut tota quæpiam communitas ad tam solemne commentum postëris transmittendum cum circumscripore conspiret. Dubitare igitur non licet de veritate facti historici, quod quidem ex sola traditione proficiscitur, adeo tamen illustre, publicum, aut ejusmodi est, ut sine ingenti strepitu nec contingere, nec promulgari potuisse videatur; agitur exempli causa de serie summorum Pontificum, Episcoporum, aut Principum aliorum, non possunt proferri documenta corva, sed catalogi ante tempus memoria antiquius conflari: potest tuto teneri talis traditio, cum nullo modo credibile sit rem adeo publicam, ac in vulgus notam vel protus oblivioni darã, vel aliqua decipientium fraude adulteratam fuisse. Contra vero ob solam traditionem credi sine hesitantia nequit factum, quod in se, vel in suis adjunctis ejusmodi est, ut sub initium a paucis duhtaxat cognosci potuerit, qualia sunt privata quandoque prodigia, quæ a muliercula nimis credula, vel ab entusiasta primum conficta, sensim denique in vulgus dimanant.

5.) Si factum quodam memorabilius testës recentiores enarrent, cujus nullus æqualium meminit, jure in dubium vocari potest, ac vero etiam debet, nisi silentii hujus gravis ratio adferri queat. Argumentum hoc a criticis *negativum* compellari solet, utque eo rite utamur, sequentia notanda veniunt. Primum constare debet auctorem certam habuisse facti illius notitiam, pronamque ejus referendi occasionem; dubia enim posteris trans-

transmitti non debent, neque ea, quorum commentarios scribendi non est occasio: multa ab eruditis nostri temporis, & quidem digniora sciuntur, nec tamen scribuntur, quod videlicet vel occupationes vel vitæ rationes, vel ipse etiam scopus, quem in elucubrationibus suis viri docti sibi præfigunt, id non admittunt. Porro occasione non caruisse auctorem ex his fere arguimus: si sit factum valde memorabile & notatu dignum, ad filum historiæ pertinens, multumque forrasse ad aliorum, quæ in ea pertractantur confirmationem faciens; si auctor habuisset singularia motiva illud adducendi, si ex ejus relatione nullum incommodum in se redundaturum prudenter timere potuisset; propterea siquidem est, ut quis veritatem reticeat, cum ex ea offensionem populi, Principis, aut alterius cujusdam, apud quem gratia valere quam maxime ipsius interest, vel aliud quodcumque incommodum prævideat oriturum. His ducti rationibus fidem non habemus Philostrato, quæ centum post annis prodigia maxime stupenda ab Apollonio Thyanzo patrata fuisse enarrat, quorum nullus coævorum meminit, etsi id ad idololatriæ superstitionem, quam promovere conabantur, confirmandam quam plurimum contulisset. Si jam vero supra dictis opposita obtineat, silentii que coævorum ratio efficax reddi possit, nullum inde argumentum pro rei a recentioribus relatæ falsitate peti potest; sic hæreticis rationem damus efficacissimam, cur de sanctissimis religionis nostræ sacramentis, eorumque usu non tam multa ac minuta in antiquis primorum Christianorum libris consignata deprehendantur, disciplinam nimirum arcani, quam inter primos Christianos viguisse ex Origine, Tertulliano, aliisque discimus. Atque id multo magis tum observandum

dum est, cum aliis cœvis tacentibus alii rem enarrant; tum enim locum habet recepta apud criticos regula: *qui aliquid tacet, id propterea non negat*, esto etiam, quod id historiarum leges exegissent; nam convenientius est judicare, unum illum fortassis in historiarum leges peccasse, quam reliquos omnes in fraudibus, aut ignorantiarum suspicionem vocare. Sic veritas librorum evangelicorum non infringitur ex eo, quod non omnia a quovis Evangelistarum referantur, sed in uno exstant, quæ ab alio prætereuntur. Inde vero sequitur, universim argumento hoc *negativo* a modum caute utendum esse, cum rarissime certo constare possit, an nullus omnino æqualium ejus, de quo quæritur, facti mentionem fecerit, cujus rei ratio est; quod multa veterum monumenta tam hominum incuria, quam temporum iniquitate interierunt.

SCHOL. Indicia duobus his §§. allata tanti sunt roboris, ut si ea omnia simul in tota sua latitudine pugnent pro veritate cujusdam testimonii, eam jam non probabilem, sed omnino moraliter certam efficiant; inde enim conflantur characteres (in schol. §. 183.) memorati, qui humanæ auctoritatis infallibilitatem commostrant. Id cum primis obtinet in libris evangelicis; nihil enim omnino est, quod eorum auctoribus, aut veridicendi voluntatem, aut factorum, quæ narrant, notitiam defuisse, vel minimam prudentis suspicionis umbram movere posset. Quare libri hi, etsi a revelatione abstrahamus, spectata solum ratione naturam fidem, quæ in rebus humanis dari potest, maximam merentur, atque rationem ipsa, exuisse censendi sunt, qui, nescio quo malo genio, aut imprudenti scepticismo acti fidem, quam tamen Livio, Curtio, aliisque

que longe inferioris notæ scriptoribus liberalissime tribuunt, iisdem pertinaciter denegant.

Ad extremum nequeo gravissimum hoc in argumento errorem Lockii, viri ceteroquin acutissimi silentio præterire; inaximi enim is est momenti, videturque eo quam proxime tendere, ut traditiones Apostolicas Romane Ecclesiæ convellat. Docet Lockius universim cujusvis testimonii probabilitatem ea proportionem imminui, qua a primo fonte recedit, „ vir fide dignus, inquit, cum „ testatur rem quampiam sibi esse notam, „ firmum adfert argumentum: verum cum „ secundus æque fide dignus idem testatur „ nixus testimonio prioris; testimonium hoc „ jam evadit debilius, & testimonium tertii, qui ex ore præcedentium loquitur, „ est rursum minus attentione dignum; „ ita ut in veritatibus, quæ nobis via solius traditionis patefiunt, quivis gradus „ remotionis a fonte vires argumenti infringat &c. &c. “ Hujus porro novæ atque absurdæ doctrinæ rationem sibi videtur invenisse in lege per Angliam recepta, vi cuius, etsi exemplum ex instrumento authentico descriptum, ac per legitimos testes comprobatum æqualem adhuc fidem faciat, hujus tamen exempli exemplum, quantumvis summæ auctoritatis testibus confirmaretur, in nullo amplius tribunali legitimæ probationis vim obtinet. Tam conqueritur apud plurimos morem e diametro oppositum invaluisse, atque inde evenire ait, ut opiniones nonnullæ sæpe solum senescendo novas vires acquirant, ac ea nunc in certissimis, ac indubitatis ob succedentium; ex primi tamen ore loquentium, auctoritatem habeantur, quæ ante mille annos, & ob testimonium pri-

*Essai
phil. —
conc. se
entend-
hum. T.
4. ch. 16.
§. 10.*

primi ne probabilia videbantur. Miror vehementer, virum qui eodem in opere tam elegantia ratiocinandi præcepta suppeditat, in patentem adeo paralogismum prolabi potuisse; sed nempe & doctissimus quisque suos patitur manes. Ut a postremo ordiatur; manifeste deseritur hypothesis assumpta, atque ad aliud, quod in questione prorsus non versatur, excurrit oratio: utrum testimonium mendax, aut opinio falsa sola annorum diuturnitate, & suo quasi senio robur obtineat, hic non queritur; id enim fieri haud quaquam posse luce meridiana clarius est, nec quemquam esse mihi persuasero, qui ignoret, commenta procedente tempore adeo non firmari, ut ea contra debeat dies, aut si neque hoc eveniat, contra veritatem tamen nulla temporum diuturnitate præscribi posse; addo etiam consuetudinem, si qua vigeat, opinionem quampiam eo solum ex capite, quod longo annorum intervallo obtinuerit, inter veras reponendi magnopere improbandam esse. At hæc omnia Lockio parum prodeunt; in hypothesis enim ab ipso statuta queritur de testimonio *vero* a teste primo *fide digno* per quamplurimos alios sibi ordine succedentes *aqualiter fide dignos* transmisso; hujus *veræ* auctoritatem longa annorum serie non minui, vel ex eo pater, quod eadem omnia, quæ ad fidem primo testimonio habendam movere poterant, etiam pugnent pro centesimo, vel millesimo, vel pro quocunque alio, cum hypothesis ponat testes omnes subsequentes esse *aqualiter fide dignos*, adeoque tales, qui id, quod acceperunt, fideliter sine omni mutatione, additione, aut subtractione adjunctorum renuncient, quamvis id fatendum sit hypothesis rei veritati sæpe non responde-

re, cum talium testium rarus admodum sit numerus, nisi facta sint publica, & solemnia, taliaque, quorum accuratam memoriam conservare multorum plurimum interest. Quod vero ad legem illam, jure Anglicano introductam, attinet, quis ignorat præsumptiones juris rerum veritati non obesse, multaque universim a legislatoribus sapientissime constituit non alio ex capite, quam ut hominibus malevolis remotiores quoque alios fraudibus circumveniendo occasiones extorqueantur? Atque unicus etiam hic finis videtur legi hunc propositus: exemplum exempli, etsi testibus idoneis confirmatum, non amplius in locum legitimæ probationis admittitur, non quod in casu quodam in singulari non possit in se mereri fidem; id enim neque lex exprimit, sed ut universim omnes fraudibus quæ in ejusmodi descriptionibus frequentissimæ sunt, occasiones eripiantur; fere uti certæ personæ, quæ in quibusdam causarum generibus a jure inter testes non recipiuntur, non tamen propterea mendaces esse declarantur. Patet igitur testimonium etiam longissima annorum serie per testes adeo idoneos transmissum nihil de sua firmitate deperdere: immo audeo asserere, sæpe traditionem eo magis esse fide dignam, quo est antiquior, non quidem solius antiquitatis ratione habita; sed quod eo annorum decursu viri insigni & ingenii perspicacia, & intellectus acuminē pollentes, quorumque imprimis interfuit primi testimonii, unde omnis ea traditio ortum ducit, pondus summa cum ratione investigare, sua eam auctoritate confirmarent. Quodsi a temporis diuturnitate abstrahamus, facile suspicio locum inveniet, an non primo testimonio ex præjudiciis quibusdam, aliisque sinistris motivis fides fuerit ad-

C A P U T V.

D E

INTERPRETATIONE, ET LECTIONE LIBRORUM.

CCXXV. *Ars Hermeneutica*, sive *Interpre-* Quid ars
herme-
neutica?
tandi est ars determinandi sensum, quem au-
ctoris verba, seu scripta, seu ore prolata con-
tinent.

SCHOL. Qui igitur alterius verba interpretari
aggreditur, is mentem auctoris perfectissi-
me assequi debet, ac proinde easdem, quae
auctor, cum vocabulis ideas conjungere (§.
81. cor. 2.).

CCXXVI. Nullus umquam sensus verbis Quid
ejus
princi-
pium?
tribuendus est, nisi quis clare probari potest;
cum enim a posse ad esse non valeat illatio,
ut loquantur philosophi, ex eo, quod verba
possint determinatum aliquem sensum facere,
inferri nequit eum reipsa esse in casu propo-
sito: igitur quis ex omnibus possibilibus nunc
sit determinate vocabulorum sensus, positiva
ratione constabiliri debet: Indicia, ex quibus
efficitur, *principia interpretandi* compellantur.

SCHOL. Indicia hæc ex triplici potissimum Et quo-
tuplex?
fonte petuntur, videlicet vel *usu loquendi*
recepto, vel *ex intentione loquentis*, vel de-
nique *ex subjecta materia*. Et profecto ni-
hil magis rationi consentaneum est: primum
siquidem prudenter præsumere possumus,
verba auctoris eundem sensum continere,
quem in usu communi, & vulgari habent;
cum

cum nemo, qui quidem ideo loquitur, ut intelligatur, ab eo sine ratione gravi recedere possit (§. 83. schol. nu. 4.). Deinde vero, cum, ut frequenter evenit, vocabula etiam ex recepto loquendi usu ad plures sensus sint indifferentia, quomodo citius, faciliusque nodum solvemus, atque respiciendo, & indagando loquentis intentionem, cum a cujusvis arbitrio pendeat voces ad significationem unam aliquam ex pluribus usitatis determinare? Denique si hisce omnibus nihil proficiamus, quo tandem recurrendum erit? nonne ad subjectam materiam? nisi enim auctor vel ob imperitiam, vel ob malitiam, quorum neutrum suspiciendum est, aliud positive intenderit, necesse est, ut is sit verborum sensus, qui argumento, quod tractatur, quam maxime congruit. Qua porro ratione triplici hoc fonte utendum sit, sequentes ite canones docebunt.

Leges Interpretandi.

1.) *Usus loquendi* exigendus est ad eam aetatem, eamque regionem, in qua auctor librum exaravit, siquidem in aperto est complura vocabula decursu temporis vim, ac potestatem suam permutasse: ineptus sit, oportet, qui, dum in veterum alio deprehendit Ægyptios geometriæ admodum peritos fuisse, putet, ea voce scientiam adeo completam, qualis nunc exstat, denotari. Ad hoc plurimum conducit diligens morum, gentium, & antiquitatum studium. Eligendus porro tum est sensus maxime naturalis, is scilicet, quem primum verba nacta sunt, cuique translatus opponitur, nec ab eo, nisi gravi de causa recedendum; qualis foret, si secus significatio aut nulla, aut absurda, aut instituto auctoris parum congrua oriretur.

Quod

Quod si nonnumquam necessitas cogat, ut ad sensum allegoricum recurratur, id ita fiat, ut una potius enunciatio, quam plures, metaphorice exponatur. Nemo autem est, qui non videtur ad hæc ex æquo præstanda requiri præterea perfectam linguæ, qua liber exaratus est; notitiam, atque hac quoque de causa libros *originales* versionibus præferimus, cum experientia teste frequentissime contigat, ut, qui translationis laborem in se suscipit, exquisita utriusque linguæ cognitione non polleat; quamquam etiam hac non deficiente ob idionismos cuiusvis linguæ proprios omnino arduum sit, quam accuratissime, ut necesse foret, auctoris ideas alieno idiomate exprimere.

II.) *Intentio loquentis* ex definitionibus ab ipso auctore statutis clarissime elucet: hæc igitur primo omnium loco exquirendæ sunt. Quod si eæ desint, exempla singularia, quæ nonnumquam adjunguntur, præsertim si abstractionis ope in universalia transmutentur, planam ad auctoris intentionem deregendam viam sternunt. Deinde, cum diversæ seu in philosophia, seu in religione sectæ, uti & artes fere omnes, etiam non liberales, propria sibi frequenter vocabula habeant; quin vocibus quoque alias receptis in alieno tamen significatu sæpius utantur, attendendum magnopere, quam sectam auctor seu in religione, seu in philosophia profiteatur; sic aliud sonat vocabulum *calor* in ore Cartesiani, aliud in ore Peripatetici: & Theologi norunt, quanti ad verum sensum in antiquis SS. PP. monumentis determinandum intersit advertere, eos plerosque omnes philosophia ecclesiastica, in qua tamen Platonis placita dominatum tenuerunt, imbutos fuisse; nec minus hæreticis tam veteribus, quam recentioribus perfamiliare est, ut certis quibusdam

vocabulis alienam prorsus significationem substituant, num id ad regendos paullisper suos errores quandoque faciant, decidere non est hujus loci. Quæti porro hæc animadversio sit momenti vel ex eo patet, quod pronissimum sit, ut quis principia, quibus jam imbutus est, etiam in diversis rebus sequatur, ex iisque nonnulla ubicumque pro data occasione insperat; regulariter autem illud factum fuisse censi debet, quod factum pronissimum est, ac prudens semper pro illo sensu stat præsumptio, qui facilius auctori occurrit, quique arctius cum principiis, ideis, & objectis ipsi familiaribus addamus etiam, educatione, consuetudine, præjudiciis, & affectionibus, quibus agitur, sive bonis, sive malis connectitur. Denique intentio loquentis censetur respicere ea, quæ ipsi magis obvia sunt, ac nota, id quod cum primis usuvenit, cum de significatione terminorum relativorum determinanda agitur, sic *magnus* olim in Græcia exercitus nunc omnino parvus foret; audis virum esse *magnæ* doctrinæ, vide, num qui id asserit, sit ex natione culta, an barbara? utrum eruditorum ex numero, an de ignorantium grege? &c. &c.

3.) *Subjecta materia* subsidium verum vocabulorum sensum detegendi suppeditat, cum textus sermonis integer, totaque doctrinæ cohesio rite expenditur; is enim propositionis, aut termini significatus esse præsumitur, qui reliquæ doctrinæ, integræque rerum connectioni aptius respondet. Necesse igitur cum primis est, ut antecedentia cum consequentibus conferatur, exquiranturque loca *parallelæ*, quæ inter se comparata id, quod obscurum est, non parum illustrabunt: verum ea, ubi obiter duntaxat, & per occasionem rei mentio fit, sollicitè discernantur ab iis, in quibus auctor copiose, ac dilucide id ipsum

sunt vel probandum, vel declarandum, vel etiam refutandum sibi sumsit, seu in quibus, ut ajunt, *sedes est argumenti*, atque ex his, non vero ex illis sensus verborum definiatur. Hac in re præcipue peccant ii, qui propositionibus ex toto orationis nexu avulsis eum sensum affingunt, quem fortassis seorsum spectatæ continere possent, ut nullo tamen modo reapse continent; cum certum sit auctorem eam, quam tota connexio exigit, significationem intendisse: solemne hoc est hæterodoxis, dum S. Scripturæ editis ad errores suos confirmandos abutuntur. Quod, si, — ut nonnumquam evenit, alterius interpretatione standum sit, ea ceteris paribus præferatur aliis, quæ a cœvo, familiari, aut discipulo ipsius auctoris proficiscitur, vel saltem ab eo, qui linguæ, ac argumenti, seu disciplinæ, quæ pertractatur, majori præ reliquis notitia pollet.

CCXXVII. *Æquitas in interpretando* est Quid æquitas in interpretatione?
studium verbis auctoris, quantum fieri potest, non nisi verum sensum tribuendi, factæque ipsius, ac honori, quantum licet, per interpretationem consulendi.

SCHOL. Ad æquitatem hanc, cum inter naturæ rationalis officia reponi debeat, quemlibet obligari certum est interea tamen multis modis in eam peccari solet. Id ne fiat, videamus, quæ ab ipsa exigantur. Quæ a-
jus le-
ges?

1.) *Ut semper mitiorem in partem auctoris verba interpretemur*, sensumque veritati magis congruum, nisi manifeste contrarium pateat, eligamus; etsi fortassis a communi loquendi usu nonnihil recedendum, aut ipsa etiam stabilita definitio paullulum inflectenda foret: idque tum præcipue, cum occurrunt nonnulla, quæ inter se pugnare videntur.

Storchenau Log. M tur;

tur; tum enim vero cura danda est, ut sibi opposita congrua quadam interpretatione concilientur, nullaque, nisi aperta necessitas cogat, contradictio adstruatur.

2.) *Ut ne sensum viro prudente indignum ensculpamus*; qualis foret 1. ad quem auctor nulla prius data occasione devolverentur; 2. in quo nullum prudentem finem intendere posset; 3. in quo prorsus ad finem propositum inepte, aut inutiliter loqueretur; 4. in quo magno verborum apparatu circa facilem nullius momenti, aut consecutionis rem versaretur; 5. in quo demum expectationi audientium, aut merito causae & postulationi objecti prorsus non satisfaceret, & quae sunt similia.

3.) *Ut ne consecraria absurda ex doctrina profluentia auctori attribuamus*, ipsumque propterea haereticum, seditiosum, pacisque publicae perturbatorem pronunciemus, quod a nonnullis, dum invidentia aguntur, fieri assolet; numquam enim auctor prudenter praesumitur aliam doctrinae suae consecutionem intendere, nisi quam actu exprimit, quin ne cogitare quidem putandus est de aliis, nisi quae ordinariae sunt, & cuivis saltem magis exercitato facile obvia, cum nihil, nisi quod factu primum est, praesumatur. Quis adeo perspicax est, ut omnia, quae ex sententia sua profluunt, continuo pervideat? Profecto optimo cuivis quandoque contingere potest, ut opinionem quampiam ex rationibus, ut sibi videntur, efficacissimis propugnet, ex qua tamen nonnulla aut contra religionem aut adversus reipublicae statum deduci possunt; quo in casu sententia quidem ea falsa est, auctorque erroris in ejus propugnatione admissi convinci debet, non tamen, nisi agnito subinde errori pertinaciter adhaereat, dici potest omnia ea absurda, quae inde pro-

manant, docuisse, cum non docuerit, nisi quæ prævidit, ac fortasse hæc non præviderit; sed potius interea indicandum, cum, si ea consecraria cognovisset, a sententia sua fuisse recessurum; nemini enim error, aut vitium adscribi debet, nisi clare comprobetur.

4.) *Ut ne invidiam auctori creemus, quod*
his ferre modis fieri observatur Joann. Clericus *Dissert. phil. de arg. theol. de invid. dufl.*
1. „ Sententia, quæ oppugnatur, male explicatur. 2. Nominibus invidiosis infamatur. 3. cum invisorum hominum dogmatibus confertur. 4. Exageratur momentum quæstionis. 5. Invisi redduntur boni, quod vocibus inventis uti nolint. 6. Studiose occultantur rationes, quibus refutanda sententia nititur. 7. Tacentur incommoda, quibus premitur sententia deferenda. 8. Prætermittuntur ea, quæ invidiam amoliri possent. 9. Invidiosa consecraria deducuntur ex sententia eorum, qui oppugnantur. 10. Malignis suspicionibus premuntur. 11. Novitas illis obijciuntur quasi crimen. 12. Miscentur in disceptationibus, quæ cum iis habentur, multa, quæ ad rem nihil faciunt, sed quæ invidiæ creandæ apta sunt. 13. In deteriorem partem accipiuntur indifferentia. 14. Provocatio fit a peritis iudicibus ad imperitos. 15. Adversarii denique quasi immorigeri magistratibus infamantur. “ Hæc uti præclare monuit vitanda esse, ita primus eodem in loco omnium se reum fecit, dum S. Hieronymum contra hæresiarchas Vigilantium, & Jovinianum scribentem horum vitiorum insinulavit; sed nempe accerimum illud in Romanam Ecclesiam, sanctosque ejus Patres odium, quod in omnibus illius scriptis, tam luculenter elucet, philosophi hujus mentem obscuravit.

CCXXVIII. Libri potissimum sunt vel hii

Historici, qui facta recensent, adeoque propositiones singulares continent; vel *dogmatici*, qui dogmata, seu veritates universales proponunt; ex his alii veritates, quas adstruunt, simulque accurate demonstrant, & *scientifici* nuncupantur; alii propositiones universales absque demonstratione, vel in rebus fidei divinæ citra probationes, atque argumenta ex theologicis fontibus petita, per modum solum historiæ referunt, quare *historico-dogmatici* audiunt.

SCHOL. Libri historico-dogmatici parum conducunt ad solidam scientiam comparandam; ad summum inserviunt ad disponendos auditorum animos, vel ad compendiarium eorum, quæ jam didicerimus, anacæphaleosin. Vera igitur eruditio ex libris scientificis hauriri debet, quorum lectio, ut tironi cum fructu cedat sequentia exigit.

Quid in
librorum
lectione
obser-
vandum?

I.) *Ordinem*, qui requirit, ut non provolemus ad subsequencia, nisi antecedentia rite assecuti; cum enim in libris scientificis subsequens propositio ex antecedente profluat, operam, oleumque perdet, qui propositionem quampiam temere in medio arreptam aggreditur, antequam ea, quæ præcesserint, rite intellexerit. Ordinis hujus defectu tot inanes contra librorum obscuritatem, querelæ funduntur ab iis nimirum, qui moræ impatientes primis principiis, quantum necesse foret, expendendis inhærere nolunt, lectionemque libri a medio, aut prorsus a fine inchoant. Obscurus quidem jure optimo habetur liber, si termini accurate non definiuntur, vel alieno in sensu usurpentur; si demonstrationum principia reticeantur; si ordo demonstrandi præposterus adhibeatur, aut omissis intermediis, nec suppletu facilibus
sta.

statim, & quasi per saltum ad conclusiones remotiores transvoletur, & quæ sunt similia: liber, qui ejusmodi vitiis scatet, relinquendus potius, quam tenendus est, nec auctor, qui intelligi noluit, ullam meretur existimationem. Porro ordo, de quo hic loquimur non solum in uno, eodemque libro pervolvendo, sed etiam in pluribus observandus est, ita ut ii prius legantur, qui aliis intelligendis luminis quidpiam collatur videntur.

2.) *Attentionem lenitudini junctam*, sine qua ideas claras, ac distinctas numquam obtinebimus: præcipitantia, cui vividiora ingenia præcipue obnoxia sunt, frequenter prorsus inutilem reddit, quem librorum lectioni impendimus, laborem, hacque ratione, fit ut evoluto etiam integro libro, quid legerimus, ignoremus, argumenti ipsius quandoque vix memores. Deinde absque meditatione nullum unquam in scientiis progressus sperari potest; omnis autem meditatio moram, ac tempus requirit; quare non qui multos evoluit libros; sed qui pauca seria meditatione in animum demisit, multum legisse censendus est.

3.) *Repetitionem frequentem*; sæpius enim redeundo ad præcedentia res longe clarior evadent, contingentque frequenter, ut tum demum priora rite perspiciamus, quæ tamen optime nos jam penetrasse putabamus; neque hoc mirum; nam & ipsa præcedentium intelligentia semper aliquo modo a subsequentibus pendet. Accedit, quod optatus lectionis fructus hauriri nequeat, nisi quæ legerimus, etiam memoria complectamur, cum, Tullio teste, tantum sciamus, quantum memoria tenemus; jam vero quis ignorat repetitionem frequentem ad res ipsas memoriæ imprimendas mirifice, & fere solum conducere, cum perspicuum sit nos eorum facilius recordari, quæ cla-

rius, distinctius, & frequentius percepimus?

4.) *Continuationem moraliter non interruptam*; qui enim longiori tempore lectionem inchoatam intermittit, atque interea aliis seu libris, argumenti præsertim non satis noti, evolvendis, seu negotiis conficiendis operam dat, novis ideis animum imbuunt: unde necesse est, ut vel idearum confusio in mente oriatur, vel certe hausta jam principia e memoria excidant. Horum quidquid eveniat, nexus ille veritatum pervideri amplius haud potest, in quo tamen perspicendo præcipuus, qui e lectione libri scientifici capi debet, fructus consistit.

5.) *Applicationem*, quæ postulat, ut demonstrationes universales, quas in auctore legimus, ad casus singulares reducamus, eandem in sua principia resolvamus, ipsique tenemus in re consimili similem demonstrationem conficere: hac certe ratione & argumentorum vim, ac pondus, in quo rei cardo versatur, perspicimus, & habitum demonstrandi nobis denique comparabimus. Quo & illud pertinet, ut, quæ meditati sumus, etiam voce proferre conemur, loquendo vel nobis ipsis, vel amico, quocum sæpe conferre utilissimum, vel saltem ea breviter in charitatem conjiciendo; sic fiet, ut pedentim ideas, mentisque nostræ conceptus in ordinem redigamus, habilesque efficiamur ad ea, quæ didicerimus; cum aliis communicanda, ut, qui litterariorum laborum finis non ultimus esse debet, utilia reipublicæ membra evadamus.

C A P U T VI.

D E

IGNORANTIA, EJUSQUE CAUSSIS.

CTXXIX. Qui nulla veritatis indicia perspicit, sive generatim, qui nihil de re quam cognoscit, eandem *ignorare* dicitur (§. 206.): est proinde *ignorantia* cognitionis defectus, seu si mavis, status mentis cognitione destitutæ; sic ignoro, *utrum Deus aliam adhuc mundum conditurus sit.*

Quid L.
ignorantia?

SCHOL. Non est inutile expendere magnitudinem nostræ ignorantie, quæ multis modis cognitionem, qua pollemus, superat; inde enim fiet, ut otiosas disputationes fugiamus, mentemque nostram utilibus solum, ac iis, quæ illius captum non excedunt, contemplandis applicemus; verissimum namque est, quod ait Seneca, *necessaria ignoramus, quia superflua discimus.* Neque vero procul petenda sunt argumenta amplitudinem ignorantie nostræ demonstrantis: quicumque aliquid intelligit, intelligit simul adesse sibi domestica perquam multa ignorantie exempla: non enim res est adeo vulgaris, & proptè vix consideratione digna, quæ non multis ex partibus adeo obscura, tenebrisque involuta sit, ut ea etiam a perspicacissimo intellectu dispelli nequeant. Sed mali hujus originem perscrutemur.

Causæ Ignorantiæ.

1.) *Defectus idearum*; & primum quidem

de iis rebus, quæ suapte natura captum nostrum non excedunt; vis certe nostra percipiendi, ac intelligendi capacitas, si cum rerum, quæ sciri possent, numero compareretur, admodum parva est. Ut nihil dicam de illis corporibus quorum enormis est a nobis distantia, ob quam paucissima, aut prorsus etiam nihil de iis scire possumus, quam multa sunt in hoc, quem inhabitamus, globo, quæ ob exilitatem suam sensus omnes, omnemque proinde cognitionem effugiunt; Ignoramus intimam elementorum, ex quibus corpora coalescunt, naturam, eorum vires, harumque virium diversam plane conspirationem, unde omnes sensibiles corporum qualitates denique oriuntur. Deinde si ad eas res animum advertamus, quæ secundum se præsentem nostram capacitatem excedunt, quantus est numerus eorum, quæ a nobis nesciuntur? Ideas omnes, quas habere possumus; aut sensuum usu, aut mentis operatione nobis comparamus: quis autem non videt, viam hanc ideas obtinendi perquam angustam esse? Quis determinet, quas alias ideas possint habere aliæ creaturæ in aliis universi partibus existentes, quæ aliis sensibus, vel diversis a nobis, vel etiam numero pluribus, & ampliori intelligendi facultate præditæ forent? Qui gratis hæc dici autumant, similes mihi videntur homini ab incunabulis oculorum usu destituto, qui colorum existentiam negare veller. propterea quod eorum ideam in animo suo informare nequirit.

2.) *Impotentia detegendi connexionem idearum, quas habemus*; perspicacitas nempe humani ingenii admodum debilis, ac limitata est. Aliqui vix trium, aut quatuor idearum inter se relationem pervidere possunt; longius si ducantur, in meras tenebras incurunt: unius hos syllogismi homines cum Lockio compellare licet; alii longiorem aliquan-

tum idearum seriem mente complecti possunt, multa tamen non assequuntur, qui denique perspicacissimi habentur, sæpe hallucinantur. Quamdiu autem idearum, quas habemus, connexionem non perspicimus, minime idonei sumus cognitioni universali obtinendæ; unica tum via restat experientia; at hæc quam arcta, quam angustâ? Oritur hoc malum ex defectu idearum mediarum, quæ nobis sensim, & quasi per gradus eam connexionem manifestare deberent. Sic nullamprehendimus connexionem inter talem in organo sensorio affectionem, & talem in mente sensationem, atque inde est, quod de sensationibus qualitatem sensibilibus amplius quid non cognoscamus, quam quod de iisdem per experientiam nobis innotescit.

3.) *Socordia in sequendis ideis, quas habemus.* Inde fit, ut in ignorantia versemur etiam tum, cum ideas distinctas, earumque connexionem cognitam habemus, aut saltem habere facile possumus; sic multi ignorant veritates mathematicas, non ob tardiores ingenii vires, aut incertam rerum naturam, & conditionem, verum ob solum applicationis defectum, cum nolint ullam operam impendere ideis illis acquirendis, examinandis, atque debito inter se modo comparandis. Contingit id primum ex malo vocabulorum usu, fieri enim nequit, ut, qui cognitiones suas sonis duntaxat, qui de se dubiæ, & incertæ significationis sunt, affigit, unquam concordiam, aut repugnantiam idearum studiose querat, aut certo detegat. Deinde vero etiam & frequentissime quidem ex ignavia, pro qua multi humanæ mentis imbecillitatem obtinent; etsi enim multa a nobis sciri nequeant, multa tamen etiam sunt, quæ assequi possemus, si modo ignaviam nostram ex naturali corporis inertia oriundam super-

rare vellemus. Hæc porro ignavia in causa est, ut laborem fugiamus, moræque impatientes longius idearum examen horreamus, atque ad ea tantum animum applicemus, quæ sine ingenti dedecore, aut maximo detrimento a nobis penitus ignorari non possunt.

4.) *Memoria*, quæ duplici modo ignorantia occasionem præbet; 1. *infidelitate*: maximum & commune veræ scientiæ obstaculum est defectus memoriæ: ubi enim elapsa est mente idea præcedens, jam subsequencia, quæ cum ea connexionem habent, non rite intelliguntur: memoria vivida & tenaci opus est, ut, dum secundam ideam contemplari volumus, prima simul menti quam vivacissime repræsentetur, & secunda, cum ad tertiam progredimur, & ita porro; retineri præterea debent scientiarum principia, quæ jam didicimus, quod sine iis animo actu præsentibus ulterius progredi non licet. Sed tamen desperandum non est iis, qui imbecilliorum a natura memoriæ nacti sunt; potest siquidem ea, ut reliquæ omnes tantum corporis, quam mentis facultates, continuo usu augeantur, ac roborari: ut quis de rure homo in dies aptior evadit ad gravius onus ferendum, longioremque viam conficiendam; ita quoque litteratus majorem quotidie habilitatem adipiscitur, plures simul ideas, & cognitiones memoriæ suæ retinendi. Inter complura, quæ memoriæ excolenda adjumenta præscribi solent, non ultimo loco reponendum est illud, ut ideas, de quibus nobis judicandum est, in chartam conjiciamus; scriptio enim hæc eas rursus oculorum ope menti repræsentat, figit, efficitque, ut ob mutuam connexionem aliæ quoque excitentur. 2. *Nimia præstantia*, cui dum nimirum confidunt nonnulli, interea excolere intellectum, seriæ meditationi inhærere, resque ipsas perscrutari negligunt, quæ

qua ratione fit, ut multarum rerum ignorantie teneantur, quantumvis verba memoria infixa ipsis non desint. Vitium hoc pervulgatum esse in ætatis nostræ adolescentibus, longa experientia, & non absque dolore didici; sunt certe, qui longissimas demonstrationes seu metaphysicas, seu mathematicas e memoria recitare norunt, nihil tamen eorum, quæ proloquuntur, intelligunt. Ejusmodi qui sunt, non tantum nulla obtinendæ scientiæ adjuvmenta sibi comparant, sed potius maxima ponunt impedimenta, ac speciosa ignorantie fomenta sibi congerunt, atque tandem annis aliquot elapsis, ubi ea, quæ ita memoria impresserunt, exciderint, rursus tales evadunt, quales nondum incepto studiorum curriculo fuerunt.

5.) *Confusio studiorum*, quæ ratio est omnino multiplex. Aliqui omne litteraturæ genus simul avidissime arripiunt; cuncta uno, eodemque tempore condiscere volunt; poetas, oratores, philosophos, nummarios, botanicos, chemicos &c. ac imprimis eos, qui de omnibus tractant, legunt, vel indices solum, & librorum præfationes inspiciunt, unde fit, ut supremis aliqua duntaxat labiis degustantes nihil non solide ignorent; mirum tamen, quantum sese ejusmodi efferant, sibi que de docta sua ignorantia plaudant, ac alios vere eruditos, doctosque viros arrogantem supercilio despiciant; & prohi quam ferax est id genus *sciorum* hæc, quam vivimus, ætas! Alias nulla methodo, nullo certo ordine litterarum studia pertractantur; sunt ingenia quædam fervida, quæ faciliora cursim transiunt, atque ad difficiliora, quæ solum labore suo digna reputant, properant; at paulo post velut ad scopulum adherentes progredi nequeunt, quare? Quod definitio obiter lecta jam mente elapsa est; quod axioma cetero-

Hist. de
l'accl.
roy. de
sci. ann.
1717.
eloq.
Nevol.

quin notissimum nunc non occurrit ; verbo denique , quod prima principia , quæ nimis facilia videbantur , profunda meditatione in mentem admissa non fuerunt . Ipse Newtonus vir certe insignis se hac in parte deliquisse fatetur , atque ab se operam mathesi daruro Euclidem ut nimis facilem , ac obvium spre- tum fuisse deplorat . Alii contra , qui medicis sunt ingenii , modica quavis difficultate terrentur , nullamque in ea enodanda operam locant , sed potius ad alia , ea prætermissa , transvolant , ingenti suo damno ; cum enim neque subsequencia penetrent , auctis in dies difficultatibus tandem prorsus animum despon- dent . Nonnulli neglectis necessariis , quæ muneris sui ratione scire tenerentur , inutilibus tantum se tradunt ; iis unice delectantur , quæ magis curiositatem alunt , quam intelle- ctum perficiunt , aut verum quodpiam com- modum adferunt . Denique alieno sæpe tem- pore arripiuntur studia ; non omnia omni ætati æque congruunt ; quæ plus memoria ni- tantur , pueris ; quæ solidius requirunt judi- cium , adolescentibus magis accomodata sunt ; quare graviter errant parentes , qui filios suos tum primum , cum jam philosophiæ , aut ju- risprudentiæ condiscendæ maturi sunt , lin- guarum , geographiæ , historiæ , aut arithme- ticæ studio occupant . His omnibus ignoran- tiam nostram foveri in aperto est .

6.) *Defectus subsidiorum externorum* : ex in- opia fortunarum ad vitam honeste agendam oritur defectus librorum , reliquæque litera- riæ suppellectilis , nec non domesticorum in- stitutorum , sine quibus juvenis magnum in litteris progressum ægre faciet . Numquam illi parentes satis pro merito reprehendi pos- sunt , qui omnem , quem pro prolium erudi- tione expenderint nummum , in perditis ha- bent , quorumque curæ ea solum tendunt , ut

ampulum filijs patrimonium relinquant, quod ipsi in stupiditate, ac ignorantia educati paulo post dilapidaturi sunt.

7.) *Libertas philosophandi constricta*; dum enim non, quod ratio suadet, sed quod aliis placuit, sentire jubemur, non veritas studiose inquiritur, sed aliorum sensa anxie explorantur; non indagantur firmiores rationes, non instituuntur experimenta; sed in eorum locum auctoritas substituitur, argumentaque precaria undique conquiruntur, quibus periclitanti sententiæ, in quam juratum est, quoquo modo succurratur; verba denique nihil novi moliminis suscipitur, sed auctorum dicta pro delphicis oraculis accipiuntur, novitasque ipsa peccatum est. Si priorum temporum, quibus Aristoteles in scholis dominatum tenuit, memoriam recollere velimus, verissima hæc esse haud difficile comperiemus; sed non libet obductum jam ulcus refricare. Ceterum libertatem philosophandi dum petimus eam nequaquam intelligi volumus, quam nonnulli hujus ævi philosophi ad divinarum scripturarum contemptionem, atque ad ipsa castissimæ religionis mysteria impugnanda impie abutuntur. Philosophus noster ita secum statuatur: omnibus libertatem sentiendi permitti debere in iis, quæ solo rationis lumine investigari possunt, at tolerari eam nullo prioris modo posse, cum de illis agitur, quæ a divina solum revelatione proficiscuntur, omnemque in ejusmodi rebus novitatem in gravissimi sceleris loco habendum esse; cum enim Deus loquitur, necesse est, ut ratio naturalis conticescat; ejusque auctoritati humanus sese intellectus summa cum demissione subjiciat.

C A P U T VII.

D E

ERRORE, EJUSQUE FONTIBUS.

Quid er-
ror?

CCXXX. Qui propositioni falsæ assensum, aut veræ dissensum præbet, *errore* dicitur; in ejusmodi igitur assensu, vel dissensu *erro*, sive *judicium erroneum* consistit; sic erfat, qui judicat *animam esse corpus*.

Quid præjudi-
cium?

CCXXXI. *Præjudicium* est anticipata quædam, animoque alte infixa opinio, ex qua in casu quodam singulari ad erroneum judicium formandum inducimur; sic præjudicium est ea opinio, quæ vulgi animis insidet: *omnia sic esse constituta, prout sensibus apparent*, unde vulgus solum intuendo judicat: *illum esse trium, vel quatuor palmorum discum*.

COROLL. 1. Quoties præjudicio quoddam judicium formatur, adest occulta saltem ratiocinatio, cujus partem antecedentem ea ipsa præjudicata opinio agit; sic enim in proposito exemplo vulgus ratiocinatur: *res ita sunt constituta, ut sensibus apparent; sed sol apparet meis sensibus esse discus trium vel quatuor palmorum: ergo*.

COROLL. 2. Cum ex vero antecedente non sequatur falsum consequens (§: 125. cor. 3.), necesse est, ut opinio illa anticipata ipsa quoque erronea sit, estque reipsa judicium aliquod non tam actuale, quam habituale.

Quæ præjudi-
cium
genera?

SCHOL. 1. Opinionis ejusmodi anticipatæ, quibus homines passim abripi videmus, sunt omnino diversissimæ; videntur eæ tamē ad tres præcipue classes reduci posse, quas

quas ignorare philosophum non oportet;
sunt vero.

1.) *Præjudicia ætatis*; nulla hominum ætas
a singularibus quibusdam erroribus, ac sibi
velut propriis exempta est, sed omnium ma-
ximè prima hoc morbo laborat. Mens nostra
omnium rerum ignara corpus ingreditur, ne-
que in tenera illa ætate ulli ratiocinio, sed
sensationi solum, & phantasie locus est; un-
de quidquid infantes audiunt, in veris ha-
bent, ad miserie cumulum accedit, quod in-
fantium cura iis fere committatur, quorum,
omnium cum sint rudissimi, ora non nisi fa-
bellis absurdis de spectris, lemuribus, occul-
tis plantarum, & lapidum viribus, quin &
gravissimis circa mores, ac religionem erro-
ribus plena sunt, quod vehementer Tullius
deplorat; „ simul atque adisi in lucem, &
„ suscepti sumus, in omni continuo pravita-
„ te, & in summa opinionum perversitate
„ versatur, ut pæne cum lacte nutricis er-
„ rorem suxisse videamur. Cum vero paren-
„ tibus redditi, & magistris traditi sumus,
„ tum ita variis imbuimur erroribus, ut va-
„ nitati veritas, & opinioni confirmatæ na-
„ tura ipsa cedat. Accedunt etiam poetæ,
„ qui cum magnam doctrinæ, sapientiæque
„ speciem præ se tulerunt, audiuntur, le-
„ guntur, ediscuntur, & inhærescunt pe-
„ nitus in mentibus. Tum vero accedit eo-
„ dem quasi maximus quidam magister popu-
„ lus, atque omnis undique ad vitia consen-
„ tiens multitudo: tum plane inficimur opi-
„ nionum pravitate, a naturaque ipsa descii-
„ scimus. „ Quare, sed frustra, optaverat
olim Chrysippus, ut pueri a philosophis edu-
carentur. Jam vero quid inde in reliquam
vitam boni sperari possit? Quæ primum in-
fantium intellectui nondum re alia præven-

*Q. infr.
l. 3. c. 1.*

to, at simul opportunis præcavendi subsidii destituto immissa sunt, adeo profundas subinde radices agunt, præsertim si mala insuper educatio; & longa consuetudo accedat, ut fere in naturam abeant, & quasi impossibile evadat eadem radicibus tollere, nisi adulti deinde omnia ad incudem revocent, rîdigiousimoque examini subjiciant; at quotus quisque est, qui hunc arduum sane laborem, prout oportet, susciperet? Infinita prope sunt obstacula, quæ tum a parentum, ac institutorum auctoritate, tum ab ingenita ignavia opponuntur. Qui ejusmodi opinionibus in infantia imbuti sunt, cum adolescunt, eas prope modum ut res sacras intuentur, sollicitèque cavent, ne fortassis per novam quæstionem super iis institutam profanentur; cum enim quandoque super illas reflectunt, deprehendunt eas adeo antiquas esse, ut rem quamlibet aliam, cujus recordari possunt, nec advertunt, quando, quaves ratione mentem subjerunt, atque vel sola hæc antiquitas sâcri quidpiam ipsis spirare videtur; inde fit, ut iisdem tamquam principiis certissimis, ac indubitatis utantur, atque ad ea in quæstionibus controversis velut ad infallibilem veritatis regulam provocent, remere & cæco prorsus impetu admittentes, quidquid ipsis consentaneum: respuentes contra sine ulterio-ri indagine, quidquid adversum videtur.

2.) *Præjudicia opinionis receptæ, vel propriæ, vel familiæ, nationis, patriæ, vulgi, antiquitatis, novitatis.* Sunt videlicet, qui pro sententia, pro qua semel animum obfirmarunt, velut pro aris, & focis depugnant; hæc totam quasi ipsorum intelligentiæ spheram conficit; hic velut constricti hærent, nec facile egrediuntur; audiunt patienter alios, aut ut rem aliter habere, ac ut ipsi pridem apud se statuent, in animum inducant, nullis ra-

tio-

florum momentis promoveri possunt. Sunt, qui communibus amicorum, factionis, patriæ, & provinciæ suæ opinionibus abripiuntur; torrentem hi sequuntur: quære ex illis, cur hinc vel illi opinioni firmiter adeo adhareant? reponent: tot illustres viri ex mea familia, vel natione idem opinati sunt, cur ego ab eorum mente recedam? At num etiam illustres hi viri ex solo, ut decuisset, veritatis amore ejusmodi sententias & docuerunt, & propugnaverint, non indagant; putantamen nos frequenter contrarium experturos, si occulta illa motiva, quibus nonnumquam homines etiam docti, & sapientes, ii præsertim, qui sectarum, factionumque capita esse amant, impelluntur, detegere possemus. Vultus deinde quot non præjudicia fovet? Seu enim mores, seu vitæ rationes, seu alia quæcumque spectentur, quot ubique errores, antea fabulæ, sensuum, ac phantasie illusiones in evidentissimis veritatibus habentur? Esto vero etiam, subsit quandoque veri quidpiam rumoribus vulgi; plurima certe, ut illud deprehendatur, resecari debent, ea præcipue, quæ mirabilitatis magnæ speciem præseferunt; hisce enim rudes animi facillime percelluntur, cumque, neglecta intellectus cultura, vivaci potissimum imaginatione polleant, magnum iis in rebus fingendi campum nanciscuntur. Non est quidem, quod miremur, tam uberem errorum segetem in eorum mentibus excrescere, quos una hæc cura sollicitos tenet, ut sibi, suisque prolibus alimenta procurent; at ingens esse iam aliorum animos opinionum vulgi imperium, id enim vero mirum. Quam exiguus eorum numerus est, qui publica judicia contemnere audeant? quam multi cum turba errare malunt; quam cum paucis sapere? Ejus rei periculum numquam est majus, atque cum de iis agitur judiciis.

ad quæ vulgus nationum odio, patriæ amore, lucri cupiditate, aut mali gravioris metu impellitur. His erroribus nullo prorsus negotio sapientiores quoque inficiuntur; cum enim sese partem ejus esse populi considerant, communis etiam commodi inde orituri spe alliciuntur. Sunt denique, qui cum nimia veteres æstimatione prosequantur, non nisi antiqua probant, ab opposito, quibus nihil sapit, nisi quod novum est: illi recentiora quæque solo novitatis titulo rejiciunt; hi omnes sine discrimine veteres, eorumque opera, & labores contemnunt: gravissimo utriusque præjudicio laborant; etenim & multa egregia a veteribus præstita sunt, & sæpe tamen etiam hallucinata est antiquitas, atque idem prorsus nostris temporibus commune est, neque semper recentioris ævi auctores, ut opporueret, sapiunt: quare nec sola annorum diuturnitas veritati pondus addere, nec novitas eidem obesse censenda est, duoque hi scopuli philosopho in indagazione veritatis magnopere cavendi veniunt, inconsultus nimirum novitatis amor, & cæca antiquitatis servitus.

2.) *Præjudicia auctoritatis*, quæ ex nimia aliorum auctoritatis existimatione oriuntur, qua fit, ut propositionibus universalibus, quæ non credi, verum sciri debent (§. 221. cor.), ob solum eruditorum testimonium assensus præstetur. Nolim equidem auctor esse, ut viro doctrinæ famæ percelebri temere contradicatur; magis enim convenit, ut nostris potius facultatibus diffidentes nondum omnia ea in re rite nos perspexisse arbitremur: neque tamen propterea illico conquiescendum est, sed veritas sollicitè investiganda, dum re omnimode penetrata, vel cum illo consentiamus, vel ab ejus sententiâ modeste recedamus. Huic præjudicio omnis quidem, sed

cum-

cum primis rursus tenera ætas subjecta est, unde infinitus prope eorum cumulus in omnem reliquam vitam enascitur; infantes enim, ac pueri cum neque rei, neque ipsius auctoritatis examinandæ capaces sint, simulque submissionem illam, quam in actionibus suis & excipiendis religionis institutionibus aliorum directioni præstare coguntur, ab ea, quæ ad opiniones pertinet, non discernant, auctoritatem quamlibet seu parentum, seu nutricum, seu aliorum institutorum pro unica veritatis regula admittunt, quo fit, ut, quidquid cum ea non pugnat, temere arripiant. Adolescunt equidem, eamque subinde ætatem attingunt, qua propria ratione uti possunt; at quis jam numeret errores, quibus, interea eorum mens imbuta fuit? Quæ vero se ratione iis exonerabunt? difficilimum est referre inter falsa, quæ quis longissimo tempore vera esse judicaverit. Ea porro ætate nova, eaque permulta formantur judicia, sed, cum non nisi conclusiones sint ex anticipatis erroribus deductæ, æque falsa. Succedunt tandem anni, quibus disciplinæ severiores seu privatim, seu publice condiscendæ sunt, tum vero nova magistrorum auctoritatis juvenum animos obruit; hic velut ad saxum, hærent, nefasque putant ab opinione institutoris suis vel latum unguem discedere; vidimus id olim in Pythagoræis, quorum illud pervulgatum *ἀπορρητὴ* satis demonstrat, quam pertinaciter magistri sui auctoritati adhæserint; vidimus id subinde in Peripateticis, qui errores quam plurimos per plura sæcula disseminarunt sola Aristotelis auctoritate ducti, quem tamquam *humani ingenii finem* venerabantur; vidimus id recentius in Chartesianis, qui eruditæ duci sui fabulas in certissimæ veritatis locum adoptarunt; videre id denique & nunc quoque possumus; est enim &

ætas.

etas quoque nostra eorum fertilis, qui adeo servili sunt ingenio, ut, quod facilius est, credere malint, quam scire, quod operosius, quique parentes etiam errores auctoris cujusdam, cujus placita sequi decreverunt, amplectuntur; sapienter hanc in rem Tullius:

De nat.

D. I. I.

c. 5.

„ Qui requirunt, quid quaque in re ipsi sentiamus, curiosius id faciunt, quam necesse est: non enim tam auctores in disputando, quam rationis momenta quærenda sunt.
 „ Quin etiam obest plerumque iis, qui discere volunt, auctoritas eorum, qui se docere profitentur: desinunt enim suum iudicium adhibere; id habent ratum, quod ab eo, quem probant, iudicatum vident.
 „ Nec vero probare soleo id, quod de Pythagoricis accepimus, quos ferunt, si quid affirmarent in disputando, cum ex iis quæreretur, quare ita esset, respondere solitos, ipse dixit: ipse autem erat Pythagoras. Tantum præjudicata opinio poterat, ut etiam sine ratione valeret auctoritas.”

Sed neque cum hisce annis auctoritatis imperium terminatur, & viri quoque sæpe non ineruditi eidem subjiuntur; nihil enim est pronius, quam ut ea pro veris habeantur; quæ a doctoribus audiuntur, utque eorum doctrina cum solida veritate demonstratione confundatur. Atque hæc est ratio, cur rarissime deferantur opiniones jam receptæ; cur multa solo novitatis titulo rejiciantur; cur et præferantur sententiæ, quæ provinciæ, in qua degimus, aut familiæ, cui nomen dedimus, communiores sunt; cur in una regione verum videatur, quod in altera ut falsum rejicitur, quasi glebæ adscripta foret veritas.

SCHOL. 2. Verum non præjudiciis modo errores originem suam debent; sed alii quoque sunt, ac fere innumeri eorum fontes:

tes: horum præcipuos eam adducam, quod
tiro philosophus cautissime incedere con-
discat.

Fontes Errorum.

1.) *Defectus serię voluntatis momenta ratio-
num expendendi*, in iis præcipue, qui cetero-
quin & occasionem, & otium, & requisitam
mentis perspicaciam nacti sunt. Nempe alii
inordinato voluptatum studio trahuntur, quod,
cum animum emolliat, eumque objecto volu-
ptatis nimium affigat, attentionem distrahit,
mentisque acumen retundit; alii nimia ad
negotia sua applicatione; alii aversione qua-
dam a meditatione, librorumque lectione pro-
pe generali ita retinentur constricti, ut num-
quam seriam cogitationem in animum admit-
tant, alii metuunt, ne anxia, atque ab om-
ni partium studio remota veritatis inquisitio
sibi, suisque anticipatis opinionibus, ac rece-
ptæ jam vivendi rationi minus faveat; unde
opiniones, quas sibi commodum allaturas ar-
bitrantur, absque omni indagine accipiunt, si-
modo ab alijs quoque, quicumque ii fuerint,
eas foveri videant. Nonnumquam assectata
propriæ imbecillitatis opinio efficit, ut ho-
mines animum despondeant, nihilque per se
ipsos tentare audeant, sed ea cæce ample-
ctantur, quæ a majoribus tradita acceperunt:
id si omnium adhuc philosophantium animis
insedisset, etiamnum in antiquis ignorantie
tenebris palparemus; nonnulli denique adeo
superstitiose vitæ suæ, ac valetudini conser-
vandæ student, ut omnem horam, quam me-
ditationi litterariæ, aut lectioni impendunt,
eidem detractam putent; at hi quidem nosse
deberent, non tam litterarum studia, quam
otium, voluptatesque corporeas, quibus plus
æqua indulgent, valetudini obesse: nec de-
sunt

sunt virorum doctissimorum exempla, quibus id confirmari potest; Democritus ad centesimum; Plato ad octogesimum primum; S. Hieronymus ad nonagesimum primum; Newtonus ad octogesimum primum inter continuos litterarum labores vitam protraxerunt.

2.) *Affectiones animi dominantes.* Nulla fecerunt argumenta, quæ affectionibus, ac desideriis nostris contraria sunt, aliquod apud nos pondus obtinent; quod volumus, facile credimus: effatum est certissimum. Sæpius quorundam in admittendis veritatibus moralibus obstinationem mecum expendens mirari soleo, qui fiat, ut ii ipsi, qui cuivis legitimæ demonstrationi geometricæ absque mora assentiuntur, recusent tamen aliis veritatibus non minus evidenter demonstratis, quales sunt: *existentia unius Numinis, ejusque providentia ad minima quævis sese porrigens, cultus eidem naturaliter debitus, animæ humanæ libertas indifferentiæ, ac naturalis immortalitas &c. &c.* firmum assensum præbere: hujus profecto discriminis ratio non alio ex fonte peti debet, quam ab inordinatis animi affectionibus, quibus illæ nullo pacto, hæc vero quam maxime adversantur. Veritas nimirum tantum theoretica nullum invenit adversarium, nisi ignorantiam, quam a se dispelli nemo non lubens patitur: at veritas practica in tot incurrit hostes, quot sunt malæ animi affectiones, quotque perversam vivendi rationem amant, qui propterea omnia malunt, quam in id genus enunciationibus veritatem intueri (conf. 170. schol. n. 4.). Tales qui sunt, rationibus etiam evidentissimis non cedunt, semper, quod obmoveant, habent; jam latentem in vocabulis æquivocationem timent; jam in polysyllogismo longiori unam aliquam conclusionem male deductam suspicantur; jam quid in partem oppositam dici possit, se ignorare simu-

simulant; quodsi iis arma hæc omnia extorseris, occident denique; fossitan æqua est utrinque probabilitas, forsitan...; verbo convinci nolunt, tritoque illo utuntur: *non persuadebis, etiamsi persuaseris*. Neque vero hoc mirum est; qui enim affectu quopiam agitur, nihil videt, nisi quod cum eo connexum est; nullas percipit ideas, nisi quæ cum illo viciniorem relationem habent; ad alias nec attendit, neque res ei representantur, ut in se sunt, sed ut ab affectione depinguntur; quare cum ita a natura constituti simus, ut vivacior in nobis impressio omnem ad se attentionem avocet, fieri non potest, ut perdurante affectionis impetu animus veritatis indagacioni serio applicetur; sed evenire necesse est, ut quæ primo affectus, non quæ ratio suaserit, in veris habeantur.

Quod de horum veritate amplius convincamur, ad particularia paulisper descendamus: qui nimio in alterum amore fertur, nihil in eo videt, nisi quod laude dignum sit, ipsaque ei vitia virtutis speciem induere videntur; odium contraria omnia imperat, verbo: in amicis omnia; in inimicis nihil probamus. Quoties accidit, ut, cum auctor etiamnum latet, doctrinam ab eo propositam accerime impugnemus quin ignominiosis etiam eadem nominibus onerentus? At ubi deinde constiterit fuisse amicum, improvide dicta ingeniose retractamus; nonnulla leviter carpentes, reliqua justam habere excusationem censemus: inde oritur pervulgatum illud partium studium, quod non modo historicos, sed ipsos etiam philosophos frequentissime corrumpit; inde aliqui ejus solum auctoris pronunciata dilaudant, qui ejusdem cum ipsis nationis est, & patriæ, ut in Anglia, Gallia, Germania contigisse novimus, cum plures Novvtrono, Cartesio, Leibnitio ante adhæserunt, quam quid a viris his præ-

præstantissimis doceatur, rite intellexerunt; inde servilis illa apud nonnullos antiquitatis veneratio; inde immoderatum novitatis studium, inde eas sæpe sine examine rejicimus sententias, quæ ab invisio nobis doctore profiscuntur, quasi veri nihil dici possit ab iis, quos odio habemus; cuius vitii reos olim se fecerunt Cartesianorum nonnulli, qui sine ulteriori inquisitione eo solum titulo multa rejecerunt, quod ab Aristotelicis tradita fuerunt: auream hac in re præstituit regulam P. Buffier: *ut, cum de amico ratiocinandum est, videamus, quid ex propositis argumentis concluderem, si de inimico ageretur, & vicissim.* Spes, desiderium, timor efficiunt, ut facile ea fieri, aut facta esse credamus, quæ cupimus, aut timemus; belli tempore id cumprimis videri potest; cuilibet tum rumori fides habetur, nec raro contingit, ut hodie cæsum doleamus exercitum, quem insignem de hostibus victoriam retulisse heri sine dubitatione credidimus; atque inde omnes fere veterum gentilium superstitiones, illæque de cometis, eclipsibus, aliisque portentis cælestibus fabulæ ortum traxerunt. Superbia, sive nimis suis, rerumque suarum amor, ubi animum occupavit, in caussa est, ut nihil sapiat, nisi quod suum est; hinc ejusmodi homines alios præ se despiciunt, & cum turpe putent ab aliis doceri, malunt absurdissimos errores, si modo singulares sint, amplecti, specialis inde perspicacitatis, ac magnanimæ in querenda veritate libertatis gloriam aucupantes. Indubitatum mihi prorsus videtur, opiniones aperte adeo absurdas, quas in antiqua Græcorum philosophia complures viguisse novimus, ex hoc præcipue fonte profluere, ac hodie etiamnum profluere apud eos, qui magis gloriæ, quam veritatis amore ducuntur; quam multi enim nostra hac ætate ita litterarum

studiis animum applicant, ut non tam veritatem quærant, quam gloriolæ auram captent? Inde illas tantum disciplinas condiscunt, quæ ea in regione, illoque tempore præ aliis celebrantur, atque in his ipsis ea solum seligunt, quibus sese indoctis facilius fucum facturos sperant; inde in scientiam quampiam universalem inquirunt, ex omnibus aliquid addiscunt; at non plus, quam sufficere putent, ut minus expertis a se omnia sci-ri persuadeant; cumque omnem ignorantiam umbram magna cura fugiant, contemptum loquuntur de iis, quæ ipsi non assequuntur, aut facillioribus neglectis in sublimibus duntaxat velut aquilæ nidos exstruunt. Longum foret per reliquam affectionum turmam discurrere; generatim verissime pronunciavit Tullius, „plura multo homines judicant odio, „aut amore, aut cupiditate, aut iracundia, „aut dolore, aut lætitia, aut spe, aut ti- „more, aut alia permotione mentis, quam „veritate.“ Philosophus igitur sollicitè caveat, ne umquam fervente affectionis æstu judicium ferat, expectet, donec sedato tumultu sua menti redeat serenitas; eamque, quæ de bono affectionum usu uberius tractat, philosophiæ partem tam lectione, quam exercitatione sibi optime perspectam reddat.

3.) *Naturalis corporis inertia.* Est corpus nostrum natura sua iners, laboris impatiens, levique molestia frangitur, quo fit, ut minuatur attentio, eorumque tædium generetur, quæ longiorem industriam requirunt, ac mens ipsa meditationi intenta a corpore retardetur: hinc multa transilimus contenti, si modo in scientiis sublimioribus non rudes place ac hospites habeamur, nec ulla nos doctrinæ soliditate, & perfectione cura tenet; terremur magnis auctorum voluminibus; compendia amamus, eosque præcipue libellos

exquirimus, qui magnificis titulis integras, difficilimasque scientias paucis sese paginis complexuros promittunt. Accedit diversa ipsius corporis constitutio, a qua ingenium, intellectus acumen, memoria, ac imaginationis vis, experientia teste, pendent; inde tarditas, confusio, inconstantia, aliarque consimiles animi miseriarum, quibus passim homines obnoxios videmus. Morbos denique sapientiarum studio plurimum obesse non ignotum esse potest; & sensus quoque incautis frequentes errorum occasiones præbere diximus (§§. 175. 176.). Sed quid jam tot inter obstacula ab ipsa natura posita philosopho agendum? rectam primum sibi corporis habitudinem tum moderato cibi, potusque usu, tum interposita nonnumquam animi remissione, tum medicamentis etiam, si necesse sit, procuret; deinde vero paullatim continuata attentione, ac meditatione studendi habitum contrahere conetur; sensim enim difficilis illa cum corporis pondere colluctatio mitior efficitur. Nihil est, verba sunt Senecæ, „ tam difficile, & arduum, „ quod non humana mens vincat, & in familiaritatem perducatur assidua meditatio. “

4.) *Nimia ingenii, ac perspicacitatis fiducia.* Qui hoc vitio laborant, a solida rationum investigatione abstinere, quavis primo occurrente contenti; statim sibi satisfaciunt, dumque tamen sciendi aviditate tenentur, magis de rerum copia, quam doctrinæ soliditate solliciti sunt. Oritur inde *præcipitantia*, amplissimus errorum fons, ac fere majori hominum parti communis; ex quo innumera iudicia erronea sive in disciplinis, sive in vita civili originem ducunt; hinc enim fit, ut tam frequenter ex uno vel altero facto singulari illico universim concludamus: contingat, ut quis semel, aut iterum in re quapiam labatur, aut optatum in negotio exitum non consequatur.

De Ira
l. 2. c. 12.

quatur, continuo talis qui est, ad omne vel instituti, vel artis, vel negotii genus tractandum ineptissimus declaratur; hinc fit, ut ab opposito sæpe lapsus occullemus, nec nisi ad id attendamus, quod successu non caruit: sic qui astrologis fidem habent, ad ea solum, licet paucissima, attendunt, quæ casu quodam fortuito prænunciationi responderunt; alia, & quamplurima, in quibus prædictionum vanitas evidenter apparuit, studiose supprimunt.

§.) *Confusio idearum*, quæ contingit 1. si *relative pro absolutis habeantur*; cum enim idea relativa nihil extra mentem repræsentet, sed duarum solum aliarum comparatione efficiatur, toties erramus, quoties per talem ideam aliquid reipsa existens exhiberi putamus; sic, cum de rerum magnitudine loquentes, dicimus: *Cajuni esse magno ingenio*, id nihil significat, nisi collatio fiat cum aliorum ingeniis: ex hoc fonte fluit eorum impietas, qui majora in hoc universo corpora contemplantur facile quidem adducuntur, ut ea speciali Conditoris providentia administrari credant; at vero ut in insectis quoque opinione hominum vilissimis, in minutissimorum pulverum, ipsarumque atomorum, motu eandem sapientissimam mentem gubernatricem adorent, nulla ratione permoveri possunt, quasi aliquid comparate ad summum Creatorem magnum, aut parvum foret. 2. *Si abstractæ pro concretis*; nam & earum quoque objecta extra mentis complexum non existunt (§. 73. schol. l. 2.); quo pertinet questio de universali a parte rei tanta olim laterum contentione agitata. 3. *Si clare pro distinctis*, aut *hæc pro adequatis*; quando enim eo pervenimus, ut rem ab omni alia discernamus, neque amplius quidquam in ea cognitione attingere possimus, facile nobis persua-

demus, nihil reapse aliud, quod cognosci posset, in ea latere; sic *aurum* distinguimus ab omni alio metallo, multasque ejus proprietates perspicimus; sed quis pro certo asserat nullas præterea in eodem inesse, aut etiam inter aurum unum & alterum nullam prorsus dari differentiam? ideas hac ratione confundunt, qui putant reales substantiarum existentium essentias nobis notas esse. 4. *Si consociatæ pro complexis*; contingit nimirum, ut in psychologia docetur, ut ideæ, quas uno simul tempore obtinuimus, præsertim si vehementer ob vivacem impressionem mentem affecerint, etsi in se diversæ sint, ita copulentur, ut quoties subinde una redit, altera quoque menti recurat, nec facili amplius negotio separari queant; jam vero hic lapis est, in quem incauti frequenter offendunt; dum enim non sufficientem adferunt attentionem, ideas id genus recurrentes non discernunt, easque ut unam complexam, ac ad eandem rem pertinentem intuentur, ex quo innumeros errores, falsaque judicia profluere necesse est. Sic quando infantibus tempore nocturno a nutricibus absurdæ illæ de spectris, & lemuribus fabellæ narrantur, in tenero eorum cerebro *idea tenebrarum* cum *ideis spectrorum* ita consociatur, ut deinceps ea recurrente & hæ recurrant, quas cum minime distinguant, in unam confundunt, atque hinc tota sæpe vita vano spectrorum metu in tenebris anguntur, ita ut jam vesperscente cælo soli esse non sustineant. Habet tamen hæc idearum consociatio magnum aliquando usum; inde enim, ut alia taceam superiorum in subditos imperium maximam accipit firmitatem, quod imperii hujus idea cum ideis reverentiæ, ac timoris arcte conjuncta est; ejus rei documentum exstat in bello, quod Scythæ olim contra rebellantes

ser.

servos suscipere coacti sunt; nam perduelles, hi, ut post Herodotum Justinus refert; cum a dominis suis armorum ope nulla ratione superari possent, levi prorsus negotio virgis ac flagellis, usitata scilicet Mancipiorum castigatione, sub jugum missi sunt.

6. *Malus vocabulorum usus.* Ita consuetudo obtinuit, ut in teneriori ætate vocabula memorie imprimamus nondum justis de rebus ipsis, earumque significatione ideis mente efformatis, quid jam vero inde consequitur? Id, ut loquentes vocibus, quibus utimur, non subjiciamus nisi ideas confusas, obscuras, aut omnino nullas, utque, quoties per reliquam vitam eadem vocabula ab aliis pronunciari audimus, easdem quoque imperfectas ideas in animo excitemus, quæ infinitis prope erroribus occasionem faciunt. Ad hunc errorum fontem obruendum necesse est, ut qui philosophari incipiunt, vocabula, ideasque illis adhuc substitutas de novo in examen vocent, vitiaque jam inveterata per seriam idearum quasi correctionem emendent; præcipue vero ad id enitantur, ut singulis, quibus utuntur vocabulis, quantum fieri potest, claram, & distinctam ideam subjiciant; nimis enim frequens est, ut putemus nos vocabuli cujusdam potestatem aut nunc perfecte assequi, aut saltem alias assecutos esse; quod nullo tamen modo intelligimus, sed ex longa solum consuetudine enunciamus. Sed de his abunde dictum est (cap. 5. part. 1.); erat tamen res hæc tanti momenti, ut non immerito hic iterum in memoriam revocanda fuerit.

CCXXXII. *Sapiens dubitatio est retentio* Quid sapiens dubitatio?
judicii; cum veritas menti non satis relucet, donec ea accuratiori examine melius investigetur.

CCXXXIII. *Sapiens dubitatio est remedium* An ea errorum remedium?
universale contra omnia præjudicia, erroneaque

que alios unde demum cumque oriundos. Quē enim veritate, non satis relucente iudicium suspendit, non sequitur in iudicando opiniones anticipatas, nec iudicium fert, antequam convenientiam, vel repugnantiam prædicati cum subjecto clare pervideat; sed talis rite iudicat, atque ab omni errore remotus est (conf. §. 93. schol.): igitur sapienti dubitatione omnia præiudicia, atque errores certissime declinantur.

SCHOL. Sapientem dubitationem præscribimus; nam scepticum illud, ac universale de omnibus veritatibus etiam evidentissimis dubium omnino stultum est, quod olim magnæ Academicorum parti, tum etiam Pyrrhoni; ejusque assectis placuit, qui de omnibus sine fine, & spe discendi dubitare voluerunt, & nunc etiam placet iis, quibus suave religionis jugum ferri non posse videtur. Quare sapientissime monuit Cartesius, philosophiæ studium a dubitatione inchoandum esse, cum alia via non appareat, quæ tot præiudicatæ opiniones animo extirpentur; quod ego ita accipiendum esse existimo, ut primo dubium istud neque ad certa, & per se evidentia, in quibus insanum: neque ad solum religionis mysteria, in quibus temerarium foret dubitare, extendatur; deinde etiam in rebus agendis, ubi operandi necessitas adest, ab eo prudenter caveamus; in negotiis enim quotidianis, quæ expediri debent, nec differri possunt, sola frequenter verisimilitudine contenti esse cogimur, neque semper rationes omnes ad amussim exigere possunt, modo ne quid temere, aut præcipitanter statuatur (conf. §. 216. schol. n. 2.). Igitur philosophiæ tiro medicamento hoc ita utatur, ut primo omnium loco mentem suam exuat omnibus, quas antea vi-

ræ consuetudine temere arripuit, opinionibus nullamque earum amplius in veris habeat: nisi maturo prius examine probatam, attentoque ad rationum momenta animo expensam. Sed hæc quasi per gradus præstanda erunt, neque enim mens nostra omnes simul acquirit vires: satis erit, si in omnibus, ubi rem quampiam seria meditatione evolvit, sollicitè dispiciat, utrum principia, ex quibus præsentès conclusiones profluunt, aliquando accurate expenderit; inde fiet, ut non admittat consecutiones, nisi quæ principiis certis, ac evidentibus nituntur. Deinde cum audit contradici ab aliis, impugnarique opiniones, quas adhuc in certissimis habuit, rursum indaget, num umquam argumenta suæ opinionis in examen vocaverit; id si factum non esse deprehendatur, tum fiat, simulque oppositæ sententiæ rationes ponderentur. Cumprimis vero examen istud instituendum circa opiniones nationis, aut familiæ, quæ nobis quasi domesticæ sunt, quod magna quandoque obstacula perfringenda habet; cum enim sæpe noxium sit a communi opinione recedere, facillime in ejusmodi investigatione labimur, rationesque oppositas levi attentione percurrimus metuentes, ne sententiæ, quam commodi cujuspiam amore veram esse cupimus, falsitas patefiat; actum agit, qui in veritatis inquisitione timore, aut desiderio agitur.

C A P U T VIII.

D E

CONCERTATIONE LITTERARIA.

Quid
convin-
cere, re-
futare,
& impu-
gnare?

CCXXXIV. Qui efficit, ut alteri veritas fiat certa, *convincit*; alter vero *convincitur*: qui alterius sententiam demonstrat esse falsam, *refutat*, sive *refellit*; qui vero insufficienter solum propositionis falsitatem probat, *impugnat*; sive *atheos*, vel *deistas refellimur*; *systema terra nata a quibusdam impugnatur*.

COROLL. In refutatione convictio; non item in impugnatione locum habet.

Quid
concerta-
tio litten-
aria?

CCXXXV. *Concertatio litteraria* fit, cum alter alterius sententiam vel refutat, vel impugnat. Propositio in quæstionem vocata latinis *positio*, græcis *thesis* nuncupatur.

COROLL. Concertantium igitur unus negat, quod alter affirmat; ac inde sibi contradicunt; atque hinc tritum illud oritur: *concertantes versantur in terminis contradictoriis*.

SCHOL. Plura sunt, quæ generationem in omni concertatione litteraria observari utiliter possunt, ac vero etiam debent: ergo aliqua præstituto attingam.

Leges generales Concertationis litterariæ.

1.) *Concertatio amore duntaxat veritatis vel inveniendæ, vel amplius cognoscendæ instituenda est; abesse proinde procul debet omnis inordinata animi affectio, partium studium, & quæcumque veritatis inventionem impediunt magis, quam promovent, præclare Tullius? „ cupio refelli: quid enim laboro, „ nisi ut veritas in omni quæstione explicetur: “ De iis igitur rebus, quarum aliunde jam certa habetur veritas, aut quæ humani ingenii captum superant, non disceptatur.*

2.) *Status controversiæ primo omnium loco verbis quam usitatissimis, & maxime aptis exponatur, ac prorsus nitide explicetur: quod nisi fiat, pronum est, ut in partes prorsus contrarias abeant concertantes, nec sese mutuo intelligant; totaque tandem disceptatio in logomachiam sive inutilem de vocabulo litem degeneret. (conf. §. 202. schol. l. 1.). Sed & definito jam concertationis capite magnopere cavendum, ne in disputationis fervore ab eo recedatur, quique in hoc deliquerit, absque mora in viam revocandus est.*

3.) *Concertantibus sint quedam principia, in quibus uterque conveniat, communia: cum enim conclusioni majus sobor competere nequeat, quam principio, ex quo ea profluit, nisi istud est adversario certum, numquam is de conclusionis veritate convinci poterit. Universim nempe demonstratio aliud non est, quam series quædam, & colligatio propositionum eo fine facta, ut adversarius admittat consecutionem alicujus principii, aut verita-*

tis a se jam admissæ, ex hoc autem evidenter patet, necesse esse, ut detur principium quoddam ab ipso admissum, atque adeo utrique concertantium commune. Sic Judæum convincere nequeo *ex libris novi testamenti tamquam divinis*, cum is eorum divinitatem neget; si quæstio agitetur physica, requiritur, ut uterque in hoc consentiat; *legitimum sensuum testimonium respui non posse*. Atque inde, quantum fieri potest, principia clariora, & notiora obscurioribus præferri debent; utimur tamen quandoque etiam falsis, quæ adversarius in veris habet, si modo caussa ex parte nostra vera sit, ac justa; secus enim talium argumentorum usus a fraudulentæ caliditatis nota absolvi nequit: sic licet *Mahometanum ex Alcorano de veritate religionis christianæ convincere* (conf. §. 197. schol.). Patet vero ex his, eo difficiliorem fore concertationem, quo pauciora sunt principia ab adversario admissa; cum iis autem, qui nulum admittunt, disputari nec debere, nec posse: ejusmodi olim erant sceptici, hodie sciolæ nonnulli, ac profani homines reconditæ doctrinæ laudem inde aucupantes, quod evidentia quoque magno verborum nihil significantium apparatu in dubium, ut illi quidem sibi persuadent, vocare sciant; qualia sunt, quæ contra demonstratam Dei providentiæ, religionisque revelatæ existentiam, ac immortalitatem animæ humanæ ore impio efutunt.

4.) *Refutaturus alterius sententiam vel ipsam immediate, vel principia, ex quibus eam adversarius deducit, aggrediatur*; primum demonstratione vel directâ, vel indirectâ confici poterit, idque versando sive circa ipsam sententiam, sive circa consectarium clare tamen, ac legitime ex ea profluens: alterum
vel

vel ipsa principia refellendo, vel iis permis-
sis ostendendo, thesin ex iisdem non legitime
sequi, atque adeo formæ vitium admissum
fuisse.

5.) *Qui in concertatione negativam tuetur
partem, non tenetur aliam negationis suæ ad-
ferre rationem, quam quod adversarii argu-
menta nihil probent; id vero non obtinetur
generalibus, dubiisque responsis, ut aliquibus
in more est: forsitan potuit res aliter fieri,
fortasse sunt nonnulla, quæ ignoramus &c. &c.*
sed omnino necesse est, ut ea solide refellan-
tur; sic qui negat ullam dari in compenetra-
tione, & replicatione corporum contradic-
tionem, negationem suam exquisitis rationibus
constabilire non tenetur; tenetur tamen resol-
vere adversariorum argumenta, & planum fa-
cere, contradictiones omnes ab ipsis allata ap-
parentes solum, ac in se nullas esse.

6.) *Qui propositionem suam veram esse,
aut oppositam, quam negat, impossibilem de-
monstravit, prorsus ad nihil amplius tenetur,
nec prudenter cogi potest, ut respondeat ob-
jectiunculis, quæ a pertinacibus, & scepticis
accumulari solent; quæ enim possunt rationes
excogitari, quæ propositionem demonstratam
falsam esse, aut rem impossibilem reipsa dari
evincant? Sic geometræ solliciti sunt, num
quid theorematis ab ipsis demonstratis a rudi-
bus opponi possit; sic metaphysicus, ubi exis-
tentiam Dei demonstravit, non tenetur artheo-
rum sophismatibus respondere, nisi polluta
eorum ora amplius obtundere velit.*

CCXXXVI. Concertatio litteraria vel in-
ter eruditos, doctosque viros, & quidem po-
tissimum scripto inter absentes instituitur,
vel eos inter, qui disciplinis severioribus in
publicis collegiis operam navant: hæc inter
præsentis, & ore fit.

Quota-
plex con-
certatio?

COROLL. Inde scripta *poenitica*, sive *critica*, quæ vel de rebus solum scientificis vel etiam ad religionem pertinentibus; tractant, denominantur. Qualia continentur in *Récueil de divers. piécs. par Monsr. Leibnitz, Clarke, Newton, & alios. aut. cel.*

SCHOL. Viris equidem eruditis nullæ videntur leges præscribendæ; quia tamen nec eruditio semper a distortis animi motionibus sejuncta est, quædam hoc loco utiliter monenda veniunt. Atque in primis quidem magnopere caveri debent ea vitia; quæ (§. 227. schol. n. 4.) allata sunt; tum abstinendum est ab iis argumentandi modis, qui ex odio magis, aut invidia, quam sincero veritatis amore proficiscuntur: cujus modum sunt, ut Lockius observat.

*Essai
phil.
conc. l.
entend.
hum. l.
a. ch. 17.
(§. 19.
&c.*

Ita) *Argumentum ad verecundiam*: cum accervatim congeruntur opiniones aliorum, qui vel ob insignis doctrinæ, magnique ingenii famam, vel ob potentiam, aut muneris, quod sustinent, dignitatem, publicum nomen, existimationem, magnamque auctoritatem, ac quoddam quasi in aliorum animos imperium adepti sunt, ut adversarius immenso auctoritatis pondere in puncto quasi temporis oppressatur, nec ultra hiscere audeat. Sunt fere homines ita affecti, ut viro in dignitate constituto contradicere, ejusque, quam jam possidet, auctoritatem in dubium vocare nefas esse putent; quare, si quis non continuo omni cum demissione se submittat, sententiisque auctorum, qui ejusmodi publica veneratione digni vulgo censentur, absque maturo examine adstipulari recuset, jam is vanitatis, ignorantia, & pertinaciæ non tolerande reus habetur.

2.) *Argumentum ad ignorantiam*, quo utuntur it, qui ad aliorum assensum vi extorquendum postulant, ut adversarius, cum rationem ab ipsis allatam admittere nolit, meliorem, firmioremque assignet: quasi vero a me idcirco stet veritas, quod alter argumenta mea dissolvere, aut aptius quidpiam in medium adferre nequeat; quid si artifex a me operis sui commendationem, aut præstantis confessionem extundere vellet propterea, quod ego nec simile, nec concinnius aliud efficere possim? Non ambulat profecto alius ex eo solum capite rectum tranitem, quod ego meliorem non novi, nec minus iniquus in me foret is, qui eam ob causam eundem tenendi necessitatem mihi imponere vellet, cum fieri possit, ut & alter aberret, & ego letiorem demonstrare, aut melius quid invenire nequeam.

3.) *Argumentum ad hominem male applicatum*, equidem hoc argumentandi genus alias probavimus (§. 197. schol.), id tamen adverti velint; primum: nequaquam nobis contra licere, cum ipsis in mala versamur causas; hac enim ratione adversarium non nisi ab uno errore ad alium traduceremus: deinde etsi illud ad convincendum admodum opportunum sit, non tamen ad constituendum quidpiam per sese ullam habet efficaciam; neque enim ex eo meæ opinioni veritas accedit, quod ea ex adversarii principiis profluat, aut ipsa etiam illius confessione comprobetur, si quidem ego una cum ipso errare possum; neque eadem opera, quo ostendo adversarium errare, simul evinco me ab errore immunem esse.

4.) Denique viri eruditi honori suo haudquaquam consulunt, cum consecraria diversa non tam refutandi; quam calumniandi, odium.

diumque, ac invidiam conciliandi animo ex adversarii doctrina erunt, eaque ipsi tamquam totidem dogmata ex proposito propugnata attribuant (conf. §. 227. schol. n. 3.). Id genus homines *consequentarios* appellare solemus, eorumque agendi ratio naturalibus mutæ charitatis officiis repugnat.

Quid defendens
& oppu-
gnans?

CCXXXVII. Concertatio litteraria inter collegiorum auditores sive exercitationis solum, sive speciminis publice dandi causa instituta requirit *defendentem*, seu illum, qui thesis a se propositæ veritatem contra adversariorum objecta apte respondendo vindicat: tum *oppugnantem*, sive eum, qui, dum adversarii partes agit, eandem positionem argumentis aptis vel refellere, vel certe impugnare nititur.

Quid ab
his obser-
vandum?

SCHOL. Sunt nonnulla utrique; alia cuivis nominatim observanda, ut ejusmodi concertatio suo fructu non careat.

1.) *Utrique*. Ne alterutra pars a scopo aberret, aut inania quærat diverticula, adhibeantur perpetuo syllogismi, nisi quando fusiori dictorum explanatione opus est; ne vero inutiles, & ad rem non pertinentes accumulentur, tempus cuilibet argumento præfixum non nimis longum sit. Vitentur deinde jurgia, clamores inconditi, calumniæ; permittatur suum cuique loquendi spatium, nec unus in alterius dicta inurbane inolet; universim denique suo honori mutuo consulant, defendens accommodando responsiones ita, ut argumentum in ordine procedat: oppugnans modeste, neque nimium premendo; prorsus enim indecorum est, nec immerito auditoribus stomachum movet, cum defendens quæcumque præfractæ negando eo solum tendit,

ut

ut adversarium ex argumento, ut ajunt, ejiciat; & contra oppugnans magna doctrinæ suæ opinione inflatus ea, quæ discentium captum excedunt, importune urgendo defendentem obmutescere cogit.

2.) *Defendentis* munus est syllogismum quemvis propositum ad verbum e memoria reddere, atque ad singulas propositiones apte respondere, *negando* falsas: *concedendo* veras; *distinguendo* ambiguas, aut æquivocas; *disparrem*, ubi opus fuerit, rationem assignando; huc non pertinentia *transmittendo*; tandem etiam, si res postulet, argumentum ipsum in adversarium *retorquendo*. Præcisa tum hæc responsa fusiori quandoque oratione explananda veniunt, præsertim ubi distinctio adhibita, aut dispartitio assignata fuerit. Universim vero in omni ejusmodi explanatione sit clarus, brevis, ea solum proferat, quæ ad rem præsentem faciunt, inutilia, aut huc non spectantia omittat; ex his enim manifestum fiet, eum non memoriam solum, sed intellectum quoque excoluisse, neque vocabula tantum, distinctionumque formulas, sed rem ipsam funditus perdidicisse.

3.) *Oppugnantis* est prudentem thesīs impugnationis selectionem facere, nec facile admodum evidenter aggredi; tum paret sibi argumentum ordinatum, quod obtineretur, si primi syllogismi conclusio sit contradictoria positionis oppugnationis, in consequentibus vero constanter inferatur propositio ultimo ab adversario negata, & sic a minoribus pedetentim ad majores difficultates ordine, & quasi per gradus ascendatur. Sint præterea syllogismi breves, ut commodè a defendente resumī queant; talia opponat, quæ a defendente sciri, & possunt, & debent, quo illius honori consulat, atque ita, quæ objecerit, in-

inter se apte connectat, ut ex altero alterum quodam modo profluat: abstineat in argumenti decursu a nimio clamore, strepitu, ac ironi-
cis quibusdam urgendi formulis, quæ non ser-
viunt nisi ad bilem movendam, nec videatur
velle extorquere ab adversario, ut se victum
profiteatur; quin si victoriam ad se inclinare
advertat, modesto potius silentio finem dis-
putationi imponat, eo contentus, quod argu-
menti vim auditori præsentī, ac defendenti
ipsi detexerit, iudicium ipsis relinquat; deni-
que contra improvisa responsa accurata medi-
tatione sese antea præmuniat, nec facile quid
proferat, quod nesciat extemplo probare. Ce-
tera usus docebit.

Hæc porro per decursum huius capitis al-
lata si observentur, non erit, cur omnes ge-
neratim concertationes carpantur: habent eæ
profecto utilitatem maximam; nam præter
veritatis inventionem, quo quidem potissimum
illa eruditorum disceptatio contendit, inge-
nium acuunt; promptam cogitandi, eloquen-
dique facultatem conciliant; iudicium deni-
que in discernendo vero a falso roborant;
cum enim in ipso disputationis fervore in
omnem sese partem mens vertere cogatur,
ut commodam singulis objectis responsionem
depromat, fit frequentissime, ut ea rum oc-
currant, quæ secus in mentem aut numquam,
aut non nisi post diuturnam meditationem
venissent. Nimiam tamen disputandi libidi-
nem non probo; ea enim non leve est pro-
movendarum scientiarum impedimentum; ho-
mines non tam doctos, quam scepticos efficit,
generatque pervicax quoddam contradicendi
studium, quo invalescente nulla doctrina adeo
absurda, adeo impia est, ut non aliquibus
propugnatoribus gloriatur. Id facile patebit,
si ad ea mente redeamus, tempora, quibus di-

divisum cum Aristotele imperium veterum
sophistarum reliquæ tennerunt; sed his ce- nos-
malis eripuit Deus Optimus Maximus, cujus
honoribus hunc qualemcumque laborem dica-
tum volo.

O. A. M. D. G. B. V. S. L. C. H.



1871 011111 4 11

DE VET. GRÆC. L.

F I N I S.

NOI

NOI RIFORMATORI

DELLO STUDIO DI PADOVA.

Concediamo licenza a GIUSEPPE ROSSI q. BORTOLO Stampator di *Venezia*, di poter ristampare il Libro intitolato SIGISMUNDE STORCHENAU *Institutiones Logicae, & Metaphysicae*, osservando gli ordini soliti in materia di Stampe, e presentando le Copie alle Pubbliche Librerie di Venezia, e di Padova.

Data li 4. Maggio 1793.


(GIACOMO NANI Cav. Rif.

(PIETRO ZEN Rif.

(FRANCESCO PESARO Cav. Pr. Rif.

Registrato in Libro a Carte 442. al Num. 19.

Marcantonio Sanfermo Seg.




309

Wm. Marshall. April

1812

Joseph Mancelliani writes
1814.



PANDIMM

21 DIC. 1979

LEGATORIA - ROMA

